

Namo tassa bhagavato arahato sammāsambuddhassa

Majjhimanikāye

Uparipaṇṇāsa-ṭīkā

1. Devadahavaggo

1. Devadahasuttavaṇṇanā

1. Dibbanti kāmagaṇehi kiḷanti, laḷanti, tesu vā viharanti, vijayasamatthatāyogena paccatthike vijetum icchanti; issariyaṭṭhānādisakkāradānaggahaṇam taṃtaṃatthānusāsanañca karontā voharanti, puññānubhāvappattāya jutiyā jotenti vāti **devā vuccanti rājāno**. Tathā hi te catūhi saṅgahavatthūhi janaṃ rañjayantā sayam yathāvutthehi visesehi rājanti dibbanti sobhantīti ca, “**rājāno**”ti vuccanti. **Tatthāti** tasmim̐ nigamadese. **Sāti** pokkharāṇī. **Tanti** taṃ, “devadaha”nti laddhanāmaṃ pokkharāṇim̐ upādāya, tassa adūrabhavattāti keci. **Sabbaṃ** sukhādibhedaṃ vedayitaṃ. **Pubbeti** purimajātiyaṃ. **Katakamma** paccayāti katassa kamma paccayabhāvato jātaṃ kammaṃ paṭicca. Tena sabbāpi vedanā kammaphalabhūtā eva anubhavitabbāti dasseti. Tenāha “**iminā**”tiādi. **Aniyamētvā vuttanti**, “santi, bhikkhave, eke samaṇabrāhmaṇā evaṃvādino”ti evaṃ ime nāmāti avisesetvā vuttamatthaṃ. **Niyamētvāti**, “evaṃvādino, bhikkhave, nigaṇṭhā”ti evaṃ visesetvā dasseti.

Kalisāsananti parājayaṃ. Kalīti hi anatto vuccati, kalīti sasati vippharātīti **kalisāsanam**, parājayo. Kalīti vā kodhamānādikilesajāti, tāya pana ayuttavādītā **kalisāsanam**. Taṃ **āropetukāmo** vibhāvetukāmo. **Ye** kammaṃ kataṃ akataṃ vāti **na jānanti, te kathaṃ** taṃ edisanti **jānissanti**. Ye ca kammaṃ pabhedato na jānanti, te kathaṃ tassa vipākam̐ jānissanti; vipākapariyositabhāvaṃ jānissanti, ye ca pāpassa kammaṃ paṭipakkhameva na jānanti; te kathaṃ tassa pahānaṃ kusalakammaṃ ca sampādanavidhiṃ jānissantīti imamatthaṃ dassento, “**uttari pucchāyapi eseva nayo**”ti āha.

2. Kiñcāpi **cūladukkhakkhandhepi**, (ma. ni. 1.180) “**evaṃ sante**”ti iminā tesam̐ nigaṇṭhānaṃ ajānanabhāvo eva ujukaṃ pakāsito heṭṭhā desanāya tathā pavattattā. Tathā hi **aṭṭhakathāyaṃ** (ma. ni. aṭṭha. 1.180) vuttaṃ – “evaṃ santeti tumhākaṃ evaṃ ajānanabhāve satī”ti, tathāpi tattha uparidesanāya sambaddho evamattho vuccamāno yujjati, na aññathāti dassetuṃ idha, “**mahānigaṇṭhassa vacane sacce santeti attho**”ti vuttaṃ. **Ettakassa ṭhānassāti** yathāvuttassa pañcaparimāṇassa kāraṇassa.

3. Anekavāraṃ visarañjanaṃ idha gāḷhāpalepanaṃ, na sātākassa viya littatāti āha – “**bahalūpa... pe... littena viyā**”ti. **Vuttameva**, na puna vattabbaṃ, tattha vuttanayeneva veditabbanti adhippāyo.

Imesaṃ nigaṇṭhānaṃ tādisassa tesam̐ abhāvato, “**jānanakālo siyā**”ti parikkappavasena vadati. Tena evaṃ jānituṃ tehi sakkā siyā, tesañca dassanaṃ saccaṃ siyā. Yasmā tesam̐ dassanaṃ asaccaṃ, tasmā te na jāniṃsūti dasseti. **Catūsu kālesūti** vaṇamukhassa parikantanakālo, sallassa esanakālo, abbuhanakālo, vaṇamukhe agadaṅgāraodahanakāloti imesu catūsu kālesu. **Suddhanteti** suddhakoṭṭhāse, dukkhassa anavasesato nijjīraṇaṭṭhena niddukkhabhāveti attho. **Ekāya upamāyāti**, “sallena viddhassa hi viddhakāle vedanāya pākātakālo viyā”ti imāya ekāya upamāya. **Tayo atthāti** pubbe ahuvamhā vā no vā, pāpakammaṃ akarimhā vā no vā, evarūpaṃ vā pāpakammaṃ akarimhāti ime tayo atthā. **Catūhi upamāhīti** vaṇamukhparikantanādīhi catūhi upamāhi. **Eko atthoti**, “ettakaṃ dukkhaṃ nijjīraṇa”ntiādinā vutto eko attho. So hi dukkhanijjīraṇabhāvasāmaññā eko atthoti vutto.

4. **Ime pana** nigaṇṭhā. Āsaṅkāya **viddhosmīti saññaṃ uppādetvā. Paccāharitunti** paccāvattituṃ,

pariharitunti attho.

5. Atītavādaṃ saddahantānanti, “atthi kho, bho, nigaṇṭhā pubbe pāpakammaṃ kata”nti evaṃ atītaṃsaṃ ārabha pavattaṃ mahānigaṇṭhassa vādaṃ saddahantānaṃ. **Bhūtattāti** yathābhūtattā kiṃ aviparītameva atthaṃ ārammaṇaṃ katvā pavattāti pucchati. Sesapadesupi eseva nayo. Saha dhammenāti sahadhammo, so eva **sahadhammiko** yathā “venayiko”ti (a. ni. 8.11; pārā. 8). “Dhammo”ti ettha kāraṇaṃ adhippetanti āha – “**sahetukaṃ sakāraṇa**”nti. Paṭiharati paṭivatteti paṭihāro, vādo eva paṭihāro **vādapaṭihāro**; taṃ, uttaranti attho. Tenāha – “**paccāgamanakavāda**”nti, codanaṃ parivattetvā paṭipākatikakaraṇanti attho. **Tesanti** idaṃ āvuttivasena gahetabbaṃ, “tesaṃ saddhāchedakavādaṃ nāma tesāṃ dasseti”ti.

6. Avijjā aññāṇā sammohāti pariyāyavacanametāṃ. **Avijjāti** vā avijjāya karaṇabhūtāya. **Aññāṇenāti** ajānana. **Sammohenāti** sammuyhanena mahāmuḷhatāya. Sāmaṃyeva opakkamikā etarahi attano upakkamahetu dukkhavedanaṃ vediyamānaṃ – “yaṃkiñcāyaṃ...pe... pubbekatahetū”ti **viparītato saddahatha**. Pubbekatahetuvādasaññitaṃ **vipallāsaggāhaṃ gaṇhatha**.

7. Diṭṭhadhammo vuccati paccakkhabhūto, tattha veditabbaṃ phalaṃ **diṭṭhadhammavedanīyaṃ**. Tenāha – “**imasmīyeva attabhāve vipākādāyaka**”nti. **Payogenāti** kāyikena payogena vā vācasikena vā payogena. **Padhānenāti** padahanena cetasikena ussāhanena. Āsanne bhavantare vipācetum na sakkā, pageva dūreti dassetum, “**dutiye vā tatiye vā attabhāve**”ti vuttaṃ. Nibbattakabhāvato sukhavedanāya hitanti **sukhavedanīyaṃ**. Sā pana vipākavedanābhāvato ekantato iṭṭhārammaṇā eva hotīti āha “**iṭṭhārammaṇavipākādāyaka**”nti. **Viparītanti** aniṭṭhārammaṇavipākādāyakaṃ. **Nipphaneti** saddhiṃ aññena kammaena nibbatte. **Samparāyavedanīyassāti** upapajjavedanīyassa aparāpariyavedanīyassa. **Evaṃ santepīti** kāmaṃ paripakkavedanīyanti diṭṭhadhammavedanīyameva vuccati, tathāpi atthettha atisayo diṭṭhadhammavisesabhāvato paripakkavedanīyassāti dassetum, “**ayametthā**”tiādi vuttaṃ. Yasmiṃ divase kataṃ, tato **sattadivasabbhantare**.

Tatrāti tasmiṃ paripakkavedanīyakammaṃsa sattadivasabbhantare vipākādāne. **Ekavāraṃ kasitvā nisīdi** chātājjhatto hutvā. **Āgacchantī āha** – “ussūre bhattaṃ āharīyitthā”ti domanassaṃ anuppādetvā yathā katapuññaṃ anumodati. **Vijjotamānaṃ disvā**, “kiṃ nu kho idampi tappakāro, mama cittavikkappamattaṃ, udāhu suvaṇṇamevā”ti vīmamsanto **yaṭṭhiyā paharivā**.

Vālayakkhasañcaraṇattā rājagahūpacārassa **nagare sahasabhaṇḍikaṃ cāresuṃ**. Uppannarāgo **cūlāya ḍaṃsi**. **Rañño ācikkhitvāti** taṃ pavattiṃ rañño ācikkhitvā. **Mallikāya vatthu** dhammapadavatthumhi (dha. pa. aṭṭha. 2.mallikādevīvatthu) āgatena nayena kathetabbaṃ.

Maraṇasantikepi kataṃ, pageva tato puretaraṃ atītattabhāvesu ca kataṃ. **Idha nibbattitavipākoti vutto** avassaṃbhāvībhāvato. **Samparāyavedanīyameva** bhavantare vipākādāyakabhāvato. **Idha nibbattitagunoṭveva vutto**, na idha nibbattitavipākoti vimuttībhāvato. **Paripakkavedanīyanti veditabbaṃ** heṭṭhā vuttaparipakkavedanīyalakkhaṇānativattanato. **Sabbalahum phaladāyikāti** etena phaluppādanasamatthatāyogena kammaṃsa paripakkavedanīyatāti dasseti.

Catuppañcakkhandhaphalatāya **saññābhavūpagaṃ** kammaṃ **bahavedanīyanti** vuttaṃ. Ekakhandhaphalattā **asaññābhavūpagaṃ** kammaṃ **appavedanīyaṃ**. Keci pana, “arūpāvacarakammaṃ bahukālaṃ veditabbaphalattā bahavedanīyaṃ, itaraṃ appavedanīyaṃ. Rūpārūpāvacarakammaṃ vā bahavedanīyaṃ, parittakammaṃ appavedanīya”nti vadanti. **Savipākaṃ kammanti** paccayantarasaṃvāyē vipākuppādanasamatthaṃ, na āradhāvīpākameva. **Avipākaṃ kammanti** paccayavekallena vipaccitum asamatthaṃ ahosikkammādibhedam.

8. Diṭṭhadhammavedanīyādīnanti diṭṭhadhammavedanīyādīnaṃ dasannaṃ kammānaṃ upakkamena kammānaṃ aññāthābhāvassa anāpādanīyattā yathāsabhāveneva kammāni tiṭṭhanti. Tattha

nigaṅṭhānaṃ upakkamo nippayojanoti āha “**aphalo**”ti. Nigaṅṭhānaṃ padahanassa micchāvāyāmassa nipphalabhāvappavedano **padhānacchedakavādo**. Parehi vuttakāraṇehi yehi kāraṇehi nigaṅṭhānaṃ vādesu dosaṃ dassenti. Tehi parehi vuttakāraṇehi. Na hi lakkhaṇayuttana hetunā vinā paravādesu dosaṃ dassetuṃ sakkā. Tenāha “**sakāraṇā hutvā**”ti. **Nigaṅṭhānaṃ vādā ca anuvādā cāti** nigaṅṭhehi vuccamānā sakasakasamayappavedikā vādāceva sāvakehi vuccamānā tesam anuvādā ca. **Viññūhi garahitabbaṃ kāraṇaṃ āgacchantīti**, “ayamettha doso”ti tatta tatta viññūhi paṇḍitehi garahārahaṃ kāraṇaṃ upagacchanti, pāpuṇantīti attho. **Tassatthotiādīsu** ayaṃ saṅkhepattho, “vuttanayena parehi vuttana kāraṇena sakāraṇā hutvā dosadassanavasena nigaṅṭhānaṃ vādā anuppattā, tato eva taṃ vādaṃ appasādanīyabhāvadassanena sosentā hetusampattivohārasukkhanaena milāpentā dukkaṭakammakārinotiādayo dasa gārayhāpadesā upagacchantī”ti.

9. Saṅgati bhāvahetūti tatta tatta yadicchāya samuṭṭhitasāṅgatinimittaṃ. Sā pana saṅgati niyatilakkhaṇāti āha “**niyatibhāvakāraṇā**”ti. Acchejjasuttāvutaabhejjamaṇi viya hi paṭṇiyatataṃ niyatipavattīti. **Chaḷabhijāti hetūti** kaṇhābhijāti nīlābhijāti lohitābhijāti haliddābhijāti sukkābhijāti paramasukkābhijāti imāsu abhijātīsu jātinimittaṃ. **Pāpasāṅgati kāti** nihīnasāṅgati kā.

10. Anaddhabhūtaṃ ettha adhi-saddena samānattho **addha**-saddoti āha – “**anaddhabhūtaṃ anadhibhūta**”nti. Yathā āpāyiko attabhāvo mahatā dukkhena abhibhuyyati, na tathā ayanti āha – “**dukkhena anadhibhūto nāma manussattabhāvo vuccati**”ti. “Acelako hoti”tiādīnā (dī. ni. 1.394) vuttāya **nānappakārāya dukkarakārikāya** kilamathena. Yadi evaṃ kathaṃ dhutaṅgadharaṇāti āha “**ye panā**”tiādī. **Niyyānikasāsanasmīhi vīriyanti** vivaṭṭasannissitaṃ katvā pavattiyamānaṃ vīriyaṃ sarīraṃ khedantampi **sammāvāyāmo nāma hoti** nāyāraddhabhāvato.

Theroti ettha āgatamahārakkhitatthero. **Tisso sampattiyo** manussadevanibbānasampattiyo, sīlasamādhīpaññāsampattiyo vā. **Khuraggeyevāti** khure sīsagge eva, khure sīsaggato apanīte evāti adhippāyo. **Ayanti**, “issarakule nibbato”tiādīnā vutto. Na sabbe eva sakkārapubbakaṃ pabbajitvā arahattaṃ pāpuṇantīti āha “**yo dāsikucchiya**”ntiādī. **Rajatamuddikanti** rajatamayaṃ aṅgulimuddikaṃ. **Gorakapiyaṅgumattenapīti** kapitthachallikaṅgupupphagandhamattenapi.

Dhammena nāyena āgatasukhaṃ dhammasukhanti āha – “**saṅghato vā...pe... paccayasukha**”nti. **Amucchitoti** anajjhāpanno. Idāni taṃ anajjhāpannataṃ tassa ca phalaṃ dassetuṃ “**dhammikaṃ hī**”tiādī vuttaṃ. **Imassāti** samudayassa. So hi pañcakkhandhassa dukkhassa kāraṇabhūtatā āsanno paccakkho katvā vutto. Tenāha “**paccuppanāna**”ntiādī. **Saṅkhāraṇti** yathāraddhāya sātisaṃyamaṃ karaṇato saṅkhāraṇti laddhanāmaṃ balavavīriyaṃ ussoḷhiṃ. **Padahatoti** payuñjantassa pavattentassa. **Maggena virāgo hotīti** ariyamaggena dukkhanidānassa virajjanā hoti. Tenāha “**idaṃ vuttaṃ hoti**”ti. **Iminā sukhāpaṭipadā khippābhiññā kathitā** akasireneva sīghataraṃ maggapajānatāya bodhitattā. **Majjhataṭṭakāroti** vīriyūpekkhamāha. **Saṅkhāraṃ tatha padahatīti** padhānasāṅkhāraṃ tatha dukkhanidānassa virajjananimittaṃ virajjanatthaṃ padahati. Kathaṃ? **Maggappadhānena** catukiccappadhāne ariyamagge vāyāmena **padahati** vāyamati. **Ajjhupekkhatoti** vīriyassa anaccāraddhanāsisithilatāya vīriyasamatāyojane byāpārākaraṇena ajjhupekkhato. Tenāha “**upekkhaṃ bhāventassā**”ti. Upekkhābhāvanā ca nāmettha tathāpavattā ariyamaggabhāvanā evāti āha – “**maggabhāvanāya bhāvetī**”ti.

Ettha ca evaṃ pāliyaṃ padayojanā veditabbā, – “so evaṃ pajānāti. Kathaṃ? Saṅkhāraṃ me padahato saṅkhārapadahanā imassa dukkhanidānassa virāgo hoti, ajjhupekkhato me upekkhānaṃ imassa dukkhanidānassa virāgo hoti”ti. Paṭipajjamānassa cāyaṃ pubbabhāgavīmaṃsassaṭṭi gahetabbaṃ. Tatta **saṅkhārapadhānāti** sammasanapadena sukheneva khippataraṃ bhāvanāussukkāpanavīriyaṃ dassitanti sukhāpaṭipadā khippābhiññā dassitā. **Ajjhupekkhatoti** ettha kassaci nātidalḥaṃ katvā pavattitavīriyenapi dukkhanidānassa virāgo hoti vipassanamanuyuñjati dassitaṃ. Ubhayatthāpi catutthīyeva paṭipadā vibhāvītati daṭṭhabbaṃ. Idāni, “yassa hi khvāssa...pe... upekkhaṃ tatha bhāvetī”ti vārehi tāsamyeva paṭipadānaṃ vasena tesam puggalānaṃ paṭipatti dassitā.

Vaṭṭadukkhaniḍānassa pariḷḷaṇṇaṃ imehi vārehi dukkhakkhaya vibhāvito.

11. Baddhacittoti sambaddhacitto. Bahalacchandoti bahalataṇhāchando. Aticaritvāti atikkamitvā. Naṭasatthavidhinā naccanakā **naṭā, naccakā** itare. **Somanassaṃ uppajjati**, “īdisaṃ nāma itthiṃ pariccaji”nti. **Chijjāti** dvidhā hotu. **Bhijjāti** bhijjatu. “Chijja vā bhijjavā”ti padadvayenapi vināsameva vadati. **Ṇatvāti** pubbhāgañāṇena jānitvā. **Tadubhayanti** saṅkhārapadahanaupekkhābhāvanam.

12. Pesentassāti vāyamantassa. Taṃ sandhāyāti dukkhāya paṭipadāya niyyānatam sandhāya.

Usukāro viya yogī tejanassa viya cittassa ujukaraṇato. Gomuttavaṅkaṃ, candalekhākuṭilam, naṅgalakoṭijimham cittaṃ. **Alātā viya vīriyam** ātāpana-paritāpanato. **Kaṅcikatelaṃ viya saddhā** sinehanato. **Namanadaṇḍako viya lokuttaramaggo** nibbānārammaṇe cittassa nāmanato. **Lokuttaramaggena** cittassa **ujukaraṇam** bhāvanābhisamayato daṭṭhabbam. Antadvayavajjitā majjhimā paṭipattīti katvā **kilesagaṇavijjhanam** pahānābhisamayo. Itarā pana paṭipadā dandhābhiññāti imesaṃ dvinnam bhikkhūnam **imāsu dvīsu** yathāvuttāsu khippābhiññāsu **kathitāsu, itarāpi kathitāva honti** lakkhaṇāhāranayena paṭipadāsamaññato. **Sahāgamaṇīyāpi vā paṭipadā kathitāva**, “na heva anaddhabhūtam atthāna”ntiadinā pubbhāgapaṭipadāya kathitattā. “Āgamaṇīyapaṭipadā pana na kathitā”ti idaṃ savisesam ajjupekkhassa akathitataṃ sandhāya vuttanti daṭṭhabbam. **Nikkhamanadesananti** nikkhamanupāyam desanam. Sesam suviññeyyameva.

Devadahasuttavaṅganāya līnatthappakāsanā samattā.

2. Pañcattayasuttavaṅganā

21. Eketi ettha eka-saddo aññattho, na gaṇanādiatthoti taṃ dassento “ekacce”ti āha. Yaṃ pana pāliyam “santī”ti vuttam. Tena tesam diṭṭhigatikānam vijjamānatāya avicchinnatā; tato ca nesam micchāgahaṇato sithilakaraṇavivecanehi attano desanāya kiccakāritā avitathatā ca dīpitā hoti. Paramatthasamaṇabrāhmaṇesu aparantakappikatāya lesopi natthīti āha **“paribbajupagatabhāvenā”**tiādi. Sassatādivasena aparantaṃ kappentīti aparantakappino, te eva **aparantakappikā**. Yasmā tehi aparantaṃ purimatarasiddhehi taṇhādiṭṭhikappehi kappetvā āsevanabalavatāya ca vikappetvā aparabhāgasiddhehi abhinivesabhūtehi taṇhādiṭṭhiggāhehi gaṇhanti abhinivisanti parāmasanti; tasmā vuttam – **“aparantaṃ kappetvā vikappetvā gaṇhantī”**ti. Taṇhupādānavasena kappanagahaṇāni veditabbāni. Taṇhāpaccayā hi upādānam. **Vuttampi cetam mahānidese uddānato** saṅkhepato. **Taṇhādiṭṭhivasenāti** taṇhāya diṭṭhiyā ca vasena. Diṭṭhiyā vā upanissayabhūtāya sahaṇāyā abhinandanakāya ca taṇhāya sassatādiākārena abhinivisantassa micchāgāhassa ca vasena. Anāgatadhammavisayāya adhippetattā anāgatakālavācako idha **apara-saddo**. Rūpādikhandhavinimuttassa kappanavatthuno abhāvā **anta-saddo** bhāgavācako idha – **“anāgataṃ khandhakoṭṭhāsa”**nti. **Kappetvāti** ca tasmim aparante taṇhāya nābhinivesānam samattanam pariniṭṭhāpanamāha. **Ṭhitāti** tassā laddhiyā avijjanam.

Anugatāti ārammaṇakaraṇavasena anu anu gatā aparante pavattā. **Ārabbhāti** ālambitvā. Visayo hi tassā diṭṭhiyā aparanto. Visayabhāvato eva hi so tassā āgamaṇāṭṭhānam ārammaṇapaccayo cāti vuttam **“āgamma paṭicca”**ti. **Adhivacanapadānīti** paññattipadāni, dāsādīsu sirivaḍḍhakādisaddo viya vacanamattameva adhikāram katvā pavattiyā adhivacanam paññatti. Atha vā adhi-saddo uparibhāve, vuccatīti vacanam, upari vacanam **adhivacanam**, upādānabhūtarūpādānam upari paññāpiyamānā upādāpaññattīti attho, tasmā paññattidīpakapadānīti attho. Paññattimattañhetam vuccati, yadidaṃ, “attā loko”ti ca, na rūpavedanādayo viya paramattho. Adhikavuttitāya vā **adhimuttiyoti diṭṭhiyo vuccanti**. Adhikañhi sabhāvadhammesu sassatādiṃ pakatiādiṃ drabyādiṃ jīvādiṃ kāyādiṃca abhūtamattaṃ ajjhāropetvā diṭṭhiyo pavattantīti. **Abhivadantīti**, “idameva saccam moghamañña”nti abhinivisitvā vadanti, “ayam dhammo, nāyam dhammo”tiadinā vivadanti. Abhivadanakiriyāya ajjāpi avicchedabhāvadassanattaṃ vattamānakālavacanam.

Sañña etassa atthīti saññīti āha “**saññāsamaṅgī**”ti. Natthi etassa rogo bhaṅgoti **arogoti** arogasaddassa niccapariyāyatā veditabbā. Rogarahitatāsīsena vā nibbikāratāya niccatam paṭijānāti diṭṭhigatikoti āha “**arogoti nicco**”ti. **Imināti**, “saññī attā arogo param maraṇā”ti iminā vacanena. **Soḷasa saññīvādāti** – rūpīcatukkam, arūpīcatukkam, antavācatukkam, ekantasukhīcatukkanti – imesam catunnam catukkānam vasena soḷasa saññīvādā kathitā. Imesuyeva purimānam dvinnam catukkānam vasena aṭṭha saññīvādā aṭṭha ca nevasaññīnāsaññīvādā veditabbā. **Satta ucchedavādāti** manussatthabhāve kāmāvacaradevattabhāve rūpāvacaradevattabhāve catubbidhāruppattabhāve cavitvā sattassa ucchedapaññāpanavasena satta ucchedavādā kathitā. Asato vināsāsambhavato atthibhāvanibandhano ucchedavādoti vuttam “**satoti vijjamānassā**”ti. Yāvāyam attā na ucchijjati, tāva vijjati evāti gahaṇato nirudayavināso idha ucchedoti adhippetoti āha “**upaccheda**”nti. Visesena nāso **vināso**, abhāvo, so pana maṃsacakkhu-paññācakkhu-dassanapathātikkamovāti āha “**adassana**”nti. Adassane hi nāsa-saddo loke nirulho. **Bhavavigamanti** sabhāvāpagamanam yo hi nirudayavināsavasena ucchijjati, na so attano sabhāveneva tiṭṭhati.

Pañca diṭṭhadhammanibbānavādāti pañcakāmaguṇasukhamaṇubhogavasena catubbidharūpajjhānasukhaparibhogavasena ca diṭṭhadhamme nibbānappattipaññāpanavādā. **Diṭṭhadhammoti** dassanabhūtena ñāṇena upaladdhadhammo. Tatha yo anindriyavisayo, sopi supākātabhāvena indriyavisayo viya hotīti āha – “**diṭṭhadhammoti paccakkhadhammo vuccatī**”ti. Teneva ca, “**tattha tattha paṭiladdhaattabhāvassetam adhivacana**”nti vuttam. **Saññīti ādivasena tihākārehi santanti** saññī asaññī nevasaññīnāsaññīti imehi ākārehi vijjamānam, sadā upalabbhamānam sassatanti attho. **Saññī attātiādīni tīni** dassanāni. **Santaatthavasena ekanti** sassatassa attano vasena ekaṃ dassanam. **Itarāni dveti** ucchedavāda-diṭṭhadhammanibbānavādasaññītāni dve dassanāni. **Tīni hutvā pañca hontīti** idam, “santaatthavasena eka”nti saṅghavasena vuttassa saññīti ādivibhāgavasena vuttattā suviññeyyanti aṭṭhakathāyam na uddhaṭam.

22. Rūpim vāti ettha (dī. ni. ṭi. 1.76-77) yadī rūpam assa atthīti rūpīti ayamatto adhippeto. Evaṃ satī rūpavinimuttana attanā bhavitabbam saññāya viya rūpassapī attaniyattā. Na hi saññī attāti ettha saññā attā. Tathā hi vuttam **sumaṅgalavilāsiniyam** (dī. ni. aṭṭha. 1.76-77) “tatha pavattasaññañcassa saññāti gahetvāti vutta”nti. Evaṃ sante, “kasiṇarūpam attāti gaṇhātī”ti idam kathanti? Na kho panetaṃ evam daṭṭhabbam – “rūpam assa atthīti rūpī”ti, atha kho “ruppanasīlo rūpī”ti. Ruppanañcettha rūpasarikkhatāya kasiṇarūpassa vaḍḍhitāvaḍḍhitakālavasena visesāpatti, sā ca natthīti na sakkā vuttam parittavipulatādivisesasabbhāvato. Yadi evam imassa vādassa sassatadiṭṭhisāṅgho na yujjati? No na yujjati kāyabhedato uddham attano nibbikāratāya tena adhippetattā. Tathā hi vuttam “**arogo param maraṇā**”ti. Atha vā “rūpam assa atthīti rūpī”ti vuccamānēpi na doso. Kappanāsiddhenapi hi bhedenā sāminiddeśadassanato yathā “silāputtakassa sarīra”nti. Ruppanam vā ruppanasabhāvo rūpam, tam etassa atthīti **rūpī**, attā “rūpino dhammā”tiādīsu (dha. sa. 11 dukamātikā) viya. Evañca katvā rūpasabhāvattā attano “rūpam attā”ti vacanam ñāyāgatamevāti “**kasiṇarūpam attāti gaṇhātī**”ti vuttam. **Arūpinti** ettāpi vuttanayānusārena yathāraham attho vattabbo. Santasukhamam muñcivā tabbiparītassa gahaṇe kāraṇam natthīti lābhī, “kasiṇarūpam attā”ti gaṇhātīti lābhittakino ṭhapetvā, sesatakkī lābhiggahaṇeneva gahitā. Anussutitakkikopi suddhatakkikopi vā nirāṅkusattā takkanassa kasiṇarūpampi attāti kadācīpi gaṇheyyāti vuttam – “**ubhopi rūpāni gaṇhātiyevā**”ti. Suddhatakkikassa ubhayaggahaṇam na kataṃ, tasmā sāsaṅkavacanam.

Kasiṇugghātimākāsa-paṭhamārūppaviññāṇa-natthibhāvaākīñcaññāyatanāni **arūpasamāpattinimittam**. **Ṭhapetvā saññākkhandhanti** idam saññāya attaniyatam hadaye katvā vuttam. “Rūpim vā”ti ettha vuttanayena pana atthe vuccamāne saññākkhandham bahiddhā akatvā “**arūpadhamme**”iceva vattabbam siyā. **Missakaggāhavasenāti** rūpārūpasamāpattīnam nimittāni ekajjam katvā, “eko attā”ti, tattha pavattasaññañcassa, “saññā”ti gahaṇavasena. Ayañhi diṭṭhigatiko rūpārūpasamāpattilābhītāya tamnimittam rūpabhāvena arūpabhāvena ca gahetvā upatiṭṭhati, tasmā, “rūpī arūpī cā”ti abhinivesam janeti ajjhattavādino viya takkamatteneva vā rūpārūpadhamme missakavasena gahetvā, “rūpī ca arūpīca attā hotī”ti. **Takkagāhenevāti** saṅkhārāvasesasukhumabhāvappattadhammā

viya ca accantasukhumabhāvapattiyā sakiccasādhanāsamatthatāya thambhakuṭṭahatthapādānaṃ saṅghāto viya neva rūpī, rūpasabhāvānavattanato na arūpīti evaṃ pavattatakkagāhena. Lābhivasenapi vā antānantikacatutthavāde vakkhamānanayena aññamaññapaṭipakkhavasena attho veditabbo. Kevalaṃ pana tattha desakālabhedavasena tatiyacatutthavādā icchitā; idha kālavatthu bhedavasenāti ayameva viseso. Kālabhedavasena cettha tatiyavādassa pavatti rūpārūpanimittānaṃ saha anupaṭṭhānato; catutthavādassa pana vatthubhedavasena pavatti rūpārūpadhammānaṃ samūhato, “eko attā”ti takkavasenāti tattha vakkhamānanayānusārena veditabbaṃ.

Yadipi aṭṭhasamāpattilābhino diṭṭhigatikassa vasena samāpattibhedena saññānānattasambhavato dutiyadiṭṭhipi samāpannakavasena labbhāti; tathāpi samāpattiyā ekarūpeneva saññāya upaṭṭhānato, “**paṭhamadiṭṭhi samāpannakavārena kathitā**”ti āha. Tenevettha samāpannakaggahaṇaṃ kataṃ. Ekasamāpattilābhino eva vā vasena attho veditabbo. Samāpatti bhedena saññābhedasambhavesi bahiddhā puthuttārammaṇe saññānānattena oḷārikena nānattasaññīti, “**dutiyadiṭṭhi asamāpannakavārenā**”ti āha. Avaḍḍhitakasiṇavasena parittasaññītaṃ, vaḍḍhitakasiṇavasena appamāṇasaññītaṃ dassetuṃ, “**tatiyadiṭṭhi supparamattena vā sarāvamattena vā**”tiādi vuttaṃ. “Aṅgutṭhappamaṇo vā attā yavappamaṇo, aṇumatto vā attā”tiādidassanavasena (udā. aṭṭha. 54; dī. ni. ṭ. 1.76-77) paritto saññīti **parittasaññī**. Kapilakaṇḍādayo (vibha. anuṭṭi. 189) viya attano sabbagatabhāvapaṭijānavasena appamaṇo saññīti **appamāṇasaññī**ti evampettha attho daṭṭhabbo.

Etanti, “rūpiṃ vā”tiādinā yathāvuttaattavādaṃ. **Ekesanti** ekaccānaṃ. **Upātivattatanti** atikkamantānaṃ. Niddhāraṇe cetam sāmivacanaṃ. Viññāṇakasiṇameke abhivadantīti yojanā. Tenāha – “saññaṃ...pe... abhivadantī”ti. Tattha “saññaṃ ṭhapetvā sesāni tīṇī”ti idaṃ saññāya catukkampi paripuṇṇameva gahetvā, **apare aṭṭhakanti vadanti**. **Tadubhayanti** taṃ saññāaṭṭhakanti vuttaṃ ubhayaṃ. **Parato āvi bhavissatīti**, “catasso rūpasaññī”tiādinā upari pakāsessati. Vakkhati hi – “koṭṭhāsato aṭṭha, atthato pana satta saññā hontī”ti (ma. ni. aṭṭha. 3.22). **Etthāti**, “etaṃ vā panā”ti etasmiṃ vākye. **Samatikkamituṃ sakkonti** tattha ādīnavadassanena taduddhaṃ ānisamsadassanena ca brūhitasaddhādi guṇatā, vipariyāyena asakkuṇaṇaṃ veditabbaṃ. **Ye sakkonti, teva gahitā** tesamyeva vasena vakkhamānassa visesassa vattum sakkuṇeyyattā. Sakkontānañca nesam upātivattanaṃ attano ñāṇabalānurūpanti imamattaṃ upamāya dassetuṃ, “**tesam panā**”tiādi vuttaṃ. Tattha **appamāṇanti** appamāṇārammaṇo, appamāṇārammaṇatā cassa āgamanavasena veditabbā anantārammaṇato vā. Na hi ārammaṇe anantanti paramānantassa pamāṇaṃ vā gaṇhāti. Sukhadukkhehi aniñjanato rūpavirāgabhāvanāvisesatāya ca āneñjaṃ patvā tiṭṭhati, ayaṃ no attāti abhivadantā tiṭṭhanti. **Viññāṇakasiṇameketi** viññāṇaṇcāyatanaṃ eke diṭṭhigatikā attāti vadanti. Tenāha – “**viññāṇaṇcāyatanaṃ tāva dassetu**”nti. Tassa pana ārammaṇabhūtaṃ kasiṇuggahāṭimākāse pavattaviññāṇanti apare. Tañhi kasiṇaṃ manasikāravasena, “viññāṇakasiṇa”nti, viññāṇaṇca taṃ ārammaṇaṭṭhena āyatanañcāti, “viññāṇaṇcāyatana”nti ca vuccati. **Ākiñcaññāyatana**meketi etthāpi eseva nayo.

Tayidanti ya-kāro padasandhikaroti āha “**taṃ ida**”nti. **Diṭṭhigatanti** yathā vuttaṃ “saññī attā”ti evaṃ vuttaṃ diṭṭhiṃ. Diṭṭhiyeva hi **diṭṭhigataṃ** “muttagataṃ (ma. ni. 2.119; a. ni. 9.11), saṅkhāragata”ntiādisu (mahāni. 41) viya. Gantabbābhāvato vā diṭṭhiyā gatamattaṃ **diṭṭhigataṃ**, diṭṭhiyā gahaṇamattanti attho. Diṭṭhipakāro vā **diṭṭhigataṃ**. Lokiyā hi vidhayuttagatapakārasadde samānatthe icchanti. **Diṭṭhipaccayo** diṭṭhikāraṇaṃ, avijjādi diṭṭhiṭṭhānanti attho. Tattha avijjāpi hi **diṭṭhiṭṭhānaṃ** upanissayādi bhāvato. Yathāha – “assutavā, bhikkhave, puthujjano ariyānaṃ adassāvī ariyadhammassa akovido”tiādi (dha. sa. 1007). **Phassopi diṭṭhiṭṭhānaṃ**. Yathāha “tadapi phassapaccayā”ti (dī. ni. 1.118-124). **Saññāpi diṭṭhiṭṭhānaṃ**. Yathāha “saññānidānā hi papañcasaṅkhā”ti (su. ni. 880; mahāni. 109). **Vitakkopi diṭṭhiṭṭhānaṃ**. Yathāha – “takkañca diṭṭhīsu pakappayitvā, saccaṃ musāti dvayadhammāhū”ti (su. ni. 892; mahāni. 121). **Ayonisomanasikāropi diṭṭhiṭṭhānaṃ**. Yathāha – “tassevaṃ manasikaroto channaṃ diṭṭhīnaṃ aññatarā diṭṭhi uppajjati, atthi me attāti tassa saccato thetato diṭṭhi uppajjati”ti (ma. ni. 1.19). **Diṭṭhārammaṇanti** diṭṭhiārammaṇabhūtaṃ upādānakkhandhapañcakaṃ. Tenāha – “rūpaṃ attato samanupassati”tiādi (paṭi.

ma. 1.130). Rūpavedanādivinimuttassa diṭṭhiyā ārammaṇassa abhāvato anādiyivā idameva dasseti – **“iminā paccayena idaṃ nāma dassanaṃ gahita”**nti. **Iminā paccayenā**ti vā ettha paccayaggahaṇena ārammaṇampi gahitamevāti daṭṭhabbaṃ.

Tadevāti diṭṭhigatañceva diṭṭhipaccayañca. **Rūpasaññānanti** ettha **iti**-saddo ādiattho. **Evam**-saddo pakārattho, **“yadi rūpasaññāna”**ntiadinā pakārena vuttasaññānanti attho. **Nirupakkilesā** nīvaraṇādi upakkilesavimuttito. Uttamā pañītabhāvappattito, tato eva **seṭṭhā**, seṭṭhattā eva uttaritarābhāvato **anuttariyā**. **Akkhāyatī**ti upaṭṭhāti. Ākiñcaññāyatanaññāya viṣuṃ vuccamānattā catutthārūppasaññāya ca imasmiṃ saññīvāde anotarānato, **“yadi āruppasaññānanti iminā ākāsānañcāyatana-viññānañcāyatanaññā”**icceva vuttaṃ. **Itarehi pana dvīhī**ti, “yadi ekattasaññānaṃ, yadi nānattasaññāna”nti imehi dvīhi padehi. **Samāpannakavāro ca** tathā idha kathitoti adhippāyo. **Koṭṭhāsato aṭṭha saññā** catukkadvayaśaṅgahato. Ekattasaññīpadaṃ ṭhapetvā **atthato pana satta saññā honti** aggahitaggahaṇenāti adhippāyo. Tenāha – **“samāpannaka...pe... saṅgahitoyevā”**ti.

Saññāgatanti saññāvasena gataṃ, saññāśaṅgahaṃ gataṃ vā. Tassa pana aditṭhigatassapi upalabbhamānattā, **“saddhiṃ diṭṭhigatenā”**ti vuttaṃ. **Paccayehi samāgantvā katanti** saha kāraṇabhūtehi paccayehi teneva saha kāraṇabhāvena samāgantvā nibbattitaṃ; paṭiccasamuppānanti attho. **Saṅkhatattā oḷārikaṃ** uppādavayaññathattasabbhāvato. Yassa hi uppādo paññāyati, vayo paññāyati, ṭhitassa aññathattaṃ paññāyati, taṃ khaṇe khaṇe bhijjanasabhāvato passantassa pākāṭabhūtavikāraṃ oḷārikaṃ siyā. Na cettha maggaphaladhammā nidassetabbā tesam tathā ananupassitabbato; tesampi saṅkhatabhāvena itarehi samānayogakkhamatāya dunnivārayabhāvato. Tathā hi **“asesavirāgaṇirodhā”**ti (udā. 3) vacanato maggassapi nissaraṇabhāvena **“atthi kho pana saṅkhārānaṃ nirodho”**ti nibbānamevettha paṭiyogabhāvena uddhaṭṭaṃ **“nirujjhanti etthā”**ti katvā. **Nirodhasaṅkhātāṃ nibbānaṃ nāma atthī**ti ettha, – **“atthi, bhikkhave, ajātaṃ abhūtaṃ asaṅkhata”**nti suttapadaṃ (udā. 73) ānetvā vattabbaṃ. **Nibbānadassīti** sacchikiriyābhisamayavasena nibbānadassī, tato eva itarābhisamayatthasiddhiyā **taṃ saṅkhatāṃ atikkanto**.

23. Aṭṭhasu asaññīvādesūti idaṃ brahmajāle (dī. ni. 1.78-80) āgatanayena vuttameva hi sandhāya heṭṭhā, **“saññīti iminā aṭṭha asaññīvādā kathitā”**ti vuttaṃ. Idha pana cattāro vādā eva uddhaṭṭā. Tenāha **“asaññī”**tiādi. Esa nayo parato **“aṭṭhasu nevasaññīnāsaññīvādesū”**ti etthāpi. Saññāya sati tāya vedanāgāhasabbhāvato **“ābādhanatṭhena saññā rogo”**ti vuttaṃ. Dukkhatāsūlayogato kilesāsucipaggharaṇato uppādajarābhāṅgehi uddhumātapakkapabhijjanato ca **saññā gaṇḍo**; svāyamatto dosaduṭṭhatāya eva hotīti āha – **“sadosatṭhena gaṇḍo”**ti. Piḷājananato antotudanato duruddharaṇato ca saññā sallaṃ; svāyamatto attabhāvaṃ anupavisitvā avaṭṭhānenāti āha **“anupaviṭṭhatṭhena salla”**nti. Paṭisandhiggahaṇe viññānaṃ kutoci āgataṃ viya hotīti vuttaṃ **“paṭisandhivasena āgati”**nti. **Gatinti** pavattim. Sā pana tāsu tāsu gatīsu vutti hotīti vuttaṃ – **“cutivasena gati”**nti; vaḍḍhanavasena ghanapabandhavasenāti attho. Tenāha **“aparāpara”**nti. Aparāparañhi pabandhavasena pavattamānaṃ viññānaṃ nandūpasecanaṃ; itaraṃ khandhattayaṃ vā nissāya abhivuddhiṃ patiṭṭhaṃ mahantañca pāpuṇāṭīti. Pavaḍḍhavasena vā gatim, nikkhepavasena cutim, tato aparāparañca rūpapavattanavasena upapattim, indriyaparipākavasena vuḍḍhim tassa tassa kammaṃ katūpacitabhāvena viruḷhim; tassa kammaṃ phalanibbattiyā vepullanti yojetabbaṃ.

Kāmañcātiadinā “aññātra rūpā”tiādikā codanā lakkhaṇavasena vuttāti dassetvā ayañca nayo codanāya avisiṭṭhavisayatāya siyā; visiṭṭhavisayā panāyaṃ codanāti dassetuṃ, **“ayaṃ pana pañho”**tiādi vuttaṃ. **Ettake khandheti** yathāvutte rūpavedanādike cattāro khandhe. **Aññātra rūpāti** iminā yattha katthaci rūpena vinā viññānaṃ pavatti natthīti dīpitaṃ hoti. Bhavavisesacodanāya sabhāvato eva viññānaṃ vinā rūpassapi pavatti natthīti dīpitaṃ hotīti āha – **“arūpabhavēpi rūpaṃ, asaññābhavē ca viññānaṃ atthī”**ti. **Nirodhasamāpannassati** saññāvedayitanirodhaṃ samāpannassapi viññānaṃ atthi. **Byañjanacchāyāya ce atthaṃ paṭibāhasīti** yadi saddatthameva gahetvā adhippāyaṃ na gaṇhasi neyyatthaṃ suttanti. Ettha ca asaññābhavē nibbattasattavasena paṭhamavādo; saññāṃ attato samanupassatīti ettha vuttanayena saññāmyeva attāti gahetvā tassa kiñcanabhāvena ṭhitāya aññāya

saññāya abhāvato asaññīti pavatto dutiyavādo; tathā saññāya saha rūpadhamme sabbe eva vā rūpārūpadhamme attāti gahetvā pavatto tatiyavādo; takkaggāhavaseneva pavatto catuttavādo. Tesu yaṃ vattabbaṃ, taṃ heṭṭhā vuttanayeneva veditabbaṃ. Nevasaññīnāsaññīvādepi asaññābhava nibbattassa sattassa cutiṭṭhāsandhīsu; sabbattha vā paṭusaññākiccaṃ kātuṃ asamattāya sukhumāya saññāya atthibhāvapaṭijānanavasena paṭhamavādo; asaññīvāde vuttanayena sukhumāya saññāya vasena sañjānanasabhāvapaṭijānanavasena ca dutiyavādādayo pavattāti. Evamettha etesaṃ vādānaṃ sabbhāvo veditabbo. Sesam vuttanayameva.

24. Yattha na saññā, tattha ñāṇassa sambhavo eva natthīti āha – **“asaññā sammoho”**ti, asaññābhāvo nāma sammohappavattīti attho. Yathā niyyantīti niyyāniyāti bahulaṃ vacanato kattusādhanō niyyānīyasaddo, evaṃ idha viññātabbasaddoti āha – **“vijānātīti viññātabba”**nti, vijānanam viññāṇanti attho. Tena **diṭṭhasutamutaviññātabbamattenāti** diṭṭhasutamutaviññāṇappamāṇenāti attho daṭṭhabbo. Tenāha – **“pañcadvārikasaññāpavattimattenā”**ti, nibbikappabhāvato pañcadvārikasaññāpavattisameva bhāvanābhinihārenāti attho. **Olārikasañkhārappavattimattenāti** olārikānaṃ sañkhārānaṃ pavattiyā. **Olārikasañkhārāti** cettha ākiñcaññāyatanapariyosānā samāpattidhammā adhippetā. **Upasampadanti** ye saññāya, asaññābhāve ca dosaṃ disvā nevasaññānāsaññāyatanam vaṇṇentāpi rūpajjhānapaṭilābhamattena tassa sampādanam paṭilābham adhigamaṃ paññapenti, tesam tassa byasanaṃ akkhāyati anupāyabhāvato. Tenāha **“vināso”**tiādi. **Vuṭṭhānanti** sadisasamāpajjanapubbakam parivuṭṭhānam. Samāpatti eva tesam natthi anadhigatattā. **Olārikasañkhārappavattiyā** antamaso ākiñcaññāyatanasañkhārappavattiyāpi **pattabbanti na akkhāyati** tepi samatikkamitvā pattabbato. **Sañkhārānanti** niddhāraṇe sāmivacanaṃ. **Avasesāti** ito paraṃ sukhumabhāvo nāma natthīti sukhumabhāvapattiyā avasesā. Tenāha – **“bhāvanāvasena sabbasukhumabhāvam pattā sañkhārā”**ti. **Etanti** nevasaññānāsaññāyatanam, **pattabbam nāma hoti** tādīsasañkhārappattiyam tabbohārato. **Sañkhatam** samecca sambhuyya paccayehi katattā.

25. “Ye te samaṇabrāhmaṇā sato sattassa ucchedam vināsam vibhavam paññapenti”ti (ma. ni. 3.25) vakkhamānattā sabuddhiyam viparivattamāne ekajjam gahetvā, “tatrā”ti bhagavatā vuttanti āha – **“tatrāti sattu ucchedavādesu bhumma”**nti. **Uddham saranti** uddham gataṃ sarantāti taṃ dassento āha **“uddham vuccati”**tiādi. **Sarantāti** yattha patthenti na labhanti, taṃ jānantā. **Āsattinti** āsīsanam. **Peccāti** paraloke. **Vāñijūpamā viyāti** bhavapariyāpannaphalavisesāpekkhāya paṭipajjanato. **Sakkāyassa bhayāti** santo kāyoti sakkāyo, paramatthato vijjamāno dhammasamūhoti katvā upādānakkhandhapañcakaṃ, tato bhāyanena. **Mā khīyi mā** parikkhayaṃ agamāsi. **Mā osīdi** mā heṭṭhā bhassi. **Abbhanti** ākāsam **mā undriyi** mā bhijjivā pati. Gaddulena baddho **gaddulabaddho**. **Daḷhathambho viya khīlo viya ca** sakkāyo dummocāniyato. **Sā viya diṭṭhigatiko** tassa anuparivattanato. **Daḍḍako viya diṭṭhi** chedanakaraṇāya asamattabhāvakarāṇato. **Rajju viya taṇhā** bandhanato ca, ārammaṇakarāṇavasena samannāgamanavasena ca sambaddhabhāvato. Tena vuttam – **“diṭṭhidaḍḍake pavesitāya taṇhārajjuyā”**ti.

26. Bhagavā attano desanāvilāsenā veneyyajjhāsaya vasena (catucattārīsa aparantakappikavādā tattha tattha antogadhāti) uddesavasena pañceva saṅgahetvā yathuddesaṃ nigamento, **“imāneva pañcāyatanāni”**ti āha. Tattha dukkhassa nimittabhāvato diṭṭhigatānaṃ karaṇatṭhena āyatanatthoti vuttam – **“imāneva pañca karaṇāni”**ti. Saññīvādivasena tīṇi ucchedavādoti **cattāri bhājītāni**. Itaram pana **diṭṭhadhammanibbānaṃ kuhiṃ pavitṭham?** Sarūpato abhājittatā yathābhājitesu vādesu kattha antogadhanti pucchati. Uddese pana sarūpato gahitameva, **“diṭṭhadhammanibbānaṃ vā paneke abhivadanti”**ti. Itaro ekattasaññīvāde nānattasaññīvāde antogadhanti dassento **“ekatta...pe... veditabba”**nti āha yathāsukhañcetaṃ vuttam. Paṭhamo hi diṭṭhadhammanibbānavādo nānattasaññīvāde antogadho, itare cattāro ekattasaññīvāde.

27. **Atītakoṭṭhāsasañkhātanti** atītam khandhakoṭṭhāsasañkhātam pubbantam. Pubbe nivutthadhammavisayā kappanā idhāhippetā, tasmā atītakālavācako idha pubbasaddo,

rūpādikhandhavinimuttañca kappanāvattu natthi, antasaddo ca koṭṭhāsavācako. Tena vuttaṃ “**attīkaṭṭhāsasaṅkhātaṃ pubbantāṃ kappetvā**”ti. “Kappetvā”ti ca tasmiṃ pubbante taṇhāyanābhinivisānaṃ samatthanaṃ pariniṭṭhāpanaṃ vadati. **Sesampīti** “pubbantānudiṭṭhī”ti evamādikāṃ. **Pubbe vuttappakāraṇti** “aparantānudiṭṭhino”tiādīsu vuttappakāraṃ. Ekekasmīñca **attāti** āhito ahaṃmāno etthāti katvā, **lokoti** lokiyanti ettha puññapāpāni tabbipākā cāti katvā, taṃ taṃ gahaṇavisesaṃ upādāya paññāpanaṃ hotīti āha – “**rūpādīsu aññataraṃ attāti ca lokoti ca gahetvā**”ti. Sabbadābhāvena **sassato. Amaro nicco dhuvoti** tasseva vevacanāni. Maraṇābhāvena **amaro**, uppādābhāvena sabbakālaṃ vattanato **nicco**, thiraṭṭhena vikārābhāvena **dhuvo, yathāhātī**adinā yathāvuttamatthaṃ niddesapaṭisambhidāpālīhi vibhāveti. Ayañca attho “rūpaṃ attato samanupassati, vedanaṃ... saññaṃ... saṅkhāre... viññānaṃ attato samanupassati”ti (paṭi. ma. 1.130-131) imissā pañcavidhāya sakkāyadiṭṭhiyā vasena vutto. “Rūpavanta”ntiādīkāya (paṭi. ma. 1.130-131) pana pañcadasavidhāya sakkāyadiṭṭhiyā vasena cattāro cattāro khandhe, “attā”ti gahetvā tadaññaṃ – “loko”ti paññapentīti ayampi attho labbhati, tathā ekaṃ khandhaṃ, “attā”ti gahetvā tadaññe “loko”ti paññapentīti evamettha attho daṭṭhabbo. **Eseva nayoti** iminā yathā “rūpādīsu aññataraṃ attāti ca lokoti ca gahetvā sassato...pe... dhuvo”ti attho vutto; evaṃ asassato anicco adhuvo ucchijjati vinassati na hoti paraṃ maraṇā; nicco ca anicco ca nevanicco nāniccoti evamādimatthaṃ atidisiati.

Cattāro sassatavādāti lābhīvasena tayo, takkīvasena ekoti evaṃ cattāro. Pubbenivāsaññalābhī tiṭṭhiyo mandapañño anekajāṭisatasahassamattaṃ anussarati, majjhimaṃ pañño dasa saṃvaṭṭavivaṭṭakappāni, tikkhapañño cattārīsa saṃvaṭṭavivaṭṭakappāni, na tato paraṃ. So evaṃ anussaranto attā ca loko cāti abhivadati. Takkī pana takkapariyāhataṃ vīmaṃsānucaritaṃ sayappaṭibhānaṃ sassato attā ca loko cāti abhivadati. Tena vuttaṃ – “lābhīvasena tayo, takkīvasena ekoti evaṃ cattāro sassatavādā”ti. Eteneva ca adhiccasaṃmuppattikavādo viya sassatavādo kasmā duvidhena na vibhattoti ce? Paṭikkhittatīti daṭṭhabbaṃ.

Ettha ca, “sassato attā ca loko cā”ti vāde ayamayuttatāvibhāvanā – yadi hi parena parikappito attā, loko vā sassato siyā, tassa nibbikāratāya purimarūpāvijahanato kassaci visesādhānassa kātuṃ asakkuṇeyyatāya ahitato nivattanatthaṃ hite ca paṭipattiatthaṃ upadeso eva nippayojano siyā sassatavādino. Kathaṃ vā so upadeso pavattīyati vikārābhāvato; evañca attano ajaṭākāsassa viya dānādīkiriyaṃ himsādīkiriyaṃ ca na sambhavati; tathā sukhasa dukkhasa ca anubhavananibandho eva sassatavādino na yujjati kammabaddhābhāvato, jātiādīnaṃ asambhavato kuto vimokkho. Atha pana dhammamattaṃ tassa uppajjati ceva vinassati ca, yassa vasenāyaṃ kiriyādivohāroti vadeyya. Evampi purimarūpāvijahanena avatṭhitassa attano dhammamattanti na sakkā sambhāvetuṃ; te vā panassa dhammā avatṭhābhūtā tato aññe vā siyuṃ anaññe vā, yadi aññe, na tāhi tassa uppannāhipi koci viseso atthi. Yo hi karoti paṭisaṃvedeti cavati upapajjati cāti icchitaṃ. Tasmā tadavattho eva yathāvuttadoso, kiñca dhammakappanāpi niratthakā siyā. Atha anaññe, uppādavināsavantīhi avatṭhāhi anaññassa attano tāsāṃ viya uppādavināsasambhavāpattito kuto niccatāvākāso. Tāsampi vā attano viya niccatāti bandhanavimokkhānaṃ asambhavo evāti na yujjati eva sassatavādo; na cettha koci vādī dhammānaṃ sassatabhāve parisuddhaṃ yuttim vattuṃ samattho atthi; yuttirahitañca vacanaṃ na paṇḍitānaṃ cittamārādhētīti viññūhi chaḍḍito evāyaṃ sassatavādoti.

Satta ucchedavādāti ettha te sarūpamattato heṭṭhā dassitā eva, tattha dve janā ucchedadiṭṭhiṃ gaṇhanti lābhī ca alābhī ca. Tattha lābhī nāma dibbacakkhuññalābhī dibbena cakkhunā arahato cutim disvā upapattim apassanto. Yo vā puthujjanānampi cutimattameva daṭṭhuṃ sakkoti, pubbayogābhāvena parikammākarāṇena vā upapātaṃ daṭṭhuṃ na sakkoti. So “tattha tattheva attā ucchijjati”ti ucchedadiṭṭhiṃ gaṇhāti. Alābhī – “ko paralokaṃ jānāti, ettako jīvavisayo, yāva indriyagocaro”ti attano dhītuyā hatthaggaṇhanakarājā viya kāmasukhagiddhatāya vā, “yathā rukkhapaññāni rukkhato patitāni na paṭisandhiyanti, evaṃ sabbepi sattā appaṭisandhikamaraṇameva gacchanti, jalabubbūlakūpamā sattā”ti takkamattavasena vā ucchedadiṭṭhiṃ gaṇhāti. Tattha yaṃ heṭṭhā vuttaṃ – “manussatabhāve kāmāvacaradevatabhāve rūpāvacaradevatabhāve catubbidhaarūpattabhāve cavivā sattassa ucchedapaññāpanavasena satta ucchedavādā kathitā”ti. Tattha yuttaṃ tāva purimesu tīsu vādesu

“kāyassa bheda”ti vuttam; pañcavokārabhavapariyāpannam attabhāvaṃ ārabba pavattattā tesam vādānaṃ, na yuttam catuvokārabhavapariyāpannam attabhāvaṃ nissāya pavattesu catutthādīsu catūsu vādesu, “kāyassa bheda”ti vuttam. Na hi arūpīnaṃ kāyo atthīti? Saccametam, rūpabhava pavattavohārenea diṭṭhigatiko arūpabhavēpi kāyavohāramāropetvā āha “kāyassa bheda”ti. Yathā diṭṭhigatikehi diṭṭhiyo paññattā, tatheva bhagavā dassesīti. Arūpakāyabhāvato vā phassādīdhammasamūhābhūte arūpattabhāve kāyaniddeso daṭṭhabbo.

Etthāha – “kāmāvacaradevattabhāvādiniravasesavibhavapatiṭṭhāpakānaṃ dutiyavādādīnaṃ yutto aparantakappikabhāvo anāgataddhavisayattā tesam vādānaṃ; na pana diṭṭhigatika-paccakkhabhūta-manussattabhāva-samucchedapatiṭṭhāpakassa paṭhamavādassa paccuppannavisayattā”ti. Yadi evaṃ yathā hi dutiyādivādānaṃ, purimapurimavādasaṅgahitasseva attano uttaruttarabhavopapattiyā samucchedanato yujjati aparantakappikatā, tathā ca “no ca kho, bho, ayaṃ attā ettāvātā sammā samucchinno hotī”tiādi vuttam. Evaṃ anāgatasseva manussattabhāvasamucchedassa adhippetattā paṭhamavādassapi aparantakappikatā yujjati. Evaṃ sabbassapi pubbantato āgatassa ucchedapaññāpanavasena idha pubbantakappikesu desanā gatā. Ete ucchedavādā heṭṭhā aparantakappikesu desanā gatā. Ete ucchedavādā heṭṭhā aparantakappikesu tattha tattheva ucchijjati, na tato uddham pavatti atthīti dassanattam vuttā. Jalabubbulaḷakūpamā hi sattāti tassa laddhi.

Idhāti pubbantakappikesu. **Idheva** manussattabhāvādike **ucchijjati** vinaṭṭhavināsavasena. Evaṃ anāgate anuppattidassanaparānaṃ ucchedavādānaṃ aparantakappikesu gahaṇam; pubbantato pana āgatassa attano idheva ucchedadassanaparānaṃ pubbantakappikesu gahaṇam. **Ito param na gacchatīti** pana idaṃ atthato āpanassa atthassa dassanaṃ. Sattesu saṅkhāresu ca ekaccasassatanti pavatto ekaccasassatavādo. So pana brahmakāyika-khiḍḍāpadosika-manopadosikattabhāvato cavitvā idhāgatānaṃ takkino ca uppajjanavasena catubbidhoti āha “**cattāro ekaccasassatavādā**”ti. “Saṅkhārekaccasassatikā”ti idaṃ tehi sassatabhāvena gayhamānānaṃ dhammānaṃ yathāsabhāvadassanavasena vuttam, na panekaccasassatikamatadassanavasena. Tassa hi sassatābhimatam asaṅkhatamevāti laddhi. Tathā hi vuttam (dī. ni. 1.49) **brahmajāle** – “cittanti vā manoti vā viññāṇanti vā ayaṃ attā nicco dhuvo sassato avipariṇāmadhammo sassatisamaṃ tatheva ṭhassatī”ti. Na hi yassa bhāvassa paccayehi abhisāṅkhatabhāvaṃ paṭijjānāti; tasseva niccadhuvādībhāvo anumattakena na sakkā paṭiññātum. Etena, “uppādavayadhuvātāyuttabhāvā siyā niccā, siyā aniccā, siyā na vattabbā”tiādinā pavattassa sattabhaṅgavādassa ayuttatā vibhāvītā hoti.

Tatthāyaṃ (dī. ni. 1.38) ayuttatāvibhāvanā – yadi, “yena sabhāvena yo dhammo atthīti vuccati, teneva sabhāvena so dhammo natthī”tiādinā vucceyya, siyā anekantavādo; atha aññena, siyā na anekantavādo; na cettha desantarādisambaddhabhāvo yutto vuttam tassa sabbalokasiddhattā vivādābhāvato. Ye pana vadanti – “yathā suvaṇṇaghaṭe makūṭe kate ghaṭabhāvo nassati, makūṭabhāvo uppajjati, suvaṇṇabhāvo tiṭṭhatiyeva, evaṃ sabbabhāvānaṃ koci dhammo nassati, koci uppajjati, sabhāvo pana tiṭṭhatī”ti. Te vattabbā – kiṃ tam suvaṇṇam, yaṃ ghaṭe makūṭe ca avatṭhitam? Yadi rūpādi, so saddo viya anicco, atha rūpādisamūho, samūho nāma sammutimattam. Tassa vohāramattassa atthitā natthitā niccatā vā na vattabbā. Tassa paramatthasabhāvena anupalabbhanatoti anekantavādo na siyā. Dhammā ca dhammito aññe vā siyuṃ anaññe vā. Yadi aññe, na tesam aniccatāya dhammī anicco aññattā. Na hi rūpā cakkhuvīññānaṃ aññattā, na ca rūpe cakkhuvīññānasaddo hoti; kiñca dhammakappanāpi niratthikā siyā dhammino niccāniccatāya asijjhanato atha anaññe; uppādivināsavantehi anaññassa dhammino tesam viya uppādivināsasabbhāvato kuto niccatāvākāso, tesampi vā dhammino viya niccatāpatti siyā. Apica niccāniccanavattabbarūpo attā ca loko ca paramatthato vijjāmānatāpaṭijjānanato yathā niccādīnaṃ aññataram rūpaṃ, yathā vā dīpādayo. Na hi dīpādīnaṃ udayabbayasabhāvānaṃ niccāniccanavattabbasabhāvātā sakkā vuttam jīvassa niccādīsu aññataram rūpaṃ viyāti evaṃ sattabhaṅgassa viya sesabhaṅgānampi asambhavoyevāti sattabhaṅgavādassa ayuttatā veditabbāti.

Ettha ca, “issaro nicco, aññe sattā aniccā”ti evaṃ pavattavādā sattekaccasassatavādā; seyyathāpi

issaravādādayo. “Paramāṇavo niccā dhuvā, dvianukādayo aniccā”ti evaṃ pavattavādā saṅkhārekaccasassatavādā; seyyathāpi kaṇḍavādādayo. Nanu ca “ekacce dhammā sassatā, ekacce asassatā”ti; etasmim vāde cakkhādīnaṃ asassatātāsanniṭṭhānaṃ yathāsabhāvāvabodho eva, tayidaṃ katham micchādassananti, ko evamāha – “cakkhādīnaṃ asassatabhāvasanniṭṭhānaṃ micchādassana”nti? Asassatesuyeva pana kesañci dhammānaṃ sassatabhāvābhiniveso idha micchādassanaṃ; tena pana ekavāre pavattamānena cakkhādīnaṃ asassatabhāvāvabodho vidūsito saṃsatṭhabhāvato; visasaṃsatṭho viya sappimaṇḍo sakiccakāraṇāsamattatāya sammādassanapakkhe ṭhapetabbataṃ nārahati. Atha vā asassatabhāvena nicchitāpi cakkhuādayo samāropitajīvasabhāvā eva diṭṭhigati kehi gayhantīti tadavabodhassa micchādassanabhāvo na sakkā nivāretuṃ. Tathā hi vuttaṃ **brahmajāle** (dī. ni. 1.49) – “cakkhanti vā...pe... kāyoti vā ayaṃ me attā”tiādi. Evañca katvā asaṅkhatāya saṅkhatāya ca dhātuyā vasena yathākkamaṃ ekacce dhammā sassatā; ekacce asassatāti evaṃ pavatto vibhajjavādopi ekaccasassatavādo āpajjatīti evaṃpakārā codanā anokāsā hoti aviparītadhammasabhāvāsampaṭipattibhāvato.

Na maratīti amarā. Kā sā? “Evantipi me no”tiādinā (dī. ni. 1.62) nayena pariyantarahitā diṭṭhigatikassa diṭṭhi ca vācā ca, amarāya diṭṭhiyā vācāya vividho khepoti amarāvikkhepo. So etassa atthīti **amarāvikkhepo**. Atha vā amarāti ekā macchajāti, sā ummujjananimujjanādivasena udake sandhāvamānā gāhaṃ na gacchati; evamevaṃ ayampi vādo ito cito ca sandhāvati, gāhaṃ nāgacchatīti amarāvikkhepo, so eva **amarāvikkhepiko**. Svāyaṃ vādo musāvādaanuyogachandarāgamohahetukatāya catudhā pavattoti āha – “**cattāro amarāvikkhepikā vuttā**”ti. Nanu cettha (dī. ni. ṭī. 1.65-66) catubbidhopi amarāvikkhepiko kusalādi ke dhamme paralokattikādīni ca yathābhūtaṃ anavabujjhamāno, tattha tattha pañhaṃ puṭṭho pucchāya vikkhepanamattaṃ āpajjatīti tassa katham diṭṭhigatikabhāvo. Na hi avattukāmassa viya pucchitamattaṃ ajānantassa vikkhepakaraṇamattena diṭṭhigatikatā yuttāti? Na hevaṃ pucchāvikkhepakaraṇamattena tassa diṭṭhigatikatā icchitā, atha kho micchābhinivesena. Sassatavasena micchābhiniṭṭhoyeva hi mandabuddhitāya kusalādidhamme paralokattikādīni ca, yāthāvato appaṭipajjamāno attanā aviññātassa atthassa paraṃ viññāpetuṃ asamattatāya musāvādādibhayena ca vikkhepaṃ āpajjatīti. Tathā hissa vādassa sassatadiṭṭhisāṅgaho vutto. Atha vā puññapāpānaṃ, tabbipākānañca anavabodhena, asaddahanena ca, “tabbisayāya pucchāya vikkhepakaraṇaṃyeva yuttaṃ sundarañcā”ti, khantiṃ ruciṃ uppādetvā abhinivisantaṃ uppannā visumyevekā eṣā diṭṭhi sattabhaṅgadiṭṭhi viyāti datṭhabbā. Tathā ceva vuttaṃ – “pariyantarahitā diṭṭhigatikassa diṭṭhi ceva vācā cā”ti (dī. ni. aṭṭha. 1.61). Katham panassā sassatadiṭṭhisāṅgaho? Uchedavasena anabhinivesato. “Natthi koci dhammānaṃ yathābhūtavēdī vivādabahulattā lokassa; ‘evameva’nti pana saddantarena dhamme nijjhānanā anādikālikā loke”ti gāhavasena sassatalesopettha labbhatiyeva.

Amati gacchati ettha sabhāvo osānanti anto, mariyādo, so etassa atthīti **antavā**. Tenāha “**sapariyanto**”ti. Avadḍhitakasiṇassa puggalassa evaṃ hotīti yojanā. **Dutiyaṃvādo** “anantavā loko”ti vādo. **Tatiyaṃvādo** “antavā ca anantavā cā”ti vādo. **Catutthavādo** “nevantavā nānantavā”ti vādo. Ete eva cattāro vādino sandhāya **brahmajāle** (dī. ni. 1.53) – “antānantikā antānantam lokassa paññāpentī catūhi vatthūhī”ti vuttaṃ. Tattha (dī. ni. ṭī. 1.53) yuttaṃ tāva purimānaṃ tiṇṇaṃ vādīnaṃ antattañca anantattañca antānantattañca ārabba pavattavādattā antānantikattaṃ. Pacchimassa pana tadubhayapaṭisedhavasena pavattavādattā kathamantānantikattanti? Tadubhayapaṭisedhavasena pavattavādattā eva. Yasmā paṭisedhavādopi antānantavisayo eva taṃ ārabba pavattattā. Apare āhu – “yathā tatiyaṃvāde sambhedavasena etasseva antavantatā anantatā ca sambhavati, evaṃ takkīvādepi kālabhedavasena ubhayasambhavato aññamaññapaṭisedhena ubhayaññeva vuccati. Katham? Antavantatāpaṭisedhena hi anantatā vuccati, anantatāpaṭisedhena ca antavantatā, antānantānañca tatiyaṃvādabhāvo kālabhedassa adhippetattā. Idaṃ vuttaṃ hoti yasmā ayaṃ lokasaññito attā jhāyīhi adhigatavisesehi ananto kadāci sakkhi diṭṭho anusuyyati; tasmā nevantavā. Yasmā pana tehi eva kadāci antavā sakkhi diṭṭho anusuyyati, tasmā na pana anantavā”ti. Yathā ca anussutitakkīvasena, evaṃ jātissaratakkīādīnañca vasena yathāsambhavaṃ yojetabbaṃ. Ayañhi takkiko avadḍhitabhāvapubbakattā paṭibhāganimittānaṃ vadḍhitabhāvassa vadḍhitakālavasena apaccakkhakarītāya anussavādimatte ṭhatvā

– “nevantavā”ti paṭikkhipati, avadḍhitakālavasena pana “nānanto”ti. Na pana antavantatānantatānaṃ accantamabhāvena yathā taṃ “nevasaññīnāsaññī”ti, avassañca etaṃ evaṃ viññātabbaṃ, aññathā vikkhepapakkhaṃyeva bhajeyya catutthavādo. Na hi antavantatānantatātadubhayavinimutto attano pakāro atthi, takkīvādī ca yuttimaggako, kālabhedavasena ca tadubhayampi ekasmiṃ na na yujjati. **Anantaracatukkanti** ekattasaññīti āgatasaññīcatukkaṃ.

Ekantasukhīti ekanteneva sukhī. Taṃ panassa sukhaṃ dukkhena avomissaṃ hotīti āha “**nirantarasukhī**”ti. **Ekantasukhamevāti** idaṃ sukhabahulataṃ sandhāya vuttaṃ. **Atītasu sattasu jātisūti** idaṃ tato paraṃ jātissaraññaṇena anussarituṃ na sakkāti katvā vuttaṃ. **Tādisamevāti** sukhasamaṅgimeva attabhāvaṃ. “Evaṃ sukhasamaṅgī”ti taṃ **anussarantassa jātissarassa** atītajātiyampi idha viya dukkhaphuṭṭhassa taṃ anussarantassa.

Sabbesampīti lābhīnaṃ takkīnampi. **Tathāti** iminā “sabbesampī”ti idaṃ padaṃ ākaḍḍhati. Kāmāvacaraṃ nāma adukkhamasukhaṃ anuḷāraṃ avibhūtaṃ āha “**catutthajjhānavasenā**”ti. Catutthajjhānaṃ kāraṇabhūtaṃ etassa atthi, tena vā nibbattanti **catutthajjhānikam**. **Majjhataṃ** majjhatabhūtaṃ majjhattavedanābahulassa. **Majjhatabhūtaṭṭhānameva** attano majjhataṭṭhāpattameva bhūtapubbaṃ anussarantassa. **Ekaccasassatikāti** ekaccasassatavādino vuttā. Puggalādhiṭṭhānaṃ hi ekaccasassatikā. Esa nayo sesesupi. Adhiccasaṃmuppannavādo sassatavādasamuddiṭṭhoti katvā “**dve adhiccasaṃmuppannikā**”ti ca vuttaṃ.

28. Diṭṭhuddhāranti yathāvuttānaṃ diṭṭhīnaṃ aniyyānikabhāvadassanavasena paduddharaṇaṃ. **Paccattamaṃyeva nāṇanti** aparappaccayaṃ attaniyeva nāṇaṃ. Taṃ pana attapaccakkhaṃ hotīti āha “**paccakkhañña**”nti. Suvaṇṇassa viya dosāpagamena upakkilesavigamena nāṇassa visuddhanti āha “**parisuddhanti nirupakkilesa**”nti. Kilesasandhakāravigamato sappabhāsamujjalameva hotīti vuttaṃ – “**pariyodātanti pabhassara**”nti **bāhirasaṃmayasmimpi honti** jhānassa samijjhanato. **Mayamidaṃ jānāmāti** “sassato attā ca loko ca idameva saccaṃ moghamañña”nti ca micchāgāhavasena aññābhāgameva paribrūhetvā tato eva yathāgahitaṃ gāhaṃ sandhāya – “mayamidaṃ atthaṃ tattha jānāmā”ti **evaṃ tattha** micchāgāhe avijjamānaṃ **nāṇakotṭhāsaṃ otārentiyeva** anuppavesentiyeva. **Na taṃ nāṇaṃ, micchādassanaṃ nāmetam**, kiṃ pana taṃ micchādassanaṃ nāma? Sassato attā ca loko cātiādinaṃ micchābhinivesabhāvato. Tenāha “**tadapi...pe... attho**”ti. Yaṃ taṃ diṭṭhiyā upanissayabhūtaṃ nāṇaṃ, taṃ sandhāyāha – “**jānanamattalakkhaṇattā nāṇabhāgamattamevā**”ti. Nāṇampi hi diṭṭhiyā upanissayo hotiyeva lābhino itarassa ca tathā tathā micchābhinivesato. **Anupātivattanato** anatikkaṃanato. Asādhāraṇato na upātivattanti etenāti anupātivattanaṃ, tato. **Upādānapaccayatoti** upādānassa paccayabhāvato. Etena phalūpacāreneva upādānamāha. Yadi brahmajāle āgatā sabbāpi diṭṭhiyo idha kathitā honti, evaṃ sante idaṃ suttaṃ brahmajālasuttena ekasadisanti āha – “**brahmajāle panā**”tiādi. “Aññatra rūpaṃ aññatra vedanā sakkāyaṃyeva anuparidhāvanti”ti vacanato idha sakkāyadiṭṭhi āgatā. **Brahmajālaṃ kathitameva hoti** tattha āgatānaṃ dvāsaṭṭhiyāpi diṭṭhīnaṃ idhāgatattā. Sassatucchedābhiniveso attābhinivesapubbako, “attā sassato attā ucchedo”ti pavattanato.

30. Dvāsaṭṭhi...pe... dassetunti kathaṃ panāyamattho “idha, bhikkhave, ekacco”tiādi pāḷiyā dassito hotīti? Appahīnasakkāyadiṭṭhikassa pubbantāparantadiṭṭhiupādiyanajotanato. **Pariccāgenāti** vikkhambhanaṃ. **Catutthajjhānanirodhā tatiyajjhānaṃ upasampajja viharatīti** ettha na parihīnacatutthajjhānassa tatiyajjhānaṃ bhavati, tatiyajjhānā vuṭṭhitassa pana catutthajjhānā vuṭṭhitassa ca tatiyaṃ paṭilomanayena sambhavati. Tenāha “**ayaṃ panetthā**”tiādi. **Evaṃsampadamidaṃ veditabbanti** “pavivekā pīti nirujjhatī”ti idaṃ, “nirāmisasukhassanirodhā”ti ettha viya vuṭṭhānanirodhavasena vuttanti veditabbanti attho. **Hīnajjhānapariyādānakadomanassanti** nīvaraṇasahagatadomanassamāha. Tañhi jhānapariyādānakaraṃ. **Kammaṇiyabhāvoti** samāpattiṃ patto viya samāpattisamāpajanabhāve kammakkhamabhāvo. Somanassavidhurattā domanassaṃ viyāti domanassanti vuttaṃ. “Uppajjati pavivekā pīti”ti puna vuttā pīti **jhānavayapīti**. **Yaṃ ṭhānaṃ chāyā jahatīti** yaṃ padesaṃ ātapena abhibhuyyamānaṃ chāyā jahati. Tattha ātape chāyāti padesena

ātapasaññitānaṃ bhūtasankhatānaṃ pahānaṭṭhānamāha. Tenāha “**yasmiṃ ṭhāne**”tiādi.

31. Nirāmiṣaṃ sukhanti tatiyajjhānasukhaṃ dūrasamussāritakāmāmisattā.

32. Adukkhamasukhanti catutthajjhānavedanaṃ, na yaṃ kiñci upekkhāvedanaṃ.

33. Niggahaṇoti mamaṃkārabhāvena kiñcipi agaṇhanto. **Nibbānassa sappāyanti** nibbānādhighamassa, nibbānasseva vā avilomavasena ekantikupāyatāya sappāyaṃ. Tenāha “**upakārabhūta**”nti. **Sabbatthāti** sabbesu tebhūmakadhammesu. **Etanti** etaṃ yathāvuttasamathabhāvanāya kilesānaṃ vikkhambhanaṃ. Sabbattha nikantiyā asukkhāpitattā kathaṃ nibbānassa **upakārapaṭipadā nāma jātaṃ**? Na jāyate vātyadhippāyo. **Sabbatthāti** pubbantānuḍḍhiādike sabbasmiṃ. **Aggaṇhanavasenāti** taṇhāgāhena aggaṇhanavasena. Yattha hi taṇhāgāho vimocito, tattha diṭṭhimānaggāhā sukkhā viya honti tadekaṭṭhabhāvato. Tādisassa nibbānagāminī paṭipadā eva āsanne, na dūre. Tena vuttaṃ – “**upakārapaṭipadā nāma jāta**”nti. Tādisassa ca santohamasmītiādikā samanupassanā adhimānapakkhe tiṭṭhatīti āha – “**abhivadatīti abhimānena upavadatī**”ti. Idameva upādiyatīti niyamābhāvato “**aṭṭhārasavidhampī**”ti vuttaṃ. Sesapadepi eseva nayo. Diṭṭhupādāne satī sesaupādānasambhavo avuttasiddhoti tadeva uddhaṭaṃ.

Se āyatane veditabbeti nirodhassa kāraṇaṃ nibbānaṃ veditabbaṃ. **Dvinnāṃ āyatanānanti** cakkhāyatanādīnaṃ dvinnāṃ āyatanānaṃ. **Paṭikkhepena nibbānaṃ dassitaṃ** veneyyajjhāsavavasena.

Na gādhātīti na patiṭṭhāti. **Atoti** asmā nibbānā. **Sarāti** taṇhā. **Saṅkhārapaṭikkhepenāti** saṅkhārekadesabhūtānaṃ catunnaṃ mahābhūtānaṃ paṭikkhepena.

Viññānanti visiṭṭhena ñāṇena jānitabbaṃ. Tato eva **anidassanaṃ** acakkhuvīññeyyaṃ anindriyagocaraṃ. **Anantanti** antarahitaṃ, niccanti attho. **Sabbato pabhanti** kilesandhakārābhāvato ca samantato pabhassaraṃ. “Sabbato papa”nti vā pāṭho, sabbato patatitthanti attho. Cattārīsakammaṭṭhānasaṅkhātehi titthehi otaritvā anupavisitabbaṃ amatasaranti vuttaṃ hoti. Anupādā kañci dhammaṃ aggahetvā vimuccanti etthāti **anupādāvimokkho**, nibbānaṃ. Anupādā vimuccatī etenāti **anupādāvimokkho**, aggamaggo. Anupādāvimokkhantikātāya pana arahattaphalaṃ **anupādāvimokkhoti** vuttaṃ. Sesam suviññeyyameva.

Pañcattayasuttavaṇṇanāya līnatthappakāsanā samattā.

3. Kintisuttavaṇṇanā

34. Bhavoti paritto. **Abhavoti** mahanto. Vuddhiattho hi ayaṃ a-kāro, “saṃvarāsaṃvaro, phalāphala”ntiādīsu viya, tasmā **bhavābhavahetūti** khuddakassa mahantassa vā bhavassa hetu, taṃ paccāsīsamānoti attho. Tenāha – “**tasmiṃ tasmiṃ bhve sukhaṃ vedissāmi**”tiādi.

35. Lokuttarabodhipakkhiyadhamme uddissa puthujjanānaṃ vivādo sambhavatīti āha – “**lokiyalokuttarāva kathitā**”ti. Lokiyāpi hi bodhipakkhiyadhammā lokuttaradhammādhighamassa āsannakāraṇattā visesakāraṇanti yāva aññehi lokiyadhammehi abhivisiṭṭhoti katvā, “**imesu sattatīmsabodhipakkhiyadhammesū**”ti avisesena vuttaṃ. **Atthato nānaṃ hotīti** atthato bhedo hoti bodhipakkhiyadhammānaṃ samadhigatattā. Na hi kāyādayo bhāvetabbā, satiyeva pana bhāvetabbāti. **Byañjanato nānaṃ** bhedaṃ. **Imināpi kāraṇenāti** imāyapi yuttīyā. Idāni taṃ yuttim dassento – “**atthañca byañjanañca**”tiādīmāha. Tattha **samānetvāti** suttantarato samānetvā, suttantarapadehi ca samānetvā. **Aññathāti** aññato, bhūtato apagataṃ katvāti attho. **Micchā ropitabhāvoti** ayāthāvato ṭhapitabhāvo. **Atthañca byañjanañca viññāpanakāraṇamevāti** aviparītattassa saddassa ca bujjanahetutāya.

37. Idha dhammavinayaṭṭhāne **satīyeva satipaṭṭhānanti gahitā**, atthato sameti nāma yāthāvato atthassa gahitattā. Asabhāvaniruttibhāvato byañjanato nānattanti taṃ liṅgabhedena vacanabhedena ca dassento, “**satipaṭṭhānoti vā satipaṭṭhānāti vā micchā ropethā**”ti āha. **Appamattakanti** aṇumattaṃ sallahukam, na garutaram adhanitaṃ katvā vattabbampi **dhanitaṃ** ghosavantaṃ **katvā ropite** vuttadosābhāvatoti tenāha – “**nibbutiṃ pattuṃ sakkā hoti**”ti.

Byañjanassa micchāropanaṃ na visesantarāyakaraṃ hotīti nāpanatthaṃ, **catusu maggesu pañhaṃ kathetvāva parinibbuto. Suttantabyañjanaṃ sandhāyetaṃ vuttaṃ** – “appamattakam kho panā”ti.

38. **Atha catutthavāre vivādo kasmā jāto?** Yāvata nesaṃ vacanaṃ atthato ceva sameti byañjanato cāti adhippāyo. **Saññāya vivādoti** kiñcāpi sameti atthato ceva byañjanato ca, saññā pana nesaṃ avisuddhā, tāya saññāya vasena vivādo jātoti dassento “**aha**”ntiādimāha. Ahaṃ satipaṭṭhānanti vadāmi, ayaṃ satipaṭṭhānoti vadatīti evaṃ tesam nāṇaṃ hotīti imamattaṃ, “**eseva nayo**”ti iminā atidisati.

39. **Na codanattāya vegāyitabbanti** sīghaṃ sīghaṃ na codanā kātabbāti attho. **Tasmāti** yasmā ekacco kodhanabhāvena evaṃ paṭipphari, tasmā. **Anādānadiṭṭhīti** ādiyitvā anabhinivisanato anādānadiṭṭhī adalḥaggāhī. **Pakkhipanto viyāti** gilitvā pakkhipanto viya.

Upaghātoti cittappaghāto pharasupaghāto viya. **Vaṇaghaṭṭitassa viyāti** vaṇe ghaṭṭitassa viya **dukkhuppatti** cittadukkhuppatti. **Dve vāre vatvāpi visajjēti** suppaṇinissaggī evaṃ pageva coditamatte vissajjēti ceti adhippāyo. Kathanavasena ca **kāyacittakilamatho. Evarūpoti** sahasā avissajjentena codakassa vihesāvādo hutvāpi akkodhanādisabhāvo.

Upekkhāti sakena kammena paññāyissatīti tasmim puggale ajjupekkhaṇā. **Upekkhaṃ atimaññati nāma** tassa anācārassa anajjupekkhaṇato.

40. **Vacanasāncāroti** pesuññavasena aññathāvacanupasaṃhāro. **Diṭṭhipalāsoti** yugaggāhasena laddhi. Sā pana **cittassa anārādhaniyabhāvo** satthucittassa anārādhakabhāvo. **Kalahoti** adhikaraṇuppādasena pavatto viggaho bhaṇḍanassa pubbabhāgo.

Yena kāraṇenāti yena dhammena satthusāsanena. Tameva hi sandhāya vadati – “**dhammoti sāraṇiyadhammo adhippeto**”ti. **Etthāti** “dhammassa cānudhamma”nti ettha. **Dhammoti** sambuddhassa tassa tathā pavattaṃ byākaraṇaṃ yathā vivādāpannā saññattiṃ gacchanti. Tenāha – “**tesam bhikkhūnaṃ saññattikaraṇa**”nti. Tadeva byākaraṇaṃ anudhammoti bhikkhūnā vuccamāno anupavatto dhammo. Tenāha – “**tadeva byākaroti nāmā**”ti. **Kocīti** yo koci. **Sahadhammiko** sakāraṇo. Aññattho ayaṃ kiṃ saddoti āha “**añño**”ti. **Assāti** vuttanayena paṭipannabhikkhuno, tassa paṭipatti na kenaci garaṇāyā hotīti attho. Sesam sabbam suviññeyyameva.

Kintisuttavaṇṇanāya līnatthappakāsanā samattā.

4. Sāmagāmasuttavaṇṇanā

41. **Dvedhikajātāti** jātadvedhikā sañjātabhedā. **Dvejjhajātāti** duvidhabhāvaṃ pattā. Bhaṇḍanti paribhāsanti etenāti **bhaṇḍanaṃ**, viruddhacittatā. **Tanti** bhaṇḍanaṃ. **Dhammavinayanti** pāvacaṇaṃ. **Vitujjantā** mukhasattīhi. **Sahitaṃ meti** mayhaṃ vacanaṃ sahitaṃ siliṭṭhaṃ pubbāparasambandhaṃ atthayuttaṃ. Tenāha “**atthasamhita**”nti. **Adhiciṇṇanti** āciṇṇaṃ. **Viparāvattanti** virodhadassanavasena parāvattitaṃ, parāvattaṃ dūsitanti attho. Tenāha – “**cirakālavasena...pe... nivatta**”nti. **Pariyesamāno cara**, tattha tattha gantvā sikkhāhīti attho. **Sace sakkosi**, idānimeva mayā veḥitadosaṃ nibbeḥehi. **Maraṇamevāti** aññamaññaghātavasena maraṇameva.

Nāṭaputtassa imeti **nāṭaputtiyā**. Te pana tassa sissāti āha “**antevāsikesū**”ti. Purimapaṭipattito paṭinivattanam paṭivānam, taṃ rūpaṃ sabhāvo etesanti **paṭivānarūpā**. Tenāha “**nivattanasabhāvā**”ti. **Kathanam** atthassa ācikkhanam. **Pavedanam** tassa hetudāharaṇāni āharitvā bodhanam. Na upasamāya saṃvattatīti anupasamasamvattanam, tadeva **anupasamasamvattanikam**, tasmim. Samussitam hutvā paṭiṭṭhāhetubhāvato **thūpaṃ** paṭiṭṭhāti āha – “**bhinnathūpeti bhinnapaṭiṭṭhe**”ti. **Thūpoti** vā dhammassa niyyānabhāvo veditabbo, aññadhamme abhibhuyya samussitaṭṭhena. **So** nigaṇṭhassa samaye kehici abhinnasammato **bhinno** vinaṭṭhoyeva sabbena sabbaṃ abhāvato **bhinnathūpo**. So eva niyyānabhāvo vaṭṭadukkhato muccitukāmānam paṭisaraṇam, taṃ ettha natthīti appaṭisaraṇo, tasmim **bhinnathūpe appaṭisaraṇeti** evamettha attho veditabbo.

Ācariyappamāṇanti ācariyamutṭhi hutvā pamāṇabhūtam. **Nānānihārenāti** nānākārena. “Vivādo na uppajjī”ti vatvā tassa anuppattikāraṇam dassento, “**sathā hi...pe... avivādakāraṇam katvāva parinibbāyī**”ti vatvā taṃ vivaritam “**bhagavatā hī**”tiādi vuttam. **Paṭiṭṭhā ca avassayo ca**, “ayaṃ dhammo ayaṃ vinayo idaṃ satthusāsana”nti vinicchayane mahāpadesā, pañhabyākaraṇāni ca, yasmā tesu paṭiṭṭhāya te avassāya dhammavinayadharā ca nicchayaṃ gacchanti. Tathā hi suttantamahāpadesato vinaye kenaci pucchito attho catunnam pañhabyākaraṇānam vasena suvinicchitarūpo, tasmā dhammavinayo idha satthu kiccaṃ kātuṃ sakkotīti āha – “**tenevā**”tiādi, tasmā uḷārāya desanāya bhājananti adhippāyo.

42. Paṭipaviṭṭham katvā āharitabbato, saccam kāritabbato pābhatam mūlanti āha – “**kathāpābhata**”nti, dhammakathāya mūlakāraṇanti attho. Yesam vasena vivādo uppanno, teyeva adhammavādino, tesam tāva so ahitāya dukkhāya saṃvattatu, tato aññesaṃ devamanussānam kathanti, codanā paramparāya saṃkilesavatthubhāvato parihaṇo. Tenāha – “**kosambakakkhandhake viyā**”tiādi.

43. **Abhiññā desitāti** abhivisiṭṭhāya paññāya jānitvā bodhitā. **Patissayamānarūpāti** apadissa patissayamānā garukavasena nissayamānasabhāvā. Tenāha – “**upanissāya viharantī**”ti, garutaram nissayam katvā viharantīti attho. **Parivāre paññattānīti**, “ājīvahetu ajīvakāraṇā”ti, evaṃ niddhāretvā **parivārapāliyam** (pari. 336) āsaṅkaravasena ṭhapitāni. “Evañca pana, bhikkhave, imaṃ sikkhāpadam uddiseyyā”ti (pārā. 39, 42, 43) vibhaṅgapāṭhavaseneva hi tāni bhagavatā paññattāni. **Tāni ṭhapetvā sesāni sabbasikkhāpadāni adhipātimokkham nāmāti**, idaṃ gobalībaddaṇāyena vuttanti daṭṭhabbam tesampi adhipātimokkhabhāvato.

Tatrāyam nayoti tasmim suppajahanāya appamattakabhāve ayaṃ vakkhamāno. **Tānīti** pañītabhojanāni. **Yo kocīti** bhikkhu vā bhikkhunī vā. **Dukkaṭavattukanti yaṃ kiñci** dukkaṭapattivatthukam. **Tenāti** suppajahanabhāvena mūlapattivītikamassa aṇumattatāya.

Pubbabhāgamagganti lokiyamaggaṃ. **Tatrāti** tasmim pubbabhāgamaggaṃ nissāya vivāduppāde. **Obhāsaññanti** obhāsassa uppattihetubhūtam ñāṇam. Tattha pana so maggasaññibhāvena maggo ca catubbidhoti sutattā, “**paṭṭhamamaggo nāmā**”tiādimāha. **Evanti** evaṃ asandiddham aparisaṅkitam pariccattam katvā kammaṭṭhānam kathetum na sakkoti.

Cetiyam na diṭṭhanti tassa kataṃ thūpaṃ vadati. Nindiye puthujjanabhāve ṭhitam pāsamsam ariyabhāvaṃ āropetvā taṃ micchāladdhim abhinivissa paggayha voharaṇato **saggopi maggopi vāritoyevāti**. Vuttañhetam –

“Yo nindiyam pasamsati, taṃ vā nindati yo pasamsiyo;
Vicināti mukhena so kalim, kalinā tena sukham na vindatī”ti. (su. ni. 663; saṃ. ni. 1.180-181; a. ni. 4.3; netti. 92);

“Khaṇeneva arahattam pāpuṇitum samatthakammaṭṭhānakatham ācikkhissāmī”ti hi iminā tattha

kohaññampi dissati; itaresu pana vattabbameva natthi. **Uppāṭetvā**ti uddharitvā. “Atha te bhikkhū”tiādi **sesaṃ** nāma. “Amataṃ te paribhuñjanti, ye kāyagatāsatiṃ paribhuñjanti”ti (a. ni. 1.600) vacanaṃ duggahitaṃ gaṇhāpetvā, “**ettāvatā vo amataṃ paribhuttaṃ nāma bhavissati**”ti āha.

44. Evanti ākāralakkaṇametam, na ākāraniyamaṇam. Tena imināva kāraṇena ca yo vivādo uppajjeyyāti vuttaṃ hoti. Garusmiṃ garūti pavattaṃ cittaṃ garuvisayattā taṃsahacaritattā garu, tassa bhāvo gāraṇam, garukaraṇam, taṃ ettha natthīti **agāraṇo**. Tenāha “**gāravavirahito**”ti. Garussa gāravavasena patissayaṇam patissoti vuccati nīcavuttitā, tappaṭipakkhato **appatissoti** āha – “**appatissayo anīcavutti**”ti. Ettha yathāyaṃ puggalo satthari agāraṇo nāma hoti, taṃ dassetuṃ, “**ettha panā**”tiādi vuttaṃ. Tatha **tīsukālesu upaṭṭhānaṃ na yāti**tiādi samudāyakittanaanavasesadassanaṃ, avayavato pana agāravasiddhi yathā taṃ sāmāññato sikkhāpadasamādānaṃ tabbiseso bhedo. Esa nayo sesesupi.

Sakkaccaṃ na gacchatīti ādaravasena na gacchati. **Saṅghe katoyeva hoti** saṅghapariyāpannattā tassa, yathā saṅghaṃ uddissa dinnam ekena bhikkhunā paṭiggahitaṃ saṅghassa dinnameva hoti. **Aparipūrayamānova** sikkhāya agāraṇo. Tenāha bhagavā – “**sikkhāya na paripūrakārī**”ti (ma. ni. 2.135). Attano parisāya uppannaṃ vivādamaḷaṃ visesato attanā vūpasametabbato attano ca anathāvahato “**ajjhatta**”ntveva vuttaṃ. Esa nayo **bahiddhāti** etthāpi.

46. Chaṭṭhānāniti chamulāni. Yathā samanavasena samathānaṃ vivādādīsū adhikattubhāvo, evaṃ vivādādīnaṃ tehi adhikattabbatāpīti āha – “**vūpasamanatthāya...pe... adhikaraṇāni**”ti. Tena adhikaraṇasaddassa kammaṭṭhataṃ āha. Samathā vā samanavasena adhikarīyanti etthāti **adhikaraṇāni**, vivādādayo.

Vivādo uppannamattova hutvā parato kakkhaḷatthāya saṃvattanato yaṃ vatthuṃ nissāya paṭhamam uppanno vivādānusārena mūlakaṃ viya anubandharogo tameva tadaññaṃ vā vatthuṃ katvā pavaḍḍhanto vivādādhikaraṇam patvā upari vaḍḍhati nāma, anuvādāpattikiccādhikaraṇam patvā vivādassa ca vaḍḍhanaṃ pākaṭameva. Tena vuttaṃ – “**cattāri adhikaraṇāni patvā upari vaḍḍhanto so vivādo**”ti. **Uppannānaṃ uppannānanti** (dī. ni. 1. 3.331) uṭṭhitānaṃ uṭṭhitānaṃ. **Samathatthanti** samanattham.

Aṭṭhārasahi vatthūhīti lakkhaṇavacanametam yathā “yadi me byādhi dāheyyuṃ. Dātabbamidamosadha”nti (saṃ. ni. 1. 2.3.39-42; kaṅkhā. abhi. 1. adhikaraṇasamathavañṇanā), tasmā tesu aññatarena vivadantā, “aṭṭhārasahi vatthūhi vivadanti”ti vuccanti. **Upavadanāti** akkoso. **Codanāti** anuyogo.

Adhikaraṇassa sammukhāva vinayanato **sammukhāvinayo**. Sannipatitaparisāya dhammavādīnaṃ yebhuyyatāya yebhuyyasikakammassa karaṇam **yebhuyyasikā**. **Kāraṇasaṅghassa sāmaggivasena sammukhībhāvo**, na yathā tathā kārapuggalānaṃ sammukhatāmatam. **Bhūtatāti** tacchatā. Saccapariyāyo hi idha dhamma-saddo “dhammavādī”tiādīsū (dī. ni. 1.9) viya. Vineti etenāti vinayo, tassa tassa adhikaraṇassa vūpasamāya bhagavatā vuttavidhi, tassa vinayassa sammukhatā **vinayasammukhatā**. Vivādavatthusāṅkhāte atthe paccatthikā atthapaccatthikā, tesam **atthapaccatthikānaṃ**. **Saṅghasammukhatā parihāyati** sammatapuggaleheva vūpasamanato.

Nanti vivādādhikaraṇam. “Na chandāgatiṃ gacchatī”tiādīnā (pari. 383) vuttaṃ **pañcaṅgasamannāgataṃ**. Guḷhakādīsū alajjussannāya parisāya guḷhako **salākaggāho** kātabbo; lajjussannāya **vivaṭako**, bālussannāya **sakaṇṇajappako**. Yassā kiriyāya dhammavādīno bahutarā, sā yebhuyyasikāti āha – “**dhammavādīnaṃ yebhuyyatāyā**”tiādi.

Evaṃ vinicchitanti āpattiṃ dassetvā ropanavasena vinicchitaṃ, paṭikammaṃ pana āpattādhikaraṇasamathe parato āgamissati. Na samaṇasārappaṃ **assāmaṇakaṃ**, samaṇehi akātabbam,

tasmiṃ. **Ajjhācāre** vītikkamesati. **Paṭīcaratoti** paṭicchādentassa. Pāpussannatāya pāpiyo, puggalo, tassa kātabbakammaṃ **tassapāpiyasikaṃ**.

Sammukhāvinayeneva vūpasamo natthi paṭiññāya, tathārūpāya khantiyā vā vinā avūpasamanato. **Etthāti** āpattidesanāyaṃ. Paṭiññāte āpannabhāvādi ke karaṇakiriya, “āyatim saṃvareyyāsi”ti, parivāsādānādivasena ca pavattaṃ vacīkammaṃ **paṭiññātakaraṇaṃ**.

Yathānurūpanti “dvīhi catūhi tihi ekenā”ti evaṃ vuttanayena yathānurūpaṃ. **Etthāti** imasmiṃ sutte, etasmiṃ vā samathavicāre. **Vinicchayanayoti** vinicchaye nayamattaṃ. Tenāha “**vitthāro panā**”tiādi.

47. Saṅkhepatova vutto, na samathakkhandhake viya vitthārato. **Tathāti** iminā “dhammā”ti padaṃ ākaḍḍhati, ettha **iti**-saddo ādiattho, evamādinā iminā pakārenāti vāti vuttaṃ hoti. Bodhipakkhiyadhammānaṃ ekantānavajjabhāvato natthi adhammabhāvo, bhagavato desitākāraṃ hāpetvā vaḍḍhetvā vā kathanāṃ yathādhammaṃ akatanti katvā adhammabhāvoti dassento āha – “**tayo satipaṭṭhānā**”tiādi.

Niyyānikanti sapāṭihīraṃ appaṭivānaṃ hutvā pavattati. **Tathevāti** iminā “evaṃ amhāka”ntiādinā vuttamatthaṃ ākaḍḍhati. **Bhūtena...pe... kātabbakammaṃ dhammo nāma** yathādhammaṃ karaṇato, vuttavipariyāyato ito paraṃ **adhammo. Ayaṃ vinayo nāma** rāgādīnaṃ saṃvaraṇato pahānato paṭisaṅkhānato ca. **Ayaṃ avinayo nāma** rāgādīnaṃ avinayanato. **Ayaṃ vinayo nāma** yathāvinayakaraṇato, vuttavipariyāyena itaro **avinayo**. Vatthusampattiādinā eva sabbesaṃ vinayakammānaṃ akuppatāti āha – “**vatthusampatti...pe... ayaṃ vinayo nāmā**”ti, tappaṭipakkhato avinayo veditabbo. Tenāha “**vatthuvipattī**”tiādi.

Sammāpaṭipattiyā nayanatṭhena yathāvutto dhammo eva netti, tato eva sattassa viya rajju asithilapavattihetutāya **dhammarajjūti** attho vutto. Suttantapariyāyena tāva dasa kusalakammamathā dhammoti evaṃ vuttā. Sā eva vā hotu dhammanetti, yo idha imissā vaṇṇanāya, “chattimṣa bodhipakkhiyadhammā”tiādinā dhammena ca vinayena ca vutto, so eva vā dhammanetti hotūti ānetvā yojanā. **Tāya dhammanettiyā sameti** tāya yathāvuttāya dhammanettiyā saṃsandati, ekalakkaṇameva hotūti attho. Evaṃ vivādavatthubhūto dhammo ce “dhammo”ti, adhammo ce “adhammo”ti, vinayo ce “vinayo”ti, avinayo ce “avinayo”ti nicchinantena **ekaccānaṃ vivādādhikaraṇameva dassitaṃ** tassa vūpasamadhammānaṃ apariyosāpitattā.

48. Taṃ panetanti vivādādhikaraṇaṃ paccāmasati. **Vāre** atthasaṃvaṇṇanāvasena **pattepi. Dvīhīti** yasmiṃ āvāse vivādādhikaraṇaṃ uppannaṃ, tattha vāsīhi **dvīhipi** bhikkhūhi **atirekatarā**.

49. Khandhasāmantanti āpattikkhandhabhāvena samīpaṃ. **Āpattisāmantam nāma** pubbabhāgā āpajjitabbaāpatti. Methunarāgavasena kāyasamsagge dukkaṭassa vatthūti āha – “**paṭhamapārājikassa pubbabhāge dukkaṭa**”nti. **Sesānaṃ** tiṇṇaṃ pārājikānaṃ pubbabhāge thullaccayameva.

50. Parikkamitvā upakkamitvā. **Āpattādhikaraṇaṃ dassitaṃ** tattheva visesato paṭiññāya kāretabbatāya icchitabbattā.

52. Kammaṣa vatthu dassitaṃ na samathoti adhippāyo. Nanu cāyaṃ samathādhikāroti? Saccam, samathassa pana kāraṇe dassite samatho dassitova hotūti dassetuṃ “**evarūpassa hī**”tiādi vuttaṃ.

53. Idaṃ kammanti “idaṃ amhākaṃ bhaṇḍanajātāna”ntiādinā vuttakammaṃ. **Tiṇavattārahakasadisattāti** taṃsadisatāya tabbohāroti dasseti yathā – “esa brahmadatto”ti. **Ākāramattameva** tiṇavattārahakakammaṃ nāma, na pana tassa sabbaso karaṇavidhānaṃ. Tenāha

“**khandhake**”tiādi. **Gihīnaṃ hīnena khumsanavambhanaṃ** yathā “tilasaṃguḷikā natthī”ti. **Dhammikapaṭissavesu** viṣaṃvādanavasena **āpannā āpatti**. **Assāti** kiccādhikaraṇassa. **Sammukhāvinayeneva vūpasamo** saṅghasammukhatādināva vūpasamanato.

54. **Sotāpattiphalasacchikiriyavacanato kosambiyasutte** (ma. ni. 1.492) **sotāpattimaggasammādiṭṭhi kathitā**, idha pana “diṭṭhisāmaññagato viharati”cceva vuttattā, “**imasmim sutte sotāpattiphalasammādiṭṭhi vuttāti veditabbā**”ti vuttaṃ. Pāpakammaṣṣa appatā mahantatā sāvajjabhāvassa mudutikkhabhāvena veditabbāti āha “**aṇunti appasāvajjaṃ. Thūlanti mahāsāvajja**”nti. Sesam suviññeyyameva.

Sāmagāmasuttavaṇṇanāya līnatthappakāsanā samattā.

5. Sunakkhattasuttavaṇṇanā

55. Heṭṭhimamaggehi ñātamariyādāya pajānanato **aññā**, maggapaññā. Tassa phalabhāvato aggaphalapaññā, taṃsahagatā sammāsaṅkappādayo ca “aññā”ti vuttāti āha “**aññāti arahatta**”nti. **Catūhi padehi kathitā**, “pariciṇṇā me bhagavā”tiādisu viya na ekapadeneva. “Lokuttaro dhammo adhigato mayā”ti maññanāmatam adhimānoti dassento, “**appatte pattasaññino**”tiādimāha.

56. **Idaṃ ṭhānanti** idaṃ obhāsādisammutihetubhūtaṃ uḷārataraṃ udayabbayañāṇaṃ. Uḷāratarabhāvena hi taṃ maggaphalapaññāya paccayo hutvā yāthāvato dubbhiññeyyatāya vipassakaṃ viṣaṃvādeti. Tenāha “**avibhūtaṃ andhakāra**”nti. **Imaṃ pañhanti** imaṃ suttam gambhīraṃ lokuttarapaṭisaṃyuttaṃ attanā ñātuṃ icchitaṃ atthaṃ. **Uggahetvāti** kevalaṃ piṭakasampādanavaseneva uggaṇhitvā. Tenāha “**ajānitvā**”ti. **Visevamānāti** kilesavise avamānentā, sāsanassa vā anupakāravirūpapaccaye sevamānā. **Evaṃmassāti** evaṃ vuttanayena tesam karaṇahetu assa cittassa dhammadesanāvasena pavattassa. **Aññathābhāvo** adesetukāmatā **hoti**. **Tanti** yathāvuttamatthaṃ **sandhāya**. **Etanti** “tassapi hoti aññathatta”nti evaṃ vuttaṃ.

58. Kīlesehi āmasīyatīti āmiṣaṃ, lokepariyāpannaṃ āmiṣanti idha pañca kāmaguṇā adhippetāti tesu vaṭṭāmiṣabhāvepi labhite kāmāmiṣabhāvo siddhoti āha – “**vaṭṭāmiṣakāmāmiṣalokāmiṣabhūtesū**”ti. Kāmaguṇā hi vaṭṭassa vaḍḍhanato vaṭṭāmiṣaṃ, kāmetabbato kāmatanḥāya āmasitabbato kāmāmiṣaṃ, yebhūyyato sattalokassa āmiṣabhāvato lokāmiṣaṃ. **Kāmaguṇasabhāgāti** kāmaguṇānulomā kāmaguṇapaṭisaṃyuttā. **Āneñjasamāpattipaṭisaṃyuttāyāti** kilesiñjanarahitatāya idha āneñjāti adhippetāhi heṭṭhimāhi arūpasamāpattīhi paṭisaṃyuttāya. **Evarūpoti** lokāmiṣabhūtesu paccayesu adhimutto tanninno taggaruko tappabbhāro. **Ettāvātāti** evaṃ saddhānaṃ manussānaṃ dassanena tesam pavattitāsayena ca. **Sisaṃ nikkhantaṃ hotīti** lābhāsāya sīsaṃ bahi nikkhantaṃ viya hoti. **Udaraṃ phalitaṃ** atibahubhaṇḍaṃ pakkhipiyamānaṃ pasibbakaṃ viya laddhabbassa atipahūtabhāvena udaraṃ phītaṃ hoti.

59. Yathā purimā dve arūpasamāpattīyo attano paccanīkakīlesehi aniñjanato “aniñjā”ti vuccanti, evaṃ itarāpi. **Taṃ pavuttanti** lokāmiṣasaṃyojanaṃ vigataṃ.

60. **Nighamsanti** “ettako aya”nti paricchedanti attho. **Silesenāti** cammakārasilesādisilesena, vajjiralepasīlese vattabbameva natthi. **Taṃ bhinnanti** āneñjasamāyojanaṃ bhinnaṃ vidhamitaṃ samatikkantaṃ tāsū samāpattīsū apekkhābhāvato. Ajjhāsāyena asambaddhattā vuttaṃ – “**dvedhābhinnā selā viya hotīti**”ti. Tenāha – “**taṃ samāpajjissāmīti cittaṃ na uppajjati**”ti.

61. **Vantanti** chaḍḍitaṃ, viṣaṭṭhanti attho.

62. **Uparisamāpattilābhīnoti** ettha **uparisamāpattīti** arahattaphalasaṃpatti adhippetā, arahato ca

maggādhigameneva anāgāmiphalasamāpatti, sekkhānaṃ visayā heṭṭhimā phalasamāpattiyo paṭippassaddhā. Lokiyā pana nikantippahānena paṭinissatṭhāti āha – **“heṭṭhā...pe... na uppajjati”**ti.

63. “Pañca kho ime, sunakkhatta, kāmaguṇā”tiādinā āraddhadesanā, “sammā nibbānādhimutto purisapuggalo”ti arahattakittanena niṭṭhāpitāti tato paraṃ, “ṭhānaṃ kho panā”tiādikā desanā, **“pāṭiyekko anusandhi”**ti vuttā. Tenāha **“heṭṭhā hī”**tiādi. Tattha yathā khīṇāsavassa samāpattilābhinoti yojanā, evaṃ vā khīṇāsavassa sukkhavipassakassāti yojetabbā. **Paṭikkhittam** aṭṭhakathāyaṃ. Tassa paṭikkhepassa kāraṇaṃ dassetuṃ **“samāpattilābhino hī”**tiādi vuttam. Yathā sukkhavipassako adhimāniko samāpattilābhino samānayogakkhamo appatte pattasaññitāya bhedābhāvato, evaṃ sukkhavipassako khīṇāsavo samānayogakkhamo khīṇāsavabhāvena visesābhāvato, tasmā **“samāpattilābhimi kathite itaropi kathitova hoti”**ti vuttam. **Dvinnam bhikkhūnanti** samāpattilābhino adhimānikassa khīṇāsavassa ca. Tenevāha **“puthujjanassa tāvā”**tiādi.

Yadaggenāti yena bhāgena. Yadipi khīṇāsavassa asappāyārammaṇaṃ kilesānaṃ uppattiyā paccayo na hoti tesam sabbaso samucchinnattā. Santavihāraparipantho pana siyā visabhāgatoti vuttam – **“khīṇāsavassapi asappāyamevā”**ti. Tenāha – **“visam nāma...pe... visamevā”**ti. Etena **“yathā visajānaṃ appamāṇaṃ, vikāruppādanato pana taṃ pariharitabbaṃ, evaṃ pariññātampi vattu atthavisesābhāvena ekarūpamevāti taṃ pariharitabbamevā”**ti dasseti. Tenāha **“na hī”**tiādi. **Na hi asaṃvutena bhavitabbaṃ** asāruppabhāvato. **Yuttapayuttenevāti** sabhāgārammaṇassa ālokanādīsu yutteneva **bhavitum vaṭṭati**.

64. Yattha sayam nipatati uppajjati, tassa santānassa vipasannavasena rupanato, visasaṅkhātassa dukkhassa mūlabhāvato ca **“avijjāsāṅkhāto visadoso”**ti vuttam. **Ruppatīti** kattabbādimucchāpādanena vikāraṃ uppādeti. **Anuddhamseyyāti** vibādheyya. Rāgo hi uppajjamānova kusalacittappavattiyā okāsaṃ adento taṃ vibādhati; tathābhūto saddhāsinehassa samathavipassanābhivuḍḍhiyā vamanena ca taṃ visoseti milāpeti. Tenāha **“soseyya milāpeyyā”**ti. **Saghaṇasesanti** gahetabbavisaṃ sāvasesaṃ katvāti attho. Na alaṃ na samatthanti **analaṃ**. Sūkapariyāyo pāḷiyam vutto **suka-saddoti** āha – **“vhisukādi ca sūka”**nti.

Saupādānasalluddhāro viya appahīno avijjāvisadoso daṭṭhabbo mahānatthuppādanato. **Asappāya...pe... asaṃvutakālo daṭṭhabbo** attabhāvassa apariharaṇabhāvato. **Maraṇaṃ viya sikkhaṃ paccakkhāya hīnāyāvattanaṃ** adhisīlasaṅkhātassa āyuno apetattā. **Maraṇamattaṃ dukkhaṃ viya āpattiyā āpajjanaṃ** yathāvuttassa āyuno upapīḷanakabhāvato. **Imināva nayena opammaṣandaṇanti** ettha anupādisesasalluddhāro viya pahīno avijjāvisadoso; sappāya...pe... susaṃvutakālo, tadubhayena vaṇe puthuttaṃ na gate maraṇābhāvo viya sikkhāya apaccakkhānaṃ, maraṇamattadukkhābhāvo viya aññatarāya saṃkiliṭṭhāya āpattiyā anāpajjananti yojanā veditabbā.

65. Satiyāti ettha yasmā **“ariyāyā”**ti na visesitanti āha – **“sati paññāgatikā”**tiādi. Paññā cettha lokiyā adhippetā, na lokuttarāti āha – **“parisuddhāya vipassanāpaññāyā”**ti.

Khīṇāsavassa balanti ulāratamesu dibbasadisepi ārammaṇesu manacchaṭṭhānaṃ indriyānaṃ anupanamanahetubhūtaṃ susaṃvutakārisaṅkhātaṃ khīṇāsavabalaṃ dassento, **“saṃvutakārī”**ti vuttam, ukkaṃsagatasatīvepullattā yathā asaṃvarassa asaṃvaro hoti, evaṃ satisampajaññabalena cakkhādidvārāni saṃvaritvā dassanādikiccekārī. **Evaṃ jānitvāti** **“upadhi dukkhassa mūla”**nti evaṃ vipassanāpaññāsahitāya maggapaññāya jānitvā. Upadhīyati dukkhaṃ etehīti upadhī, kilesāti āha – **“kilesupadhipahānā nirupadhī”**ti. Tato eva upādīyati dukkhaṃ etehīti kilesā **“upādānā”**tipi vuccantīti āha – **“nirupādānoti attho”**ti. Upadhī sammadeva khīyanti ettāti **upadhisāṅkhayo**, nibbānanti āha – **“upadhīnaṃ saṅkhayabhūte nibbāne”**ti. **Ārammaṇatoti** ārammaṇaṃ katvā tadārammaṇāya phalavimuttiyā **vimutto**. **Kāmupadhimiṃ kāyaṃ upasaṃharissatīti** **“kāmesevissāmi”**ti tattha kāyaṃ upanāmessati; kāyūpasamhāro tāva tiṭṭhatu, tathā cittaṃ vā uppādessatīti etaṃ kāraṇaṃ natthīti. Sesam suviññeyyameva.

Sunakkhattasuttavaṇṇanāya līnatthappakāsanā samattā.

6. Āneñjasappāyasuttavaṇṇanā

66. Khaṇapabhaṅgutāya na niccā na dhuvāti **aniccā**. Tato eva paṇḍitehi na iccā na upagantabbātipi **aniccā**. So cāyaṃ aniccatto udayavayaparicchinnatāya veditabboti dassento, “**hutvā abhāvaṭṭhena aniccā**”ti āha; uppajjivā vinassanatoti attho. Ayañca aniccata vakkhamānā ca tucchādītā dvinnampi kāmānaṃ sādharmaṇoti āha – “**vatthukāmāpi kilesakāmāpi**”ti. **Rittā** vivittā, tesam niccasārādīnaṃ attani abhāvato tehi visumbhūtā. Yathā pana sabbaso sabhāvarahitamākāsaṃ “**tuccham rittā**”nti vuccati, na evamete. Ete pana kevalaṃ niccasārādivirahato eva tucchā rittāti dassento “**na panā**”tiādīmāha. “**Na hi tucchamuṭṭhi nāma natthi**”ti idaṃ lokasamaññāvasena vuttaṃ, lokasamaññā lokiyakathā na laṅghitabbā.

Musāti ittarapaccupaṭṭhānatāya na dissatīti āha “**musāti nāsanakā**”ti. Viṣaṃvādanatṭhena vā **musā**. Ete hi asubhādisabhāvāpi bālānaṃ subhādibhāvena upaṭṭhahantā subhādiggahaṇassa paccakkhabhāvena satte viṣaṃvādentī. **Nassanasabhāvāti** khaṇabhaṅgattā ittarapaccupaṭṭhānatāya dissamānā viyapi hutvā apaññāyanakapakatikā. Tenāha “**khettaṃ viyā**”tiādi. Dhammasaddo cettha “**jātidhammāna**”ntiādīsu (dī. ni. 2.398) viyā pakatipariyāyo, tathā sabhāvasaddo cāti daṭṭhabbaṃ. **Mosadhammāti** mosanapakatikā, kusalaḥaṇḍaharaṇasabhāvāti attho. **Māyākatanti** māyāya kataṃ udakādimaṇiādiākārena māyādinā upaṭṭhāpitaṃ; māyākataṃ viyā māyākataṃ aññasabhāvā hutvā atathā upaṭṭhahanato. Tenāha “**yathā**”tiādi. Cakkhupathe eva katavijjāya, na tato paranti vuttaṃ – “**dassanūpacāre ṭhitasseva tathā paññāyati**”ti. Tayidaṃ sambaravijjāvasena vuttaṃ.

Evam tāvakālikabhāvena kāmānaṃ māyākatabhāvaṃ dassetvā idāni tato aññenapi pakārena dassetuṃ “**yathā cā**”tiādi vuttaṃ. Aniccādisabhāvānaṃ kāmānaṃ niccādisabhāvadassanaṃ vipallāsasahagatatāya veditabbaṃ. **Bālānaṃ lāpanatoti** apariññātavatthukānaṃ andhabālānaṃ puggalānaṃ vipallāsahetuto. Manussaloke ṭhatvā manussānaṃ vā vasena bhagavatā bhāsittatā vuttaṃ – “**diṭṭhadhammikā kāmāti mānusakā pañca kāmagaṇā**”ti. Tato eva ca “**samparāyikāti te ṭhapetvā avasesā**”tiādi vuttaṃ. Tattha diṭṭhadhammā paccakkhasabhāvā ārammaṇabhūtā etāsaṃ atthīti **diṭṭhadhammikā**. Samparāyike kāme ārabba uppannaññā **samparāyikā**. Te samecca dhīyati ettha āṇāti dheyyaṃ, āṇāpavattitṭhānaṃ. Mārassa dheyyanti **māradheyyaṃ** tassa issariyapavattanattā. Tenāha “**yeḥi**”tiādi. **Gahitanti** visayavisayībhāvena gahitaṃ, ārammaṇavasena ārammaṇakaraṇavasena ca gahitanti attho. Tattha ārammaṇakaraṇavasena gahaṇaṃ nāma “**idaṃ mayha**”nti avibhāgena pariggahakaraṇaṃ; ārammaṇavasena pana gahaṇaṃ bhāgaso ārammaṇānubhavananti vadanti. Ubhayassapi pana taṅhārāgavasena gahaṇaṃ sandhāya, “**ubhayameṭaṃ gahita**”nti vuttaṃ. **Māroṭi** kilesamāro. Yadaggena kilesamāro, tadaggena devaputtamāropi te attano vasaṃ vatteti. **Taṃ sandhāyāti** dhammamukhena puggalaggahaṇaṃ sandhāya.

Appahīnavipallāsā hi puggalā kāmādhimuttā mārassa issariyavattanaṭṭhānatāya “**māradheyya**”nti vuttā, tathā mārassa nivāpagocarapariyāyehipi te evaṃ vuttāti dassento, “**yathā coḷassā**”tiādīmāha. Nivāpatīti nivāpo, so eva bījanti **nivāpabijaṃ**. Teti kāmagaṇā. **Yatthāti** yasmaṃ padese.

Manasi bhavāti **mānasāti** āha “**cittasambhūtā**”ti. Te pana avijjādayo pāliyaṃ āgatā. Evañhi lohitasannissayo pubbo viyā anurodhūpanissayo virodhoti dassento, “**mamāyite vatthusmi**”ntiādīmāha. **Tedhāti** ettha **idhāti** nipātamattaṃ “**idhāhaṃ, bhikkhave, bhuttāvī assa**”ntiādīsu (ma. ni. 1.30) viyā. **Kāmalokanti** kāmagaṇasaṅkhātāṃ saṅkhāralokaṃ, yattha vā loke kāmagaṇavantaṃ lokāṃ. **Cittena adhiṭṭhahitvāti** jhānārammaṇaṃ paṭibhāganimittaṃ bhāvanācittena uppādetvā. **Parittaṃ nāma** vikkhambhanaasamatthattā kilesehi parito khaṇḍitaṃ viyā hoti. **Tassa paṭikkhepenāti** parittabhāvapaṭikkhepena. **Pamaṇantipi kāmāvacarameva** pāpakānaṃ pamaṇakaraṇadhammānaṃ vikkhambhanavasena appajahanato. Tappaṭikkhepavasena **appamaṇaṃ** nāma mahaggatanti āha – “**rūpāvacaraṃ arūpāvacara**”nti. Samucchedavasena kilesānaṃ appahānena

mahaggatajjhānampi subhāvitaṃ nāma na hoti, pageva parittajjhānanti āha – “**subhāvīṅṅanti...pe... lokuttarassevetaṃ nāma**”nti. **Etassa vasenā**ti “subhāvita”nti padassa vasena.

Tameva paṭipadanti tameva abhijjhādhīpāhānāvahaṃ jhānapaṭipadaṃ. Arahatte tassa upāyabhūtāya vipassanāya vā catutthajjhāne tassa upāyabhūte upacāre vā sati cittaṃ pasannaṃ eva hotīti āha – “**arahattaṃ vā...pe... upacāraṃ vā**”ti. **Adhimokkhasampasādoti** “ajjeva arahattaṃ gaṇhissāmī”ti vā vipassanāya vīthipaṭipannattā; “ajjeva catutthajjhānaṃ nibbattessāmī”ti vā upacārasamādhinā cittaṃ samāhitattā adhimuccanabhūto sampasādo. **Paṭilābhasampasādoti** arahattassa catutthajjhānassa vā adhigamasāṅkhāto sampasādo. Paṭilābhopi hi kilesakāluṣiyābhāvānato cittaṃ suppasannabhāvāvahattā “sampasādo”ti vutto. **Paccayāti** nāmarūpapaccayā avijjādayo. **Sabbathāti** samudayato atthaṅgamato assādato ādīnavato nissaraṇatoti sabbappakārena. **Āsāti** adhimuccanavasena āsīsanā. Tenāha – “**āsā santiṭṭhati, adhimokkhaṃ paṭilabhati**”ti.

Pāḍakanti padaṭṭhānaṃ. **Kilesā sannisīdanti**ti nīvaraṇasahagatā eva kilesā vikkhambhanavasena vūpasamanti. **Satīti** upacārajjhānāvahā sati **santiṭṭhati**. **Saṅkhāragatanti** bhāvanāya samatāya pavattamānattā, ime dhammavicayasambojjhaṅgādayo ekarasā hutvā pavattanti, bhāvanācittuppādapariyāpanaṃ saṅkhāragataṃ **vibhūtaṃ pākaṭaṃ hutvā upaṭṭhāti**. **Cittuppādoti** bhāvanācittuppādo. **Lepaṇḍeti** silesapaṇḍe **laggamāno viya** appito viya hoti. **Upacārena samādhīyati** upacārajjhānena samādhīyati. **Ayanti** ayaṃ duvidhopi adhimuccanākāro adhimokkhasampasādo nāma. **Tasmiṃ sampasāde satīti** etasmiṃ vipassanālakkaṇe, upacārajjhāne vā adhimokkhasampasāde sati. **Yo pana arahattaṃ vā paṭilabhati catutthajjhānaṃ vā, tassa cittaṃ vipassanaṃ hotīyeva**, ayaṃ nipariyāyato **paṭilābhasampasādo**, evaṃ santepi idhāmiṭṭhameva dassetuṃ, “**idha panā**”tiādi vuttaṃ. **Vipassanā hīti**ādi vuttassa samatthanaṃ. Tatha **paññāyāti** arahattapaññāya. **Adhimuccanassāti** saddhanaṃ ussukkāpajjanaṃ. **Upacāraṅṅanti** upacārajjhānaṃ. **Āneṅṅasamāpattiyā** adhimuccanassa kāraṇanti yojanā.

Etarahi vāti idānimeva. **Āneṅṅaṃ vāti** catutthajjhānaṃ vā. **Samāpajjati**ti adhigacchati. **Idaṃ hīti**ādinā saṅkhepato vuttamatthaṃ vivarati. Arahattasacchikiriyā nāma aggamaggabhāvanāya sati atthato āpanā hoti, aggamaggapaññā eva tadatthaṃ adhimuccitabbāti dassento, “**atha vā**”ti vikappantaramāha. Tatha yathā nāma pāsādassa atthāya samānītaḍḍasambhārāvayave appahonte kūṭāgāraṃ kātuṃ na pahontīyeva, evaṃ sampadamidanti dassento, “**taṃ anabhisambhūtaṃ āneṅṅaṃ vā samāpajjati**”ti āha. **Catusaccaṃ vā sacchikaroti** heṭṭhimamaggādhigamanavasena āneṅṅaṃ vā samāpajjati ubhayassapi hetupariggahitattā.

Tatrāti tasmiṃ “paññāya vā adhimuccati, āneṅṅaṃ vā samāpajjati”ti yathāvutte viśesādhigame ayaṃ idāni vuccamāno yojanāyayo. **Evaṃ hotīti** idāni vuccamānākārena cittaḍḍhināro hoti. **Kiccanti** pabbajitakiccaṃ. **Tatoti** arahattādhigamanato. **Osakkitaṃ mānasoti** saṃkucitacitto. **Antarā na tiṭṭhāti**ti asamāhitabhūmiyaṃ na tiṭṭhāti. Idāni yathāvuttamatthaṃ upamāya vibhāvetuṃ “**yathā**”tiādi vuttaṃ. Tatrāyaṃ saṅkhepattho – yathā tassa purisassa vanamahimsaṃ gahetuṃ ussāhavato osakkantassa sasagodhādiggaṇe vattabbameva natthi, evaṃ imassapi bhikkhuno arahattaṃ gahetuṃ ussāhavato tato osakkitvā catutthajjhānasamāpajjane vattabbameva natthīti. **Eseva nayoti** yathāvuttaṃ upamaṃ upamāsaṃsandanaṅṅa maggabhāvanāyojanāyaṃ catusaccasacchikiriyāyojanāyaṃ atidisati.

Hetuatthajotano **yanti** nipāto, karaṇe vā etaṃ paccattavacananti āha “**yena kāraṇenā**”ti. Tassa saṃvattanaṃ arahati, taṃ vā payojanaṃ etaṃ **taṃsaṃvattanaṃ**. **Viññāṅṅanti** vipākaviññāṅṅaṃ. **Āneṅṅasabhāvaṃ** upagacchatīti **āneṅṅūpagaṃ**. Yathā kusalaṃ āneṅṅasabhāvaṃ, evaṃ taṃ vipākaviññāṅṅampi āneṅṅasabhāvaṃ upagataṃ assa bhavēyya. Tenāha – “**kādisameva bhavēyyāti attho**”ti. **Kecīti** abhayagirivāsino. **Kusalaviññāṅṅanti** vipākaviññāṅṅampi taṃ kusalaṃ viya vadanti. **Tannāmakamevāti** kusalaṃ viya āneṅṅjanāmakameva siyā. Ettha ca purimavikappe “āneṅṅūpaga”nti taṃsadisatā vuttā, dutiyavikappe tato eva taṃsamaññatā. **So panāyamatthoti** āneṅṅasadisatāya vipākakālepi taṃnāmakameva assāti yathāvutto attho. **Iminā nayanāti** iminā vuttanayena. Ettha hi

āneñjābhisañkhārahetu vipākaviññāṇaṃ “āneñjūpagamaṃ hoti viññāṇa”nti vuttattā taṃnāmakameva katvā dīpitaṃ. **Arahattassāpīti** apisaddena aggamaṃ gabbhāvanāyapi heṭṭhimamaggabbhāvanāyapīti attho saṅgahitoti daṭṭhabbo. **Samādhivasena osakkanā kathitā** “vipulena mahaggatena cetasā vihareyya”nti samathanayaṃ dassetvā desanā kathitā.

67. Ayañhi bhikkhūti yaṃ uddissa ayaṃ dutiyāneñjasappāyadesanāya bhikkhu vutto. **Paññavantataroti** vatvā taṃ dassetuṃ, “**dvinnampi kammaṭṭhānaṃ ekato katvā sammasati**”ti vuttaṃ. Heṭṭhimassa hi “ye ca diṭṭhadhammikā kāmā”tiādinā rūpasaddagandharasaphoṭṭhabbāneva rūpamukhena vipassanābhiniveso kato, imassa pana “yaṃ kiñci rūpa”ntiādinā sakalarūpadhamavasena. Bhagavā hi kammaṭṭhānaṃ kathento kammaṭṭhānikassa bhikkhuno kāraṇabalānurūpameva paṭhamaṃ bhāvanābhinivesaṃ dasseti; so pacchā ñāṇe vipulaṃ gacchante anavasesato dhammaṃ pariggaṇhāti. **Rūpaṭṭibāhanenāti** rūpavirāgabbhāvanāya sabbaso samatikkamena. **Sabbatthāti** sabbesu tatiyāneñjādīsu.

Paññavantataroti paññuttaro. **Tiṇṇampi kammaṭṭhānaṃ ekato katvāti** kāmagaṇā sabbarūpadhammā kāmasaññāti evaṃ tiṇṇaṃ puggalānaṃ kammaṭṭhānavasena tidhā vutte sammasanūpagadhamme ekato katvā, “sabbametaṃ anicca”nti ekajjhaṃ gahetvā, sammasati yathā – “yaṃ kiñci samudayadhammaṃ, sabbaṃ taṃ nirodhadhamma”nti (dī. ni. 1.298; saṃ. ni. 5.1081; mahāva. 16; cūḷani. ajitamāṇavapucchāniddeśa 4, 7, 8; tissametteyyamāṇavapucchāniddeśa 10, 11; paṭi. ma. 2.30). Tenāha – “**ubhayametaṃ anicca**”ntiādi. Kāmarūpasaññāvasena diṭṭhadhammikasaṃparāyikabhedato aṭṭha ekekakoṭṭhāsāti evaṃ kataṃ ubhayanti vuttanti āha – “**diṭṭhadhammika...pe... vasena sañkhipitvā ubhayanti vutta**”nti. **Tañhādīṭṭhivasenāti** tañhābhinandanāvasena “etaṃ mamā”ti, diṭṭhābhinandanāvasena “eso me attā”ti evaṃ **abhinanditūṃ**. **Eseva nayoti** iminā tañhādīṭṭhivasena “etaṃ mama, eso me attā”ti abhinanditūṃ ajjhosāya gilitvā pariniṭṭhāpetvā ṭhātunti imamatthaṃ atidisati. **Kāmapaṭṭibāhanenāti** idaṃ āgamanapaṭṭipadādassanattamaṃ, vaṇṇabhāṇanattamaṃ vuttaṃ. **Rūpaṭṭibāhanaṃ** hissa āsannaṃ, tatopi ākāśānañcāyatana samatikkamo, taṃsamatikkamena saheva sabbe tā **vipassanāvasena osakkanā kathitā** “ubhayametaṃ anicca”ntiādivacanato.

68. Idha attano cāti ākiñcaññāyatana kammaṭṭhānaṃ sandhāyāha. **Nirujjhanti** tappaṭṭibaddhachandarāganirodhena, samāpajjanakkhaṇe pana anuppādanenapī. Tenāha “**ākiñcaññāyatanaṃ patvā**”ti. **Atappakatthenāti** ulāratarabhāvena jhānasamāpattiyā atittikarabhāvena. **Tameva paṭṭipadanti** ākiñcaññāyatana bhāvanamāha. **Samādhivasena osakkanā kathitā** tatiyāruppakammaṭṭhānassa vuttattā “yatthetā”tiādinā.

Idha **attanoti** dvikoṭṭikasūññatāmanasikārasañkhātamaṃ vipassanākammaṭṭhānaṃ. **Heṭṭhā vuttapaṭṭipadanti** anantamaṃ vuttaākiñcaññāyatana kammaṭṭhānaṃ. Sati samathabhāvanāyaṃ suññatāmanasikārassa idha sātisayattā vuttaṃ. “**Dutiya kiñcaññāyatane vipassanāvasena osakkanā kathitā**”ti.

70. Tatiyākiñcaññāyatane attanoti catukoṭṭikasūññatāmanasikārasañkhātamaṃ vipassanākammaṭṭhānaṃ. **Etthāti** etasmim suññatānupassanādhikāre. **Kvacīti** katthaci ṭhāne, kāle, dhamme vā. Atha vā **kvacīti** ajjhataṃ, bahiddhā vā. **Attano attānanti** sakattānaṃ. “Ayaṃ kho, bho brahmā...pe... vasī pitā bhūtabhabyāna”ntiādinā (dī. ni. 1.42) paraparikappitaṃ attānañca kassaci kiñcanabhūtaṃ na passatīti dassento “**kassaci**”tiādimāha. Tattha **parassāti** “parā pajā”ti “paro puriso”ti ca evaṃ gahitassa. **Na ca mama kvacanīti** ettha **mama**-saddo aṭṭhānapayuttoti āha “**mamasaddaṃ tāva ṭhapetvā**”ti. **Parassa cāti** attato aññassa, “paro puriso nāma atthi mamatthāya sajito, tassa vasena mayhaṃ sabbaṃ ijjhati”ti evaṃ ekaccadiṭṭhigatikaparikappitavasena paraṃ attānaṃ, tañca attano kiñcanabhūtaṃ na passatīti dassento, “**na ca kvacanīti**”tiādimāha. Ettha ca **nāhaṃ kvacanīti** sakaattano abhāvaṃ passati. **Na kassaci kiñcanatasminti** sakaattano eva kassaci anattaniyataṃ passati. **Na ca, mamāti** etaṃ dvayaṃ yathāsankhyaṃ sambandhitabbaṃ, **atthīti**

paccekam. “Na ca kvacani parassa attā atthī”ti parassa attano abhāvaṃ passati, “tassa parassa attano mama kismiñci kiñcanatā na cattī”ti parassa attano anattaniyatam passati. Evaṃ ajjhataṃ bahiddhā ca khandhānaṃ attattaniyasuññatā suddhasaṅkhārapuñjatā catukoṭikasūññatāpariggaṇhanena diṭṭhā hoti. **Heṭṭhā vuttapaṭipadanti** idhāpi ākiñcaññāyatanakammaṭṭhānameva vadati. **Vipassanāvaseneva osakkanā kathitā** catukoṭikasūññatādassanavisesabhāvato, tappadhānattā cassa manasikārassa.

Idha **attanoti** nevasaññānāsaññāyatanakammaṭṭhānamāha. **Sabbasaññāti** rūpasaññā paṭighasaññā nānattasaññā heṭṭhimā tisso arūpasaññāti evaṃ sabbasaññā anavasesā nirujjhantīti vadanti. “**Heṭṭhā vuttā**”ti pana visesitattā imasmiṃ āgatā catutthajjhānasaññādayo api saññāti apare. **Tanti** sammutumattam kāmasaññāpaṭibāhanavaseneva tesam nānattasaññādinirodhassa atthasiddhattā. **Samādhivasena osakkanā kathitā** nevasaññānāsaññāyatanabhāvanāya samathakammaṭṭhānabhāvato.

71. Pubbe pañcavidham kammavaṭṭanti purimakammabhavasmiṃ moho avijjā āyūhanā saṅkhārā nikantitaṇhā upagamanam upādānam cetanā bhavoti evamāgato saporikkhāro kammappabandho. **Na āyūhitam assāti** na cetitam pakappitam bhaveyya. **Etarahi evam pañcavidham vipākavaṭṭanti** viññāṇanāmarūpasalāyatanaphassavedanāsaṅkhāto paccuppanno vipākappabandho **nappavatteyya** kāraṇassa anipphanattā. **Sace āyūhitam na bhavissatīti** yadi cetitam pakappitam na siyā. **Yaṃ atthīti** yaṃ paramatthato vijjamānakam. Tenāha “**bhūta**”nti. Tañhi paccayanibbattatāya “**bhūta**”nti vuccati. **Tam pajahāmīti** tappaṭibaddhachandarāgappahānena tato eva āyatim anuppattidhammatāpādanavasena pajahāmi pariccajāmi.

Parinibbāyīti saha parikkappanena atītattheti āha “**parinibbāyeyyā**”ti. **Parinibbāyeyya nu khoti** vā pāṭho, so evattho. **Na kiñci kathitanti** nevasaññānāsaññāyatanasamāpattiyā saṅkhārāvasesasukhumabhāvena ñāṇuttarasseva visayabhāvato sarūpato na kiñci kathitam, nayena panassa visesam ñāpetukāmatā. Bhagavato kira etadahosi – “imissameva parisati nisinnā ānando anusandhikusalatāya nevasaññānāsaññāyatanam pādakam katvā ṭhitassa bhikkhuno paṭisandhim arahattañca sandhāya pañham pucchissati, iminā pucchānusandhinā tamattham desessāmī”ti. Osakkanāya ca idhādhippetattā bhinnarasadesanā hotīti pucchānusandhi pucchitā. Tasmiñhi asati anusandhibhedabhinnesā desanā, na ca buddhāciññā bhinnarasadesanāti. **Vipassanānissitanti** tannissitam. **Tassa** bhikkhuno. Upādiyati etenāti ca **upādānam**. **Na parinibbāyati** pahātabbassa appajahanato. Tenāha bhagavā – “dhammāpi kho, bhikkhave, pahātabbā, pageva adhammā”ti (ma. ni. 1.240). **Upādānaseṭṭhanti** idam nevasaññānāsaññāyatanabhavassa sabbabhavaggaṭādassanaparam, na pana ariyabhavaggaṭā upādānaseṭṭhatāpaṭisedhaparam.

73. Nissāyāti bhavapariyāpannam nāma dhammam nissāya tappariyāpannam nāma nissāya oghanittharaṇā bhagavatā akkhātā; aho acchariyametam, aho abbhutametanti.

Navasupi ṭhānesu samathayānikasseva vasena desanāya āgatattā, idha ca kassacipi pādakajjhānassa anāmaṭṭhattā vuttam – “**ariyasāvako sukkhavipassako ariyasāvako**”ti. **Navannampi kammaṭṭhānam ekato katvā sammāsati**ti idam jhānadhammepi anussavaladdhe gahetvā sammasanam sambhavatīti katvā vuttam; tebhūmakasaṅkhāragatam idha vuttanti anavasesato pariggahaṇam sandhāya vuttam – “**yāvatā sakkāyo**”ti.

Etam amatanti amatam nibbānam ārabhha pavattiyā etam arahattam amatarasam. Tenāha – “**etam amatam santam, etam pañita**”nti. “Anupādāya kiñcipi aggahetvā cittam vimuccī”ti vuttattāpi **anupādā cittassa vimokkho** nibbānam aññattha sutte vuccati.

Tiṇṇam bhikkhūnanti abhinivesabhedena tividhānam. Pādakam katvā ṭhitassa osakkanāya abhāve kāraṇam heṭṭhā vuttanayeneva vedītabbam. **Samodhānetvāti** sammadeva odahitvā tasmim tasmim ṭhāne asaṅkarato vavatthapetvā. **Sukathitam nāma hoti** kathetabbassa anavasesetvā kathitattā.

Āneñjasappāyasuttavaṇṇanāya līnatthappakāsanā samattā.

7. Gaṇakamoggallānasuttavaṇṇanā

74. Yathā heṭṭhimasopānaphalakaṃ orohantassa pacchimam nāma hoti, evaṃ ārohantassa paṭhamam nāma hotīti vuttaṃ – “**yāva pacchimasopānakaḷevarāti yāva paṭhamasopānaphalakā**”ti. **Vatthum sodhetvāti** vatthuvijjācariyena vuttavidhinā pāsādavatthuno sodhanavidhiṃ katvā. **Etthāti** pāsādakarāṇe. Sattadhā bhinnassa vālaggassa aṃsukoṭivedhako **vāavedhi** nāma. **Ṭhānasampādananti** vesākhamāṇḍalādīnam sampādanam. **Muṭṭhikaraṇādīhīti** usumuṭṭhikaraṇajiyāgāhajiyāvijjhādīhi. **Evaṃ gaṇāpemāti** ekaṃ nāma ekameva, dve dukā cattāri, tīṇi tikāni nava, cattāri catukkāni soḷasātiādīnā evaṃ gaṇanam sikkhāpema.

75. **Kerāṭikā hontīti** samayassa anupakkiliṭṭhakarāṇamāyāsāṭṭheyyena samannāgatā honti. **Taṃ damanam jīvītahetupi nātikkamati**, ayamassa jātidosābhāvo.

76. **Satisampajaññāhi samaṅgibhāvatthāyāti** satatavihāribhāvasādhanehi satisampajaññehi samannāgamatthāya. Nanu ca khīṇāsavā sativepullappattā paññāvepullappattā ca, katham tassa satisampajaññam payogasādhaniyam pavattanti āha “**dve hī**”tiādi. **Satatavihārīti** satatam samāpattivihāribahulā, tasmā te icchiticchitakkhaṇe phalasaṃpattim samāpajanti. Vuttavipariyāyena nosatatavihārino daṭṭhabbā. Tenāha “**tatthā**”tiādi. **Appetum na sakkoti** anāciṇṇabhāvato.

Taṃ vitakkentoti “sāmaṇerassa senāsanam natthi, araññaṇca sīhādīhi sapaṇissayam, kiṃ nu kho tassa bhavissati”ti taṃ vitakkento. **Evarūpoti** ediso yathāvuttasāmaṇerasadiso khīṇāsavo. **Ime dhammeti** imasmim sutte āgate silādiddhamme. **Āvajjītvāvāti** attano parisuddhasīlatādiāvajjanahetu eva samāpajjitum sakkhissati.

78. “**Yeme, bho gotamā**”ti vacanassa sambandham dassetum, “**tathāgate kirā**”tiādi vuttaṃ. **Evanti** “yeme, bho gotamā”tiādiākārehi **vattumāraddho**.

Ajjadhammesūti apurātanadhammesu. Takkanamattāni hi tehi kappetvā sayamṇaṭṭibhānam viracitāni. Purātanatāya paripuṇṇatāya ekantaniyyānikatāya ca paramo uttamo. Tenāha – “tesu...pe...uttamoti attho”ti. Sesam suviññeyyameva.

Gaṇakamoggallānasuttavaṇṇanāya līnatthappakāsanā samattā.

8. Gopakamoggallānasuttavaṇṇanā

79. Kammaṃyeva kammanto, so ettha atthīti kammakaraṇaṭṭhānam “**kammanto**”ti vuttaṃ. Tenāha “**kammantaṭṭhāna**”nti. **Tehi dhammehīti** buddhaguṇehi. Te pana sabbaññutaññāṇappamukhāti katvā āha “**sabbaññutaññāṇadhammehī**”ti. **Sabbena sabbanti** sabbappakārena anavasesam, ettako guṇānam pakārabhedo, tesu kiñcipi pakāram anavasesetvā. **Sabbakoṭṭhāsehi sabbanti** yattakā guṇabhāgā, tehi sabbehi anavasesam nissesameva katvā. **Yopi ahosīti** yopi kosambivāsīnam bhikkhūnam vasena kosambiyam kalaho ahosi. **Sopi tattheva** uppanaṭṭhāneyeva uppannamatto vūpasamito. **Parinibbutakāle panassāti** assa sammāsambuddhassa parinibbutakāle pana. Bhiyyosomattāya bhikkhū samaggā jātā, kathaṇca saṃvego jātoti dassetum “**aṭṭhasaṭṭhī**”tiādi vuttaṃ. Sātisayam abhiññaṇca upasamappattiyā **atvīya upasantupasantā**. **Anusamāyāmanoti** anu anu sammadeva jānanto vicārento vosāsamāno. “Anusaññāyamāno”ti vā pāṭho. Tattha ya-kārassa ña-kāram katvā niddesoti āha “**anuvicaramāno**”ti.

80. **Heṭṭhimapucchamevāti** gopakamoggallānena pucchitapucchameva. So hi “tehi

dhammehī”tiādīnā, “atthi koci tumhākaṃ sāsanaṃ sārabhūto bhikkhū”ti pucchi. Ayañca tameva “paṭisaraṇo”ti pariyaṇena pucchi. **Appaṭisaraṇeti** yaṃ tumhe bhikkhuṃ paṭibodheyyātha, tādisassa abhāvena appaṭisaraṇe. Tathāgatena pavedito dhammo paṭisaraṇaṃ etesanti **dhammapaṭisaraṇā**. Tenāha “**dhammo avassayo**”ti.

81. Āgacchatīti vācuggatabhāvena āgacchati. Vatthuvītikkamasāṅkhāte garugarutalalulaluhutarādibhede ajjhācāre āpattisamaññāti āha – “**āpatti...pe... āṇātikkaṃ namevā**”ti. **Yathādhamaṃti** dhammānurūpaṃ. **Yathāsiṭṭhanti** yathānusiṭṭhaṃ. **Dhammo noti** ettha **no-saddo** avadhāraṇe “na no samaṃ atthi tathāgatena”tiādīsu (khu. pā. 6.3; su. ni. 226) viya. Tenevāha “**dhammova kāreti**”ti.

83. “Yathā taṃ tumhādisehi rakkhakehi gopakehī”ti evaṃ pasannavesena attānaṃ ukkaṃsāpetukāmo. Ariyūpavādapāpaṃ khamāpane sati antarāyāya na hotīti āha – “**iccetam kusala**”nti. **Gonaṅgalamakkaṭoti** gonaṅguṭṭhamakkaṭo.

84. Ayaṃ ukkaṃsāpetuṃ icchitaṃ yathāraddhamatthaṃ viṣaṃvādeti avaṇṇitampi vaṇṇitaṃ katvā kathento; imassa vacanassa paṭikkhepena iminā dātabbapiṇḍapātassa antarāyo mā hotīti evaṃ piṇḍapātaṃ rakkhituṃ na kho pana sakkāti yojanā. **Idanti** “na kho, brāhmaṇa, so bhagavā”tiādīdesanaṃ. **Abbhantaram karitvāti** nibbānantogadhaṃ katvā, antaraṃ vā tassa nijjhānassa kāraṇaṃ katvā. Kāmarāgavasena hi taṃ nijjhānaṃ hotīti. **Idhāti** imasmiṃ suttapadesa. **Sabbasaṅgāhikajjhānanti** lokiyalokuttarassa antarāyo mā hotīti evaṃ katvāpi rūpāvacarassa maggajhānassa phalajhānassāti sabbassapi saṅgaṇhanavasena desitattā sabbasaṅgāhikajjhānaṃ nāma kathitaṃ.

Yaṃ no mayanti ettha **noti** nipātamattaṃ. **Taṃ noti** ettha pana **noti** amhākanti attho. **Usūyati** rājakkapasutatādhīnatāya ekatthābhīnivesabhāvato. Mandapaññatāya vassakāragataissābhībhūtacittatāya paripuṇṇaṃ katvā vuttampi atthaṃ anupadhārento āha – “**ekadesameva kathesi**”ti. Sesam suviññeyameva.

Gopakamoggallānasuttavaṇṇanāya līnatthappakāsanā samattā.

9. Mahāpuṇṇamasuttavaṇṇanā

85. Tasmim ahūti tasmim ahanīti āha “**tasmim divase**”ti. **Anasanenāti** sabbaso āhārassa abhuñjanena sāsānikasīlena bāhirakaanasanaṃ upetā hutvāti yojanā. **Vā-saddena** khīrapānamadhusāyanādividhiṃ saṅgaṇhāti. Upecca vasitabbato **uposatho**, pātimokkhuddeso. Upetena samannāgatena hutvā vasitabbato santāne vasetabbato **uposatho**, sīlaṃ. Anasānādidhammādiṃ vā upecca vasanaṃ upavāso **uposatho**. Tathārūpe hatthijātivisesa uposatho samaññāmatanti āha – “**uposatho nāma nāgarājātiādīsu paññatti**”ti. Vuttanayena upavasanti etthāti **uposatho**, divaso. **So panesa** uposatho. **Māsapuṇṇatāyāti** māssa pūritabhāvena. **Sampuṇṇāti** sabbaso puṇṇā. Tāya hi rattiyā vasena māso anavasesato puṇṇo hoti. Māsaddhamāsādibhedam kālam māti minanto viya hotīti ca “**mā**”iti **cando vuccati**. Etthāti etissā rattiyā. Puṇṇo paripuṇṇakalo jātoti **puṇṇamā**. Tañhi candapāripūriyā māsapāripūriyā evamāha. Etena tassa uposathabhāvaṃ dasseti.

Dissati phalaṃ sandissatīti **deso**, hetūti āha “**desanti kāraṇa**”nti. **Sabbaṃ kathenti** sabbaṃ attanā pariggahitappakāraṃ kathenti. **Kathetuṃ na sakkonti** avisayattā. **Pāsādapariveṇeti** pāsādassa purato vivaṅgaṇe. **Heṭṭhā vuttanayenāti** sekhasutte (ma. ni. aṭṭha. 2.22) vuttanayena vitthāretabbaṃ.

86. Ime nu khoti ettha nūti saṃsayajotanoti āha – “**vimatipucchā viya kathitā**”ti. **Jānantenāti**ādi pucchāvattadassanaparaṃ daṭṭhabbaṃ, na pucchakassa satthu attano ajānanabhāvadīpanaparaṃ. Jānāti hi bhagavā. **Ajānantena viya hutvā** pucchite. Yathābhūtasabhāvaṃ **jānanto viya pucchati** kohaññe

thatvā. Tenāha – **“thero evarūpaṃ vacanaṃ kiṃ karissatī”**ti kāraṇassa supphānattāti adhippāyo.

Chandamūlakāti taṇhāchandamūlakā. Taṇhā hi dukkhasamudayo. Kusalasañño vā thiravisadanipuṇasañño vā, kusalasaṅkhāro vā tikhiṇathiravisadasaṅkhāro vā; suvisuddhavipulodāraviññāno vāti imamatthaṃ **“saññādīsipi eseva nayo”**ti iminā atidisati. Kasmā panettha anāgatakālavaseneva desanā āgatāti āha **“yasmā panā”**tiādi.

Khandhānaṃ khandhapaṇṇatīti khandhasaddābhidheyānaṃ ruppanānubhavanasañjānanābhisaṅkharavijānanasabhāvānaṃ atthānaṃ **“kandho”**ti ayam sannaññā. **Kittakenā**ti kiṃparimāṇena atthēna, rāsathabhāgatthādīsū kīdisenāti adhippāyo.

Hetuhetūti hetupaccayabhūto hetu. Yo hi lobhādīnaṃ sahaṃjātadhammesu mūlaṭṭhenupakārahāvo nipariyāyena hetuttho; so pathavīdīsipi paccayabhāvamattena hetupariyāyadassanato dutiyena hetu-saddena visesetvā vutto **“hetuhetū”**ti. Avijjā puññābhisaṅkhārādīnaṃ sādāraṇapaccayattā sādāraṇahetu, **“atītānāgatapaccuppanānaṃ kammaṃ samādānaṃ thānaso hetuso vipāka”**nti ettha vijjamaṇesu pi aññesu paccayesu iṭṭhāniṭṭhaviṭṭhāniyāmakattā kammaṃ tassa padhānakāraṇanti āha – **“kusalākusalaṃ attano attano vipākadāne uttamahetū”**ti. **“Mahābhūtā hetū”**ti ayamevattho **“mahābhūtā paccayo”**ti imināpi vuttoti hetusaddapaccayasaddānaṃ samānatthattā paccayo eva hetu **paccayahetu**, yo ca rūpakhandhassa hetu, so eva tassa paññāpanāya paccayoti vuttoti āha – **“idha paccayahetu adhippeto”**ti. Yadaggena paccayadhammo attano paccayuppanassa uppādāya thitīyā ca paccayo, tadaggena tassa bhāvato sannaññāto paññāpanāyapi so paccayoti vattabbaṃ arahatīti. Pāḷiyam avibhāgena vuttamatthaṃ vibhāgena dassetuṃ, **“tatha pathavīdhātū”**tiādi vuttaṃ. Tatha **paññāpanāyā**ti sahetuahetukantiādiākārehi bodhanāya. Taṃ pana sabbodhanaṃ ṇāṇena dassanaṃ hotīti vuttaṃ **“dassanatthāyā”**ti.

Phassoti phassasamaṅgībhāvo. So cettha sakiccanipphādanasamatthassa phassassa nibbatti. Nibbatto hi phasso tathārūpāya vedanāya paccayo hotīti. Etadatthamevettha bhagavatā puggalādhiṭṭhānā desanā katā, tasmā paccuppanāṭītakālavasena dvikālīko phassasaddo vedītabbo. Phasse satī vedetī phassapaccayā vedanāiceva vuttaṃ hoti. Sesapadadvayepi eseva nayo. Yatheva hi vedanāya evaṃ saññāya saṅkhārānaṃ pi phasso visesapaccayo tasmim asati abhāvato. Cetaṇaggahaṇena āyūhanānurūpatāya tappadhānattā saṅkhārakkhandhadhammā gahitā. Tathā hi suttantabhājanīye saṅkhārakkhandhabhājanīye (vibha. 21, 22) ca **“cakkhusamphassajā cetanā”**tiādinā cetanāva niddiṭṭhā. **Viññāṇakkhandhassā**ti ettha ekasmiṃ bhavē ādibhūtaviññāṇassa nāmarūpapaccayataṃ dassetuṃ, **“paṭisandhiviññāṇena tāvā”**tiādi vuttaṃ. Tatha gabbhaseyyakassa sabhāvakassa rūpapavattim sandhāya **“uparimāparicchedenā”**ti vuttaṃ samatimsato upari paṭisandhikkhaṇe tassa rūpānaṃ asambhavato. Idāni pavattiviññāṇassa nāmarūpapaccayaṃ dvāravasena dassetuṃ, **“cakkhudvāre”**tiādi vuttaṃ. Nanu ca viññāṇassapi phasso paccayo, kasmā tayo eva khandhā phassapaccayā vuttāti? Saccametam, yathā pana viññāṇasahito phasso vedanādīnaṃ paccayo, na evaṃ viññāṇassa. Tenāha bhagavā – **“tiṇṇaṃ saṅgati phasso”**ti (ma. nī. 1.204; ma. nī. 3.421, 425, 426; sam. nī. 2.44, 45; 2.4.60) phasso viya nāmarūpaṃ viññāṇassa visesapaccayo yathā nāmarūpapaccayāpi viññāṇanti. Tasmā imaṃ visesaṃ dassetuṃ nāmarūpasseva viññāṇapaccayatā vuttā, na phassassa.

87. Yāva sakkāyadīṭṭhi samuppajjati, tāva vaṭṭassa pariyaṇto natthevāti appahīnasakkāyadīṭṭhiko vaṭṭe paribbhamaṭīti āha – **“kathaṃ pana, bhanteti vaṭṭaṃ pucchanto”**ti. Yathā ca sakkāyadīṭṭhijotānā vaṭṭapucchā, evaṃ tabbhedanajotānā vivaṭṭapucchāti āha – **“sakkāyadīṭṭhi na hotīti vivaṭṭaṃ pucchanto”**ti.

88. Ayam rūpe assādoti yāthāvato dassanaṃ pariññābhisaṃmayo, dukkhasaccapariyāpannañca rūpanti āha – **“iminā pariññāpaṭivedho ceva dukkhasaccañca kathita”**nti. **“Yam rūpaṃ**

anicca’’ntiādivacanato aniccādhībhāvo tattha ādīnavo, so cassa paccayādhīnavuttitāya paccayo samudayasaccanti samudayappahānena ādīnavasamatikkamoti ādīnavaggahaṇena siddhamatthamāha – “**pahānapaṭivedho ceva samudayasaccañcā**’’ti. Sabbasaṅkhatanissaraṇaṃ nibbānaṅca sacchikiriyābhisamayavasena paṭivijjhitaḥḥanti āha – “**iminā sacchikiriyāpaṭivedho ceva nirodhasaccañcā**’’ti. **Imesu tīsu ṭhānesūti** yathāvuttesu dukkhādīsū tīsu abhisamayāṭṭhānesu. **Ye sammādiṭṭhiādayo dhammāti** ye ariyamaggasaññitā sammādiṭṭhiādayo aṭṭha, satta vā dhammā. **Bhāvanāpaṭivedho maggasaccanti** bhāvanābhisamayavasena pavattaṃ maggasaccaṃ. **Sesapadesupīti**, “ayaṃ vedanāya assādo’’tiātipadesupī.

89. Imasminti āsannapaccakkhatāya sakaattabhāvo gahito, tadeva ajjhataṅṭā khandhāti tappāyogitāya, “**bahiddhāti parassa saviññāṇake kāye**’’ti vuttaṃ. **Sabbanimittesūti** sabbesu rūpanimittādīsūpi. Tāni pana indriyabaddhānīpi anindriyabaddhānīpi taṃsabhāvānīti āha “**anindriyabaddhampi saṅgaṇhāti**’’ti. Viññāṇaggahaṇenevettha vedanādayopī gahitā avinābhāvatoṭi, “**saviññāṇake kāye**’’ti vuttaṃ. “**Kāyo**’’ti vā khandhasamūhoti attho.

90. Anattani ṭhatvāti attarahite anattasabhāve khandhakoṭṭhāse ṭhatvā taṃ ādhāraṃ katvā **katāni** kammāni. **Katarasmim attani ṭhatvāti** kīdise attani nissayavipākaṃ dassanti vipaccissanti. Etena kārakavedakarāhitattā attapakkhakammakāni na yujjantīti dasseti, khandhānaṃ khaṇikattā ca katanāsaakatabbhāgamadoso ca āpajjantīti.

Tatrāyaṃ (itivu. aṭṭha. 74; sāratta. ṭī. 1.5) codanāsodhanāvidhī – pāṇātipātavasena tāva kammāpathasambandhavibhāvanā, khaṇe khaṇe hi nirujjhanasabhāvesu saṅkhāresu ko hanti, ko vā haññati, yadi cittacetāsikasantāno, so arūpattā na chedanābhedanādivasena vikopanasamattho, nāpi vikopānīyo. Atha rūpasantāno, so acetanattā kaṭṭhakaliṅgarūpamoti na tattha chedanādinā pāṇātipātāpuññaṃ pasavati yathā matasarīre. Payogopī pāṇātipātassa paharaṇappahārādiko atītesu vā saṅkhāresu bhavēyya, anāgatesu, paccuppannesu vā, tattha na tāva atītānāgatesu sambhavati tesam abhāvato, paccuppannesu ca saṅkhārānaṃ khaṇikattā saraseneva nirujjhanasabhāvātāya vināsābhīmukhesu nippayojano payogo siyā, vināsassa ca kāraṇarahitattā na paharaṇappahārādippayogahetukaṃ maraṇaṃ, nirīhakatāya ca saṅkhārānaṃ kassa so payogo? Khaṇikattā vadhāhippāyasamakālabhijjanakassa kiriyāpariyosānakālānavatṭhānato kassa pāṇātipātakammabaddhoti?

Vuccateyathāvuttavadhakacetanāsahito saṅkhārapuñño sattasaṅkhāto hanti. Tena pavattitavadhappayoganimittaṃ apagatausmāviññāṇajīvitindriyo matavohārapavattinibandhano yathāvuttavappayogakaraṇe uppajjanāraho rūpārūpadhammasamūho haññati, kevalo vā cittacetāsikasantāno. Vadhappayogāvisayabhāvepi tassa pañcavokārabhave rūpasantānādhīnavuttitāya rūpasantāne parena payojitajīvitindriyupacchedakapayogavasena tannibhattitavibandhakavisadirūpuppattiyā vigate vicchedo hotīti na pāṇātipātassa asambhavo; nāpi ahetuko pāṇātipāto, na ca payogo nippayojano paccuppannesu saṅkhāresu katappayogavasena tadanantaraṃ uppajjanārahassa saṅkhārakālāpassa tathā anuppattito. Khaṇikānaṃ saṅkhārānaṃ khaṇikamaraṇassa idha maraṇabhāvena anadhippetattā santatimaraṇassa ca yathāvuttanayena sahetukabhāvato na ahetukaṃ maraṇaṃ; na ca katturahito pāṇātipātappayogo nirīhakesupī saṅkhāresu sannihitatāmattena upakārikesu attano attano anurūpaphaluppādane niyatesu kāraṇesu kattuvohārasiddhito yathā – “padīpo pakāseti, nisākaro candimā’’ti. Na ca kevalassa vacādhīppāyasahabhuno cittacetāsikakālāpassa pāṇātipāto icchito santānavasena avatṭhitasseva paṭijānanato; santānavasena pavattamānānaṅca padīpādīnaṃ atthakiriyasiddhī dissatīti attheva pāṇātipātena kammunā baddho; tato eva yasmim santāne pāṇātipātacetanā pavattā; tattheva santāne paccayantarāsamavāyena bhavantare nirayādīsū tassā phalappavattīti nattheva katavināso akatabbhāgamato ca. Iminā nayena adinnādānādīnaṅca vasena yathārahaṃ kammāpathasambandhavibhāvanā veditabbāti.

Sabbo diṭṭhiggāho taṇhāvasagatasseva hotīti āha “**taṇhādhīpateyyenā**”ti. **Tesu tesu dhammesūti** mayā desiyamānadassanadhammesu. **Pakatikammaṭṭhānanti** tassa therassa santike gahetvā parihariyamānakammaṭṭhānaṃ. **Aññaṃ navakammaṭṭhānanti** bhagavato desanānūsārena gahitaṃ aññaṃ navaṃ kammaṭṭhānaṃ. Sesam suviññeyyameva.

Mahāpuṇṇamasuttavaṇṇanāya līnatthappakāsanā samattā.

10. Cūlapuṇṇamasuttavaṇṇanā

91. Tuṇhībhūtaṃ tuṇhībhūtanti āmedītavacanaṃ byāpanicchāvasena vuttanti āha – “**yaṃ yaṃ disa**”ntiādi. **Anuviloketvāti** ettha **anusaddopi** byāpanicchāyamevāti anu anu viloketvāti attho. Tenevāha – “**tato tato viloketvā**”ti. Asanto nīco purisoti **asappurisoti** āha – “**pāpapuriso lāmakapuriso**”ti. **Soti** asappuriso. **Tanti** asappurisaṃ **jānituṃ na sakkoti** asappurisdhammānaṃ yāthāvato ajānānato. **Pāpadhammasamannāgatoti** kāyaduccarītādiasantuṭṭhitādilāmakadhammasamannāgato. Asappurise bhatti etassāti **asappurisabhatti**. Tenāha – “**asappurisevano**”ti. Asappurisdhammo asappuriso uttarapadalopena, tesam cintanasīloti **asappuriscintī**. Tenāha “**asappuriscintāya cintako**”ti, duccintitacintīti attho. **Asappurisaṃmantananti** asādhujanavicāraṃ asappurisaṃvīmaṃsaṃ. **Asappurisaṃvācanti** catubbidham dubbhāsitaṃ. **Asappurisaṃkammaṃ** nāma tividdhampi kāyaduccaritaṃ. **Asappurisaṃdiṭṭhi** nāma visesato dasavatthukā micchādiṭṭhi, tāya samannāgato **asappurisaṃdiṭṭhiyā samannāgato, asappurisaṃdānaṃ** nāma asakkaccadānādi. Sabbopāyamattho pālito eva viññāyati.

“Pānaṃ hanissāmī”tiādikā cetanā kāmam parabyābādhāyapi hotiyeva, yathā pana sā attano balavataradukkhathāya hoti, tathā na parassāti imamatthaṃ dassetuṃ, “**attano dukkhathāya cinteti**”icceva vutto. **Yathā asuko asukantiādihi** pāpako pāpavipākekedesaṃ balavaṃ garutaraṃ vā paccanubhontopi yathā paro paccanubhoti, na tathā sayanti dasseti. Tenāha “**parabyābādhāyā**”ti. **Gahetvāti** pāpakiriyāya sahāyabhāvena gahetvā.

Asakkaccanti anādaraṃ katvā. Deyyadhammassa asakkaraṇaṃ appasannākāro, puggalassa asakkaraṇaṃ agarukaraṇanti imamatthaṃ dassento, “**deyyadhammaṃ na sakkaroti nāmā**”tiādimāha. **Acittīkatvāti** na citte katvā, na pūjetvāti attho. Pūjento hi pūjetabbavatthum citte ṭhapeti, tato na bahi karoti. Cittam vā acchariyaṃ katvā paṭipatti **cittīkaraṇaṃ**, sambhāvanakiriyā. Tappaṭikkhepatto **acittīkaraṇaṃ**, asambhāvanakiriyā. **Apaviddhanti** ucchiṭṭhādichaddānīyadhammaṃ viya avakhittakaṃ. Tenāha – “**chaddetukāmo viyā**”tiādi. **Rogaṃ pakkipanto viyāti** rogikasarīraṃ odanādīhi pamajjitvā vammike rogaṃ pakkipanto viya. Addhā imassa dānassa phalaṃ mameva āgacchatīti evaṃ yassa tathā diṭṭhi atthi, so āgamanadiṭṭhiko, ayaṃ pana na tādisoti āha “**anāgamanadiṭṭhiko**”ti. Tenāha – “**no phalapāṭikaṅkhī hutvā detī**”ti.

Kāmañcāyaṃ yathāvuttapuggalo asaddhammādīhi pāpadhammehi samannāgato, tehi pana sabbehipi micchādassanaṃ mahāsāvajanti dassetuṃ, “**tāya micchādiṭṭhiyā niraye upapajjati**”ti vuttaṃ. **Vuttapaṭipakkhanayenāti** kaṇhapakkhe vuttassa atthassa vipariyāyena sukkapakkhe attho veditabbo. “Sadevakaṃ loka”ntiādisu (pārā. 1) devasaddo chakāmāvacaradevesu, evamidhāti āha “**chakāmāvacaradevā**”ti. Tattha brahmānaṃ visuṃ gahitattā kāmāvacaradevaggahaṇanti ce? Idha dānaphalassa adhippetattā kāmāvacaradevaggahaṇaṃ, tathāpi chakāmāvacaraggahaṇaṃ daṭṭhabbaṃ devamahattatādivacanato. **Tiṇṇaṃ kulānaṃ sampattīti** khattiyamahattādīnaṃ tiṇṇaṃ kulānaṃ sampatti, na kevalaṃ kulasampadā eva adhippetā, atha kho tattha āyuvāṇṇayasabhogaissariyādisampadāpi adhippetāti daṭṭhabbaṃ uḷārassa dānamayapuññaṃ vasena tesampi samijjanato. **Suddhavaṭṭavaseneva kathitaṃ** sukkapakkhepi sabbaso vivaṭṭassa anāmaṭṭhattā. Saddhādayo hi lokiyakusalasambhārā evettha adhippetāti. Sesam suviññeyyameva.

Cūlapuṇṇamasuttavaṇṇanāya līnatthappakāsanā samattā.

Niṭṭhitā ca devadahavaggaṇṇanā.

2. Anupadavaggo

1. Anupadasuttavaṇṇanā

93. Iddhimāti guṇo pākaṭo paratoghosena vinā pāsādakampanadevacārikādīhi sayameva pakāsabhāvato; dhutavādādiguṇānampi tathābhāve eteneva nayena tesam guṇānaṃ pākaṭayogato ca paresam nicchitabhāvato ca. **Paññavato guṇāti** paññāpabhedapabhāvite guṇavisesse sandhāya vadati. Te hi yebhuyyena paresam avisayā. Tenāha – “**na sakkā akathitā jānitu**”nti. Visabhāgā sabhāgā nāma ayonisomanasikārabahulesu puthujjanesu, te pana appahīnarāgadosatāya parassa vijjamānampi guṇaṃ makkhetvā avijjamānaṃ avaṇṇameva ghosentīti āha – “**visabhāga...pe... kathenti**”ti.

Yā aṭṭhārasannaṃ dhātūnaṃ samudayato atthaṅgamato assādato ādīnavato yathābhūtaṃ pajānanā, ayaṃ **dhātukusalatā. Āyatanakusalatāyapi** eseva nayo. Avijjādīsu dvādasasu paṭiccasamuppādaṅgesu kosallaṃ **paṭiccasamuppādakusalatā**. Idam imassa phalassa ṭhānaṃ kāraṇaṃ, idam aṭṭhānaṃ akāraṇanti evaṃ ṭhānaṃca ṭhānato, aṭṭhānaṃca aṭṭhānato yathābhūtaṃ pajānanā, ayaṃ **ṭhānāṭṭhānakusalatā**. Yo pana imesu dhātūādīsu pariññābhīsamayādivasena nissāṅgagatiyā paṇḍāti laddhanāmena ñāṇena ito gato pavatto, ayaṃ **paṇḍito** nāmāti āha – “**imehi catūhi kāraṇehi paṇḍito**”ti. Mahantānaṃ atthānaṃ pariggaṇhanato mahatī paññā etassāti **mahāpañño**. Sesapadesupi eseva nayoti āha – “**mahāpaññādīhi samannāgatoti attho**”ti.

Nānattanti yāhi mahāpaññādīhi samannāgatattā thero “mahāpañño”tiādīnā kittiyati, tāsam mahāpaññādīnaṃ idam nānattaṃ ayaṃ vemattatā. Yassa kassaci (dī. ni. ṭī. 3.216; saṃ. ni. ṭī. 1.1.110; a. ni. ṭī. 1.1.584) visesato arūpadhammassa mahattaṃ nāma kiccāsiddhiyā veditabbanti tadassa kiccāsiddhiyā dassento, “**mahante sīlakkhandhe pariggaṇhātīti mahāpaññā**”tiādīmāha. Tattha hetumahantatāya paccayamahantatāya nissayamahantatāya pabhedamahantatāya kiccamahantatāya phalamahantatāya ānisaṃsamahantatāya ca sīlakkhandhassa mahantabhāvo veditabbo. Tattha **hetū** alobhādayo, **paccayā** hirottappasaddhāsativīriyādayo. **Nissayā** sāvakabodhipaccekabodhisammāsambodhiniyatatā taṃsamaṅgino ca purisavisesā. **Pabhedo** cārittādivibhāgo. **Kiccam** tadaṅgādivasena paṭipakkhassa vidhamanaṃ. **Phalam** saggasampadā nibbānasampadā ca. **Ānisaṃso** piyamanāpatādi. Ayamettha saṅkhepo, vitthāro pana visuddhimagge (visuddhi. 1.9) ākaṅkheyyasuttādīsu (ma. ni. 1.64 ādayo) ca āgatanayena veditabbo. Iminā nayena **samādhikkhandhādīnampi** mahantatā yathārahaṃ niddhāretvā veditabbā, **ṭhānāṭṭhānādīnaṃ** pana mahantabhāvo mahāvisayatāya veditabbo. Tattha ṭhānāṭṭhānānaṃ mahāvisayatā bahudhātukasutte (ma. ni. 3.124 ādayo) sayameva āgamissati. **Vihārasamāpattīnaṃ** samādhikkhandhe niddhāritanayena veditabbā, **ariyasaccānaṃ** sakalasāsanasaṅgahaṇato saccavibhaṅge (vibha. 189 ādayo) taṃsaṃvaṇṇanāsu (vibha. aṭṭha. 189 ādayo) āgatanayena. **Satipaṭṭhānādīnaṃ** vibhaṅgādīsu (vibha. 355 ādayo) taṃsaṃvaṇṇanādīsu (vibha. aṭṭha. 355 ādayo) ca āgatanayena. **Sāmaññaphalānaṃ** mahato hitassa mahato sukhasa mahato atthassa mahato yogakkhemassa nipphattibhāvato santapaṇītanipuṇaatakkāvacaṇḍitavedanīyabhāvato ca. **Abhiññānaṃ** mahāsambhārato mahāvisayatato mahākiccato mahānubhāvato mahānipphattito ca. **Nibbānassa** madanimmadanādīmahatthasiddhito mahantatā veditabbā.

Puthupaññāti etthāpi vuttanayānusārena attho veditabbo. Ayaṃ pana viseso – **nānākkhandhesu ñānaṃ pavattatīti**, “ayaṃ rūpakkhandho nāma...pe... ayaṃ viññānakkhandho nāmā”ti, evaṃ pañcannaṃ khandhānaṃ nānākaraṇaṃ paṭicca ñānaṃ pavattati. Tesupi “ekavidhena rūpakkhandho, ekādasavidhena rūpakkhandho, ekavidhena vedanākkhandho, bahavidhena vedanākkhandho, ekavidhena saññākkhandho...pe... ekavidhena viññānakkhandho, bahavidhena viññānakkhandho”ti evaṃ ekekassa khandhassa ekavidhādivasena atītādibhedavasenaṃ nānākaraṇaṃ paṭicca ñānaṃ

pavattati. Tathā “idaṃ cakkhāyatanam nāma...pe... idaṃ dhammāyatanam nāma. Tattha dasāyatanā kāmāvacarā, dve catubhūmakā”ti evaṃ āyatananānattam paṭicca ñāṇam pavattati.

Nānādhātūsūti “ayaṃ cakkhūdhātu nāma...pe... ayaṃ manoviññādhātu nāma. Tattha soḷasa dhātuyo kāmāvacarā, dve catubhūmakā”ti evaṃ nānādhātūso paṭicca ñāṇam pavattati. Tayidaṃ upādiṇṇakadhātuvāsena vuttanti veditabbaṃ. Paccekabuddhānañhi dvinnāṇa aggasāvakaṇam upādiṇṇakadhātūsyeva nānākaraṇam paṭicca ñāṇam pavattati. Tañca kho ekadesatova, no nippadesato, anupādiṇṇakadhātūnaṃ pana nānākaraṇam na jānantiyeva. Sabbaññubuddhānaṃyeva pana, “imāya nāma dhātuyā ussannattā imassa rukkhassa khandho seto hoti, imassa kaṇho, imassa bahalattaco, imassa tanuttaco, imassa pattaṃ vaṇṇasaṅghānādivāsena evarūpaṃ, imassa pupphaṃ nīlaṃ pītaṃ lohitaṃ odātaṃ sugandhaṃ duggandhaṃ, phalaṃ khuddakaṃ mahantaṃ dīghaṃ vaṭṭaṃ susaṅghānaṃ maṭṭhaṃ pharusam sugandhaṃ madhuraṃ tittakaṃ ambilaṃ kaṭukaṃ kasāvaṃ, kaṇṭako tikhiṇo atikhiṇo ujuko kuṭilo lohito odāto hoti”ti dhātunānattam paṭicca ñāṇam pavattati.

Atthesūti rūpādīso ārammaṇesu. **Nānāpaṭiccasamuppādesūti** ajjhatabhiddhābhedato santānābhedato ca nānappabhedesu paṭiccasamuppādaṅgesu. Avijjādiṅgānañhi paccekaṃ paṭiccasamuppādasāññitāti. Tenāha – saṅkhārapīṭake “dvādasa paccayā dvādasa paṭiccasamuppādā”ti. **Nānāsuññatamanupalabbhesūti** nānāsabhāvesu nīccasārādivirahato suññāsabhāvesu, tato eva itthipurisāattaattaniyādivāsena anupalabbhesu sabhāvesu. Ma-kāro hettha padasandhikaro. **Nānāatthesūti** atthapaṭisambhidāvisayesu paccayuppannādinānāatthesu. **Dhammesūti** dhammapaṭisambhidāvisayesu paccayādinānādhamesu. **Niruttisūti** tesamyeva atthadhammānaṃ niddhāraṇavacanasaṅkhātāso nānāniruttīso. **Paṭibhānesūti** ettha atthapaṭisambhidādīso visayabhūtesu, “imāni idamatthajotakāni”ti (vibha. 725-745) tathā tathā paṭibhānato paṭibhānānti laddhanāmesu ñāṇesu. **Puthu nānāsīlakkhandhesūti**ādīso sīlassa puthuttaṃ nānattañca vuttameva. Itaresaṃ pana vuttanayānusārena suviññeyyattā pākāṭameva. Yaṃ pana abhinnaṃ ekameva nibbānaṃ, tattha upacāravāsena puthuttaṃ gahetabbanti āha – “**puthu nānājanasādhāraṇe dhamme samatikkammā**”ti. Tenassa madanimmadanādiṇipariyāyena puthuttaṃ paridīpitaṃ hoti.

Evaṃ visayavasena paññāya mahattaṃ puthuttañca dassetvā idāni sampayuttadhammavasena hāsabhāvaṃ, pavattīkāravāsena javanabhāvaṃ, kiccavasena tikkhādibhāvañca dassetuṃ, “**katama hāsapaññā**”tiādi vuttaṃ. Tattha **hāsabahuloti** pītibahulo. Sesapadāni tasseva vevacanāni. **Sīlaṃ paripūretīti** haṭṭhapahaṭṭho udaggudaggo hutvā pītisahagatāya paññāya. Pītisomanassasahagatā hi paññā abhirativāsena ārammaṇe phullā vikasitā viya pavattati; na upekkhāsahagatāti pātīmokkhasīlaṃ ṭhapetvā hāsaniyaṃ paraṃ tividhampi sīlaṃ paripūretīti attho. Visuṃ vuttattā puna **sīlakkhandhamāha**. **Samādhikkhandhanti**ādīsupi eseva nayo.

Rūpaṃ aniccato khippaṃ javatīti rūpakkhandhaṃ aniccanti sīghaṃ vegena pavattiyā paṭipakkhadūrībhāvena pubbābhisaṅkhārassa sātisayattā indena vissaṭṭhavajiraṃ viya lakkhaṇaṃ paṭivijjhantī adandhāyantī rūpakkhandhe aniccalakkhaṇaṃ vegasā paṭivijjhanti, tasmā sā **javanapaññā** nāmāti attho. Sesapadesupi eseva nayo. Evaṃ lakkhaṇārammaṇikavipassanāvasena javanapaññaṃ dassetvā balavavipassanāvasena dassetuṃ, “**rūpa**”ntiādi vuttaṃ. Tattha **khayaṭṭhenāti** yattha yattha uppajjati, tattha tattheva bhijjanato khayāsabhāvattā. **Bhayaṭṭhenāti** bhayānakabhāvato. **Asārakaṭṭhenāti** attasāravirahato nīccasārādivirahato ca. **Tulayitvāti** tulābhūtāya vipassanāpaññāya tuletvā. **Tīrayitvāti** tāya eva tīraṇabhūtāya tīretvā. **Vibhāvayitvāti** yāthāvato pakāsetvā pañcakkhandhaṃ **vibhūtaṃ katvā**. **Rūpanirodheti** rūpakkhandhassa nirodhabhūte **nibbāne** ninnapoṇapabbhāravāsena. Idāni sikhāppattavipassanāvasena javanapaññaṃ dassetuṃ, puna “**rūpa**”ntiādi vuttaṃ. Vuṭṭhānagāminivipassanāvasenāti keci.

Ñāṇassa tikkhabhāvo nāma savisesaṃ paṭipakkhasamucchindanena veditabboti, “**khippaṃ kilese chindatīti tikkhapaññā**”ti vatvā te pana kilese vibhāgena dassento, “**uppannaṃ kāmavitakka**”ntiādimāha. Tikkhapañño hi khippābhiñño hoti, paṭipadā cassa na calatīti āha –

“**ekasmim āsane cattāro ariyamaggā adhigatā hontī**”tiādi.

“Sabbe saṅkhārā aniccā dukkhā vipariṇāmadhammā saṅkhatā paṭiccasamuppannā khayadhammā vayadhammā nirodhadhammā”ti yāthāvato dassanena saccasampañivedho ijjhāti, na aññathāti kāraṇamukhena nibbedhikapaññaṃ dassetuṃ, “**sabbasaṅkhāresu ubbegabahulo hotī**”tiādi vuttaṃ. Tatha **ubbegabahuloti** vuttanayena sabbasaṅkhāresu abhiñhaṃ pavattasamvego. **Uttāsabahuloti** ñāṇutrāsavasena sabbasaṅkhāresu bahuso utrastamānaso. Tena ādināvānupassanamāha. **Ukkaṇṭhanabahuloti** pana iminā nibbidānupassanaṃ āha – **aratibahuloti**ādinā tassā eva aparāparuppattiṃ. **Bahimukhoti** sabbasaṅkhārato bahibhūtaṃ nibbānaṃ uddissa pavattañānamukho, tathā vā pavattitavimokkhamukho. Nibbijhanaṃ nibbedho, so etissā atthi, nibbijhatīti vā nibbedhā, sāva pañña **nibbedhikā**. Yaṃ panettha atthato avibhattaṃ, taṃ heṭṭhā vuttanayattā suviññeyyameva.

Pajjati etena vipassanādikoti **padaṃ**, samāpatti, tasmā **anupadanti** anusamāpattiyoti attho. **Padam** vā sammasanupagā dhammā vipassanāya pavattiṭṭhānabhāvato. Tenāha “**samāpattivāsena vā**”ti. **Jhānaṅgavasena vāti** jhānaṅgavasenāti ca attho. Aṭṭhakathāyaṃ pana kamattho idha padasaddo, tasmā anupadaṃ anukkamenāti ayamettha atthoti āha “**anupaṭipāṭiyā**”ti. **Dhammavipassananti** taṃtaṃsamāpatticittuppadapariyāpannānaṃ dhammānaṃ vipassanaṃ. **Vipassatīti** samāpattiyō jhānamukhena te te dhamme yāthāvato pariggahetvā, “itipi dukkhā”tiādinā sammasati. **Addhamāsena arahattaṃ patto** ukkaṃsagatassa sāvakānaṃ sammasanacārassa nippadesena pavattiyamānattā, sāvakaṃpāramiññaṃ ca tathā paṭipādetabbattā. **Evaṃ santepīti** yadipi mahāmogallānatthero na cirasseva arahattaṃ patto; dhammasenāpati pana tato cirena, evaṃ santepi yasmā mogallānattheropi mahāpañña, tasmā sārīputtattherova mahāpaññataroti. Idāni tamatthaṃ pākāṭataraṃ kātuṃ, “**mahāmogallānatthero hī**”tiādi vuttaṃ. Sammasanaṃ carati etthāti sammasanacāro, vipassanābhūmi, taṃ **sammasanacāraṃ**. **Ekadesamevāti** sakaattabhāve saṅkhāre anavasesato pariggahetuñca sammasituñca asakkantaṃ attano abhinīhārasamudāgataññaṃabalānurūpaṃ ekadesameva pariggahetvā sammasanto. Nanu ca “sabbam, bhikkhave, anabhiñānaṃ aparijānaṃ avirājayam appajahaṃ abhabbo dukkhakkhayāyā”ti (saṃ. nī. 4.26) vacanato vaṭṭadukkhato muccitukāmena sabbam pariññeyyam pariñānītābameva? Saccametaṃ, tañca kho sammasanupagadhammavasena vuttaṃ. Tasmā sasantānagate sabbadhamme, parasantānagate ca tesam santānavibhāgaṃ akatvā bahiddhābhāvasamāññato sammasanaṃ, ayam sāvakānaṃ sammasanacāro. Thero pana bahiddhādhammepi santānavibhāgena keci keci uddharitvā sammasi, tañca kho ñāṇena phuṭṭhamattaṃ katvā. Tena vuttaṃ – “**yaṭṭhikoṭiyā uppīlento viya ekadesameva sammasanto**”ti. Tatha ñāṇena nāma yāvata neyyam pavattitabbaṃ, tathā apavattanato “**yaṭṭhikoṭiyā uppīlento viyā**”tiādi vuttaṃ. Anupadadhammavipassanāya abhāvato “**ekadesameva sammasanto**”ti vuttaṃ.

Buddhānaṃ sammasanacāro dasasahasilokadhātuyaṃ sattasantānagatā, anindriyabaddhā ca saṅkhārāti vadanti, koṭisatasahassakavāḷesūti apare. Tathā hi addhattayavasena paṭiccasamuppadanayaṃ osarivā chattiṃsakoṭisatasahassamukhena buddhānaṃ mahāvajiraññaṃ pavattaṃ. Paccekabuddhānaṃ sasantānagatehi saddhiṃ majjhimadesavāsisattasantānagatā anindriyabaddhā ca sammasanacāroti vadanti, jambudīpavāsisattasantānagatāti keci. Dhammasenāpatinopi yathāvuttasāvakānaṃ vipassanābhūmiyeva sammasanacāro. Tatha pana thero sātisaṃ niravasesaṃ anupadadhammaṃ vipassi. Tena vuttaṃ – “**sāvakānaṃ sammasanacāraṃ nippadesaṃ sammasi**”ti.

Tatha “sāvakānaṃ vipassanābhūmi”ti ettha sukkhavipassakā lokiyābhiññappattā pakatisāvakā aggasāvakā paccekabuddhā sammāsambuddhāti chasu janesu sukkhavipassakānaṃ jhānābhiññāhi anadhigatapaññānepuññattā andhānaṃ viya icchitapadesokkamaṃ vipassanākāle icchikicchitadhammavipassanā natthi. Te yathāpariggahitadhammatteyeva ṭhatvā vipassanaṃ vadḍhenti. Lokiyābhiññappattā pana pakatisāvakā yena mukhena vipassanaṃ ārabhanti; tato añña vipassanaṃ vitthārikaṃ kātuṃ sakkonti vipulaññattā. Mahāsāvakā abhinīhārasampannattā tato sātisaṃ vipassanaṃ vitthārikaṃ kātuṃ sakkonti. Aggasāvakesu dutiyo abhinīhārasampanniyā

samādhānassa sātisayattā vipassanaṃ tatopi vitthārikam karoti. Paṭhamo pana tato mahāpaññatāya sāvakehi asādhāraṇam vitthārikam karoti. Paccekabuddho tehipi mahābhinihāratāya attano abhinihārānurūpaṃ tatopi vitthārikavipassanaṃ karonti. Buddhānaṃ, sammadeva, paripūritapaññāpāramipabhāvita-sabbaññutaññānādhigamanassa anurūpāyāti. Yathā nāma katavāvedhāparicayena sarabhaṅgasadisena dhanuggahena khitto saro antarā rukkhalaṭādisu asajjamāno lakkhaṇeyeva patati; na sajjati na virajjhati, evaṃ antarā asajjamānā avirajjhamānā vipassanā sammasanīyadhammesu yāthāvato nānāyehi pavattati. Yaṃ mahāñānanti vuccati, tassa pavattiākārabhedo gaṇato vuttoyeva.

Etesu ca sukkhavipassakānaṃ vipassanācāro khajjotapabhāsadiso, abhiññappattapakatisāvakānaṃ dīpapabhāsadiso, mahāsāvakānaṃ okkāpabhāsadiso, aggasāvakānaṃ osadhitārakāpabhāsadiso, paccekabuddhānaṃ candapabhāsadiso, sammāsambuddhānaṃ rasmisahassapaṭimaṇḍitasaradasūriyamaṇḍalasadiso upaṭṭhāsi. Tathā sukkhavipassakānaṃ vipassanācāro andhānaṃ yaṭṭhikoṭiyā gamanasadiso, lokiyābhiññappattapakatisāvakānaṃ daṇḍakasetugamanasadiso, mahāsāvakānaṃ jaṅghasetugamanasadiso, aggasāvakānaṃ sakaṭasetugamanasadiso, paccekabuddhānaṃ mahājaṅghamaggagamanasadiso, sammāsambuddhānaṃ mahāsakamaggagamanasadisoti veditaḅbo.

Arahattañca kira patvāti ettha kira-saddo anussavaladdhoyamatthoti dīpetuṃ vutto. **Patvā aññāsi** attano vipassanācārassa mahāvisayattā tikkhavisadasūrabhāvassa ca sallakkhaṇena. Kathaṃ paṇāyaṃ mahāthero dandhaṃ arahattaṃ pāpuṇanto sīghaṃ arahattaṃ pattato paññāya attānaṃ sātisayaṃ katvā aññāsīti āha – “**yathā hī**”tiādi. **Mahājaṭanti** mahājālasākhaṃ ativiya sibbitajālaṃ. **Yaṭṭhiṃ pana sāraṃ vā ujum vā na labhati** veṇuggahaṇe anuccinitvā veṇussa gahitattā. **Evamsampadanti** yathā tesu purisesu eko veṇuggahaṇe anuccinitvā veṇuyatṭhiṃ gaṇhāti, eko uccinitvā, evaṃ nipphattikaṃ. **Padhānanti** bhāvanānuyuñjanaṃ.

Sattasatṭhi nāṇānīti paṭisambhidāmagge (paṭi. ma. 1.73 mātikā) āgatesu tesattatiyā nāṇesu ṭhapetvā cha asādhāraṇañāṇāni sutamayañāṇāḍiṇi paṭibhānapaṭisambhidāñānapariyosānāni sattasatṭhi nāṇāni. Tāni hi sāvakehi pavicitabbāni, na itarāni. **Soḷasavidhaṃ paññanti** (saṃ. ni. aṭṭha. 3.5.379; saṃ. ni. ṭi. 3.5.379) mahāpaññādikā, navānupubbavīhārasamāpattipaññāti idaṃ soḷasavidhaṃ paññaṃ.

Tatrāti tassa. **Idaṃ hotīti** idaṃ dāni vuccamānaṃ anupubbasammasanaṃ hoti. **Vipassanākoṭṭhāsanti** vitakkādisammasitabbadhammavibhāgena vibhattavipassanābhāgaṃ.

94. Paṭhame jhāneti upasilese bhuttaṃ, tasmā **ye paṭhame jhāne dhammāti** ye paṭhamajjhānasamsatṭhā dhammāti attho. **Antosamāpattiyanti** ca samāpattisahagata cittuppāde samāpattisamaññaṃ āropetvā vuttaṃ. **Vavatthitāti** katavavatthanā nicchitā. **Paricchinnāti** nāṇena paricchinnā salakkhaṇato paricchijja nātā. **Oloketoti** nāṇacakkhunā paccakkhato passanto. **Abhiniropanaṃ** ārammaṇe cittassa āropanaṃ. **Anumajjanaṃ** ārammaṇe cittassa anuvicāraṇaṃ. **Pharaṇaṃ** pañitarūpehi kāyassa byāpanaṃ, vipphārikabhāvo vā. **Sātanti** sātamadhuratā. **Adhikkhepo** vikkhepassa paṭipakkhabhūtaṃ samādhānaṃ. **Phusanaṃ** indriyavisayaviññānassa tato uppajjitvā ārammaṇe phusanākārena viya pavatti. **Vedayitaṃ** ārammaṇānubhavanaṃ. **Sañjānanaṃ** nīlādivasena ārammaṇassa sallakkhaṇaṃ. **Cetayitaṃ** cetaso byāpāro. **Vijānanaṃ** ārammaṇūpaladdhi. **Kattukamyatā** cittassa ārammaṇena atthikatā. Tasmīṃ ārammaṇe adhimuccanaṃ, sannitṭhānaṃ vā **adhimokkho**. Kosajjapakkhe patituṃ adatvā cittassa paggaṇhanaṃ **paggāho**, adhiggahoti attho. **Ārammaṇaṃ upagantvā ṭhānaṃ**, anissajjanaṃ vā **upaṭṭhānaṃ**. Samappavattesu assesu sārathi viya sakiccapasutesu sampayuttetu ajjhupekkhanaṃ **majjhataṭā**. Sampayuttadhammānaṃ ārammaṇe anunayanaṃ saṃcaraṇaṃ **anunayo**. **Sabhāvatoti** yathābhūtasabhāvato. Soḷasannaṃ eva cettha dhammānaṃ gahaṇaṃ tesameva therena vavatthāpitabhāvato, te evassa tadā upaṭṭhahimsu, na itareti vadanti. Vīriyasatiggahaṇena cettha indriyabhāvasāmaññato saddhāpaññā; satiggahaṇeneva ekantānavajjabhāvasāmaññato passaddhiādayo cha yugaḷā; alobhādosā ca saṅgahitā

jhānacittuppadapariyāpannattā tesam dhammānaṃ. Therena ca dhammā vavattānasāmaññato āraddhā. Te na upaṭṭhahimsūti na sakkā vattunti apare.

Viditā uppajantīti uppādepi nesam vedanānaṃ pajānaṃ hotiyevāti attho. Sesapadadvayepi eseva nayo. Tam jānātīti tamñāṇo, tassa bhāvo **taṃñāṇatā**, ñāṇassa attasamvedananti attho. Tamsamāyogakkhamāhi sampayuttadhammā. **Ñāṇabahutāti** ñāṇassa bahubhāvo, ekacittuppāde anekañāṇatāti attho. Idāni tamevatthaṃ vivarituṃ, “**yathā hī**”tiādi vuttaṃ. **Na sakkā jānituṃ** ārammaṇakaraṇassa abhāvato. Asammohāvabodho ca idisassa ñāṇassa natthi. **Ekekameva** ñāṇaṃ **uppajati** tasmim̐ khaṇe ekasseva āvajjanassa uppajjanato, na ca āvajjanena vinā cittuppatti atthi. Vuttañhetam –

“Cullāsītisahassāni, kappā tiṭṭhanti ye marū;
Na tveva tepi jīvanti, dvīhi cittehi saṃyutā”ti. (mahāni. 10, 39) ca,

“Natthi citte yugā gahī”ti ca –

Vatthārammaṇānaṃ pariggahitatāyāti yasmiñca ārammaṇe ye jhānadhammā pavattanti, tesam vatthārammaṇānaṃ pageva ñāṇena paricchijja gahitattā. Yathā nāma migasūkarādīnaṃ āsayepariggahite tatra ṭhitā migā vā sūkarā vā tato uṭṭhānatopī āgamanatopī nesādassa sukhaggahaṇā honti, evaṃsampaadamidaṃ. Tenāha “**therena hī**”tiādi. **Tenāti** vatthārammaṇānaṃ pariggahitabhāvena. **Assāti** therassa. **Tesam dhammānanti** jhānacittuppadapariyāpannānaṃ dhammānaṃ. **Uppādam āvajjantassāti**tiādinā uppādādīsu yaṃ yadeva ārabba ñāṇaṃ uppajati; tasmim̐ tasmim̐ khaṇe tassa tasseva cassa pākaṭabhāvo dīpito. Na hi āvajjanena vinā ñāṇaṃ uppajati. **Ahutvā sambhontīti** pubbe avijjamānā hutvā sambhavanti, anuppannā uppajantīti attho. **Udayam passati** tesam dhammānaṃ, “ahutvā sambhontī”ti uppādakkhaṇasamaṅgibhāvadassanato. Pubbe abhāvabodhako hi attalābho dhammānaṃ udayo. **Hutvāti** uppajjivā. **Paṭiventīti** paṭi khaṇe khaṇe vinassanti. **Vayam passati**, “hutvā paṭiventī”ti tesam dhammānaṃ bhaṅgakkhaṇasamaṅgibhāvadassanato. Viddhaṃsabhāvabodhako hi dhammānaṃ vijjamānato vayo.

Tesu dhammesu natthi etassa upayo rāgavasena upagamananti **anupayo**, ananurodho. Hutvā viharatīti yojanā. Tathā natthi etassa apāyo paṭighavasena apagamananti **anapāyo**, avirodho. “Etaṃ mama, eso me atthā”ti tassa taṇhādīṭṭhiabhiniवेशbhāvato taṇhādīṭṭhinissayehi **anissito**. **Appaṭibaddhoti** anupayānissitabhāvato vipassanāya paribandhavasena chandarāgena na paṭibaddho na vibandhito. **Vippamuttoti** tato eva vikkhambhanavimuttivasena kāmarāgato vimutto. **Visaṃyutto** vikkhambhanavaseneva paṭipakkhadhammehi visaṃyutto.

Kilesamariyādā tena katā bhaveyyāti antosamāpattiyam pavatte soḷasa dhamme ārabba pavattamānaṃ vipassanāvīthim̐ bhinditvā sace rāgādayo uppajjeyyūṃ; tassa vipassanāvīthiyā kilesamariyādā tena cittena, cittasamaṅginā vā katā bhaveyya. **Tesūti** tesu dhammesu. **Assāti** therassa. **Ekopīti** rāgādīsu ekopīti ca vadanti. Vuttākārena ekaccānaṃ anāpāthagamane sati vipassanā na tesu dhammesu nirantarappavattāti **ārammaṇamariyādā bhaveyya**. **Vikkhambhitapaccanīkattāti** vipassanāya paṭipakkhadhammānaṃ pageva vikkhambhitattā idānipi vikkhambhetabbā kilesā natthīti vuttaṃ.

Itoti paṭhamajjhānato. **Anantaroti** uparimo jhānādiviseso. **Tassa pajānanassāti**, “atthi uttari nissaraṇa”nti evaṃ pavattajānanassa. **Bahulikaraṇenāti** punappunaṃ uppādanena.

Sampasādanatthenāti kilesakālusiyāpagamanena, tassa vicārakkhobhavigamena vā cetaso sammadeva pāsādikabhāvena.

Vīriyam sati upekkhāti āgataṭṭhāne pārisuddhiupekkhā, adukkhamasukhāvedanāti ettha

jhānupekkhāti, “**sukhaṭṭhāne vedanupekkhāvā**”ti vuttaṃ. **Sukhaṭṭhāneti** ca paṭhamajjhānādīsu sukhasa vuttaṭṭhāne. **Passaddhattāti** samadhuracetayitabhāvena ārammaṇe viṣaṭavittathatabhāvato yo so cetaso ābhogo vutto. Sāmaññaphalādīsu satiyā pārisuddhi, sā thana atthato sativinimuttā natthīti āha “**pārisuddhāsatiyevā**”ti. **Pārisuddhiupekkhā**, na jhānupekkhādayo.

95. Īdisesu ṭhānesu satiyā na kadācīpi ñāṇaviraho atthīti āha – “**ñāṇena sampajāno hutvā**”ti. Tathā hi tatiyajjhāne, “satimā sukhavihārī”ti ettha sampajānoti ayamattho vutto eva hoti. **Na sāvakānaṃ anupadadhammavipassanā hoti** sañkhārāvesasasukhumappavattiyā duviññeyyattā vinibbhujitvā gahetuṃ asakkuṇeyyabhāvato. Tenāha – “**kalāpavipassanaṃ dassento evamāhā**”ti.

96. Paññāya cassadisvā āsavā parikkhīṇā hontīti dassanasamakālaṃ khīyamānā āsavā, “disvā parikkhīṇā hontī”ti vuttā. Samānakālepi hi ediso saddappayogo dissati –

“Cakkhuñca paṭicca rūpe ca uppajjati cakkhuviññāṇa”nti (ma. ni. 1.204, 400; 3.421, 425, 426; sam. ni. 2.43-45; 2.4.60; kathā. 465, 467).

“Nihantvā timiraṃ sabbaṃ, uggatejo samuggato;
Verocano rasmimālī, lokacakkhupabhaṅkaro”ti. (paṭṭhā. anuṭī. 1.25-34; visuddhi. mahāṭī. 2.580) ca –

Evamādīsu. Hetuattho vā ayaṃ **disvāsaddo** asamānakattuko yathā – “ghataṃ pivitvā balaṃ hoti, sīhaṃ disvā bhayaṃ hotī”ti (visuddhi. mahāṭī. 2.802). Dassanahetuko hi āsavānaṃ parikkhayo pariññāsacchikiriyābhāvanābhīsamaye sati pahānābhīsamayassa labbhanato. **Yuganaddhaṃ āharitvāti** paṭhamajjhānaṃ samāpajjitvā vuṭṭhāya tattha jhānadhamme sammasanto samathavipassanaṃ yuganaddhaṃ bhāveti. Evaṃ yāva nevasaññānāsaññāyatanam samāpajjitvā vuṭṭhāya tattha sammasanto samathavipassanaṃ yuganaddhaṃ katvā yathā thero arahattaṃ pāpuṇi. Taṃ sandhāya vuttaṃ – “**arahattaṃ pattavāro idha gahito**”ti. **Idhāti** imasmiṃ sutte. Dīghanakhasuttadesanāya (ma. ni. 2.205-206) hi thero arahattaṃ patto. Tadā ca anāgāmī hutvā nirodhaṃ samāpajjati vacanaavasaro natthi, tasmā vuttaṃ – “arahattaṃ pattavāro idha gahito”ti. Yadi evaṃ – “sabbaso nevasaññānāsaññāyatanam samatikkamma saññāvedayitanirodhaṃ upasampajja viharatī”ti idam kasmā vuttanti? There vijjamāne paṇḍitagūṇe anavasesato dassetvā arahattanikūṭena desanaṃ niṭṭhāpetuṃ. Nirodhasamāpajjanaṃ pana therassa āciññasamāciññaṃ. Tenāha “**nirodhaṃ pana...pe... vadantī**”ti. Tena phalasaṃpattimpī antarā samāpajjatiyevāti dasseti.

Vomissaṃ vivarituṃ “**tatthassā**”tiādi vuttaṃ. Tattha “nirodhaṃ samāpajjissāmī”ti ābhogena samathavipassanaṃ yuganaddhaṃ āharitvā ṭhitassa **nirodhasamāpatti sīsaṃ** nāma hoti, tassa ābhogavasena **nirodhassa vāro āgacchati. Phalasaṃpatti gūlho hoti**, “phalasaṃpattim samāpajjissāmī”ti ābhogassa abhāvato. **Phalasaṃpatti sīsaṃ hotīti** etthāpi vuttanayena attho veditabbo. Etena ābhogapaṭibaddhametesam āgamananti dīpitanti veditabbaṃ. **Jambudīpavāsino therā panātiādi aṭṭhakathāruḷhameva taṃ vacanaṃ. Antosaṃpattiyanti** nirodhaṃ samāpannakāle. **Tisamuṭṭhānikarūpadhammeti** utukammāhārasena tisamuṭṭhānikarūpadhamme.

97. Ciñnavasitanti paṭipakkhadūribhāvena subhāvitavasībhāvaṃ. **Nippattiṃ pattoti** ukkaṃsapariniṭṭhānaṃ patto. Ure vāyāmajanītāya **oraso. Pabhāvitanti** uppāditaṃ. **Dhammenāti** ariyamaggadhammena. Tassa hi adhigamena ariyāya jātiyā jāto nibbattoti katvā, “**dhammajjo dhammanimmito**”ti vuccati. **Dhammadāyassāti** navavidhassa lokuttaradhammadāyassa. **Ādiyanatoti** gaṇhanato, sasantāne uppādanatoti attho. Sesam suviññeyyameva.

Anupadasuttavaṇṇanāya līnatthappakāsanā samattā.

2. Chabbisodhanasuttavaṇṇanā

98. Khīṇā jātīti attano jātikkhayaṃ paṭijānantena arahattaṃ byākataṃ hoti arahato tadabhāvato. Tathā **vusitaṃ brahmacariyanti** maggabrahmacariyavāso me pariyoṣitoti paṭijānantenapi. **Kataṃ karaṇīyanti** catūhi maggehi catūsu saccesu pariññādivasena soḷasavidhassapi kiccassa attanā niṭṭhāpitabhāvaṃ paṭijānantenapi. **Nāparaṃ itthattāyāti** āyatim punabbhavābhāvaṃ, āyatim vā pariññādikaraṇīyābhāvaṃ paṭijānantenapīti āha – “**ekenapi padena aññā byākatāva hoti**”ti. Dvikkhattuṃ baddhaṃ pana subaddhaṃ viyāti vuttaṃ. **Idha pana aññābyākaraṇaṃ catūhi padehi āgataṃ**, tasmā vattabbameva cettha natthīti adhippāyo. **Cetanāya diṭṭhavādītā nāma** ariyavohāro. **Sabhāvoti** pakatiattho hi ayaṃ dhammasaddo, “jātidhammā jarādhammā”tiādīsu (ma. ni. 1.274-275) viya tasmā, **anudhammoti** ariyabhāvaṃ anugatā pakatīti attho. Paramappicchātāya ariyā attano guṇe anāvīkarontāpi sāsanaṃ niyyānikabhāvapavedanattāñceva sabrahmacārīnaṃ sammāpaṭipattiyāṃ ussāhajananattāñca tādīsānaṃ parinibbānasamayeyeva āvīkarontīti adhippāyenāha – “**parinibbutassa...pe... kātabbo**”ti.

99. Dubbalanti pheggu viya subhejjanīyaṃ balavirahitaṃ, asāranti attho. **Virāgutanti** palujjanasabhāvaṃ. **Vigacchanasabhāvanti** vināsagamanaṃ sabhāvaṃ. Aniccadukkhavipariṇāmatā assāsasassapi abhāvato **assāsavirahitaṃ**. Ārammaṇakaraṇavasena samannāgamanavasena ca yathārahaṃ upenti upagacchantīti **upayā**, “etaṃ mama, eso me attā”ti upādiyanti daḷhaggāhaṃ gaṇhantīti **upādānā**. Adhitiṭṭhati cetaso abhinandanabhūtāti **cetaso adhiṭṭhānaṃ**. **Tāhīti** taṇhādīṭṭhīhi. **Tanti** cittaṃ. **Abhinivisatīti** abhirativasena nivisati, ayañhettha attho – sakkāyadhammesu cittaṃ abhinivisati “etaṃ mamaṃ, eso me attā”ti ajjhosāya tiṭṭhati etāhi abhinivesāhi, tathā sakkāyadhammesu cittaṃ anuseti etāhīti **anusayā**, taṇhādīṭṭhiyo. Yadaggena hi tebhūmakadhammesu rāgādayo anuseti, tadaggena taṃsahagatadhammā tattha anusetīti pariyaēyena, “**taṃ anuseti**”ti vuttaṃ. **Khayā virāgāti** hetumhi nissakkavacananti “**khayena virāgenā**”ti hetumhi karaṇavasena attho vutto. **Virāgenāti** ca **itisaddo** ādi attho. Tena “nirodhenā”ti evamādikāṃ gahitaṃ hoti. **Aññamaññavevacanāneva** upayādīnaṃ samucchedasēva bodhanato.

100. Paṭiṭṭhāti ettha sesabhūtattayaṃ upādārūpañcāti paṭiṭṭhānā, nijjīvaṭṭhena dhātucāti **paṭiṭṭhānadhātu**. Nhānīyacūṇaṃ bāhiraudakaṃ viya sesabhūtattayaṃ ābandhatīti **ābandhanaṃ**. Pacanīyabhattaṃ bāhiratejo viya sesabhūtattayaṃ paripācetīti **paripācanaṃ**. Bāhiravāto viya sesabhūtattayaṃ vitthambhetīti **vitthambhanaṃ**. Dhātusaddattho vuttoyeva. **Asamphuṭṭhadhātūti** asamphusitabhāvo tesāṃ viparimaṭṭhatābhāvato. **Vijānanaṃ** ārammaṇūpaladdhi. **Ahaṃ attāti** ahaṃ, “rūpadhammo me attā”ti **attakoṭṭhāsena** attabhāvena **na upagamaṃ** na gaṇhim. Nissitanissitāpi nissitā eva nāmāti āha “**pathavīdhātunissitāvā**”ti. Attanā vā pana tannissitāti “**ekena pariyaēyena**”ti. Upādārūpampi kāmaṃ nissitampi hoti. Tathāpi taṃ nissitaṃ hotiyevāti taṃ na uddhaṭaṃ. Paricchedakarattā paricchedākāsassa “**avinibbhogavasena**”ti vuttaṃ. Tena ca tathā paricchinnattā **sabbampi bhūtupādārūpaṃ ākāsadhātunissitaṃ nāma**. Taṃ nissāya pavattiyā upādārūpaṃ viya bhūtārūpāni, arūpakkhandhā viya ca vatthurūpāni, “**taṃnissitarūpavatthukā arūpakkhandhā**”ti vuttanayena ākāsadhātunissitacakkhādirūpadhammavatthukā vedanādayo arūpakkhandhā ākāsadhātunissitā nāmāti imamatthaṃ **tathā**-saddena upasaṃharati. **Idhāpīti** ākāsadhātunissitapadepi, na pathavīdhātunissitapadādīsu eva. **Rūpārūpanti** sabbampi rūpārūpaṃ **gahitameva hoti**, aggahitaṃ natthi. **Sahajāta...pe... nissitanti** idaṃ nippariyāyasiddhaṃ nissayattaṃ gahetvā vuttaṃ. Hetṭhā vuttanayena pariyaēyasiddhe nissayatte gayhamāne – “pacchājātapaccayoti pacchājāta cittaacetasi kā dhammā purejātassa imassa kāyassa pacchājātapaccayena paccayo”ti (paṭṭhā. 1.1.11) vacanato sabbāṃ catusamuṭṭhānikarūpaṃ, “**viññāṇadhātunissita**”nti vattabbaṃ. Tathā anantaraviññāṇadhātupaccayā pavattanato, “**viññāṇadhātunissita**”nti vattabbaṃ.

101. Ruppanti vaṇṇavikāraṃ āpajjamānaṃ hadayaṅgatabhāvaṃ pakāsetīti **rūpanti** ayamattho cakkhudvāre āpāthagate rūpāyatane nippariyāyato labbhati, na āpāthamanāgate. Cakkhuvīññāṇavīññātabbhāvo pana āpāthamanāgatepi tasmim labbhateva taṃsabhāvānavatthananato. Rūpāyatanaṃ **dvidhā** vibhajitvā. Thero pana āpāthaṃ anāgatassāpi rūpāyatanaṃ rūpabhāvaṃ na sakkā paṭikkhipitunti dvidhākaraṇaṃ nānujānanto channovādaṃ nidasseti, “**upari channovāde kinti**

karissathā”ti. Tattha hi “cakkhum, āvuso channa, cakkhuviññāṇaṃ cakkhuviññāṇaviññātabbe dhamme”ti (ma. ni. 3.391) āgataṃ, na cettha cakkhudvāre āpāthaṃ āgatameva rūpāyatanam cakkhuviññāṇaviññātabbapadena gahitaṃ, na āpāthaṃ anāgatanti sakkā viññātuṃ aviseseneva rūpāyatanena taṇhāmānadiṭṭhigāhābhāvassa jotitattā. Tenāha “**na yidaṃ labbhatī**”ti. **Rūpamevāti** rūpāyatanameva. Yadi evaṃ “cakkhuviññāṇaviññātabbesu dhammesū”ti padaṃ kathaṃ netabbanti āha – “**cakkhuviññāṇasampayuttā panā**”tiādi. **Cakkhuviññāṇena saddhiṃ viññātabbesūti** yena manoviññāṇena cakkhuviññāṇaṃ aniccantiādinā cakkhuviññāṇena saddhiṃ tena viññātabbesu taṃsampayuttadhammesūti attho. **Taṇhāchandoti** tassanasabhāvo chando, na kattukamyatā chandoyevāti taṇhāchando. **Rajjanavasenāti** vatthaṃ viya raṅgajātaṃ cittassa anurañjanavasena. **Abhinandanavasenāti** ārammaṇe abhiraṃitvā nandanavasena. Sappītikataṇhā hi **nandīti** vuccati. Taṇhāyanavasena **taṇhā**.

102. Ahaṅkāroti “seyyohamasmī”tiādinā (dha. sa. 1121, 1239; vibha. 832, 866; saṃ. ni. 4.108; mahāni. 21, 178) ahaṅkaraṇaṃ. Yena hi mamaṃ karoti, etaṃ **mamaṅkāro**. **Svevāti** “ahaṅkāro”ti vuttamāno. Evaṃ catutthajjhāne niddiṭṭhe sabbāsu lokiyābhīññāsu vuccamānāsu heṭṭhā vijjādvayaṃ vattabbanti adhippāyena, “**pubbenivāsaṃ dibbacakkuṅca avatvā kasmā vutta**”nti āha? Itaro idha sabbavāresupi lokuttaradhammapucchā adhiatā tasmā “so evaṃ samāhite”tiādinā tatiyā vijjā kathitāti dassento, “**bhikkhū lokiyadhammaṃ na pucchantī**”tiādimāha. **Ekavissajjitasuttaṃ nāmetam** tatiyavijjāya eva āgatattā. Ariyadhammavasenaṇipissa samaññā atthevāti dassento, “**chabbisodhanantipissa nāma**”nti vatvā tesu dhammesu bhedaṃ dassetuṃ, “**ettha hī**”tiādi vuttaṃ. **Visuddhāti** tassā codanāya sodhanavasena visodhitā. **Ekameva katvāti** ekavāraseneva pāliyaṃ ekajjhaṃ āgatattā ekameva koṭṭhāsaṃ katvā. Yadi evaṃ kathaṃ vā chabbisodhanatāti āha – “**catūhi āhārehi saddhi**”nti kathaṃ panettha cattāro āhārā gahetabbāti? Keci tāva āhu – “sādhūti bhāsitaṃ abhinanditvā anumoditvā uttari pañho pucchitabbo”ti heṭṭhā āgatena nayena āhāravāro āharitvā vattabboti. “Bahiddhā sabbanimittesū”ti ettha āhārānampi saṅgahitattā āhārā atthato āgatā evāti aññe. Apare pana rūpakkhandhaggahaṇena kabalīkāro āhāro, saṅkhārakkhandhaggahaṇena phassāhāro, manosañcetanāhāraggahaṇena viññāṇāhāro sarūpatopi gahitoti vadanti.

“Chabbisodhana”nti imassa suttassa samaññāya anvatthataṃ dassetvā āyatimpī tādīsena byākaraṇena bhikkhūnaṃ paṭipattimpī dassanattam, “**ime panā**”tiādi āraddham. **Vinayaniddesapariyāyenāti** vinayaniddese āgatena kāraṇena. **Vinaye** vā āgataniddesānukkamena.

Adhigantabbato **adhigamo**, jhānādiadhigamapucchā. Tenāha – “**jhānavimokkhādisū**”tiādi. **Upāyapucchāti** adhigamopāyapucchā. **Kintīti** kena pakārena vidhināti attho.

Katamesaṃ tvaṃ dhammānaṃ lābhīti idaṃ pana pubbe “kiṃ te adhigata”nti aniddhāritabhedā jhānādivisesā pucchitāti idāni tesam niddhāretvā pucchānākāradassanaṃ. **Tasmāti** yasmā yathāvuttehi ākārehi adhigamabyākaraṇaṃ sodhetabbaṃ, tasmā. **Ettāvātāvāti** ettakena byākaraṇamatteneva na sakkāro kātabbo. Byākaraṇāñhi ekaccassa ayāthāvatopi hoti, yathā nāma jātarūpapatirūpaṃ jātarūpaṃ viya khāyatīti jātarūpaṃ nighaṃsanatāpanachedanehi sodhetabbaṃ evamevaṃ **imesu** idāneva vuttesu **chasu thānesu** pakkhipitvā **sodhanattam vattabbo vimokkhādisūti ādi**-saddena samādhi-samāpatti-ñānadassana-maggabhāvanā-phalasaṅgahāyā saṅgahāti.

Pākaṭo hoti adhigatavisesassa satisammosābhāvato. Sesapucchāsipi “pākaṭo hotī”ti pade eseva nayo. **Uggahaparipucchākusalāti** sajjhāyamaṅgasamvaṇṇanāsu nipuṇā. Yāya paṭipadāya yassa ariyamaggo āgacchati, sā pubbhāgapaṭipatti **āgamanapaṭipadā**. **Sodhetabbāti** suddhā udāhu asuddhāti vicāraṇavasena sodhetabbā. **Na sujhatīti** tattha tattha pamādapaṭipattibhāvato. **Apanetabbo** attano paṭiññāya. “**Sujhatī**”ti vatvā sujhanākāraṃ dassetuṃ, “**dīgharatta**”ntiādi vuttaṃ. **Paññāyatīti** ettha “yadi”ti padaṃ ānetvā yadi so bhikkhu tāya paṭipadāya yadi paññāyatīti sambandho. **Khīṇāsavapaṭipattisadisā paṭipadā hoti** dīgharattaṃ vikkhambhitakilesattā.

Nadiyā samuddaṃ pakkhandanaṭṭhānaṃ **nadīmukhadvāraṃ**. **Maddamānoti** badarasālavamaṃ sarasaṃ patte pakkhitto hutvā maddamāno. Sesamaṃ suviññeyyameva.

Chabbisodhanasuttavaṇṇanāya līnatthappakāsanā samattā.

3. Sappurisadhammasuttavaṇṇanā

105. Sappurisadhammanti sappurisabhāvakaraṃ dhammaṃ. So pana yasmā sappurisānaṃ paveṇiko dhammo hoti. Tasmā āha – “**sappurisānaṃ dhamma**”nti, esa nayo **asappurisadhammanti** etthāpi. Evaṃ padhānaṃ anuṭṭhātabbaṅca sappurisadhammaṃ ādiṃ katvā mātikaṃ ṭhapetvā ayathānupubbīyā niddisanto “**katamo ca, bhikkhave, asappurisadhammo**”tiādimāha. Tathā pana niddisanto udāharaṇapubbakaṃ hetuṃ dassetuṃ, “**yathā nāmā**”tiādi vuttaṃ. Tena icchitabbapariccāgapubbakaṃ gahetabbagahaṇaṃ nāma ñāyapaṭipatti, tasmā sappurisadhammā sampādetabbāti dīpento satthā ayathānupubbīyā niddhārīyatīti imamatthaṃ dasseti. Tathā aññatthāpi “asevanā ca bālānaṃ, paṇḍitānaṅca sevanā”ti. **Etadeva hi kuladvayaṃ “uccakula”nti vuccati** nipariyāyato. Tathāhi antimabhavikā bodhisattā tattheva paṭisandhiṃ gaṇhanti. **Soti sāmīcippaṭipanno** bhikkhu. **Antaraṃ karitvāti** taṃ kāraṇaṃ katvā. Paṭipadā hi viññūnaṃ pūjāya kāraṇaṃ, na uccakulīnatā. **Mahākulāti** vipulakulā upādītoditakulasampavattikāti attho.

106. Yasasaddo parivāravācako. **Yasassīti** ca sātisayaparivāravantatā vuccatīti āha “**parivārasampanno**”ti. Ādhīpateyyābhāvato paresamaṃ uparinatti etesaṃ īso īsanaṃ issariyanti akkhātabbāti **appesakkhā**. Tenāha “**appaparivārā**”ti. Abhāvatto hi idha **appa**-saddo.

107. Naveva dhutaṅgāni āgatānīti ettha yathā ukkaṭṭhapamaṃ sukūlikassa teṭṭavarikatā sukarā. Evaṃ ukkaṭṭhapiṇḍapātīkassa sapadānacārikatā sukarā. Ekāsanīkassa ca pattapiṇḍīkakkhalupacchābhattīkatā sukarā evāti – “pamaṃ sukūliko hoti”tiādivacaneneva pāḷiyā anāgatānampi āgatabhāvo vedītabbo parihaṇasukaratāya tesampi samādānasambhavato. Tenāha “**terasa hontī**”ti.

108. Kāmatanḥādīkāya tāya taṇhāya nibbattāti tammayā, puthujjanā, pakatibhāvūpagamanena tesamaṃ bhāvo tammayatā, tappatīkkhepato **atammayatā**, nittanḥatā. **Tamyeva kāraṇaṃ katvāti** paṭhamajjhānēpi taṇhāpahānaṃyeva kāraṇaṃ katvā. **Citte uppādetvāti** atammayatāpariyāyena vutte taṇhāya paṭipakkhadhamme sampādetvā. **Na maññatīti** maññānaṃ ariyamaggena sabbaso samucchinnattā kismiñci okāse kāmabhavādike kenaci vatthunā hatthiassakhetvatthādīnā pattacīvaravīhārapariveṇādīnā ca puggalaṃ na maññati. Sesamaṃ suviññeyyameva.

Sappurisadhammasuttavaṇṇanāya līnatthappakāsanā samattā.

4. Sevitabbāsevitabbasuttavaṇṇanā

109. Aññamaññanti aññaṃ aññaṃ. Tenāha “**aññaṃ sevitabba**”ntiādi. **Sattahi padehīti** sattahi vākyehi. Pajjati etena yathādhīpeto atthoti padaṃ, vākyamaṃ. **Sāriputtattherassa okāsakaraṇaṃ** dhammadāyāde (ma. ni. 1.31) vuttanayena vedītabbaṃ.

113. Diṭṭhiyeva paccayavasena paṭiladdhatāya **diṭṭhipaṭilābho**. **Saññāpaṭilābhepi** eseva nayo. **Micchādīṭṭhisammādiṭṭhiyo...pe... na gahitā** kammaṭṭhappattānaṃ tesamaṃ manosamācārabhāvena gahitattā. Yadi evamaṃ kasmā diṭṭhi cittuppādavāre na gahitāti? Kāmaṃ micchādīṭṭhiyā avayavibhāvo labbhati, tathāpi cittuppādakkaṇe lokiyalokuttaracittuppādesu kammaṭṭhakoṭṭhāso na uddhaṭo.

115. Kāmasaññādīnanti ettha **ādi**-saddena yathā byāpādavīhīmsāsaññā saṅgahitā, evamaṃ anabhijjhābyāpādaavīhīmsāsaññā saṅgahitā paṭhamena ādisaddena “anabhijjhāsahagatāya

saññāyā’ tiādipāṭhassa saṅgahitattā.

117. Ti kāmabhavādīnaṃ apariyosānāya pariyosānaṃ icchatopi tādisassa bhavānaṃ apariyosānameva hoti. **Cattāro honti** puggalavasena. Tenāha “**puthujjanopi hi**” tiādi. **Akusalā dhammā vaḍḍhantī** tesam pahānāya appaṭipajjamānassāti adhippāyo, tato eva **kusalā dhammā parihāyanti**. Tenassa kilesadukkheṇa vipākadukkheṇa ca **sadukkameva attabhāvaṃ abhinibbatteti**. Orambhāgiyasamyojanāni pahāya suddhāvāsesu nibbattanāraho **anāgāmī kathaṃ...pe... abhivaḍḍhantī** āha “**anāgāmīpi**” tiādi. **Sadukkameva attabhāvaṃ abhinibbatteti**, yāya labbhamānaakusalābhivuddhiṃ kusalaparihāniṇca gahetvā anāgāminopi sabyābajjhaattabhāvābhiniḍḍattanaṃ vuttaṃ. Evaṃ yathālabbhamānaṃ akusalaparihāniṃ kusalābhivuddhiṇca gahetvā puthujjanassapi antimabhavikassa abyābajjhaattabhāvābhiniḍḍattanaṃ vuttanti daṭṭhabbaṃ. Tenāha “**puthujjanopi**” tiādi. **Akusalameva hāyati**, na kusalaṃ tassa buddhipakkhe ṭhitattā. Tatthāpi **vipassanameva gabbhaṃ gaṇhāpeti**, na vaṭṭagabbhaṃ antimabhavikatāya vivaṭṭūpanissitattā ajjhāsayaṃsa, ñāṇassa ca pākagamanato.

119. Ekaccassāti sāmivacanaṃ “**abhinandati**” tiādīsu paccattavasena pariṇāmetabbaṃ, tathā “**nibbindati**” tiādīsupi. **Uggaṇhitvāpi pi**-saddo luttaniddiṭṭho. Bhagavato bhāsītassa atthaṃ ajānantā tāva dīgharattaṃ hitasukhato paribāhirā hontu jānantānampi sabbesaṃ dīgharattaṃ hitāya sukhāya hotīti anekamaṣikataṃ codento “**evaṃ santepi**” tiādīmāha. Itaro sabbesaṃpi dīgharattaṃ hitāya sukhāya hotiyevāti, “**appaṭisandhikā**” tiādīnā anekamaṣikataṃ pariharati. Sesam suviññeyyameva.

Sevitabbāsevitabbasuttavaṇṇanāya līnatthappakāsanā samattā.

5. Bahudhātukasuttavaṇṇanā

124. Bhayanti (a. ni. ṭī. 2.3.1) cittasamsappatāti āha “**cittutrāso**” ti. **Upaddavoti** antarāyo. Tassa pana vikkhepakāraṇattā vuttaṃ “**anekaggatākāro**” ti. **Upasaggoti** upasajjanaṃ. Tato appatīkāravighātāpatti yasmā patīkārahāvena vihaññamānassa kiñci kātuṃ asamattassa osādanakāraṇaṃ, tasmā vuttaṃ – “**tattha tattha lagganākāro**” ti. Vañcivā āgantūṃ **yathāvutte divase anāgacchantesu**. Bahi anikkhamaṇatthāya **dvāre aggim datvā**.

Naḷehīti naḷacchannasankhepena upari chādetvā tehiyeva dārukacchadananiyāmena paritopi chādītā. **Eseva nayoti** iminā tiñehi channataṃ, sesasambhārānaṃ rukkhamayatañca atidisati. **Vidhavāputteti** adantabhāvopalakkaṇaṃ. Te hi nippitīkā avinītā asaṃyatā akiccakārino honti.

Matthakaṃ apāpetvāva niṭṭhāpitāti kasmā bhagavā evamakāsīti? Ānandattherassa pucchākosalladīpanatthameva, tattha nisinnānaṃ sannipatitabhikkhūnaṃ desanāya jānanatthañca. Te kira saṅkhepato vuttamatthaṃ ajānantā andhakāraṃ pavitṭhā viya ṭhitā. Pucchānusandhivasena pariggayha jānissantīti.

125. Rūpapariggahova kathito, na aññaṃ kiñcīti attho. Idāni tato saccāni niddhāretvā catusaccakammaṭṭhānaṃ dassetuṃ, “**sabbāpi**” tiādi vuttaṃ. **Pañcakkhandhā hontīti** addhekādasa dhātuyo rūpakkhandho, addhaṭṭhamā dhātuyo yathārahaṃ vedanādayo cattāro arūpino khandhāti evaṃ aṭṭhārasa dhātuyo pañcakkhandhā honti. **Pañcapi khandhā** tañhāvajjā **dukkhasaccaṃ. Appavattīti** appavattinimittaṃ. **Nirodhapajānanāti** paññāsīsena maggakiccamāha. Sammādiṭṭhipamukho hi ariyamaggo. **Matthakaṃ pāpetvā kathitaṃ hoti** sammasanassa bhūmiyā nippattiyā ca kathitattā. **Jānāti passatīti** iminā ñāṇadassanaṃ kathitaṃ taṃ pana lokiyaṃ lokuttaranti duvidhanti tadubhayampi dassento āha – “**saha vipassanāya maggo vutto**” ti.

Ettāvātāpi khoti pi-saddaggaṇaṇena aññaṇa pariyāyena sathā dhātukosallaṃ desetukāmoti thero, “**siyā pana, bhante**” ti pucchatīti bhagavā pathavīdhātuādivasenaṃpi dhātukosallaṃ vibhāveti. Tattha

pathavīdhātuādisaddena desanākāraṇaṃ vibhāvento, “**pathavīdhātu...pe... vuttā**”ti āha. **Tāpi** hi ādito cha dhātuyo. “**Viññāṇadhātuto nīharitvā pūretabbā**”ti vatvā kathaṃ rūpadhātuyo nīhariyantīti codanaṃ sandhāya taṃ nayaṃ dassetuṃ, “**viññāṇadhātu**”tiādi vuttaṃ. Kāmañcetha kāyaviññāṇadhātuyā ārammaṇaṃ phoṭṭhabbhadhātupathavīdhātu ādivasena desanāruḷameva, kāyadhātu pana nīharitabbāti ekamsameva nīharaṇavidhiṃ dassento, “**esa nayo sabbatthā**”ti āha. **Purimapacchimavasena manodhātūti** pacchimabhāgavasena kiriyāmanodhātu gahetabbā tassānurūpabhāvato. Nanu cetha manodhātu nāmāyaṃ manoviññāṇadhātuyā asaṃsaṭṭhā, visumyeva cesā dhātūti? Saccametaṃ aṭṭhārasadhātudesanāya, cittavibhattiniddese chaviññāṇakāyadesanāyaṃ pana sā manoviññāṇakāyasaṅgahitāvāti daṭṭhabbaṃ. Yaṃ panettha vattabbaṃ taṃ **visuddhimaggasaṃvaṇṇanāyaṃ** (visuddhi. mahāṭī. 2.517) vuttanayena veditabbaṃ. Atha vā **purimapacchimavasenāti** purecarānucaravasena. **Manodhātūti** vipākamanodhātu gahetabbā purecaraṇato, parato uppajjanakiriyāmanoviññāṇadhātuyā anantaraṃ manodhātuyā, kiriyāmanodhātuyā anantaraṃ manoviññāṇadhātuyā anuppajjanato ca.

Dhammānaṃ yāvadeva nissattanijjīvavibhāvanatthāya satthu dhātudesanāti aññesu sabhāvadhāraṇādiatthesu labbhamānesupi ayamettha attho padhānoti āha – “**esanayo sabbatthā**”ti. **Sappaṭipakkhavasenāti** sappaṭibhāgavasena sukhaṃ dukkhena sappaṭibhāgaṃ, dukkhaṃ sukkena, evaṃ somanassadomanassāti. Yathā sukhādīnaṃyeva samudācāro vibhūto, na upekkhāya, evaṃ rāgādīnaṃyeva samudācāro vibhūto, na mohassa, tena vuttaṃ “**avibhūtabhāvenā**”ti. **Kāyaviññāṇadhātu pariggahitāva hoti** tadavinābhāvato. **Sesāsu** somanassadhātuādisu, **pariggahitāva hoti** avinābhāvato eva. Na hi somanassādayo manodhātuyā vinā vattanti. **Upekkhādhātuto nīharitvāti** ettha cakkhuvīññāṇadhātuādayo catasso viññāṇadhātuyo tāsāṃ vatthārammaṇabhūtā cakkhudhātuādayo cāti aṭṭha rūpadhātuyo, manodhātu, upekkhāsahagatā manoviññāṇadhātu, upekkhāsahagatā eva dhammadhātūti evaṃ pannarasa dhātuyo upekkhādhātuto nīharitabbā. Somanassadhātuādayo pana catasso dhātuyo dhammadhātuantogadhā, evaṃ sukhadhātuto kāyaviññāṇadhātuyā tassā vatthārammaṇabhūtānaṃ kāyadhātuphoṭṭhabbhadhātūnaṃ nīharaṇā heṭṭhā dassitanayāti, “**upekkhādhātuto nīharitvā pūretabbā**”icceva vuttaṃ.

Kāmavitakkādayo idha kāmadhātuādi pariyaṇena vuttāti “**kāmadhātuādināṃ dvedhāvitakke kāmavitakkādīsu vuttanayena attho veditabbo**”ti āha. Tattha hi “kāmavitakkoti kāmapaṭisaṃyutto vitakko, byāpādavitakkoti byāpādapaṭisaṃyutto vitakko, vihiṃsāvitakkoti vihiṃsāpaṭisaṃyutto vitakko, nekkhammapaṭisaṃyutto vitakko nekkhamavitakko, so yāva paṭhamajjhānā vaṭṭati. Abyāpādapaṭisaṃyutto vitakko abyāpādavitakko, so mettāpubbabhāgato paṭṭhāya yāva paṭhamajjhānā vaṭṭati. Avihimsāpaṭisaṃyutto vitakko avihimsāvitakko, so karuṇāya pubbabhāgato paṭṭhāya yāva paṭhamajjhānā vaṭṭati”ti vuttaṃ. Ayaṃ panattho abhidhamme vitthārato āgato evāti dassetuṃ, “**abhidhamme**”tiādi vuttaṃ. **Kāmadhātuto nīharitvāti** ettha **kāmaggaṇa** gahitā rūpadhātuādayo cha, taṃvisayā sattaviññāṇadhātuyo, tattha pañcannaṃ viññāṇadhātūnaṃ cakkhudhātuādayo pañcāti aṭṭhārasa. Nekkhammadhātuādayo pana dhammadhātuantogadhā eva.

Kāmataṇhāya visayabhūtā dhammā kāmadhātūti āha – “**pañca kāmāvacarakkhandhā kāmadhātū**”ti. Tathā rūpataṇhāya visayabhūtā dhammā rūpadhātu, arūpataṇhāya visayabhūtā dhammā arūpadhātūti āha – “**cattāro arūpāvacarakkhandhā**”tiādi. Kāmataṇhā kāmo uttarapadalopena, evaṃ rūpārūpataṇhā rūpārūpaṃ. Ārammaṇakaraṇavasena tā yattha avacaranti, te kāmāvacarādayoti evaṃ kāmāvacarakkhandhādīnaṃ kāmataṇhādibhāvo veditabbo. **Ādinā nāyena** etena “uparito paranimitavasavattideve antokarivā etthāvacarā”tiādi paḷiṃ (vibha. 1020) saṅgaṇhāti. **Etthāvacarāti** avīciparanimitaparicchinokāsāya kāmataṇhāya visayabhāvaṃ sandhāya vuttaṃ, tadokāsata ca taṇhāya tanninnatā veditabbā. Sesapadadvayepi eseva nayo. Paripuṇṇaṭṭhārasadhātukattā kāmāvacaradhammānaṃ “**kāmadhātuto nīharitvā pūretabbā**”ti vuttaṃ. Manoviññāṇadhātudhammadhātu ekadesamattameva hi rūpārūpāvacaradhammāti.

Samāgantvāti sahitā hutvā. Yattakañhi paccayadhammā attano phalassa kāraṇaṃ, tattha

tannibbattane samāgatā viya hoti vekalle tadanibbattanato. **Saṅkhatadhātuto nīharitvā pūretabbā** asaṅkhatāya dhātuyā dhammadhātuekadesabhāvato.

126. Evaṃ pavattamānā mayam attāti gahaṇam gamissāmāti iminā viya adhippāyena attānam adhikicca uddissa pavattā ajjhata, tesu bhavā tappariyāpannattāti **ajjhattikāni**. Tato bahibhūtāni **bāhirāni**. Āyatanakathā paṭiccasamuppādakathā ca **visuddhimagge** (visuddhi. 2.510, 570, 571) vuttanayeneva veditabbāti na vitthāritā.

127. Avijjamānam ṭhānam **aṭṭhānam** (a. ni. ṭi. 1.1.268; vibha. mūlaṭi. 809), natthi ṭhānanti vā **aṭṭhānam**. **Anavakāso**ti ettha eseva nayo. Tadatthanigamanameva hi “netam ṭhānam vijjati”ti vacananti. Tenāha “**ubhayenapī**”tiādi. **Yanti** kāraṇe paccattavacanam, hetuattho ca kāraṇatthoti āha – “**yanti yena kāraṇenā**”ti. Ukkatṭhaniddesena ettha diṭṭhisampatti veditabbāti vuttam “**maggadiṭṭhiyā sampanno**”ti. Kuto panāyamatto labbhatī? Liṅgato. Liṅgañhetam, yadidaṃ niccato upagamanapaṭikkhepo. **Catubhūmakasūti** idaṃ catutthabhūmakasaṅkhārānam ariyasāvakaṃ visayabhāvūpagamanato vuttam; na pana te ārabha niccato upagamanasabbhāvato. Vakkhati ca “catutthabhūmakasaṅkhārā panā”tiādinā. Abhisāṅkhatasaṅkhāraabhisāṅkharaṇakasaṅkhārānam sappadesattā nippadesasaṅkhārāggahaṇattham “**saṅkhatasaṅkhāresū**”ti vuttam. Lokuttarasaṅkhārānam pana nivattane kāraṇam sayameva vakkhati. **Etam kāraṇam natthi** setughātattā. **Tejussadattāti** saṃkilesavidhamanatejassa adhikabhāvato. Tathā hi te gambhīrabhāvena duddasā. **Akusalanam ārammaṇam na hontīti** idaṃ pakaraṇavasena vuttam. Appahīnavipallāsānam sattānam kusalahammānampi te ārammaṇam na hontīti.

Asukhe “sukha”nti vipallāso ca idha sukhato upagamanassa ṭhānanti adhippetanti dassento, “**ekanta...pe... vutta**”nti. **Attadiṭṭhivasenāti** padhānadiṭṭhimāha. Diṭṭhiyā nibbānassa avisayabhāvo heṭṭhā vutto evāti “**kaṣiṇādipaññattisaṅgahattha**”nti vuttam. **Paricchedoti** saṅkhārānam paricchedo saṅkhārānam paricchiṇṇajagahaṇam. Svāyam yesam niccādito upagamanam bhavati tesameva vasena kātabboti dassento “**sabbavāresū**”tiādimāha. **Sabbavāresūti** niccādisabbavāresu. **Puthujjano hīti hi-**saddo hetuattho. Yasmā yaṃ yaṃ saṅkhāram niccādivasena puthujjanakāle upagacchati, tam tam ariyamaggādhigamena aniccādivasena gaṇhanto yāthāvato jānanto tam gāham tam diṭṭhiṃ vinivetheti vissajjeti. Tasmā yattha gāho tattha vissajjanāti catutthabhūmakasaṅkhārā idha saṅkhārāggahaṇena na gayhatīti attho.

128. Puttasambandhena mātāpītusamaññā, dattakittimādivasenapī puttavohāro loke dissati, so ca kho pariyāyato nipariyāyasiddham tam dassetuṃ, “**janikā va mātā janako pitā**”ti vuttam. Tathā ānantariyakammassa adhippetattā “**manussabhūto va khīṇāsavo arahāti adhippeto**”ti vuttam. “Aṭṭhānameta”ntiādinā mātuādīnaṃyeva jīvitā voropane ariyasāvakaṃ abhabbhāvāvadassanato tadaññam ariyasāvako jīvitā voropetīti idaṃ atthato āpannamevāti maññamāno vadati – “**kiṃ pana ariyasāvako aññam jīvitā voropeyyā**”ti? “Aṭṭhānametaṃ, bhikkhave, anavakāso, yaṃ diṭṭhisampanno puggalo sañcicca paṇam jīvitā voropeyya, netam ṭhānam vijjati”ti vacanato, “**etampi aṭṭhāna**”nti vuttam. Tenāha “**sacepi hī**”tiādi. **Baladīpanatthanti** saddhādibalasamannāgamadīpanattham. Ariyamaggenāgatasaddhādibalavasena hi ariyasāvako tādisam sāvajjam na karoti.

Pañcahi kāraṇehīti idaṃ atthanipphādakāni tesam pubbabhāgiyāni ca kāraṇāni kāraṇabhāvasāmaññena ekajjam gahetvā vuttam, na pana sabbesam pañcannaṃ sahayogakkhamato. **Ākārechīti** kāraṇehi. **Anussāvanenāti** anurūpaṃ sāvanena. Bhedassa anurūpaṃ yathā bhedo hoti, evam bhinditabbānam bhikkhūnam attano vacanassa sāvanena viññāpanena. Tenāha “**nanu tumhe**”tiādi. **Kaṇṇamūle vacībhedaṃ katvāti** etena “pākātam katvā bhedakaravattthudīpanam **vohāro**, tattha attano nicchitamattam rahassavasena viññāpanam **anussāvana**”nti dasseti.

Kammameva uddeso vā pamāṇanti tehi saṅghabhedasiddhito vuttam, itare pana tesam pubbabhāgabhūtā. Tenāha “**vohārā**”tiādi. **Tatthāti** vohāre. Cutiantaram phalam anantaram nāma,

tasmiṃ anantare niyuttāni tannibbattanena anantarakaraṇasīlāni, anantarappayojanāni cāti ānantariyāni, tāni eva “**ānantariyakammāni**”ti vuttāni.

Kammatotī “evaṃ ānantariyakammaṃ hoti, evaṃ anantariyakammasadisa”nti evaṃ kammavibhāgato. **Dvāratotī** kāyādidvāro. **Kappaṭṭhitiyatoti** “idaṃ kappaṭṭhitikavipākaṃ, idaṃ na kappaṭṭhitikavipāka”nti evaṃ kappaṭṭhityavibhāgato. **Pākātī** “idamettha vipaccati, idaṃ na vipaccatī”ti vipaccanavibhāgato. **Sādhāraṇādihīti** gahaṭṭhapabbajitānaṃ sādhāraṇāsādhāraṇato, **ādi-**saddena vedanādivibhāgato ca.

Yasmā manussattabhāve ṭhitasseva ca kusaladhammānaṃ tikkhavisadasūrabhāvāpatti, yathā taṃ tiṇṇampi bodhisattānaṃ bodhittayanibbattiyāṃ, evaṃ manussabhāve ṭhitasseva akusaladhammānampi tikkhavisadasūrabhāvāpattī āha “**manussabhūtassevā**”ti. Pākatikamanussānampi ca kusaladhammānaṃ visesappatti **vimānavatthuatṭhakathāyaṃ** (vi. va. aṭṭha. 3) vuttanayena veditabbā. Yathā vutto ca attho samānajātiyassa vikopane kammaṃ garutaraṃ, na tathā vijātiyassāti vuttaṃ – “**manussabhūtaṃ mātaraṃ vā pitaraṃ vā**”ti. Liṅge parivatte ca so eva ekakammanibbato bhavaṅgappabandho, jīvitindriyappabandho ca, na aññoti āha “**api parivattaliṅga**”nti. Arahantepi eseva nayo. **Tassa vipākantiādi** kammassa ānantariyabhāvasamatthanaṃ, catukoṭīkañcetta sambhavati. Tattha paṭhamā koṭī dassitā, itarāsu visaṅketāṃ dassetaṃ, “**yo panā**”tiādi vuttaṃ. Yadi pi tattha visaṅketo, kammaṃ pana garutaraṃ ānantariyasadisāṃ bhāyitabbanti āha – “**ānantariyaṃ āhacceva tiṭṭhati**”ti. **Ayaṃ pañhoti** nāpanicchānibbattā kathā.

Ānantariyaṃ phusati maraṇādhippāyeneva ānantariyavatthuno vikopitattā. **Ānantariyaṃ na phusati** ānantariyavatthubhāvato. Sabbattha hi purimaṃ abhisandhicittaṃ appamāṇaṃ, vadhakacittaṃ pana tadārammaṇaṃ jīvitindriyaṅca ānantariyānānantariyabhāve pamāṇanti daṭṭhabbaṃ. Saṅgāmacatukkaṃ sampattavasena yojetabbāṃ.

Tenevāti teneva payogena. **Arahantaghāto hotiyeva** arahato māritattā. **Puthujjanasseva dinnāṃ hotīti** yasmā yathā vadhakacittaṃ paccuppannārammaṇampi pabandhavicchedavasena ca jīvitindriyaṃ ārammaṇaṃ katvā pavattati, na evaṃ cāgacetanā, sā hi cajitabbavatthumaṃ ārammaṇaṃ katvā cajanamattameva hoti, aññasantakabhāvakarāṇaṅca tassa cajanāṃ, tasmā yassa taṃ santakaṃ kataṃ. Tasseva dinnāṃ hotīti.

Lohitaṃ samo saratīti abhigātena pakuppamānaṃ sañcītaṃ hoti. **Mahantataranti** garutaraṃ. **Sarīrapaṭijaggane viyāti** sathhurūpakāyapaṭijaggane viya.

Asannipatitēti idaṃ sāmaggīyadīpanaṃ. **Bhedo ca hotīti** saṅghassa bhedo hoti. **Vaṭṭatīti saññāyāti** idisakaraṇaṃ saṅghassa bhedāya na hotīti saññāya. **Navato ūnāparisāyaṃ** karontassa tathāti yojetabbāṃ, **tathāti** iminā “na ānantariyakammanti” imaṃ ākaḍḍhati, na pana “bhedo hotī”ti idaṃ. Heṭṭhimantena hi navannameva vasena saṅghabhedo. **Dhammavādino anavajjā** yathādhammaṃ avaṭṭhānato. Saṅghabhedassa pubbhāgo **saṅgharāji**.

Kāyadvārameva pūrenti kāyakammabhāveneva lakkhitabbato.

“**Sañṭhahante hi...pe... muccatī**”ti idaṃ kappaṭṭhakathāya na sameti. Tathā hi kappaṭṭhakathāyaṃ (kathā. aṭṭha. 654-657) vuttaṃ – “āpāyikoti idaṃ suttaṃ yaṃ so ekaṃ kappaṃ asītibhāge katvā tato ekabhāgamattaṃ kālaṃ tiṭṭheyya, taṃ āyukappaṃ sandhāya vutta”nti. **Kappavināseyevāti** pana āyukappavināseyevāti atthe sati natthi virodho. Ettha ca **sañṭhahantēti** idampi “svevavinassissatī”ti viya abhūtaparikappavasena vuttaṃ. **Ekadivasameva niraye paccati** tato paraṃ kappābhāve āyukappassapi abhāvatoṭi avirodhato atthayojanā daṭṭhabbā. **Sesānīti** saṅghabhedato aññāni ānantariyakammāni.

Ahosikammaṃ...pe... saṅkhyam gacchanti, evaṃ sati katham nesam ānantariyatā cutianantaram vipākādānābhāvato. Atha sati phaladāne cutianantaro eva etesam phalakālo, na aññoti phalakālaniyamena niyatatā nicchitā, na phaladānaniyamena, evampi niyataphalakālānam aññesampi upapajjavedanīyānam diṭṭhadhammavedanīyānañca niyatatā āpajjeyya. Tasmā vipākadhammadhammānam paccayantaravikalatādīhi avipaccamānānampi attano sabhāvena vipākadhammatā viya balavatā ānantariyena vipāke dinne avipaccamānānampi ānantariyānam phaladāne niyatasabhāvā ānantariyasabhāvā ca pavattīti attano sabhāvena phaladānaniyameneva niyatatā ānantariyatā ca veditabbā. Avassañca ānantariyasabhāvā tato eva niyatasabhāvā ca tesam pavattīti sampañcchitabbametam aññassa balavato ānantariyassa abhāve cutianantaram ekantena phaladānato.

Nanu evaṃ aññesampi upapajjavedanīyānam aññasmiṃ vipākādāyake asati cutianantaramekantena phaladānato niyatasabhāvā ānantariyasabhāvā ca pavatti āpajjati? Nāpajjati. Asamānajātikena cetopaṇidhivasena upaghātakena ca nivattetabbavipākattā anantare ekantaphaladāyakkattābhāvā. Na pana ānantariyakānam paṭhamajjhānādīnam dutiyajjhānādīni viya asamānajātikam phalanivattakam atthi sabbānantariyānam avīciphalattā. Na ca heṭṭhūpapattim icchato sīlavato cetopaṇidhi viya uparūpapattijanakkammaphalam ānantariyaphalam nivattetum samattho cetopaṇidhi atthi anicchantasseva avīcipātanato, na ca ānantariyopaghātakam kiñci kammaṃ atthi, tasmā tesamyeva anantare ekantavipākajanakasabhāvā pavattīti. Anekāni ca ānantariyāni katāni ekanteneva vipāke niyatasabhāvattā uparatāvipaccanasabhāvāsankattā nicchitāni sabhāvato niyatāneva. Tesu pana samānasabhāvesu ekena vipāke dinne itarāni attanā kātabbakiccassa teneva katattā na dutiyam tatiyam vā paṭisandhim karonti. Na samatthatāvighātattāti natthi tesam ānantariyakatā nivatti; garutarabhāvo pana tesu labbhatevāti saṅghabhedassa siyā garutarabhāvoti, “**yena...pe... vipaccati**”ti āha. Ekassa pana aññāni upatthambhakāni hontīti daṭṭhabbāni. **Paṭisandhivasena vipaccati**ti vacanena itaresam pavattivipākādāyitā anuññatā viya dissati. **No vā tathā sīlavatīti** yathā pitā sīlavā, tathā sīlavatī no vā hotīti yojanā. Sace mātā sīlavatī, mātughāto paṭisandhivasena vipaccatīti yojanā.

Pakatattoti anukkhitto. **Samānasamvāsakoti** apārājiko. **Samānasīmāyanti** ekasīmāyam.

Satthukiccam katum asamatthoti yaṃ satthārā kātabbakiccam anusāsanādi, tam katum asamatthoti bhagavantam paccakkhāya. **Aññam titthakaranti** aññam satthāram.

129. Abhijātiādisu (a. ni. ṭī. 1.1.277) pakappanena devatūpasaṅkamanādinā jātacakkavāḷena samānayogakkhemam dasasahassaparimānam ṭhānam **jātikhetam**, saraseneva āṇāpavattitṭhānam **āṇākhettam**, visayabhūtam ṭhānam **visayakhetam**. **Dasasahassī lokadhātūti** imāya lokadhātuyā saddhim imaṃ lokadhātum parivāretvā ṭhitā dasasahassī lokadhātu. Tattakānamyeva jātikhettabhāvo dhammatāvasena veditabbo. “Pariggahavasenā”ti keci. “Sabbesampi buddhānam tattakam eva jātikhetam tannivāsīnamyeva ca devatānam dhammābhisamayo”ti ca vadanti. Mātukucchiokkamanakālādīnam channaṃ eva gahaṇam nidassanamattam mahābhinhārādīkālepi tassa pakampanassa labbhamānato. **Āṇākhettam nāma** yaṃ ekajjham samvaṭṭati ca vivattati ca. **Āṇā vattati** āṇāya tannivāsīnam devatānam sirasā sampañcchanena, tañca kho kevalam buddhānam ānubhāveneva, na adhippāyavasena, adhippāyavasena pana “yāvatā vā pana ākaṅkheyyā”ti (a. ni. 3.81) vacanato tato parampi āṇā pavatteyya.

Na uppajjantīti pana atthīti, “na me ācariyo atthi, sadiso me na vijjati”tiādim (ma. ni. 1.285; 2.341; mahāva. 11; kathā. 405; mi. pa. 4.5.11) imissam lokadhātuyam ṭhatvā vadantena bhagavatā, “kim panāvuso sārīputta, atthetarāhi aññe samaṇā vā brāhmaṇā vā bhagavatā samasamā sambodhiyanti, evaṃ puṭṭho aham, bhante, notī vadeyya”nti (dī. ni. 3.161), vatvā tassa kāraṇam dassetum, “atṭhānametaṃ anavakāso, yaṃ ekissā lokadhātuyā dve arahanto sammāsambuddhā”ti imaṃ suttaṃ (dī. ni. 3.161; mi. pa. 5.1.1) dassentena dhammasenāpatinā ca buddhakhettabhūtam imaṃ lokadhātum ṭhapetvā aññattha anuppatti vuttā hotīti adhippāyo.

Ekatoti saha, ekasmiṃ kāleti attho. So pana kālo katham paricchinnoti carimabhava paṭisandhiggahaṇato paṭṭhāya yāva dhātuparinibbānāti dassento “**tatthā**”tiādimāha. **Nisinnakālato paṭṭhāyāti** paṭilomakkamena vadati. **Parinibbānato paṭṭhāyāti** anupādisesāya nibbānadhātuyā parinibbānato paṭṭhāya. **Etthantareti** carimabhava bodhisattassa paṭisandhiggahaṇam dhātuparinibbānanti etesaṃ antare.

Aññassa buddhassa uppatti na nivāritā, tattha kāraṇam dassetuṃ “**tīpi hī**”tiādi vuttaṃ. Paṭipattiantaradhānena hi sāsanaṃ osakkitattā aparassa buddhassa uppatti laddhāvasarā hoti. **Paṭipadāti** paṭivedhāvahā pubbabhāgapaṭipadā. “**Pariyatti pamāṇa**”nti vatvā tamattham bodhisattam nidassanaṃ katvā dassetuṃ, “**yathā**”tiādi vuttaṃ tayidaṃ hīnaṃ katanti daṭṭhabbam. Niyyānikadhammassa ṭhitiñhi dassento aniyyānikadhammam nidasseti.

Mātikāya antarahitāyāti, “yo pana bhikkhū”tiādinayappattā sikkhāpadapāli mātikā, tāya antarahitāya nidānuddesasaṅkhāte pātimokkhuddese pabbajjāyupāsampadākammesu ca sāsanaṃ tiṭṭhatīti attho. Atha vā pātimokkhe dharanteyeva pabbajjā upāsampadā ca, evaṃ sati tadubhayaṃ pātimokkhe antogadham tadubhayaḅbhāve pātimokkhābhāvato, tasmā tayidaṃ tayaṃ sāsanaṃ ṭhithetūti āha – “**pātimokkhapabbajjāupāsampadāsu ṭhitāsu sāsanaṃ tiṭṭhatī**”ti. Yasmā vā upāsampadādhīnaṃ pātimokkham, upāsampadā ca pabbajjādhīnā, tasmā pātimokkhe siddhe, siddhāsu pabbajjāupāsampadāsu ca sāsanaṃ tiṭṭhati. Pacchimapaṭivedhato hi param paṭivedhasāsanaṃ, pacchimasīlato ca param paṭipattisāsanaṃ vinaṭṭham nāma hoti. **Osakkitam nāmāti** pacchimakapaṭivedhasīlabhedadvayaṃ ekato katvā tato param vinaṭṭham nāma hotīti attho.

Tena kāmaṃ “sāsanaṭṭhitiyā pariyatti pamāṇa”nti vuttaṃ, pariyatti pana paṭipattihetukāti paṭipattiyā asati appatiṭṭhā hoti, tasmā paṭipattiantaradhānaṃ sāsanaosakkanassa visesakāraṇanti dassetvā tayidaṃ sāsanaosakkanam dhātuparinibbānosānanti dassetuṃ, “**tīpi parinibbānāni**”ti vuttaṃ.

Kāruññanti paridevanakāruññaṃ. Jambudīpe dīpantaresu devanāgābrahmalokesu ca vipakiritvā ṭhitānaṃ dhātūnaṃ mahābodhipallānke ekajjham sannipātanaṃ, rasmivissajjanaṃ, tattha tejodhātuyā uṭṭhānaṃ, ekajālībhāvo cāti sabbametaṃ satthu adhiṭṭhānavaseneva veditabbam.

Anacchariyattāti dvīsipi uppajjamānesu acchariyattābhāvadosatoti attho. Buddhā nāma majjhe bhinnaṃ suvaṇṇaṃ viya ekasadisāti tesam desanāpi ekarasā evāti āha – “**desanāya ca visesābhāvato**”ti. Etenapi anacchariyattameva sādheti. **Vivādabhāvato** etena vivādābhāvattam dve ekato na uppajjantīti dasseti.

Tatthāti milindapañhe. Ekaṃ buddham dhāretīti **ekabuddhadhāraṇī**. Etena evaṃ sabhāvā ete buddhaguṇā, yena dutiyabuddhaguṇe dhāretuṃ asamatthā ayaṃ lokadhātūti dasseti. Paccayavisesanipphannānañhi guṇadharmānaṃ bhāriyo viseso na sakkā dhāretuṃ, “**na dhāreyyā**”ti vatvā tameva adhāraṇam pariyaṅantarenapi pakāsento “**caleyyā**”tiādimāha. Tattha **caleyyāti** paripphandeyya. **Kampeyyāti** pavedheyya. **Nameyyāti** ekapassena nameyya. **Onameyyāti** osīdeyya. **Vinameyyāti** vividham itocito ca nameyya. **Vikireyyāti** vātena thusamutṭhi viya vipakireyya. **Vidhameyyāti** vinasseyya. **Viddhamseyyāti** sabbaso viddhastā bhavēyya. Tathābhūtā ca katthaci na tiṭṭheyāti āha “**na ṭhānamupagaccheyā**”ti.

Idāni tattha nidassanaṃ dassento, “**yathā, mahārājā**”tiādimāha. Tattha **samupādikāti** samaṃ uddham pajjati pavattatīti samupādikā, udakassa upari samaṃ gāminīti attho. **Vaṇṇenāti** saṅghānena. **Pamāṇenāti** ārohana. **Kisathūlenāti** kisathūlabhāvena, pariñāhenāti attho.

Chādentanti rocentam ruciṃ uppādentam. **Tandīkatoti** tena bhojanena tandībhuṭo. **Anonamitadaṇḍajātoti** yāvadattam bhojanena onamituṃ asakkuṇeyyatāya anonamitadaṇḍo viya jāto. **Sakim bhutto vameyyāti** ekampi ālopaṃ ajjhoharivā vameyyāti attho.

Atidhamabhārena pathavī calatīti dhammena nāma pathavī tiṭṭheyya. Sā kiṃ teneva calati vinassatīti adhippāyena pucchati. Puna thero “ratanam nāma loke kuṭumbaṃ sandhārentaṃ abhimatañca lokena attano garusabhāvātāya sakaṭabhaṅgassa kāraṇaṃ atibhārabhūtaṃ diṭṭhaṃ. Evaṃdhammo ca hitasukhavisesehi taṃsamaṅginaṃ dhārento abhimato ca viññūnaṃ gambhīrappameyyabhāvena garusabhāvattā atibhārabhūto pathavīcalanassa kāraṇaṃ hotī”ti dassento, “**idha, mahārāja, dve sakaṭā**”tiādimāha. Eteneva tathāgatassa mātukucchiokkamanādikāle pathavīkampanakāraṇaṃ saṃvaṇṇitanti daṭṭhabbaṃ. **Ekasakaṭato ratananti** ekasmā, ekassa vā sakaṭassa ratanaṃ, tasmā sakaṭato gahetvāti attho.

Osāritanti uccāritaṃ, vuttanti attho. **Aggoti** sabbasattehi aggo.

Sabhāvapakatīti sabhāvabhūtā akittimā pakati. **Kāraṇamahantatāyāti** mahantehi buddhakāradhammehi pāramitāsaṅkhātehi kāraṇehi buddhaguṇānaṃ nibbattitoti vuttaṃ hoti. Pathaviādīni mahantāni vatthūni, mahantā ca sakkabhāvādayo attano attano visaye ekekā eva, sammāsambuddhopi mahanto attano visaye ekova, ko ca tassa visayo? Buddhabhūmi, yāvatakaṃ vā ñeyyaṃ. Evaṃ “ākāso viya anantavisayo bhagavā ekova hotī”ti vadanto paracakkavāḷesu dutiyassa buddhassa abhāvaṃ dasseti.

Imināva padenāti “ekissā lokadhātuyā”ti iminā eva padena. **Dasacakkavāḷasahassāni gahitāni** jātikhattatā. **Ekacakkavāḷenevāti** iminā ekacakkavāḷeneva. Yathā – “**imasmimyeva cakkavāḷe uppajjanti**”ti vutte imasmimpi cakkavāḷe jambudīpeyeva, tatthapi majjhimapadese evāti paricchinditum vaṭṭati; evaṃ “ekissā lokadhātuyā”ti jātikhette adhippetepi imināva cakkavāḷena paricchinditum vaṭṭati.

Vivādūpacchedatoti vivādūpacchedakāraṇā. Dvīsu uppanesu yo vivādo bhaveyya, tassa anuppādoyevettha vivādūpacchedo. **Ekasmim dipeti**adinā dīpantarepi ekajjhaṃ na uppajjanti, pageva ekadīpeti dasseti. **So parihāyethāti** cakkavāḷassa padese eva vattitabbatā parihāyeyya.

130. Manussattanti manussabhāvo tasseva pabbajjādiguṇasampattiādīnaṃ yoggabhāvato. **Liṅgasampattīti** purisabhāvo. **Hetūti** manovacīpaṇidhānapubbikā hetusampadā. **Satthāradassananti** satthusammukhībhāvo. **Pabbajjāti** kammakiriyavādīsu tāpasesu, bhikkhūsu vā pabbajjā. **Guṇasampattīti** abhiññādiguṇasampadā. **Adhikāroti** buddhaṃ uddissa adhiko sakkāro. **Chandatāti** sammāsambodhiṃ uddissa sātisayo kattukamyatākusalacchando. **Aṭṭhadhammasamodhānāti** etesaṃ aṭṭhannaṃ dhammānaṃ samāyogena. **Abhinīhāroti** kāyapaṇidhānaṃ. **Samijjhatīti** nipphajjatīti ayamettha saṅkhepo, vitthāro pana paramatthadīpaniyā **cariyāpiṭakavaṇṇanāya** (cariyā. aṭṭha. pakiṇṇakakathā) vuttanayeneva veditabbo.

Sabbākāraparipūramevāti paripuṇṇalakkaṇatāya sattussadādīhi sabbākārehi sampannameva. Na hi itthiyā kosohitavathaguyhatā sambhavati, dutiyapakati ca nāma paṭhamapakatito nihīnā eva. Tenevāha anantaravāre “**yasmā**”tiādi.

Idha purisassa tattha nibbattanatoti imasmim manussaloke purisabhūtassa tattha brahmaloke brahmattabhāvena nibbattanato. Tena asatīpi purisalīnge purisākārā brahmāno hontīti dasseti. Taṃyeva hi purisākāraṃ sandhāya vuttaṃ – “**yam puriso brahmattaṃ kareyyā**”ti. Tenevāha “**samānepi**”tiādi. Yadi evaṃ itthiyo brahmaloke na uppajjantīti āha “**brahmatta**”ntiādi.

131. Kāyaduccaritassātiādīpālīyā kammaniyāmo nāma kathito. Samañjanaṃ samaṅgo, so etassa atthīti **samaṅgī**, samannāgato. Samañjanasīlo vā **samaṅgī**. Pabbabhāge **āyūhanasamaṅgitā**, sannitthāpakacetanāvasena **cetanāsamaṅgitā**. Cetanāsantativasena vā **āyūhanasamaṅgitā**, taṃtaṃcetanākhaṇavasena **cetanāsamaṅgitā**. Katūpacitassa avipakkavipākassa kammasa vasena **kammasamaṅgitā**, kamme pana vipaccitum āradde vipākappavattivasena **vipākasamaṅgitā**.

Kammādīnaṃ upaṭṭhānakālavasena **upaṭṭhānasamaṅgitā**. **Kusalākusalakammāyūhanakkhaṇeti** kusalakammassa ca akusalakammassa ca samīhanakkhaṇe. **Tathāti** iminā kusalākusalakammapadaṃ ākaḍḍhati. Yathā kataṃ kammaṃ phaladānasamatthaṃ hoti, tathā kataṃ **upacitaṃ**. **Vipākārahanti** dutiyabhavādīsu vipaccanārahaṃ. Uppajjamānānaṃ upapattinimittaṃ upaṭṭhātīti yojanā. **Calatīti** parivattati. Ekena hi kammunā taje nimitte upaṭṭhāpīte paccayavisesavasena tato aññena kammunā aññassa nimittassa upaṭṭhānaṃ parivattanaṃ.

Sunakhajīvīkoti sunakhehi jīvanasīlo. **Talasantharaṇapūjanti** bhūmitalassa pupphehi santaraṇapūjaṃ. **Āyūhanacetanākammāsamaṅgitāvāsena**ti kāyaduccaritassa aparāparaṃ āyūhanena sannīṭṭhāpakacetanāya tasseva pakappane kammakkhayaakaraññena akhepitattā yathūpacitakammunā ca samaṅgibhāvassa vasena.

132. Evaṃ sassirikanti vuttappakārena anekadhātuvibhajanādinā nānāyavicittatāya paramanipuṇagambhīratāya ca atthato byañjanato ca sasobhaṃ katvā.

Naṃ dhārehīti ettha **nanti** nipātamattaṃ. Dhātuādivasena parivaṭṭiyanti atthā etehīti parivaṭṭā, desanābheda. Cattāro parivaṭṭā etassa, etasmiṃ vāti **catuparivaṭṭo**, dhammapariyāyo. Dhammo ca so pariyaṭṭibhāvato yathāvuttenatthena ādāsoti **dhammādāso**. Upaṭṭhānaṭṭhena yathādhammānaṃ ādāsoti **dhammādāso**. Yathā hi ādāsena sattānaṃ mukhe maladosaharaṇaṃ, evaṃ imināpi suttana yogīnaṃ mukhe maladosaharaṇaṃ. **Tasmāti** yasmā iminā suttana kilese madditvā samathādhigamena yogino jayappattā; tasmā amatapurappavesane ugghosanamahābheritāya ca **amatadundubhi**. **Idha vuttanti** imasmiṃ sutte vuttaṃ. **Anuttaro saṅgāmavijayoti** anuttarabhāvato kilesasaṅgāmavijayo, “vijeti etenā”ti katvā. Sesam suviññeyyameva.

Bahudhātukasuttavaṇṇanāya līnatthappakāsanā samattā.

6. Isigilisuttavaṇṇanā

133. Samaññāyati etāyāti **samaññā**, nāmanti attho. Ayamayaṃ nāmāti paññāpentī etāya, tathāpaññāpanamattanti vā **paññatti**, nāmameva. Tenāha “**purimapadasseva vevacana**”nti. **Sesesupīti** “paṇḍavassa pabbatassa”tiādīsu tīsu vāresupī.

Samuṭṭhānaṃ tāva suttassa kathetvā atthasaṃvaṇṇanaṃ kātuṃ “**tadā kirā**”tiādi vuttaṃ. **Na pabbatehi atthoti** na bhagavato pabbatehi kathitehi attho atthi. **Isigilibhāvoti** isigilīnāmatā. **Itīti** iminā kāraṇena, imaṃ aṭṭhupattim avekkhantoti attho.

Cetiyaḡabbheti cetiyaghaṇe cetiyassa abbhantare. **Yamakamahādvāranti** yamakakavāṭayuttaṃ mahantaṃ dvāraṃ. **Dvedhā katvāti** pabbatassa abbhantare maṇḍapasaṅkhepena leṇaṃ nimminivā dvedhā katvā tadā te tattha vasimsu.

Vasitakālañca kathento tesam mātuyā yāva tatiyabhavato paṭṭhāya samudāgamaṃ dassetuṃ, “**atīte kirā**”tiādi vuttaṃ. **Patthesīti** tassā kira khettaṭṭiyā vīhaya bhajjantiyā tattha mahākarañjapupphappamāṇā mahantā manoharā pañcasatamattā lājā jāyimsu. Sā tā gahetvā mahante paduminipatte ṭhapesi. Tasmīñca samaye eko paccekabuddho tassā anuggahatthaṃ avidūre khettaṭṭiyā gacchati. Sā taṃ dīsvā pasannamānasā supupphitaṃ mahantaṃ ekaṃ padumaṃ gahetvā tattha lāje pakkhipitvā paccekabuddhaṃ upasaṅkamitvā pañcapaṭṭiṭṭhitena vanditvā, “imassa, bhante, puññassa ānubhāvena ānubhāvasampanne pañcasataputte labheyya”nti pañca puttāsātāni patthesi. **Tasmīmyeva khaṇeti** yadā sā yathāvuttaṃ patthanaṃ paṭṭhapesi; tasmīmyeva khaṇe pañcasatā migaluddakā sambhatasambhārā paripakkapaccekabodhiññā tasseva paccekabuddhassa madhuramaṃsaṃ datvā, “etissā puttā bhavyeyāmā”ti patthayimsu. Atītāsu anekajātīsu tassā puttabhāvena āgatattā tathā tesam ahoṣīti vadanti. **Pādudhāreti** pādudhāre pādudhāre. Pādudhārasīsenā cettha nikkhipanaṃ āha.

Gabbhamalaṃ nissāyāti bahi nikkhantaṃ gabbhamalaṃ nissayaṃ katvā saṃsedajabhāvena nibbattā. Opaṭātikabhāvenāti keci. **Khayavayaṃ paṭṭhapetvāti** vipassanaṃ ārabhitvā. **Vipassanāti** aniccānupassanāpubbikā sappaccayanāmarūpadassanapubbikā ca, saṅkhāre sammasantassa aniccalakkhaṇe diṭṭhe, “yadaniccaṃ taṃ dukkhaṃ, yaṃ dukkhaṃ tadanattā”ti sesalakkhaṇāni suviññeyyāneva honti. **Paccekabodhiñāṇaṃ nibbattayimsūti** dve asaṅkhyeyyāni kappānaṃ sataśahaṣṣaṇca paccekabodhipāramitāya parinipphannattā ñāṇassa paripākattā vuttanayena sayameva vipassanaṃ pavattetvā matthakaṃ pāpetvā paccekabodhiñāṇaṃ adhigacchimsu. Sabbepi te taṃyeva gāthaṃ abhāsiṃsūti āha – “**ayaṃ tesam byākaraṇagāthā ahoṣī**”ti.

Saroruhanti sarasi jātaṃ. **Padumapalāsapattajanti** khuddakamahantehi kamaladalehi saha jātaṃ. Khuddakamahantakamaladalasaṅkhātāni vā padumapalāsapattāni ettha santīti padumapalāsapattaṃ, padumagacchaṃ. Tattha jātanti **padumapalāsapattajaṃ**. **Supupphitanti** suṭṭhu pupphitaṃ sammā vikaṣitaṃ. **Bhamaragaṇānuciṇṇanti** bhamaragaṇehi anukulañceva anuparibbhamitaṇca. **Aniccatāyupagatanti** khaṇe khaṇe vaṇṇabhedādivasena aniccatāya upagataṃ. **Viditvāti** vipassanāpaññāsahitāya maggapaññāya jānitvā. **Eko careti** tasmā aññopi mādiso hotukāmo evaṃ paṭipajjitvā eko care khaggavisāṇakappoti.

135. Satisārasīlasārādisamannāgamanena sattesu **sārabhūtā**. Sabbaso vaṭṭadukkassa vigatattā **niddukkā**. Samucchinnataṇhatāya **nittaṇhā**. **Mānacchidoti** thutivacanaṃ.

Etesam ekanāmakāyevāti etesaṃ āgatānaṃ paccekabuddhānaṃ pāliyaṃ anāgatā aññe paccekabuddhā samānanāmakā eva. Vuttamevatthaṃ pākaṭikaraṇatthaṃ “**imesu hī**”tiādi vuttaṃ. **Visuṃ visuṃ avatvāti** paccekaṃ sarūpato avatvā. **Aññe cāti** asādhāraṇattā āha. Sesam suviññeyyameva.

Isigilisuttavaṇṇanāya līnatthappakāsanā samattā.

7. Mahācattārīsakasuttavaṇṇanā

136. Dosehi ārakāti **ariyaṃ**. Tenāha “**niddosa**”nti. Sā pana niddosatā lokuttarabhāvena savisesāti āha “**lokuttara**”nti. Sammā sundaro pasattho niyyāniko samādhi **sammāsamādhīti** āha – “**sammāsamādhinti maggasamādhī**”nti. Upanisīdati ettha phalaṃ tappaṭibaddhavuttitāyāti **upanisaṃ**, kāraṇanti āha – “**saupanisanti sappaccaya**”nti. Parikaroti parivāretīti **parikkhāroti** āha – “**saparikkhāranti saparivāra**”nti.

Parivāritāti saha jātādīpaccayabhāvena parivārantehi viya upagatā. **Purecārikāti** vuṭṭhānagāminibhāvanā saha jātādīpaccayavasena paccayattā purassarā. Tenāha – “**vipassanāsammādiṭṭhi cā**”ti. Idāni tāni kiccato dassetuṃ, “**vipassanāsammādiṭṭhī**”tiādi vuttaṃ. Tattha **parivīmaṃsaggahaṇaṃ** tattha tattha cittuppāde vīmaṃsādhipateyyena pavattiyā sammādiṭṭhiyā pubbaṅgamabhāvadassanattā. Tenassa maggasamādhissa nānākhaṇikaṃ pubbaṅgamabhāvaṃ dasseti. **Vīmaṃsanapariyosāneti** tathāpavattaanulomañāṇassa osāne. **Bhūmiladdhaṃ vaṭṭaṃ samugghāṭayamānāti** attano santāne dīgharattaṃ anusayitaṃ kilesavaṭṭaṃ samucchindanti. **Vūpasamayamānāti** tasseva vevacanaṃ. **Vūpasamayamānāti** vā tato eva avasiṭṭhampi vaṭṭaṃ appavattikaraṇavasena vūpasamenti. Tenevāha – “**maggasammādiṭṭhi...pe... uppajjati**”ti. Sāti sammādiṭṭhi. **Duvidhāpīti** yathāvuttā duvidhāpi. **Idha adhippetā** vipassanāpaññāsahitāya maggapaññāya kiccassa dassitattā.

Lakkhaṇe paṭivijjhamāne lakkhaṇiko dhammo paṭividdho hotīti āha – “**micchādiṭṭhim...pe... ārammaṇato pajānāti**”ti. Vipassanāsammādiṭṭhiyampi eseva nayo. **Kiccatoti** bhāvanākiccato. Sammādiṭṭhiyaṃ tadadhigataasammohatāya **asammohato pajānāti**. **Kiccatoti** paṭivedhakiccato. Taṃ pana sabbathā asammuyhanamevāti āha “**asammohato**”ti. **Evaṃ pajānanāti** micchādiṭṭhi

micchādiṭṭhīti yāthāvato avabodho. **Assāti** taṃsamaṅgino puggalassa.

Dvāyanti -kāro dīghaṃ katvā vutto. Tenāha “**dvayaṃ vadāmi**”ti. Dve avayavā etassāti dvayaṃ. Tenāha “**duvidhakoṭṭhāsaṃ vadāmi**”ti. Puññassa eko bhāgo so eva puññabhāgiko, ka-kārassa ya-kāraṃ katvā itthilingavasena “**puññabhāgiyā**”ti vuttaṃ. **Upadhisāṅkhātassāti** khandhapabandhasāṅkhātassa.

Amatadvāranti ariyamaggaṃ. **Paññapetīti** niyyānādipakārato paññapeti. Tenāha “**vibhajivā dasseti**”ti. Tattha sammohassa viddhaṃsanena asammoḥato dasseti. **Tasmiṃ attheti** amatadvārapaññāpane atthe. **Bojjhaṅgappattāti** bojjhaṅgabhāvappattā. Maggabhāvena niyyānabhāvena pavattiyā maggapaññāya aṭṭhannampi sādharmaṇṭā samudāyassa ca avayavo aṅganti katvā sesadhamme aṅgikabhāvena dassento “**ariyamaggassa aṅga**”nti āha. **So bhikkhūti** micchādiṭṭhiṃ “micchādiṭṭhī”ti sammādiṭṭhiṃ “sammādiṭṭhī”ti jānanto bhikkhu. **Pajahanatthāyāti** samucchadavasena pajahanāya. **Paṭilābhatthāyāti** maggasammādiṭṭhiyā adhigamāya. **Kusalavāyāmoti** vipassanāsampayuttova kosallasambhūto vāyāmo. Saratīti **sato**, taṃ panassa saraṇaṃ satisamaṅgitāyāti āha “**satiyā samannāgato**”ti. Kāmañcettha vipassanāsammādiṭṭhiṃ yathābhūtā sammāvāyāmasatiyo saḥajātā ca purejātā ca hutvā parivārenti, “ītiyime tayo dhammā sammādiṭṭhiṃ anuparidhāvanti anuparivattantī”ti pana vacanato, “ettha hī”tiādīnā maggasammādiṭṭhiyā eva sesadhammaṇaṃ yathārahaṃ saḥacaraṇabhāvena parivāraṇaṃ yojitaṃ. **Sammāsāṅkappādīnanti ādi-saddena** sammāvācākamantājjīvaṇaṃ gahaṇaṃ itaresaṃ parivārabhāvena gahitattā. Na hi sakkā te eva parivāre parivāravante ca katvā vattumaṃ saṅkarato sammohajananato ca. **Tayoti** sammādiṭṭhivāyāmasatiyo **saḥajātaparivārāva honti** maggakkhaṇikānaṃ tesamaṃ adhippetattā vipassanākhaṇaviratīnaṃ asambhavato.

137. Takkanavasena lokasiddhenāti adhippāyo. “Evañcevañca bhavitabba”nti vividhaṃ takkanaṃ kūpe viya udakassa ārammaṇassa ākaḍḍhanaṃ vitakkaṃ **vitakko. Saṅkappanavasena**ti taṃ taṃ ārammaṇaṃ gahetvā kappanavasena. Takkanaṃ kappananti ca atamaṃsaḥajātānamevāti daṭṭhabbaṃ. **Ekaggoti** iminā samādhinā laddhupakārasseva vitakkassa appanāpariyāyo hotīti dasseti. Visesena vā appanā vitakkassa vasena cittaṃ ārammaṇaṃ abhiropeti, vitakke asati kathanti āha “**vitakke panā**”tiādi. **Attanoyeva dhammatāya cittaṃ ārammaṇaṃ abhiruhati**ti, etena ārammaṇadhammaṇaṃ gahaṇaṃ nāma sabhāvasiddhaṃ, na dhammantaramapekkhati, vitakko pana pavattamāno ārammaṇābhiniropanavaseneva pavattatīti dasseti. Evaṃ santepi sabhāvāvitakkacittuppādato savitakkacittuppādassa ārammaṇaggahaṇaviseso vitakkena jātoti katvā vitakko cittaṃ ārammaṇaggahaṇe visesapaccayoti pākāṭoyamattho. Apare pana bhaṇanti – yathā koci rājavallabhaṃ, taṃsambandhīnaṃ mittamaṃ vā nissāya rājagehaṃ ārohati anupavisati, evaṃ vitakkaṃ nissāya cittaṃ ārammaṇaṃ ārohati vitakkassa ārammaṇābhiniropanasabhāvattā, aññesaṃ dhammañca avitakkasabhāvato. Tenāha bhagavā – “cetaso abhiniropanā”ti (dha. sa. 7).

Yadi evaṃ kathaṃ avitakkacittaṃ ārammaṇaṃ ārohati? Vitakkabaleneva. Yathā hi so puriso paricayena tena vināpi nirāsaṅko rājagehaṃ pavisati, evaṃ paricayena vitakkena vināpi avitakkaṃ cittaṃ ārammaṇaṃ ārohati. **Paricayenāti** ca santāne pavattavitakkabhāvanāsāṅkhātena paricayena. Vitakkassa hi santāne abhiṇṇaṃ pavattassa vasena cittaṃ ārammaṇābhiruhanaṃ ciraparicitaṃ; tena taṃ kadāci vitakkena vināpi tattha pavattateva; yathā nāṇasahagataṃ cittaṃ sammasanavasena ciraparicitaṃ kadāci nāṇarahitampi sammasanavasena pavattati; yathā vā kilesasahitaṃ hutvā pavattamaṃ sabbaso kilesarahitampi paricayena kilesavāsānāvasena pavattati, evaṃ sampadamidaṃ daṭṭhabbaṃ.

Vācaṃ saṅkharotīti vācaṃ uppādeti, vacīghosuppattiyā visesapaccayo hotīti attho. **Lokiyavitakko** dvattiṃsacittasahagato **vācaṃ saṅkharoti** vacīviññattijananato. **Vacīsāṅkhārotveva panassa nāmaṃ hoti** ruḷhito, taṃsamattatānirodhato vā sambhavato pana saṅkhāroti. “**Lokuttarasammāsāṅkappaṃ parivārentī**”ti vatvā tividhe sammāsāṅkappe kadāci katamaṃ parivārentīti? Codanaṃ sandhāyāha “**etthā**”tiādi. **Nānācittesu labbhanti** nānāsamannāhārahetukattā,

pubbabhāgeyeva ca te uppajjantīti. **Tiṇi nāmāni labhati** tividhassapi paṭipakkhassa samucchindanena sātisayaṃ tiṇṇampi kiccakaraṇato. Esa nayo sammāvācādīsūpi.

138. Viramati etāyāti **veramaṇi** virati vuccati. Sā musāvādato viramaṇassa kāraṇabhāvato cetanāpi verassa maṇanato vināsanato viratipīti āha – “**viratipi cetanāpi vaṭṭati**”ti. **Ārakā ramatīti** samucchinnehi dūrato samussāreti. **Vinā tehi ramatīti** accantameva tehi vinā bhavati. **Tato tatoti** diṭṭhe adiṭṭhavādādito musāvādā. Viśesato anuppattidhammattā **paṭinivattā hutvā**.

140. Tividhena kuhanavatthunāti paccayapaṭisevana-sāmantaṭṭajappana-iriyāpathapavattanasāṅkhātena pāpicchatā nibbattena tividhena kuhanavatthunā. **Etāya** kuhanāya karaṇabhūtāya paccayuppādanatthaṃ **nimittam** sīlam etesanti yojanā. Attavisayaḷābhahetu akkosanakhumsanavambhanādivasena pisanam ghaṭṭanam vihetṭhanam **nippeso**. Ito laddham aññassa, tato laddham parassa datvā evam lābhena lābham nijigīmsatīti **lābhena lābham nijigīmsanā**. **Pāliyam āgato** kuhanādivasena **micchāājīvo**. Ko pana soti āha “**ājīvahetū**”tiādi. **Tāsamyevāti** avadhāraṇam, “ājīvo kuppamāno kāyavacīdvāresu eva kuppati”ti katvā vuttam.

141. Sammā pasatthā sobhanā niyyānikā diṭṭhi etassāti **sammādiṭṭhi**, puggalo. Tassa pana yasmā sammādiṭṭhi saccābhisamayassa nibbānasacchikiriyāya avassayo, tasmā vuttam – “**maggasammādiṭṭhiyam ṭhitassā**”ti. **Pahoti** bhavati tāya saheva uppajjati pavattati. Paccavekkhaṇañāṇam yāthāvato jānanaṭṭhena sammāñāṇanti idhāhippetam, tañca kho maggasamādhimhi ṭhite eva hotīti imamattham dassetuṃ āha – “**maggasammāsamādhimhi...pe... sammāñāṇam pahoti**”tiādi. Iminā kiṃ dassetīti? Yathā maggasammādiṭṭhiyam ṭhito puggalo, “sammādiṭṭhi”ti vutto, evam maggaphalapaccavekkhaṇañāṇe ṭhito, “sammāñāṇo”ti vutto, tassa ca maggaphalasammāsamādhipavattiyā pahoti sammāñāṇassa sammāvimuttiyā pahotīti imamattham dassetī. Phalasangāhīti tāva pavattatu, maggasamādhī pana kathanti? Tampi akuppabhāvatāya accantasamādhībhāvato kiccanipphattiyā pavattatevāti vattabbatam labhati. **Ṭhapetvā aṭṭhaphalaṅgānīti** phalabhūtāni sammādiṭṭhiādīni aṭṭhaṅgāni, “sammādiṭṭhissa sammāsāṅkappo pahotī”tiādīni visum gahitattā ṭhapetvā. **Sammāñāṇam paccavekkhaṇam katvāti** paccavekkhaṇañāṇam sammāñāṇam katvā. **Phalam kātunti** phaladhammasahacaritatāya vipākasabhāvatāya ca “phala”nti laddhanāme phalasampayuttadhamme sammāvimuttiṃ kātum vaṭṭatīti vuttam. Tathā ca vuttam **sallekhasuttavaṇṇanāyam** (ma. ni. aṭṭha. 1.83) “phalasampayuttāni pana sammādiṭṭhiādīni aṭṭhaṅgāni ṭhapetvā sesadhammā sammāvimuttīti veditabbā”ti.

142. Nijjīṇṇāti nijjīritā, viddhastā vināsītātī attho. **Phalam kathitanti** “sammādiṭṭhissa, bhikkhave, micchādiṭṭhi nijjīṇṇa hotī”ti iminā vārena sāmāññaphalam kathitanti vadanti, nijjīraṇam paṭippassambhananti adhippāyo. Nijjīraṇam pana samucchindananti katvā, **majjhīmabhāṇakā...pe... maggo kathitoti vadanti. Dassanaṭṭhenaṭī** pariññābhisamayādivasena catunnam saccānam paccakkhato dassanaṭṭhena. **Viditakaraṇaṭṭhenaṭī** paccakkhena yathādiṭṭhānam maggaphalānam pākāṭakaraṇaṭṭhena. **Tadadhimuttaṭṭhenaṭī** tasmim yathāsacchikate nibbāne adhimuccanabhāvena.

Kusalapakkhāti anavajjakotṭhāsā. **Mahāvīpākādānenāti** mahato vipulassa lokuttarassa sukhavīpākassa ceva kāyikādidukkhavīpākassa ca dānena.

Yathā mahāvīpākassa dānena mahācattārīsakaṃ, tathā bahutāyapī mahācattārīsakotī dassetuṃ, “**imasmiñca pana sutte pañca sammādiṭṭhiyo kathitā**”tiādi vuttam. Bahuatthopi hi **mahā**-saddo hoti “mahājano”tiādīsū (ma. ni. 2.65). Ettha ca “natthi dinna”ntiādīni vattubhedena dasa micchādiṭṭhidhammā kathitā, vattubhedeneva, “atthi dinna”ntiādīni dasa sammādiṭṭhidhammāti vīsati hoti. Yathā “sammādiṭṭhissa, bhikkhave, sammāsāṅkappo pahotī”tiādīni maggavasena dasa sammattadhammā, tappaṭipakkhabhūtā “micchādiṭṭhissa micchāsāṅkappo pahotī”tiādīni atthato dasa micchattadhammāti vīsati, tathā phalavasena tesu evam vīsati. Katham vārepi sammādiṭṭhiādāyo dasāti vīsati? Evamete dve cattārīsakāni purimena saddhim tayo cattārīsakā vibhāvītātī veditabbā.

143. Pasamsiyassa ujuvipaccanīkaṃ nindiyāṃ pasamsantopi atthato pasamsiyāṃ nindanto nāma hoti. Pasamsiyassa guṇaparidhaṃsanamukheneva hi nindiyassa pasamsāya pavattanatoti āha – “**micchādiṭṭhināmāyaṃ sobhanāti vadantopi sammādiṭṭhiṃ garahati nāmā**”tiādi. **Evamādīti ādisaddena** “natthi hetu natthi paccayo sattānaṃ saṃkilesāyā”ti (dī. ni. 1.168; ma. ni. 2.227) evamādiṃ saṅgaṇhāti; tasmā **evaṃvādinoti** evaṃ hetu paṭikkhepavādinoti attho. **Okkantaniyāmāti** ogāḷhamicchattaniyāmā. **Evarūpaṃ laddhiṃ gahetvāti**ādisu yaṃ vattabbaṃ, taṃ **cūḷapuṇṇamasuttavaṇṇanāyaṃ** vuttanayameva tasmā tatha vuttanayeneva veditabbaṃ. Ediso hi “buddhānampi atekiccho”tiādi vuttasadiṃ.

Attano nindābhayenāti “sammādiṭṭhiṃca nāmete garahantī”ādinā upari parehi vattabbanindābhayena. **Ghaṭṭanabhayenāti** tathā paresaṃ āsādanābhayena. Sahadhammena parena attano upari kātabbaniggaho upārambho, garahato parittāso upārambhabhayaṃ, taṃ pana atthato upavādabhayaṃ hotīti āha “**upavādabhayenā**”ti. Sesāṃ suviññeyyameva.

Mahācattārīsakasuttavaṇṇanāya līnatthappakāsanā samattā.

8. Ānāpānassatisuttavaṇṇanā

144. **Pubbenāti** nissakke karaṇavacanaṃ. “Aparaṃ visesa”nti vuttattā visesavisayo ca pubbasaddoti āha – “**sīlaparipūraṇādito pubbavisesato**”ti.

145. **Āraddho** yathānusiṭṭhaṃ paṭipattiyā ārādhito. Yadatthāya sāsane pabbajjā, visesāpatti ca, tadevettha appattanti adhippetāṃ, taṃ jhānavipassanānimittanti āha – “**appattassa arahattassā**”ti. **Komodīti** kumudavatī. Tadā kira kumudāni supupphitāni honti. Tenāha – “**kumudānaṃ atthitāya komudī**”ti. Kumudānaṃ samūho, kumudāni eva vā komudā, te ettha atthīti **komudīti**. **Pavāraṇasaṅgahanti** mahāpavāraṇaṃ akatvā āgamanīyasaṅgahaṇaṃ.

Āraddhavipassakassāti ārabhitavipassanassa, vipassanaṃ vaḍḍhetvā ussukkāpetvā vipassissa. **Bhikkhū idha osarissanti** vutthavassā pavāritapavāraṇā “bhagavantaṃ vandissāma, kammaṭṭhānaṃ sodhessāma, yathāladdhaṃ visesaṇca pavedissāmā”ti ajjhāsayena. **Ime bhikkhūti** ime taruṇasamathavipassanā bhikkhū. **Visesaṃ nibbattetuṃ na sakkhissanti** senāsanaṃ appāyādiālabhena. **Apalibuddhanti** aññehi anupaddutaṃ. **Senāsanaṃ gahetuṃ na labhanti** antovassabhāvato. **Ekassa dinnopi sabbesaṃ dinnoyeva hoti**, tasmā sutasutaṭṭhāneyeva ekamāsaṃ vasitvā osariṃsu.

146. **Alanti yuttaṃ**, opāyikanti attho, “alameva nibbinditu”ntiādisu (dī. ni. 2.272; saṃ. ni. 2.124, 128, 134, 143) viya. Puṭabaddhaṃ pariharitvā asitaṃ **puṭosaṃ** a-kārassa o-kāraṃ katvā. Tenāha “**pātheyya**”nti.

147. **Vipassanā kathitāti** aniccasaññāmukheneva vipassanābhāvanā kathitā. Na hi kevalāya aniccānupassanāya vipassanākkiccaṃ samijjhati. **Bahū bhikkhū** te ca vitthārarucikāti adhippāyo. Tenāha “**tasmā**”tiādi.

149. **Sabbatthāti** sabbavāresu. “Tasmā tiha, bhikkhave, vedanānupassī”tiādisupi pītipaṭisaṃveditādivaseneva vedanānupassanāya vuttattā, “**sukhavedanaṃ sandhāyetaṃ vutta**”nti āha. Satipaṭṭhānabhāvanāmanasikāratāya vuttaṃ – “**sādhukaṃ manasikāra**”nti. **Saññānāmena paññā vuttā** tesāṃ payogattā. **Manasikāranāmena vedanā vuttā**, bhāvanāya paricitattā ārammaṇassa manasikāranti katvā. **Vitakkavicāre ṭhapetvāti** vuttaṃ vacīsankhārattā tesāṃ.

Evaṃ santepīti yadipi manasikārapariyāpannatāya “manasikāro”ti vuttaṃ, evaṃ sante vedanānupassanābhāvo na yujjati, assāsapassāsā hissa ārammaṇaṃ. **Vatthunti** sukhādīnaṃ vedanānaṃ

pavattiṭṭhānabhūtaṃ vatthūṃ **ārammaṇaṃ katvā vedanāva vediyati**, vedanāya ekantabhāvadassanena tassa vedanānupassanābhāvo yujjati evāti imamatthaṃ dasseti. **Etassa** anuyogassa.

Dvīhākārehīti ye sandhāya vuttaṃ, te dassento “**ārammaṇato asammohato cā**”ti āha. **Sappīṭike dve jhāneti** pītisahagatāni paṭhamadutiyaṃ jhānāni paṭipāṭiyā **samāpajjati. Samāpattikkhaṇeti** samāpajjanakkhaṇe. **Jhānapaṭilābhenāti** jhānena samaṅgībhāvena. **Ārammaṇato** ārammaṇamukhena tadārammaṇajhānapariyāpannā **pīti paṭisaṃviditā hoti** ārammaṇassa paṭisaṃviditattā. Yathā nāma sappariyesanaṃ carantena tassa āsaye paṭisaṃvidite sopi paṭisaṃviditova hoti mantāgadabalena tassa gahaṇassa sukarattā; evaṃ pītiyā āsayabhūte ārammaṇe paṭisaṃvidite sā pīti paṭisaṃviditā eva hoti salakkhaṇato sāmāññalakkhaṇato ca tassā gahaṇassa sukarattā. **Vipassanākkhaṇeti** vipassanāpaññāpubbaṅgamāya maggapaññāya viśesato dassanakkhaṇe. **Lakkhaṇapaṭivedhāti** pītiyā salakkhaṇassa sāmāññalakkhaṇassa ca paṭivijjanena. Yañhi pītiyā viśesato sāmāññato ca lakkhaṇaṃ, tasmim vidite sā yāthāvato viditā hoti. Tenāha – “**asammohato pīti paṭisaṃviditā hoti**”ti.

Idāni tamatthaṃ pāṭiyā vibhāvetuṃ, “**vuttampi ceta**”ntiādi vuttaṃ. Tattha **dīghaṃ assāsavasenāti** dīghassa assāsassa ārammaṇabhūtassa vasena. **Cittassa ekaggataṃ avikkhepaṃ pajānati** jhānapariyāpannaṃ avikkhepoti laddhanāmaṃ cittassekaggataṃ taṃsāmpayuttāya paññāya pajānato. Yatheva hi ārammaṇamukhena pīti paṭisaṃviditā hoti, evaṃ taṃsāmpayuttadhammāpi ārammaṇamukhena paṭisaṃviditā eva honti. **Sati upaṭṭhitā hotīti** dīghaṃ assāsavasena jhānasāmpayuttā sati tasmim ārammaṇe upaṭṭhite ārammaṇamukhena jhānepi upaṭṭhitā eva nāma hoti. **Tāya satiyāti** evaṃ upaṭṭhitāya tāya satiyā yathāvuttena **tena nāṇena** suppaṭividditattā ārammaṇassa tassa vasena tadārammaṇā **sā pīti paṭisaṃviditā hoti. Avasesapadānipīti** “dīghaṃ passāsavasena”tiādi padānipi.

Evaṃ **paṭisambhidāmagge** vuttamatthaṃ imasmim sutte yojetvā dassetuṃ, “**itī**”tiādi vuttaṃ. Imināpi yoginā manasikārena paṭilabhitabbato paṭilābhoti vuttaṃ – “**jhānasāmpayutte vedanāsāṅkhātamanasikārapaṭilābhenā**”ti.

Assāsapassāsanimitanti assāsapassāse nissāya paṭiladdhapaṭibhāganimittaṃ ārammaṇaṃ kiñcāpi karoti; satīṇca sampajaññaṇca upaṭṭhapetvā pavattanato ārammaṇamukhena tadārammaṇassa paṭisaṃviditattā citte cittānupassīyeva nāmesa hoti. Evaṃ cittānupassanāpi satisampajaññabaleneva hotīti āha “**na hī**”tiādi. Pajahati etena, sayamaṃ vā pajahatīti **pahānaṃ, fīṇaṃ. Domanassavasena byāpādanīvaraṇaṃ dassitaṃ** tadekaṭṭhabhāvato. **Tassāti** nīvaraṇapabbassa. **Pahānakarañāṇanti** pajahanañāṇaṃ. **Vipassanāparamparanti** paṭipāṭiyā vipassanamāha. **Samathapaṭipannanti** majjhimasamathanimittaṃ paṭipannacittaṃ ajjupekkhati. **Ekato upaṭṭhānanti** paṭipakkhavigamena ekabhāvena upaṭṭhānaṃ. **Sahajātānaṃ ajjupekkhanā hotīti** pagghaniggahasampahaṃsanesu byāpārassa anāpajjitattā ārammaṇānaṃ ajjupekkhanā, “yadatti yaṃ bhūtaṃ taṃ pajahati upekkhaṃ paṭilabhati”ti, evaṃ vuttaajjupekkhanā pavattāti paṭipannā. **Kevalaṃ nīvaraṇādiddhammeti** nīvaraṇādiddhamme eva pahīne disvā, atha kho tesamaṃ pajahanañāṇampi yāthāvato paññāya disvā ajjupekkhitā hoti. Vuttañhetamaṃ bhagavatā “dhammāpi kho, bhikkhave, pahātabbā, pageva adhammā”ti (ma. ni. 1.240).

150. Aniccādivasena pavicinatīti aniccādiṭṭhārehi vicināti passati. **Nirāmisāti** kilesāmisarahitā. **Kāyikacetasikadarathapaṭippassaddhiyāti** kāyacittānaṃ sādhubhāvūpagamanena vikkhambhitattā. Sahajātadhammānaṃ ekasabhāvena pavattiyā **sahajātaajjupekkhanāya ajjupekkhitā hoti.**

Tasmim kāye pavattā kāyārammaṇā **sati**, pubbhāgiyo **satisambojjhaṅgo**. Esa nayo sesesupi. Somanassasahagatacittuppādavasena cetamaṃ okkamaṇaṃ oliyanaṃ kosajjaṃ, tato ativattanaṃ atidhāvanaṃ uddhaccaṃ, tadubhayavidhurā bojjaṅgupekkhābhūtā anosakkanaanativattanasāṅkhātā majjhattākāratā. Idāni **yatheva** hītiādinā tameva majjhattākāraṃ upamāya vibhāveti. **Tudanaṃ vā** patodena. **Ākaḍḍhanaṃ vā** rasminā. **Natthi** na kātabbaṃ atthi. **Ekacittakkhaṇikāti** ekekasim citte

vipassanāvasena saha uppajjanakā. **Nānārasalakkhaṇā**ti nānākiccā ceva nānāsabhāvā ca.

152. Vuttatthāneva sabbāsavasuttavaṇṇanāyaṃ (ma. ni. aṭṭha. 27) ānāpānārammaṇā aparāparaṃ pavattasatiyo ārammaṇasīsenā tadārammaṇā dhammā gahitā, tā panekasantāne lokiyacittasampayuttāti **lokiyā**, tā vaḍḍhamānā **lokiyaṃ** catubbidhampi **satipaṭṭhānaṃ paripūrenti**. **Vijjāvimuttiphalaṇibbānanti** vimuttīnaṃ phalabhūtaṃ tehiyeva veditabbaṃ kilesanibbānaṃ, amatamahānibbānameva vijjāvimuttīnaṃ adhigamena adhigantabbatāya tathā vuttaṃ. Paripūraṇaṅcassa ārammaṇaṃ katvā amatassānubhavanameva. Idha sutte lokiyāpi bojjhaṅgā kathitā lokuttarāpīti ettakaṃ gahetvā, “**iti lokiyassa āgataṭṭhāne lokiyaṃ kathita**”nti ca atthavaṇṇanāvasena aṭṭhakathāyaṃ kathitaṃ. **Theroti** mahādhammarakkhitatthero. **Aññattha evaṃ hotīti** aññasmiṃ lokiyalokuttaradhammānaṃ tattha tattha vomissakanayena āgatasutte evaṃ lokiyaṃ āgataṃ, idha lokuttaraṃ āgataṃti kathetabbaṃ hoti. **Lokuttaraṃ upari āgataṃti** vijjāvimuttiṃ paripūrentīti evaṃ lokuttaraṃ upari desanāyaṃ āgataṃ; tasmā lokiyā eva bojjhaṅgā vijjāvimuttiṃ paripūrikā kathetabbā lokuttarānaṃ bojjhaṅgānaṃ vijjāgahaṇena gahitattā, tasmā therena vuttoyevettha attho gahetabbo. Sesam vuttanayattā suviññeyyameva.

Ānāpānassatisuttavaṇṇanāya līnatthappakāsanā samattā.

9. Kāyagatāsatisuttavaṇṇanā

153-4. Tappaṭisaraṇānaṃ kāmāvacarasattānaṃ paṭisaraṇaṭṭhena gehā kāmagaṇā, gehe sitā ārabha pavattiyā allīnāti **gehassitā**. **Sarantīti** vegasā pavattanti. Vegena hi pavatti dhāvātīti vuccati. **Saṅkappāti** ye keci micchāsāṅkappā, byāpādavihiṃsāsāṅkappādayopi kāmagaṇasitā evāti. **Gocarajjhataṃmivēvāti** pariggahite kammaṭṭhāne eva vattanti. Tañhi dhammasena upaṭṭhitāya bhāvanāya gocarabhāvato “gocarajjhata”nti vuttaṃ. Assāsapassāsakāye gatā pavattāti kāyagatā, taṃ **kāyagatāsatiṃ**. Satisīsenā taṃsahagate bhāvanādhamme vadati assāsapassāsakāyādike taṃtaṃkoṭṭhāse samathavattubhāvena pariggahetvā satiyā pariggahitattā; tathāpariggahite vā te ārabha aniccādimanasikārasena pavattā kāyārammaṇā satī satibhāvena vatvā ekajjhaṃ dassento “**kāyapariggāhika**”ntiādīmāha.

Satipaṭṭhāneti mahāsatiṭṭhānasutte (dī. ni. 2.378; ma. ni. 1.111), **cuddasavidhena kāyānupassanā kathitā**, cuṇṇakajātāni aṭṭhikāni pariyoṣānaṃ katvā kāyānupassanā niddiṭṭhā, idha pana kesādīsu vaṇṇakasiṇavasena nibbattitānaṃ catunnaṃ jhānānaṃ vasena uparidesanāya vaḍḍhitattā aṭṭhārasavidhena kāyagatāsatiṭṭhāvanā.

156. Tassa bhikkhunoti yo kāyagatāsatiṭṭhāvanāya vasībhūto, tassa bhikkhuno. **Sampayogavasena vijjaṃ bhajantīti** sahaajāta-aññamañña-nissaya-sampayutta-atthi-avigatapaccayavasena vijjaṃ bhajanti, tāya saha ekībhāvamiva gacchantīti attho. **Vijjābhāge vijjākoṭṭhāse vattantīti** vijjāsabhāgatāya tadekadese vijjākoṭṭhāse vattanti. **Tāhi sampayuttadhammā** phassādayo. Nanu cettha vijjānaṃ vijjābhāgiyatā na sambhavatīti? No na sambhavati. Yāya hi vijjāya vijjāsampayuttānaṃ vijjābhāgiyatā, sā taṃnimittāya vijjāya upacariyatīti. **Ekā vijjā vijjā, sesā vijjābhāgiyāti** aṭṭhasu vijjāsu ekaṃ “vijjā”ti gahetvā itarā tassā bhāgatāya “vijjābhāgiyā”ti veditabbā. Saddhiṃ pavattanasabhāvāsu ayameva vijjāti vattabbāti niyamassa abhāvato vijjābhāgo viya vijjābhāgiyāpi pavattati evāti vattabbaṃ. **Apopharaṇanti** paṭibhāganimittabhūtena āpokasiṇena sabbaso mahāsamuddapharaṇaṃ āpopharaṇaṃ nāma. Dibbacakkhuññaṇassa kiccaṃ pharaṇanti katvā, dibbacakkhuatthaṃ vā ālokaparaṇaṃ **dibbacakkhupharaṇanti** daṭṭhabbaṃ. Ubhayasmimpi pakkhe samuddaṅgamānaṃ kunnadīnaṃ samuddantogadhattā tesam cetasā phuṭatā veditabbā. **Kunnadiggahaṇaṅcetta** kaṅcimeva kālāṃ sanditvā tāsāṃ udakassa samuddapariyāpanabhāvūpagamanattā, na bahi mahānadiyo viya parittakālaṭṭhitikāti.

Oṭaranti kilesuppattiyā avasaraṃ, taṃ pana vivaraṃ chiddanti ca vuttaṃ. **Ārammaṇanti**

kilesupattiyā olambanam. **Yāva pariyoṣānāti** mattikāpuñjassa yāva pariyoṣānā.

158. Abhiññāyāti iddhividhādiabhiññāya. **Sacchikātabbassāti** paccakkhato kātabbassa adhiṭṭhānavikubbanādidhammassa. **Abhiññāva kāraṇanti** āha – “sacchikiriyāpekkhāya, abhiññākāraṇassa pana siddhiyā pākaṭā”ti. **Mariyādabaddhāti** udakamātikāmukhe katā.

Yuttayānam viya katāya icchiticchite kāle sukkena paccavekkhitabbattā. **Paṭiṭṭhākatāyāti** sampattīnam paṭiṭṭhābhāvaṃ pāpitāya. **Anuppavattitāyāti** bhāvanābahulīkārehi anuppavattitāya. **Paricayakatāyāti** āsevanadaḷhatāya suciraṃ paricayāya. **Susampaggahitāyāti** sabbaso ukkaṃsaṃ pāpitāya. **Susamāraddhāyāti** ativiya sammadeva nibbattikatāya. Sesam suviññeyyameva.

Kāyagatāsatisuttavaṇṇanāya līnatthappakāsanā samattā.

10. Saṅkhārupapattisuttavaṇṇanā

160. Saṅkhārupapattinti vipākakkhandhasaññitānam saṅkhārānam uppattiṃ, nibbattinti attho. Yasmā avadhāraṇam etasmiṃ pade icchitabbanti, “**saṅkhārānamyeva upapatti**”nti vatvā tena nivattitaṃ dassento, “**na sattassā**”ti āha. Tena satto jīvo uppajjati micchāvādam paṭikkhipati. Evaṃ uppajjanakadhammasena uppattiṃ dassetvā idāni uppattijanakadhammasenapi taṃ dassetuṃ, “**puññābhisāṅkhārena vā**”tiādi vuttaṃ. Tattha kāmesu puññābhisāṅkhārenapi upapatti hoti, sā pana imasmiṃ sutte gahitāti. **Puññābhisāṅkhārena vāti vā**-saddo avuttatthāpekkhaṇavikappattho, avuttatthāpekkhāya pana na āgato “āneñjābhisāṅkhārenā”ti. Atha vā upapatti āgatā, evaṃ kiccaṃ āgataṃ, āneñjābhisāṅkhāro panettha sarūpena anāgatopi puññābhisāṅkhāraggahaṇeneva gahitoti daṭṭhabbaṃ. Keci pana “puññāneñjābhisāṅkhārenā”ti paṭhanti. **Bhavūpagakkhandhānanti** sugatibhavūpagānam upādānakkhandhānam.

161. Lokikā vaṭṭanti kammavaṭṭassa gahaṇato. Bhavūpapattihetubhūtā okappanīyasaddhā catupārisuddhisīlam tādisaṃ buddhavadānābāhusaccaṃ āmisapariccāgo kammassakatāññānam kammaphaladiṭṭhi ca ime **saddhādayo** veditabbā. **Ṭhapetīti** paṇidahanavasena ṭhapeti. Paṇidahaṭṭi hi ayamettha attho. **Paṭiṭṭhāpetīti** tattha suppatiṭṭhitaṃ katvā ṭhapeti. **Sahapatthanāyāti**, “aho vatāham... pe... upapajjeyya”nti evaṃ pavattapatthanāya saha. **Saddhādayovāti** yathāvuttā saddhādayo eva **pañca dhammā** upapattiyā saṅkharaṇaṭṭhena saṅkhārā, tasmā eva aññehi visiṭṭhabhavūpaharaṇaṭṭhena vihārā nāmāti. **Tasmiṃ ṭhāneti** tasmiṃ upapattiṭṭhāne.

Pañcadhammāva taṃsamaṅgīpuggalo upapattiṃ maggati gavesati etenāti **maggo**. Paṭipajjati etāyāti **paṭipadā**. Cetanā panettha suddhasāṅkhāratāya saddhādiggahaṇeneva gahitā, tasmā avadhāraṇam kataṃ. Upapattipakappanavaseneva pavattiyā patthanāgahaṇeneva tassā gahaṇanti keci. Cittakarayuttagatinibbattanadhammasena avadhāraṇassa katattā. Cetanā hi nāma kammaṃ, tassā upapattinibbattane vattabbameva natthi, tassā pana kiccakaraṇā saddhādayo patthanā cāti ime dhammā sahakārino bhavūpapattiyā niyāmakā hontīti tatrūpapattiyā pavattantīti tesam maggādhāvō vutto. Tenāha “**yassa hī**”tiādi. Tena saddhā patthanā cāti ubhaye dhammā sahitā hutvā kammaṃ visesentā gatiṃ niyamentīti dasseti, paṭisandhiggahaṇam aniyataṃ kevalassa kammassa vasenāti adhippāyo. Kāmañcettha “kammaṃ katvā”ti vuttaṃ, kammāyūhanato pana pageva patthanam ṭhapetumpi vaṭṭatiyeva. **Kammaṃ katvāti** cettha “tāpetvā bhujjati, bhutvā sayati”tiādīsu viya na kālaniyamo, kammaṃ katvā yadā kadāci patthanam kātuṃ vaṭṭatīti ca idaṃ cārittadassanam viya vuttaṃ. Yathā hi bhavapatthanā yāva maggena na samucchijjati, tāva anuppanābhinavakatūpacitassa kammassa paccayo hotiyeva. Puna tathā visesapaccayo, yathā niyametvā uppāditā. Tena vuttaṃ – “**yassa pañca dhammā atthi, na patthanā tassa gati anibaddhā**”ti.

165. Sabbasovāti “idaṃ kālakam sāmam setam haritam maṇḍalam aparimaṇḍalam caturamsam paripuṇṇam khuddakam mahanta”ntiādinā sabbasova **pākaṭam hoti**.

167. Sundaroti kālakādidosarahitatāya sobhano. **Ākarasampanno** sampannaākaruppattiyā. **Dhovanādīhī**ti dhovanatāpanamajjanādīhi.

168. Lokadhātūnaṃ sataśahassaṃ attano vase vattanato **sataśahasso**. Tassa pana tattha obhāsakaraṇaṃ pākaṅgānti āha “**ālokapharaṇabhrahmā**”ti. Ayameva nayo heṭṭhā “sahasso brahmā”tiādīsūpi. **Nikkhena** katanti nikkhaparimāṇena jambonadena kataṃ. Nikkhaṃ pana vīsatisuvaṇṇanti keci. Pañcavīsatisuvaṇṇanti apare. Suvannaṃ nāma catudharaṇanti vadanti. **Ghaṭṭanamajjanakkhamaṃ na hoti** parittabhāvato. **Atirekenā**ti pañcasuvaṇṇaatirekena nikkhappamāṇaṃ asampattena. **Vaṇṇavantaṃ pana na hoti** avipulatāya uḷāraṃ hutvā anupaṭṭhānato. Avaṇṇavantaṭāya eva **pharusadhātukaṃ khāyati**. **Tāsūti** tāsū bhūmīsū, yattha sākāhā vaḍḍhitvā ṭhitā. **Teti** suvaṇṇaṅkurā. **Pacitvā**ti tāpetvā. **Sampahaṭṭhanti** samujjalīkatanti āha – “**dhotaghaṭṭitapamajjita**”nti, tambamattikalepaṃ katvā dhotañceva pāsāṇādinā ghaṭṭitañca eḷakalomādinā pamajjitañcāti attho.

Etadevāti ālokaṃ vaḍḍhetvā ettha ālokapharaṇameva. Atha vā yaṃ dibbacakkhupharaṇaṃ, ālokapharaṇampi **etadeva**. Yattakañhi ṭhānaṃ yogī kasiṇālokena pharati; tattakaṃ ṭhānaṃ dibbacakkhuññaṃ phusatīti dibbacakkhupharaṇe dassite ālokapharaṇaṃ dassitamevāti attho. **Sabbatthā**ti sabbasmiṃ “pharivā”ti āgatattāhāne. **Avināsentenā**ti asambhinnena.

Kasiṇapharaṇaṃ viyāti kasiṇobhāseṇa pharaṇaṃ viya **dissati** upaṭṭhāti, maṇipabhāpharaṇassa viya brahmaloke dhātupharaṇassa dassitattāti adhippāyo. Sarīrapabhā pana nikkhapabhāsadisāti, “**nikkhopamme sarīrapharaṇaṃ viya dissati**”ti vuttaṃ. **Aṭṭhakathā nāma natthī**ti pālīpadassa atthavaṇṇanāya nāma nicchitāya bhavitabbaṃ, avinicchitāya pana natthi viyāti akathanaṃ nāma aṭṭhakathāya anāciṇṇanti tassa vādaṃ **paṭikkhipivā**. Yathā hi vattabbaṃ, tathā avatvā “vīyā”ti vacanaṃ kimatthiyanti adhippāyo. Buddhānaṃ byāmapabhā byāmapadese sabbakālaṃ adhiṭṭhāti viya tassa brahmuno **sarīrapharaṇaṃ** sarīrābhāya pattharaṇaṃ **sabbakālikaṃ**. **Cattārimāni** itarāni pharaṇāni **avināsetvā** aññaṃaññaṃabhindivā **kathetabbaṃ**. **Pharaṇapadasseva vevacanaṃ** “adhimuccaneneva pharaṇa”nti. **Pattharatī**ti yathāvuttaṃ pharaṇavasena pattharati. **Jānātī**ti adhimuccanavasena jānāti.

169. Ādayoti ādi-saddena subhe saṅgaṇhāti. **Ābhāti** dutiyajjhānabhūmike deve ekajjhaṃ gahetvā sādharmaṇato vuttaṃ. Tato **subhāti** tatiyajjhānabhūmike. Tenāha – “**pāṭiyekkā devā natthī**”tiādi. Sādharmaṇato katāyapi patthanāya jhānaṅgaṃ parittaṃ bhāvitañce, parittābhesu upapatti hoti, majjhimañce, appamāṇābhesu, paṇītañce, ābhassaresu upapatti hotīti daṭṭhabbaṃ. **Subhāti** etthāpi eseva nayo. Heṭṭhā vuttanayeneva suviññeyyoti āha – “**vehapphalādivārā pākaṭāyevā**”ti.

Kāmāvacaresu nibbattatūtiādinā saddhādīnaṃ ajjhānavipassanānaṃ kathaṃ tadadhiṭṭhānaṃ hotīti āsaṅkati. Itaro saddhādīnaṃ ajjhānasabhāvattepi jhānavipassanānaṃ adhiṭṭhānaṃ nissayapaccayādivasena sappaccayattā brahmalokūpapattiṃ nibbānañca āvahantīti dassento, “**ime pañca dhammā**”tiādimāha. Tattha **silanti** sambhārasīlaṃ. Anāgāmī samucchinnaorambhāgiyasamyojano samāno sace sabbaso upapattiyo atikkamituṃ na sakkoti, ariyabhūmīsū eva nibbattati yathūpacitajjhānakammunāti āha – “**anāgāmi...pe... nibbattati**”ti. **Uparimagganti** aggamaggaṃ bhāvetvā. **Āsavakkhayanti** sabbaso āsavānaṃ khayaṃ pahānaṃ pāpuṇāti. Sesam suviññeyyameva.

Saṅkhārupapattisuttavaṇṇanāya līnatthappakāsanā samattā.

Niṭṭhitā ca anupadavaggavaṇṇanā.

3. Suññatavaggo

1. Cūlasuññatasuttavaṇṇanā

176. Kālaparicchedaṃ katvāti samāpajjantehi nāma kālaparicchedo kātabbo. Thero pana bhagavato vattakaraṇatthaṃ kālaparicchedaṃ karoti, “ettake kāle vītivatte idaṃ nāma bhagavato kātabba”nti. So tathakamyeva samāpattiṃ samāpajjitvā vuṭṭhāti, taṃ sandhāya vuttaṃ “kālaparicchedaṃ katvā”ti. **Suññatāphalasaṃpattiṃ appetvāti** etena itare, “na sotāpannasakadāgāmī phalasaṃpattiṃ samāpajjanti”ti vadanti, taṃ vādaṃ paṭisedhenti. **Suññatoti** attasuññato ca niccasuññato ca saṅkhārā upaṭṭhahimsu. Sekkhānañhi suññatāpaṭivedho pādesiko subhasukhasaṅgānaṃ appahīnattā, tasmā so thero suññatākathaṃ sotukāmo jāto. **Dhurena dhuraṃ paharantena viyāti** rathadhurena rathadhuraṃ paharantena viya katvā ujukameva suññatā...pe... vatthum na sakkāti yojanā. **Ekam padanti** ekam suññatāpadaṃ.

Pubbepāhantiādinā bhagavā paṭhamabodhiyampi attano suññatāvihārabāhullaṃ pakāsetīti dassento “**paṭhamabodhiyampi**”ti āha. **Ekotiādi** therassa suññatākathāya bhājanabhāvadassanattthaṃ. **Sotunti** aṭṭhiṃ katvā manasi katvā sabbacetasā samannāharitvā sotumpi. **Uggahetumpiti** yathābhūtaṃ dhammaṃ dhāraṇaparipucchāparicayavasena hadayena uggahitaṃ suvaṇṇabhājane pakkhittasīhavasā viya avinaṭṭhe kātumpi. **Kathetumpīti** vitthārena paresaṃ dassetumpi sakkā. **Tatthāti** migāramātupāsāde. **Kaṭṭharūpapotthakarūpacittarūpavasena katāti** thambhādīsu uttiritvā katānaṃ kaṭṭharūpānaṃ, niyyūhādīsu paṭimāvasena racitānaṃ potthakarūpānaṃ, sittipasse cittakammavasena viracitānaṃ cittarūpānaṃ katā niṭṭhapitā. **Vessavaṇamaṇdhātādīnanti** paṭimārūpena katānaṃ vessavaṇamaṇdhātusakkādīnaṃ. **Cittakammavasenāti** āramādicittakammavasena. **Saṅghitampīti** avayavabhāvena saṅghitaṃ hutvā ṭhitampī. **Jiṇṇapaṭisaṅkharaṇatthanti** jiṇṇānaṃ niyyūhakūṭāgārapāsādāvayavānaṃ abhisāṅkharaṇatthāya tasmim tasmim ṭhāne rahassasaṅgānaṃ ṭhapitaṃ. “Paribhuñjissāmī”ti tasmim tasmim kicca viniyuñjanavasena **paribhuñjitabbassa**. **Etam vuttanti**, “ayaṃ migāramātupāsādo suñño”tiādikaṃ vuttaṃ.

Niccanti sabbakālaṃ rattiṇca divā ca. **Ekabhāvaṃ ekam asuññatanti** paccatte upayogavacanāṃ, ekattaṃ eko asuññatoti attho. **Gāmoti pavattanavasenāti** gehasannivesavīthicaccarasiṅghātakādīke upādāya gāmoti lokuppattivāsena. **Kilesavasenāti** tatha anunayapaṭighavasena. **Eseva nayoti** iminā “pavattavasena vā kilesavasena vā uppannaṃ manussasañña”nti imamatthaṃ atidisati. Ettha ca yathā gāmaggaṇaṇena gharādisañña saṅgahitā, evaṃ manussaggaṇaṇena itthipurisādisañña saṅgahitā. Yasmā rukkhādīke paṭicca araṅṅasañña tatha pabbatavanasañḍādayo antogadhā, tasmā tatha vijjamaṇampi taṃ vibhāgaṃ aggahetvā ekam araṅṅaṃyeva paṭicca araṅṅasaññaṃ manasi karoti. **Otaratīti** anuppavisati. **Adhimuccatīti** nicchinoti. **Pavattadarathāti** tathārūpāya passaddhiyā abhāvato oḷārikadhammapavattisiddhā darathā. **Kilesadarathāti** anunayapaṭighasambhavā kilesadarathā. **Dutiyapadeti** “ye assu darathā manussasaññaṃ paṭiccā”ti imasmim pade. Manasikārasantatāya, – “nāyaṃ pubbe viya oḷārikā, dhammapavattī”ti saṅkhāradassanadarathānaṃ sukhumatā sallahukatā ca caritattthāti āha “**pavattadarathamattā atthī**”ti.

Yaṃ kilesadarathajātaṃ, taṃ imissā darathasaññāya na hotīti yojanā. Pavattadarathamattaṃ avasiṭṭhaṃ hoti, vijjamaṇameva atthi idanti pajānātīti yojanā. **Suññatā nibbattīti** suññatanti pavatti. Suññatā saha-caritañhi suññaṃ, idha suññatāti vuttā.

177. Assāti bhagavato **evaṃ** idāni vuccamānākārena cittappavatti ahosi. **Accantasuññatanti** “paramānuttara”nti vuttaṃ arahattaṃ desessāmīti. **Araṅṅasaññāya visesānadhigamanatoti**, “araṅṅaṃ araṅṅa”nti manasikārena jhānādivisesassa adhigamābhāvato, “pathavī”ti manasikārena visesādhigamanato. Idāni tamevatthaṃ upamāya vibhāvetuṃ “**yathā hi**”tiādi vuttaṃ. **Evaṃ santeti** evaṃ vapite sāliādayo **sampajjanti**. **Dhuvasevananti** niyatasevanaṃ pārihāriyakammaṭṭhānaṃ. **Paṭiccāti** ettha “sambhūta”nti vacanaseso icchitoti āha “**paṭicca sambhūta**”nti. Pathaviṃ paṭicca sambhūta hi saññāti.

Pathavīkasiṇe so pathavīsaññī hoti, na pakatipathaviyaṃ. **Tassāti** pathavīkasiṇassa. **Tehīti** gaṇḍādīhi. **Suṭṭhu vihatanti** yathā valīnaṃ lesopi na hoti, evaṃ sammadeva ākoṭitaṃ. Nadītaḷākādīnaṃ tīrappadeso udakassa ākaraṭṭhena kūlaṃ, unnatabhāvato uggataṃ kūlaṃ viyāti **ukkūlaṃ**, bhūmiyā uccaṭṭhānaṃ. Vigataṃ kūlanti **vikkūlaṃ**, nīcaṭṭhānaṃ. Tenāha “**uccanīca**”nti. **Ekam saññanti** ekam pathavītisaññāmyeva.

182. Satipi sankhāranimittavirahe yādisānaṃ nimittānaṃ abhāvena “animitta”nti vuccati, tāni dassetuṃ, “**niccanimittādivirahito**”ti vuttaṃ. **Catumahābhūtikam** catumahābhūtanissitaṃ. **Saḷāyatanapaṭisaṃyuttaṃ** cakkhāyatanādisaḷāyatanasahitaṃ.

183. Vipassanāya paṭivipassanti dhammānaṃ puna vipassanaṃ. **Idhāti** attano paccakkhabhūtayathādhigatamaggaphalaṃ vadatīti āha – “**ariyamagge ceva ariyaphale cā**”ti. **Upādisesarathadassanatthanti** sabbaso kilesupadhiyā pahīnāya khandhopadhi avisiṭṭhā, tappaccayā darathā upādisesarathā, taṃ dassanatthaṃ. Yasmā visayato gāmasaññā oḷārikā, manussasaññā sukhumā, tasmā **manussasaññāya gāmasaññaṃ nivattetvā**. Yasmā pana manussasaññāpi sabhāgavattupariggahato oḷārikā, sabhāgavattutho araññaññā sukhumā, tasmā **araññaññāya manussasaññaṃ nivattetvā**. Pathavīsaññādinivattane kāraṇaṃ heṭṭhā suttantaresu ca vuttameva. **Anupubbenāti** maggapaṭipāṭiyā. Niccasārādīnaṃ sabbaso avatthutāya accantameva suññatā **accantasūññatā**.

184. Suññataphalasangāpattinti suññatavimokkassa phalabhūtatā, suññatānupassanāya vasena samāpajjitabbattā ca suññataphalasangāpattinti laddhanāmaṃ arahattaphalasangāpattiṃ. Yasmā atīte paccekasambuddhā ahesuṃ, anāgate bhavissanti, idāni pana buddhasāsanassa dharamānattā paccekabuddhā na vattanti, tasmā paccekabuddhaggaṇaṃ akatvā, “**etarahipi buddhabuddhasāvakaśākhātā**”icceva vuttaṃ. Na hi buddhasāsane dharante paccekabuddhā bhavanti. Sesam suviññeyyameva.

Cūlasuññatasuttavaṇṇanāya līnatthappakāsanā samattā.

2. Mahāsuññatasuttavaṇṇanā

185. Chavivaṇṇena so kāḷo, na nāmena. **Palālasanthāroti ādīnīti ādi-saddena** kocchacimilikākaṭasārādīnaṃ gahaṇaṃ. **Gaṇabhikkhūnanti** gaṇabandhanavasena bhikkhūnaṃ.

Yadi saṃsayo nāma natthi, “sambahulā nu kho”ti idaṃ kathanti āha “**vitakkapubbabhāgā**”tiādi. Tattha vitakko pubbhāgo etissāti **vitakkapubbabhāgā, pucchā**. Sā “sambahulā no ettha bhikkhūviharantī”ti vacanaṃ, vitakko pana “sambahulā nu kho idha bhikkhū viharantī”ti iminā ākārena tadā bhagavato uppanno cittasaṅkappo, tassa parivittakassa tabbhāvajotanoṃ nu-kāro vuttoti dassento āha – “**vitakkapubbabhāge cāyaṃ nu-kāro nipātamatto**”ti. Kiñcāpi gacchanto disvā, “sambahulā no ettha bhikkhū viharantī”ti pucchāvasena bhagavatā vutto, atha kho “na kho, ānanda, bhikkhu sobhati saṅgaṇikārāmo”tiādi (ma. ni. 3.185) uparidesanāvasena matthakaṃ gacchante avinichchito nāma na hoti, atha kho visuṃ vinichchito eva hoti, disvā nicchinitvāva kathāsamuṭṭhāpanatthaṃ tathā pucchati. Tathā hi vuttaṃ – “jānantāpi tathāgatā pucchanti”ti (pārā. 16). Tenāha “**ito kirā**”tiādi.

Yathā nadīotiṇṇaṃ udakaṃ yathāninnaṃ pakkhandati, evaṃ sattā dhātuso saṃsandanti, tasmā “**gaṇavāso nadīotiṇṇaudakasadiṣo**”ti vuttaṃ. Idāni tamatthaṃ vitthārato dassetuṃ – “**nirayatiracchānayoṇī**”tiādi vuttaṃ. Kuruvindādīnānīyacuṇṇāni saṅhasukhumabhāvato nāḷiyaṃ pakkhittāni nirantarāneva tiṭṭhantīti āha – “**cuṇṇabharitā nāḷi viyā**”ti. **Sattapaṇṇāsa kulatasahasānīti** sattasatasahasādhikāni paññāsa kulānaṃmyeva satasahasāni, manussānaṃ pana vasena satta koṭīyo tadā tattha vaṣiṃsu.

Tato cintesi, katham? Kāmañcāyaṃ lokapakati, mayhaṃ pana sāsane ayuttova soti āha – “**mayā**”tiādi. **Dhammanti** sabhāvasiddhaṃ. **Samvegoti** sahottappañāṇaṃ vuccati. **Na kho panetaṃ sakkā** gilānupaṭṭhānaovādānusāsaniādivasena samāgamassa icchitabbatā. **Gaṇabhedananti** gaṇasaṅgaṇikāya vivecanaṃ.

186. Kataparibhaṇḍanti pubbe katasamvidhānassa cīvarassa vuttākārena paṭisaṅkharāṇaṃ. **Noti** amhākaṃ. **Anattamanoti** anārādhitaṅgā.

Sakagaṇena sahabhāvato **saṅgaṇikāti** āha “**sakaparisasamodhāna**”nti. **Gaṇoti** pana idha janasaṃmūhoti vuttaṃ “**nānājanasamodhāna**”nti. **Sobhati** yathānusiṭṭhaṃ paṭipajjamaṇato. Kāmato nikkhamaṭṭi **nikkhamo**, evaṃ nikkhamaṇasena uppannaṃ **sukhaṃ**. Gaṇasaṅgaṇikākilesasaṅgaṇikāhi pavivitti **paviveko**. Pavivekavasena uppannaṃ **sukhaṃ**. Rāgādīnaṃ upasamāvahaṃ **sukhaṃ upasamasukhaṃ**. Maggasambodhāvahaṃ **sukhaṃ sambodhisukhaṃ**. Nikāmetabbassa, nikāmaṃ vā lābhī **nikāmalābhī**. Nidukkhaṃ sukheṇeva labhatīti **adukkhalābhī**. Kasiraṃ vuccati appakanti āha – “**akasiralābhīti vipulalābhī**”ti.

Sāmāyikanti samaye kilesavimuccanaṃ accantamevāti sāmāyikaṃ ma-kāre a-kārassa dīghaṃ katvā. Tenāha – “**appitappitasamaye kilesehi vimutta**”nti. **Kantanti** āngasantaṭṭāya ārammaṇasantaṭṭāya ca kamaṇīyaṃ manorammaṃ. **Asāmāyikaṃ** accantavimuttaṃ.

Ettāvatatiādinā saṅgaṇikārāmaṃ visesādhigamaṃ antarāyikabhāvaṃ anvayato byatirekato ca saha nidassanena dasseti. Tattha sā duvidhā antarāyikatā vodānadhammānaṃ anuppattihetukā, samkilesadhammānaṃ uppattihetukā ca.

Te paṭhamaṃ “saṅgaṇikārāmo”tiādinā vibhāvetvā itaraṃ vibhāvetuṃ, “**idāni dosuppattiṃ dassento**”tiādi vuttaṃ. “**Aṭṭhiṅca paṭicca nhāruṅca paṭicca cammaṅca paṭicca maṃsaṅca paṭicca ākāso** parivārito rūpantveva saṅkhaṃ gacchatī”tiādisu (ma. ni. 1.306) viya idha **rūpasaddo** karajakāyapariyāyoti “**rūpanti sarīra**”nti āha. “**Nāhaṃ, ānanda...pe... domanassupāyāsā**”ti kasmā vuttaṃ? Nanu kāye ca jīvite ca anapekkhacittānaṃ āradhāvippassakānaṃpi asappāyavajjanasappāyasevanavasena kāyassa pariharaṇaṃ hotīti? Saccam, taṃ pana yo kallasarīraṃ nissāya dhammasādhanaṃ anuyuñjitukāmo hoti, tasseva dhammasādhanatāvasena. Dhammasādhanabhāvaṃhi apekkhitvā asappāyaṃ vajjetvā sappāyavasena posetvā suṭṭhutaṃ hutvā anuyuñjanato kāyassa pariharaṇaṃ, na so kāye abhirato nāma hoti paccavekkhaṇāyattattā apekkhāya vinoditabbo tādisoti. **Upāligahapatinoti** etthāpi “**dasabalasāvakkattupagamasāṅkhātenā**”ti ānetvā yojetabbaṃ.

187. Mahākaruṇāvasena parivutāya **parisāya majjhe nisinnopi** ekantavivekajjhāsayaṭṭā **ekakova**. Etena sathuno pavivittassa pavivekattena vivittataṃ dasseti. Rūpārūpapaṭibhāganimittehi nivattanaṭṭhaṃ “**rūpādīnaṃ saṅkhatanimittāna**”nti vuttaṃ. Ativiya santatarapaṇītamabhāvena visesato sinoti bandhatīti **visayo**, so eva sasantaṭṭipariyāpannatāya **ajjhataṃ**. Kiṃ pana tanti āha – “**suññatanti suññataphalasaṃpatti**”nti. Upadhivivekatāya asaṅkhatā dhātu idha vivekoti adhippetoti āha – “**vivekaninna**”tiādi. Bhaṅgamattampi asesetvā āsavaṭṭhāniyānaṅca dhammānaṃ tattha vigatattā tesam vasena **vigatantena**, evaṃbhūtaṃ tesam byantibhāvaṃ pattanti pāliyaṃ “**byantibhūtenā**”ti vuttaṃ. Uyyojanaṃ vissajjanaṃ, taṃ etassa atthi, uyyojeti vissajjetīti vā uyyojanaṃ. Yasmā na sabbakathā uyyojanavaseneva pavattati, tasmā vuttaṃ “**uyyojanikaṃ paṭisaṃyutta**”nti.

Telapākaṃ gaṇhanto viyāti yathā telapāko nāma paricchinnakālo na atikkamitabbo, evaṃ attano samāpattikālaṃ anatikkamitvā. Yathā hi kusalo vejjo telam pacanto taṃ taṃ telakiccaṃ cintetvā yadi vā patthinnapāko, yadi vā majjhimapāko, yadi vā kharapāko icchitabbo, tassa kālaṃ upadhāretvā pacati, evaṃ bhagavā dhammaṃ desento veneyyānaṃ ñāṇaparipākaṃ upadhāretvā taṃ taṃ kālaṃ

anatikkamitvā dhammaṃ desetvā parisam uyyojento ca **vivekaninneneva cittaena uyyojeti. Dve pañcaviññānānīpi** tadabhinīhatamanoviññānavasena **nibbānaninnāneva**. Buddhānañhi saṅkhārānaṃ suṭṭhu pariññātatāya pañītānāmpi rūpādīnaṃ āpāthagamane pageva itaresaṃ paṭikūlatāva supākaṭā hutvā upaṭṭhāti, tasmā ghammābhittassa viya sītajalaṭṭhānaninnatā nibbānaninnaeva cittaṃ hoti, tassa ativiya santapañītabhāvato.

188. Ajjhattamevāti idha jhānārammaṇaṃ adhippetanti āha “**gocarajjhattamevā**”ti. **Idha niyakajjhattaṃ** suññataṃ. Apagaṇapādakajjhānañhi ettha “niyakajjhatta”nti adhippetam vipassanāvisesassa adhippetatā, **niyakajjhattaṃ** nijjīvanissattataṃ, anattatanti attho. **Asampajjanabhāvajānanenāti** idāni me kammaṭṭhānaṃ vīthipaṭipannaṃ na hoti, uppathameva pavattatīti jānanena.

Kasmā panettha bhagavatā vipassanāya eva pādake jhāne avatvā pādakajjhānaṃ gahitanti āha – “**appagaṇapādakajjhānato**”tiādi. **Na pakkhandati** sammā na samāhitattā. So pana “ajjhattadhammā mayhaṃ nijjaṭā nigumbā hutvā na upaṭṭhahanti, handāhaṃ bahiddhādhamme manasi kareyyaṃ ekaccesu saṅkhāresu upaṭṭhitesu itarepi upaṭṭhaheyyumevā”ti **parassa...pe... manasi karoti**. Pādakajjhānavasena viya sammasitajjhānavasenapi ubhatobhāgavimutto hotiyevāti āha – “**arūpasamāpattiyam nu kho kathanti āneñjam manasi karotī**”ti. **Na me cittaṃ pakkhandatīti** mayhaṃ vipassanācittaṃ vīthipaṭipannaṃ hutvā na vahatīti. **Pādakajjhānamevāti** vipassanāya pādakabhūtaeva jhānaṃ. **Punappunaṃ manasi kātabbanti** punappunaṃ samāpajjitabbaṃ vipassanāya tikkhavisadatāpādanāya. **Avahante** nipuṇābhāvena chedanakiriyāya appavattante. Samāpajjitvā vipassanāya tikkhakammakaraṇaṃ samathavipassanāvihārenāti āha – “**kammaṭṭhāne manasikāro vahatī**”ti.

189. Sampajjati meti vīthipaṭipattiyā pubbenāparaṃ visesābhāvato sampajjati me kammaṭṭhānanti jānanena. **Iriyāpathaṃ ahāpetvāti** yathā parissamo nāgacchati, evaṃ attano balānurūpaṃ tassa kālaṃ netvā pamāṇameva pavattanena iriyāpathaṃ ahopetvā. **Sabbavāresūti** ṭhānanisajjāsayanavāresu. Kathāvāresu pana visesaṃ tattha tattha vadanti. **Idaṃ vuttanti** idaṃ, “iminā vihārenā”tiādivacanaṃ vuttaṃ.

190. Kāma vitakkādayo oḷārikakāmarāgabyāpādasabhāgāti āha – “**vitakkapahānena dve magge kathetvā**”ti. **Kāmaguṇesūti** niddhāraṇe bhummaṃ. **Kismiñcīdeva kilesuppattikāraṇeti** tassa puggalassa kilesuppattikāraṇaṃ sandhāya vuttaṃ, aññathā sabbepi pañca kāmaguṇā kilesuppattikāraṇameva. Samudācaratīti **samudācāroti** āha “**samudācaraṇato**”ti. So pana yasmā cittaṃ, na sattassa, tasmā vuttaṃ pāḷiyam “cetaso”ti. Ma-kāro padasandhikaro e-kārassa ca akāro katoti āha “**evaṃ sante etanti**”.

191. Anusayoti mānānusayo bhavarāgānusayo avijjānusayoti tividhopi anusayo **pahīyati** arahattamaggena. **Vuttanayenevāti**, “tato maggānantaraṃ phalaṃ, phalato vuṭṭhāya paccavekkhamāno pahīnabhāvaṃ jānāti, tassa jānanena sampajjāno hoti”ti vuttanayena.

Kusalato āyātīti āyato, so etesanti **kusalāyatikā**. Tenāha “**kusalato āgatā**”ti. Taṃ pana nesaṃ kusalāyatikkattaṃ upanissayavasena hoti sahaṃjātavasenaṃpīti tadubhayaṃ dassetuṃ, “**seyyathida**”ntiādi vuttaṃ.

Yasmā pana yathāvuttadhammesu keci lokiyā, keci lokuttarā; atha kasmā visesena “lokuttarā”ti vuttanti āha – “**loke uttarā visiṭṭhā**”ti. Tena lokiyadhammesu uttamabhāvena jhānādayo lokuttarā vuttā, na lokassa uttaraṇatoti dasseti. Yaṃ kiñci mahaggatacittaṃ mārassa avisayo akāmāvacarattā, pageva taṃ vipassanāya pādakabhūtaṃ suvikkhālitamalanti āha – “**jānituṃ na sakkotī**”ti. **Eko ānisamso atthi** bhāvanānuyogassa sappāyadhammakathāpaṭilābho.

192. Etadatthanti kevalassa sutassa atthāya. **Sappāyāsappāyavasenā**ti kasmā vuttaṃ? Nanu sappāyavasena dasakathāvatthūni āgatānīti? Saccametam, asappāyakathāvajjanapubbikāya sappāya kathāya vasena āgatattā “**sappāyāsappāyavasena āgatānī**”ti vuttaṃ. **Sutapariyattivasenā**ti sarūpena tattha anāgatānīpi dasakathāvatthūni suttageyyādiatogadhattā, “**sutapariyattivasena āgatānī**”ti vuttaṃ. Paripūraṇavasena sarūpato āgatattā **imasmim̐ thāne thātvā kathetabbāni. Atthoti sāmāññattho.**

193. Anuāvattantīti anuanu abhimukhā hutvā vattanti, payirupāsānādivasena anukūlayanti. **Mucchanataṇḥanti** paccayesu mucchanākāraṃ. Taṇhāya patthanā nāma tenākārena pavattīti āha – “**pattheti pavatteti**”ti. **Kilesūpaddavenā**ti kilesasaṅkhātena upaddavena. Kilesā hi sattānaṃ mahānatthakaraṇato “upaddavo”ti vuccanti. Attano abbhantare uppanna kilesūpaddavena antevāsino, upaddavo **antevāsūpaddavo**, brahmacariyassa upaddavo **brahmacārupaddavoti** imamattam̐ “**sesupaddavesupi eseva nayo**”ti iminā atidisatī. **Guṇamaraṇam̐ kathitam̐**, na jīvītamaraṇam̐.

Appalābhāti appamattakalābhī visesānaṃ. **Evaṃ vuttoti** yathāvuttābrahmacārupaddavo dukkhavipākataro ceva kaṭukavipākataro cāti evaṃ vutto. Ācariyantevāsikūpaddavo hi bāhirakasamayavasena vutto, brahmacārupaddavo pana sāsānavasena. Durakkhāte hi dhammavinaye duppaṭipatti na mahāsāvajjā micchābhīnivesassa sithilavāyāmahāvato; svākyāte pana dhammavinaye duppaṭipatti mahāsāvajjā mahato atthassa bāhirabhāvakaraṇato. Tenāha “**sāsane panā**”tiādi.

196. Tasmāti idam̐ pubbaparāpekkham̐ purimassa ca atthassa kāraṇabhāvena paccāmasananti āha “**yasmā**”tiādi. Mittam̐ etassa atthīti mittavā, tassa bhāvo **mittavatā**, tāya. Mittavasena paṭipajjananti āha “**mittapaṭipattiyā**”ti. **Sapattavatāyāti** etthāpi eseva nayo.

Dukkaṭadubbhāsitamattampīti iminā pageva itaram̐ vītikkamantoti dasseti. Sāvakesu hitaparakkamaṃ ovādānusāsānīhi paṭipajjananti āha – “**tathā na paṭipajjissāmi**”ti. **Āmakamattanti** kulālabhājanam̐ vuccati. **Nāham̐ tumhesu tathā paṭipajjissāmi**ti kumbhakāro viya āmakabhājanesu aham̐ tumhesu kevalam̐ jānāpento na paṭipajjissāmi. **Niggaṇhitvāti** nīharitvā. **Lokiyaguṇāpi idha sārotveva adhippetā** lokuttaraguṇānaṃ adhiṭṭhānabhāvato. Sesam̐ suviññeyyameva.

Mahāsuññatasuttavaṇṇanāya līnatthappakāsanā samattā.

3. Acchariyabbhutasuttavaṇṇanā

197. Vibhattipatirūpakā ca nipātā hontīti yathārahaṃ tam̐tam̐vibhattiatthadīpakā, idha paccattavacano **yatrasaddo**, **hisaddo** hetuattho, **nāmasaddo** acchariyattho, padattayassa pana acchariyatthaniddiṭṭhatāya “**acchariyatthe nipāto**”ti vuttaṃ. Ekamsato panetaṃ padattayam̐. Tathā hi vakkhati, “yatratī nipātavasena anāgatavacana”nti. **Papañcasaddo** heṭṭhā vutto. **Chinnavaṭumeti** iminā sabbakilesavaṭṭassa akusalakammavaṭṭassa ca chinnattā vipākavaṭṭassa ca upari vakkhamānattā āha – “**vaṭumanti kusalakusalakammavaṭṭam̐ vuccati**”ti. **Nipātavasena** yatrasaddayogena. **Anāgatavacananti** idam̐ anāgatavacanasadisattā vuttaṃ. Anāgatatthavācī hi anāgatavacanaṃ, attho cettha atītoti. **Anussarīti** idam̐ anussaritabhāvam̐ sandhāya vuttaṃ – “na anussarissatī”ti saddapayogassa atītavīsāyattā. Yadā pana tehi bhikkhūhi yā kathā pavattitā, tato pacchāpi bhagavato tesam̐ buddhānaṃ anussaraṇam̐ hotiyeva.

Khattiyajaccātiādīkālato paṭṭhāya asambhinnāya khattiyajātiyā uditoditāya. **Brahmajaccāti** brāhmaṇajaccā. **Evaṃgottepi** eseva nayo. **Lokiyalokuttarasilenāti** pāramitāsambhūtena buddhāveṇīkattā anaññāsādhāraṇena lokiyena lokuttarena ca sīlena. **Evaṃsīlāti** anavasesasīlānaṃ viṣuṃ paccavekkhaṇakaraṇena evaṃsīlāti anussarissati. Esa nayo sesesu. Yathā vijjābhāgiyā vijjāsampayuttadhammā, evaṃ samādhīpakkhā samādhīsampayuttadhammāpi sativīriyādayoti āha – “**heṭṭhā samādhīpakkhānaṃ dhammānaṃ gahitattā vihāro gahitovā**”ti. Tasmā

samādhipakkhadhammavinimutto eva idha vihāro adhippetoti vuttaṃ “**idaṃ hī**”tiādi.

Yathā vā aṭṭhasamāpattivipassanāmaggaḥalasaṅgahitā lokiyalokuttarā samādhipaṇṇā “evaṃdhammā evaṃpaṇṇā”ti padehi heṭṭhā gahitāpi yathāsakaṃ paṭipakkhato mucanassa pavattivisesaṃ upādāya “evaṃvimuttā”ti ettha puna gahitā, tathā “evaṃdhammā”ti ettha gahitāpi samādhipakkhadhammā dibbabrahmaāneñjaariyavihārasaṅkhātā attano pavattivisesaṃ upādāya, “evaṃvihārī”ti ettha puna gahitāti vuccamāne na koci virodho. Phaladhammānaṃ pavattikālepi kilesānaṃ paṭippassaddhi na taṃānubhāvajātā, atha kho ariyamaggena kilesānaṃ samucchinnattāti āha – “**maggānubhāvena kilesānaṃ paṭippassaddhante uppannattā**”ti. Yo yaṃ pajahati, so pahāyako pahātābato vimuttoti vuccati visamsaṭṭhabhāvato pahānavibhāgena vuccamāne apahāyakassa nibbānassa kathaṃ vimuttatā? Visamsaṭṭhabhāvato eva. Tañhi pakatiyāva sabbaso kilesehi visamsaṭṭhaṃ vinissaṭaṃ suvidūravidūre ṭhitā, tasmāssa tato nissaṭattā nissaraṇavimutti nissaraṇapahānanti vuccatīti āha “**nibbāna**”ntiādi.

199. Ime **tathāgatassa acchariyaabbhutadhammā**, na sāvakaḥviseṣā, mama pana desanā tayā sutā evāti te therasseva bhāraṃ karonto, “**taṃ bhiiyosomattāya paṭibhantū**”ti āha. **Sato sampajānoti** ettha kālabhedavasena labbhamānampi sampajānabhāvaṃ anāmasitvā gativibhāgena taṃ dassetuṃ, “**dve sampajāṇṇāni**”tiādi vuttaṃ – **aṭṭha vare gaṇhantoti** ettha kathaṃ varaṃ devatā deti, parassa dīyamānaṃca taṃ kathaṃ parassa samijjhātīti? Kammabaleneva. Yadi hi taṃ kammaṃ katokāsaṃ yassa tadapadesena phalaṃ vipaccati, evaṃ devatāya tassa varaṃ dinnā, itarena ca laddhanti vohāro hotīti. Apica parassa patthitavarāni nāma vipaccamānassa kammassa paccayabhūto payogavisesoti daṭṭhabbaṃ. Tāni vipaccane ekantikānīpi appesakkhā devatā – “ayamassa patthanā samijjhissati, no”ti na jānanti, sakko pana paṇṇavā tāni ekaccaṃ jānātiyeva. Tena vuttaṃ – “**sakkena pasāditvā dinne aṭṭha vare gaṇhanto**”tiādi.

Paṭhamajavanavāreti uppannassa sabbapaṭhamajavanavāre. So hi paṭisandhiyā āsannabhāvato avisado hoti, devabhāve nikantivasena uppajjanato na jānāti. **Aññāhi** devatāhi **asādhāraṇajānaṃ hoti** dutiyajavanavārato paṭṭhāya pavattanato.

Aññepi devātiādinā bodhisattassa tattha sampajāṇṇeneva ṭhitabhāvaṃ byatirekamukhena vibhāveti. **Āhārūpacchedena kālaṅkarontīti** idaṃ khiḍḍāpadosikavasena vuttaṃ. Itaresampi dibbabhogehi mucchitataṃ ajjhāpannānaṃ tiṭṭhantānaṃ sampajāṇṇābhāvo hotiyeva. **Kim tathārūpaṃ ārammaṇaṃ natthīti** yathārūpaṃ uḷāraṃ paṇītaṅga ārammaṇaṃ paṭicca te devā saṃmucchitā āhārūpacchedampi karonti, kim tathārūpaṃ uḷāraṃ paṇītaṅga ārammaṇaṃ bodhisattassa natthīti bodhisattassa sampajāṇṇānubhāvaṃ vibhāvetuṃ codanaṃ samuṭṭhāpeti? Bodhisatto hi yattha yattha nibbattati, tattha tattha aññe satte dasahi visesehi adhiggaṇhāti, pageva tattha devabhūto, tathāpi “sato sampajāno”ti ayamettha acchariyadhammo vutto.

200. Sampattibhave dīghāyukatā nāma paṇṇābalena hoti, bodhisatto ca mahāpaṇṇo, tasmā tattha tattha bhava tena dīghāyukena bhavitābanti adhippāyena, “**sesatthābhāvesu kim yāvātāyukaṃ na tiṭṭhati**”ti codeti. Itaro “**āma na tiṭṭhati**”ti paṭijānitvā, “**aññadā hī**”tiādinā tattha kāraṇamāha. “Idha na bhavissāmi”ti adhimuccanavasena kālakiriyā **adhimuttikālakiriyā**. Pāramidhammānañhi ukkaṃsappattiyā tasmim tasmim attabhāve abhiññāsamāpattīhi santānassa visesitattā attasinehassa tanubhāvena sattesu ca mahākaruṇāya uḷārabhāvena adhiṭṭhānassa tikkhavisadabhāvāpattiyā bodhisattānaṃ adhippāyā samijjhanti, citte viya kammesu ca tesāṃ vasibhāvo, tasmā yatthupapannānaṃ pāramiyo sammadeva paribrūhenti, vuttanayena kālaṃ katvā tattha upapajjanti. Tathā hi yaṃ mahāsatto imasmimyeva kappe nānājatīsu aparihīnājjhāno kālaṃ katvā brahmaloke nibbatto appakameva kālaṃ tattha ṭhatvā tato cavitvā idha nibbatto. Tenāha – “**ayaṃ kālakiriyā aññesaṃ na hoti**”ti. **Sabbapāramīnaṃ pūritattāti** iminā payoanābhāvato tattha ṭhatvā adhimuttikālakiriyā nāma na hotīti dasseti. Apica carimabhava catumahānidhisamuṭṭhānapubbikāya dibbasampattisadisāya mahāsampattiyā nibbatti viya buddhabhūtaṃ asadisadānādivasena anaññāsādhāraṇalābhuppatti viya ca

ito param mahāpurisassa dibbasampattianubhavanam nāma natthīti yāvatāyukaṭṭhānam ussāhajātassa puññasambhārassa vasenāti daṭṭhabbam. Ayañhettha dhammatā.

Manussagaṇanāvasena, na devagaṇanāvasena. **Pubbanimittānīti** cutiyā pubbanimittāni. **Amilāyitvāti** ettha **amilātaggaṇe**veva tāsam mālānam vaṇṇasampadāpi gandhasampadāpi sobhāsampadāpi dassitāti daṭṭhabbam. Bāhirabbhantarānam rajojallānam lesassapi abhāvato devānam sarīragatāni vatthāni sabbakālam parisuddhapabhassarāneva hutvā tiṭṭhantīti āha **“vatthesupi eseva nayo”**ti. **Neva sītam na uṇhanti** yassa sītassa patikārasena adhikam seviyamānam uṇham, sayameva vā kharataram hutvā adhibhavantaṃ sarīre sedaṃ uppādeyya, tādīsam neva sītam na uṇham hoti. **Tasmim kāleti** yathāvutte maraṇāsannakāle. **Bindubinduvasenāti** muttaguḷikā viya bindu bindu hutvā sedā muccanti. Dantānam khaṇḍitabhāvo **khaṇḍiccam**. Kesānam palitabhāvo **pāliccam**. **Ādi-saddena** valittacataṃ saṅgaṇhāti. **Kilantarūpo attabhāvo hoti**, na pana khaṇḍiccapāliccādīhīti adhippāyo. **Ukkaṇṭhitāti** anabhirati, sā natthi uparūpari ulāruḷārānameva bhogaṇam viśesato rucijanākaṇam upatiṭṭhanato.

Paṇḍitā evāti buddhisampannā eva devatā. Yathā devatā “sampati jātā kīdisena puñnakammaena idha nibbattā”ti cintetvā, “iminā nāma puñnakammaena idha nibbattā”ti jānanti, evaṃ atītabhave attanā kataṃ ekaccaṃ aññampi puññaṃ jānantiyeva mahāpuññāti āha – **“ye mahāpuññā”**tiādi.

Na paññāyanti ciratarakālattā paramāyuno. **Aniyyānikanti** na niyyānāvahaṃ sattānam abhājanabhāvato. Sattā na paramāyuno hontī nāma pāpussannatāyāti āha – **“tadā hi sattā ussannakilesā hontī”**ti. Etthāha – “kasmā sambuddhā manussaloke eva uppajjanti, na devabrahmalokesū”ti. Devaloke tāva nuppajjanti brahmacariyavāsassa anokāsabhāvato tathā anacchariyabhāvato. Acchariyadhammā hi buddhā bhagavanto, tesam sā acchariyadhammatā devattabhāve ṭhitānam na pākaṭā hoti yathā manussabhūtānam. Devabhūte hi sammāsambuddhe dissamānam buddhānubhāvaṃ devānubhāvato loko dahati, na buddhānubhāvato, tathā sati sammāsambuddhe nādhimuccati na sampasīdati issarakuttaggāhaṃ na vissajjeti, devattabhāvassa ca cirakālapavattanato ekaccasassatavādato na parimuccati. “Brahmaloke nuppajjanti”ti etthāpi eseva nayo. Sattānam tādīsagāhavamocanattañhi buddhā bhagavanto manussasugatiyaṃyeva uppajjanti; na devasugatiyaṃ, manussasugatiyaṃ uppajjantāpi opapātikā na hontī, sati ca opapātikūpapattiyam vuttadosānativattanato. Dhammaveneyyānam atthāya dhammatantiyā ṭhapanassa viya dhātuvaneyyānam atthāya dhātūnam ṭhapanassa icchitabbattā ca. Na hi opapātikānam parinibbānato uddham sarīradhātuyo tiṭṭhanti, tasmā na opapātikā hontī, carimabhava ca mahābodhisattā, manussabhāvassa pākaṭakaraṇāya dārapariggahampi karontā yāva puttamukhadassanā agāramajjhe tiṭṭhanti. Paripākagatasīlanekkhammaṇṇāpāññāpāramikāpi na abhinikkhamanti, kiṃ vā etāya kāraṇacintāya? Sabbabuddhehi āciṇṇasamāciṇṇā, yadidaṃ manussabhūtānaṃyeva abhisambujjhanā, na devabhūtānanti ayamettha dhammatā. Tathā hi tadattho mahābhinihāropi manussabhūtānaṃyeva ijjhati, na itaresam.

Kasmā pana sammāsambuddhā jambudīpeyeva uppajjanti, na sesadīpesūti? Keci tāva āhu – “yasmā pathaviyā nābhībhūtā buddhānubhāvasahitā acalaṭṭhānabhūtā bodhimaṇḍabhūmi jambudīpeyeva uppajjati, tasmā jambudīpeyeva uppajjanti”ti; “tathā itaresampi avijahitaṭṭhānānam tattheva labbhamānato”ti. Ayaṃ panettha amhākaṃ khanti – yasmā purimabuddhānam mahābodhisattānam paccekabuddhānaṃ nibbattiyā sāvaka bodhisattānam sāvaka bodhiyā abhinīhāro sāvaka pāramīnaṃ sambharaṇam paripācanaṃ buddhahettabhūte imasmim cakkavāle jambudīpeyeva ijjhati, na aññattha. Veneyyānam vinayanattho ca buddhuppādoti aggasāvaka divaneyyavisesāpekkhāya ekasmim jambudīpeyeva buddhā nibbattanti, na sesadīpesu. Ayaṃ nayo sabbabuddhānam āciṇṇasamāciṇṇoti tesam uttamapurisānam tattheva uppatti sampatticakkānam viya aññamaññupanissayato aparāparam vattatīti daṭṭhabbam. Tenāha – **“tisu dīpesu buddhā na nibbattanti, jambudīpeyeva nibbattantīti dīpaṃ passati”**ti. Iminā nayena desaniyamepi kāraṇam vattabbam.

Idāni ca khattiyakulaṃ lokasammataṃ brāhmaṇānampi pūjanīyabhāvato. **Rājā me pitā bhavissatīti kulaṃ passi** pituvasena kulassa niddisitabbato. **Dasannaṃ māsānaṃ upari satta divasānīti passi** tena attano antarāyābhāvaṃ aññāsi, tassā ca tusitabhava dibbasampattipaccanubhavanaṃ.

Tā devatāti dasasahassicakkavāḷadevatā. Kathaṃ pana tā bodhisattassa pūritapāramibhāvaṃ bhāvinañca sambuddhabhāvaṃ jānātīti? Mahesakkhānaṃ devatānaṃ vasena, yebhuyyena ca tā devatā abhisamayabhāgino. Tathā hi bhagavato ca dhammadānaṃvibhāge anekavāraṃ dasasahassacakkavāḷavāsīdevatāsannipāto ahoṣi.

Cavāmīti pajānāti cutiāsannajavanehi ñāṇasahitehi cutiyā upaṭṭhitabhāvassa paṭisaṃviditattā. **Cuticittam na jānāti** cuticittakkhaṇassa ittarabhāvato. Tathā hi taṃ cutūpapātañāṇassapi avisayo eva. **Paṭisandhicittēpi** eseva nayo. **Āvajjanapariyāyoti** āvajjanakkamo. Yasmā ekavāraṃ āvajjitamattena ārammaṇaṃ nicchinituṃ na sakkā, tasmā tavevārammaṇaṃ dutiyaṃ tatiyañca āvajjitvā nicchīyati, āvajjanasīsenā cettha javanavāro gahito. Tenāha – **“dutiyaṭṭhiyācittavāreya jānissatī”**ti. Cutiyā puretaraṃ katipayacittavārato paṭṭhāya maraṇaṃ me āsannanti jānāto, **“cutikkhaṇēpi cavāmīti pajānātī”**ti vuttaṃ. Paṭisandhiyā pana apubbabhāvato **paṭisandhicittam na jānāti**. Nikantiyā uppattito parato **asukasmiṃ thāne mayā paṭisandhi gahitāti pajānāti**, dutiyaṭṭhiyā jānātīti vuttovāyamattho. **Tasmiṃ kāleti** paṭisandhiggahaṇakāle. **Dasasahassī kampaṭīti** ettha kampanakāraṇaṃ heṭṭhā vuttameva. Mahākāruṇikā buddhā bhagavanto sattānaṃ hitasukhavidhānatapparatāya bahulaṃ somanassikāva honṭīti tesam paṭhamamahāvīpākacittena paṭisandhiggahaṇaṃ aṭṭhakathāyaṃ (dī. ni. aṭṭha. 2.17; dha. sa. 498; ma. ni. aṭṭha. 3.199) vuttaṃ. **Mahāsīvatthero pana** yadipi mahākāruṇikā buddhā bhagavanto sattānaṃ hitasukhavidhānatapparā, vivekajjhāsayā pana visāṅkhāninnā sabbasaṅkhāresu ajjuhekkhaṇabahulāti pañcamena mahāvīpākacittena paṭisandhiggahaṇamāha.

Pure puṇṇamāya sattamadivasato paṭṭhāyāti puṇṇamāya pure sattamadivasato paṭṭhāya, sukkaṭṭhāya navamito paṭṭhāyāti attho. **Sattame divaseti** āsāḷhīpuṇṇamāya. **Idam supinanti** idāni vuccamānākāraṃ supinaṃ. **Nesaṃ deviyoti** mahārājūnaṃ deviyoti.

So ca kho purisagabbho, na itthigabbho, putto te bhavissatīti ettakameva te brāhmaṇā attano supinasatthanayena kathesuṃ. **Sace agāraṃ ajjhāvasissatīti**ādi pana devatāviggahena bhāvinamatthaṃ yāthāvato pavedesuṃ.

Gabbhāvakkantiyoti ettha gabbho vuccati mātukucchi, tattha uppatti avakkanti, tāva gabbhāvakkanti, yāva na nikkhamati. **Ṭhitakāva nikkhamanti** dhammāsanato otaranto dhammakathiko viya.

201. Vattamānasamīpe vattamāne viya voharīyatīti **okkamati**ti vuttanti āha – **“okkanto hotīti attho”**ti. **Evaṃ hotīti** evaṃ vuttappakārenassa sampajānanā hoti. **Na okkamamāne** paṭisandhikkhaṇassa duviññeyyattā. Tathā ca vuttaṃ – **“paṭisandhicittam na jānātī”**ti. Dasasahassacakkavāḷapattharaṇena vā **appamāṇo**. Ativiya samujjalabhāvena **ulāro**. **Devānubhāvanti** devānaṃ pabhānubhāvaṃ. Devānañhi pabhaṃso obhāso adhibhavati, na tesam ādhipaccaṃ. Tenāha **“devāna”**ntiādi.

Rukkhaḡacchādīnā kenaci na haññatīti **aghā**, abādhā. Tenāha **“niccavivaṭṭā”**ti. **Asaṃvutāti** heṭṭhā upari ca kena ci na pihitā. Tenāha **“heṭṭhāpi appatiṭṭhā”**ti. Tattha **pi**-saddena yathā heṭṭhā udakassa pidhāyikā pathavī natthīti asaṃvutā lokantarikā, evaṃ uparipi cakkavāḷesu viya devavimānānaṃ abhāvato asaṃvutā appatiṭṭhāti dasseti. Andhakāro ettha atthīti **andhakārā**. **Cakkhuvīññānaṃ na jāyati** ālokassābhāvato, na cakkhuno. Tathā hi **“tena obhāsenā aññamaññaṃ sañjānantī”**ti vuttaṃ. Jambudīpe ṭhitamajjihānikavelāyaṃ pubbavidehavāsīnaṃ atthaṅgamanavasena upaḍḍhaṃ

sūriyamaṇḍalam paññāyati, aparagoyānavāsīnaṃ uggamanavasena, evaṃ sesadīpesupīti āha – **“ekappahārenea tisu dīpesu paññāyanti”**ti. Ito aññathā pana dvīsu eva dīpesu ekappahārenea paññāyatīti. **Ekekāya disāya nava nava yojanasatasahassāni andhakāraavidhamanampi** iminā nayena daṭṭhabbaṃ. **Pabhāya nappahontī** attano pabhāya obhāsituṃ na abhisambhuṇanti. Yugandharapabbatamatthakappamāṇe ākāse vicaraṇato, **“cakkavālapabbatassa vemajjhena caranti”**ti vuttaṃ.

Vāvaṭṭāti khādanatthaṃ gaṇhituṃ upakkamantā. **Viparivattitvā**ti vivaṭṭitvā. **Chijjivā**ti mucchāpattiyā ṭhitaṭṭhānato mucchitvā, aṅgapaccaṅgacchedanavasena vā **chijjivā**. **Accantakhāreti** ātapasantāpābhāvena atisītabhāvaṃ sandhāya accantakhāratā vuttā siyā. Na hi taṃ kappasaṅghānaudakaṃ sampattikaramahāmeghavuṭṭhaṃ pathavīsandhāraṃ kappavināsakaudakaṃ viya khāraṃ bhavitumarahati. Tathā hi sati pathavīpi vilīyeyya. Tesam vā pāpakammabalena peṭānaṃ pakatiudakassa pubbakheḷabhāvāpatti viya tassa udakassa tadā khārabhāvāpatti hotīti vuttaṃ **“accantakhāre udake”**ti. **Samantatoti** sabbabhāgato chappakārampi.

202. Catunnaṃ mahārājūnaṃ vassenāti vessavaṇādicatumahārājabhāvasāmañña.

203. Sabhāvenevāti parassa santike gahaṇena vinā attano sabhāveneva sayameva adhiṭṭhahitvā silasampannā.

Manussesūti idaṃ pakaticārittavasena vuttaṃ – “manussitthiyā nāma manussapurisesu purisādhippāyacittaṃ uppajjeyyā”ti, bodhisattamātu pana devesūpi tādisaṃ cittaṃ nuppajjateva. Yathā bodhisattassa ānubhāvena bodhisattassa mātu purisādhippāyacittaṃ nuppajjati, evaṃ tassa ānubhāveneva sā kenaci purisena anatikkamanīyāti āha – **“pādā na vahanti, dibbasāṅkhalikā viya bajjhanti”**ti.

Pubbe “kāmaguṇūpasamhitā cittaṃ nuppajjati”ti vuttaṃ, puna “pañcahi kāmaguṇehi samappitā samaṅgībhūtā paricāretī”ti vuttaṃ, kathamidam aññaamaññaṃ na virujjhatīti āha **“pubbe”**tiādi. **Vatthupaṭikkhepoti** abrahmacariyavatthupaṭisedho. Tenāha **“purisādhippāyavasenā”**ti. **Ārammaṇapaṭilābhoti** rūpādipañcakāmaguṇārammaṇasseva paṭilābho.

204. Kilamathoti khedo. Kāyassa hi garubhāvakaṭhinabhāvādayopi tassā tadā na honti eva. **“Tirokucchigataṃ passati”**ti vuttaṃ, kadā paṭṭhāya passatīti āha – **“kalalādikālam atikkamitvā”**tiādi. Dassane payojanaṃ sayameva vadati, tassa abhāvato kalalādikāle na passati. **Puttenāti** daharena mandena uttānaseyyakena. **Yaṃ taṃ mātū**tiādi pakaticārittavasena vuttaṃ. Cakkavattigabhatopi hi savisesaṃ bodhisattagabbho parihāraṃ labhati puññasambhāraṃ sātisaṃyattā, tasmā bodhisattamātā ativiya sappāyāhārācārā ca hutvā sakkaccaṃ pariharati. **Puratthābhimukhoti** mātu puratthābhimukho. Idāni tirokucchigatassa dissamānatāya abhantaraṃ bāhiraṇca kāraṇaṃ dassetuṃ, **“pubbe katakamma”**ntiādi vuttaṃ. **Assāti** deviyā. **Vatthunti** kucchiṃ. Phalikaabbhapaṭalādino viya bodhisattamātukucchitacassa paṭalabhāvena ālokassa vibandhābhāvato yathā bodhisattamātā kucchigataṃ bodhisattaṃ passati, kimevaṃ bodhisattopi mātaraṃ aññaṇca purato rūpagataṃ passati, noti āha, **“bodhisatto panā”**tiādi. Kasmā pana sati cakkhumhi āloke ca na passatīti āha – **“na hi antokucchiyaṃ cakkhuviññānaṃ uppajjati”**ti. Assāsapassāsā viya hi tattha cakkhuviññānampi na uppajjati tājjasamānāhārassābhāvato.

205. Yathā añña itthiyo vijātapaccayā tādisena rogena abhibhūtāpi hutvā maranti, bodhisattamātu pana bodhisatte kucchigate na koci rogo uppajjati; kevalaṃ āyuparikkhayeneva kālaṃ karoti, svāyamattho heṭṭhā vuttoyeva. **Bodhisattena vasitaṭṭhānaṃ hīti**ādinā tattha kāraṇamāha. **Apanetvāti** aggamaheṣiṭṭhānato nīharitvā. **Anurakkhituṃ na sakkotīti** sammā gabbhāparihāraṃ nānuyuñjati, tena **gabbho bahvābādho hoti**. **Vatthuvisaḍaṃ hotīti** gabbhāsayo parisuddho hoti. Mātu **majjhimavayassa tatiyakoṭṭhāse** bodhisattassa gabbhokkamanampi tassā āyuparimāṇavilokaneneva saṅgahitaṃ

vayovasena uppajjanakavikārassa parivajjanato, itthisabhāvena uppajjanakavikāro pana bodhisattassa ānubhāveneva vūpasammati.

Sattamāsajātoti paṭisandhiggahaṇato sattame māse jāto. So **sītuṇhakkhamo na hoti** ativiya sukhumālatāya. Aṭṭhamāsajāto kāmam sattamāsajātato buddhiavayavo, ekacce pana cammapadesā buddhiṃ pāpuṇantā ghaṭṭanam na saḥanti, tena **so na jīvati**. Sattamāsajātassa pana na tāva te jātāti vadanti.

Ṭhitāva hutvāti niddukkhatāya ṭhitā eva hutvā. Dukkhasa hi balavabhāvato taṃ dukkham asahamānā aññā itthiyo nisinnā vā nipannā vā vijāyanti. **Upavijaññāti** upagatavijāyanakālā. **Sakalanagaravāsini**ti kapilavatthuṃ parivāretvā ṭhitesu devadahādīsu chasu nagaresu vasantā.

Devā nam paṭhamam paṭiggaṇhantīti lokanātham mahāpurisam mayameva paṭhamam paṭiggaṇhāmāti sañjātagāravabahumānā attano pītiṃ pavedentā **khīṇāsavā suddhāvāsabrahmāno** ādito paṭiggaṇhanti. **Sūtivesanti** sūtiyaggaṇadhātivesam. **Eketi** uttaravihāravāsino. **Macchakkhisadisam** chavivasena.

206. Ajinappaveṇiyāti ajinacammehi sibbetvā katapaveṇiyā. **Mahātejoti** mahānubhāvo. **Mahāyasoti** mahāparivāro vipulakittighoso ca.

Bhaggavibhaggāti sambādhaṭṭhānato nikkhamanena vibhāvitattā bhaggā vibhaggā viya ca hutvā. Tena nesam avisadabhāvameva dasseti. **Alaggo hutvāti** gabbhāsaye yonipadese ca katthaci alaggo asatto hutvā. **Udakenāti** gabbhāsayatena udakena **amakkhito nikkhamati** sammakkhitassa tādisassa udakasmhādīkassava tatha abhāvato. Bodhisattassa hi puññānubhāvena paṭisandhiggahaṇato paṭṭhāya taṃ ṭhānam visuddham paramasugandhagandhakuṭi viya candanagandham vāyantam tiṭṭhati. **Udakavattiyoti** udakakkhandhā.

207. Muhuttajātoti muhuttana jāto hutvā muhuttamattova. **Anudhāriyamāneti** anukūlavasena nīyamāne. **Āgatānevāti** taṃ ṭhānam upagatāni eva.

Anekasākhanti ratanamayānekasatapatiṭṭhānahīrakam. **Sahassamaṇḍalanti** tesam upari patiṭṭhitam anekasahassamaṇḍalahīrakam. **Marūti** devā.

Na kho panevam datṭhabbanti sattapadavītiḥārato pageva disāvīlokanassa katattā. Tenāha “**mahāsatto hi**”tiādi. **Ekaṅgaṇānīti** vivaṭabhāvena vihāraṅgaṇapariveṇaṅgaṇāni viya ekaṅgaṇasadisāni ahesum. **Sadisopi natthīti** tumhākam idaṃ vilokanam visiṭṭhe passitum idha tumhehi sadisopi natthi, kuto uttaritaroti āhaṃsu. **Sabbapaṭhamoti** sabbappadhāno. Padhānapariyāyo hi idha paṭhamasaddo. Tenāha “**itarānī**”tiādi. Ettha ca mahesakkhā tāva devā tathā vadanti, itare pana kathanti? Mahāsattassa ānubhāvadassaneneva. Mahesakkhānañhi devānam mahāsattassa ānubhāvo viya tena sadisānampi ānubhāvo paccakkho ahoṣi. Itare pana tesam vacanam sutvā saddahantā anuminantā tathā āhaṃsu.

Jātamattasseva bodhisattassa ṭhānādīni yesam visesādhigamānam pubbanimittabhūtānīti te niddhāretvā dassento, “**ettha cā**”tiādimāha. Tatha **patiṭṭhānam catuiddhipādapaṭilābhassa pubbanimittam** iddhipādavasena lokuttaradhammesu suppatiṭṭhitabhāvasamijjhanato. **Uttarābhimukhabhāvo** lokassa uttaraṇavasena **gamanassa pubbanimittam**. **Sattapadagamanam** sattabojjhaṅgādīgamanassa **pubbanimittam**, visuddhachattadhāraṇam suvisuddhvimuttichattadhāraṇassa **pubbanimittam**, **pañcarājakkudhabhaṇḍāni** pañcavidhvimuttiguṇaparivāratāya **pubbanimittam**, **anāvaṭadisānuvilokanam** anāvaṭañṇatāya **pubbanimittam**, “**aggohamasmi**”tiādivacanam **appaṭivattiyadhammacakkapavattanassa pubbanimittam**; **ayamantimā jātīti** āyatim jātiyā abhāvakittanā **anupādi...pe... pubbanimittanti veditabbam**; tassa tassa anāgate laddhabbavisesassa taṃ taṃ nimittam abyabhicārīnimittanti

daṭṭhabbaṃ. **Na āgatoti** imasmim̐ sutte aññattha ca vakkhamānāya anupubbiyā anāgatataṃ sandhāya vuttaṃ. **Āharitvā**ti tasmim̐ tasmim̐ sutte aṭṭhakathāsu ca āgatanayena āharitvā dīpetabbo.

Dasasahasilokadhātu kampīti pana idaṃ satipi idha pāliyaṃ āgatatte vakkhamānānamacchariyānaṃ mūlabhūtaṃ dassetuṃ vuttaṃ, evaṃ aññampīdisaṃ daṭṭhabbaṃ. **Tanti baddhā vīṇā, cammabaddhā bheriyoti** pañcaṅgikatūriyassa nidassanamattaṃ, ca-saddena vā itaresampi saṅgaho daṭṭhabbo. **Bhijjimsūti** pādesu baddhaṭṭhānesuyeva bhijjimsu. **Vigacchimsūti** vūpasamimsu. **Sakatejobhāsītānīti** ativiya samujjalāya attano pabhāya obhāsītāni ahesuṃ. **Na pavattīti** na sandī. **Vāto na vāyīti** kharo vāto na vāyi, mudusukho pana sattānaṃ sukhāvaho vāyi. **Pathavīgatā ahesuṃ** uccaṭṭhāne ṭhātuṃ avisahantā. **Utusampannoti** anuṇhāsītātāsankhātēna utunā sampanno. Vāmahatthaṃ ure ṭhapetvā dakkhiṇena puthupāṇinā hatthataḷānena saddakaraṇaṃ **apphoṭanaṃ**. Mukhena usseḷanaṃ saddamuñcanaṃ **seḷanaṃ**. **Ekaddhajamālā ahoṣīti** ettha **iti**-saddo ādiattho. Tena vicittapupphasugandhapupphavassadevā vassimsu, sūriye dibbamāne eva tārakā obhāsimsu, acchaṃ vippasannaṃ udakaṃ pathavito ubbhijji, bilāsayaṃ darisayaṃ tiracchānā āsayato nikkhamimsu; rāgadosamohāpi tanu bhavimsu, pathaviyaṃ rajo vūpasami, anīṭṭhagandho vigacchi, dibbagandho vāyi, rūpino devā sarūpeneva manussānaṃ āpāthamagamaṃsu, sattānaṃ cutupapātā nāhesunti imesaṃ saṅgaho daṭṭhabbo. Yāni mahābhiniṭhārasamaye uppannāni dvattiṃsa pubbanimittāni, tāni anavasesāni tadā ahesunti.

Tatrāpīti tesupi pathavikampādīsu evaṃ pubbanimittabhāvo veditabbo, na kevalaṃ sampatijātassa ṭhānādīsu evāti adhippāyo. **Sabbaññutaññānapaṭilābhassa pubbanimittam̐** sabbassa ñeyyassa tiṭṭhakaramatassa ca cālanato. Kenaci anussāhitānaṃyeva imasmim̐yeva ekacakkavāḷe sannipāto, kenaci anussāhitānaṃyeva ekappahāreneva sannipatitvā **dhammapaṭiggahaṇassa pubbanimittam̐, paṭṭhamam̐ devatānaṃ paṭiggahaṇam̐** dibbavihārapaṭilābhassa, pacchā manussānaṃ paṭiggahaṇam̐ tattheva ṭhānassa niccalasabhāvato **āneñjavihārapaṭilābhassa pubbanimittam̐**. Vīṇānaṃ sayam̐ vajjanaṃ parūpadesena vinā sayameva **anupubbavihārapaṭilābhassa pubbanimittam̐**. Bherīnaṃ vajjanaṃ cakkavāḷapariyantāya parisāya pavedanasamatthassa **dhammabheriyā anusāvanassa amatadundubhighosanassa pubbanimittam̐. Andubandhanādīnaṃ chedo** mānavinibandhachedanassa **pubbanimittam̐; supaṭṭanasampāpuṇanaṃ** atthādi anurūpaṃ atthādīsu ñāṇassa bhedādhigamassa **pubbanimittam̐**.

Nibbānarasenāti kilesānaṃ nibbāyanaraseṇa. **Ekarasabhāvassāti** sāsanassa sabbattha ekarasabhāvassa. Vātassa avāyanaṃ kissa pubbanimittanti āha “**dvāsaṭṭhidiṭṭhigatabhindanassā**”ti. Ākāsādiappaṭiṭṭhavisamacañcalaṭṭhānaṃ pahāya **sakuṇānaṃ pathavīgamaṇam̐** tādīsaṃ micchāgāhaṃ pahāya sattānaṃ **pāṇehi** ratanattayasaraṇagamaṇassa **pubbanimittam̐. Devatānaṃ apphoṭanādīhi kīḷanaṃ** pamodanuppattiudānassa bhavavantaḡamanena dhammasabhāvabodhanena ca pamodavibhāvanassa **pubbanimittam̐. Dhammavegavassanassāti** desanāññāvegena dhammāmatassa vassanassa **pubbanimittam̐**. Kāyagatāsativasena laddhajjhānaṃ pādakaṃ katvā uppāditamaggaphalasukhānubhavo **kāyagatāsatiamatapaṭilābho**, tassa pana kāyassapi atappakasukhāvahattā **khudāpipāsāpīlanābhāvo** pubbanimittam̐ vutto. **Ariyaddhajamālāmālitāyāti** sadevakassa lokassa ariyamaggabojjhaṅgadhajamālāhi mālitabhāvassa **pubbanimittam̐**. Yaṃ panettha anuddhaṭṭam̐, taṃ suviññeyyameva.

Etthāti “sapatijāto”tiadinā āgate imasmim̐ ṭhāne. **Vissajjitova**, tasmā amhehi idha apubbaṃ vattabbaṃ natthīti adhippāyo. Tadā pathaviyaṃ gacchantopi mahāsatto ākāsena gacchanto viya mahājanassa upaṭṭhāsīti ayamettha niyati dhammaniyaṃ bodhisattānaṃ dhammatāti idaṃ **niyatīvādavasena** kathanam̐. “Pubbe purimajātīsu tādīsassa puññasambhārakammaṃ katattā upacitattā mahājanassa tathā upaṭṭhāsīti”ti idaṃ **pubbekatakammavādavasena** kathanam̐. Imesaṃ sattānaṃ upari īsanasilātāya yathāsakaṃ kammameva issaro nāma, tassa nimmānaṃ attano phalassa nibbattaṃ, mahāpurisopi sadevakaṃ lokaṃ abhibhavituṃ samatthēna uḷārena puññakammunā nibbattito tena issareṇa nimmitto nāma, tassa cāyaṃ nimmānaviseso, yadidaṃ mahānubhāvātā. Yāya mahājanassa tathā

upaṭṭhāsīti idaṃ **issaranimmānavādavasena** kathanam. **Evam taṃ taṃ bahum vatvā** kiṃ imāya pariyāyakathāyāti **avasāne** ujukameva evaṃ **byākāsi**. Sampatijāto pathaviyaṃ kathaṃ padasā gacchati, evaṃmahānubhāvo ākāseṇa maññe gacchatīti parikkappanassa vasena **ākāseṇa gacchanto viya ahoṣi**. Sīghataraṃ pana sattapadavītiḥāreṇa gatattā dissamānarūpopi **mahājanassa adissamāno viya ahoṣi**. Acelakabhāvo khuddakasarīratā ca tādisassa iriyāpathassa ananucchavikāti kammānubhāvasañjanitapāṭihāriyavasena **alaṅkārapaṭiyatto viya; soḷasavassuddesiko viya ca mahājanassa upaṭṭhāsīti** veditabbam; buddhabhāvānucchavikassa bodhisattānubhāvassa yāthāvato paveditattā **buddhena viya...pe... attamanā ahoṣi**.

Pākaṭā hutvāti vibhūtā hutvā. Buddhānaṃ ye ye saṅkhāre vavatthapetukāmā, te te uppādakkhaṇepi sabbaso suppaṭividditā supākaṭā hatthatale āmalakaṃ viya suṭṭhu vibhūtā eva hutvā upaṭṭhahanti. Tenāha **“yathā hī”**tiādi. **Anokāsagateti** pariggahassa anokāsakāle pavatte. **Nippadeseti** niravasese. **Okāsappatteti** thānagamanādikāle uppanne, te hi sammasanassa योग्यakāle uppattiyā okāsappattāti adhippāyo. **Sattadivasabbhantareti** idaṃ buddhānaṃ pākatikasammasanavasena vuttam, ākāṅkhanā pana te yadā kadāci uppannasāṅkhāre sammasantiyeva. Sesam suviññeyyameva.

Acchariyabbhutasuttavaṇṇanāya līnatthappakāsanā samattā.

4. Bākulasuttavaṇṇanā

209. Yathā **“dvattiṃsā”**ti vattabbe dvi-saddassa bā-ādesam katvā **bāttiṃsāti** vuccati, evaṃ ettha bā-kārādesam katvā bākuloti samaññā ahoṣi, sāyaṃ tassa anvatthasaññāti dassetuṃ, **“tassa hī”**tiādi vuttam. **Sīsam nhāpetvāti** maṅgalatthaṃ mahāgaṅgāya sīsam nhāpetvā. **Nimujjanavasenāti** jaṇṇupamāṇe uduke thokaṃyeva nimujjanavasena. **Chaḍḍetvā palātā** maraṇabhayatajjitā. **Pahariyamānā maranti**, na jālena bandhitamattena. **Dārakassa tejenāti** dārakassa puññatejena. **Nīhaṭamattova mato**, tassa maraṇatthaṃ upakkamo na kato, yena upakkamena dārakassa bādho siyā. **Tanti maccham**. **Sakalamevāti** paripuṇṇāvayavameva.

Na kelāyatīti na mamāyati kismiñci na maññati. Dārakassa puññatejena **piṭṭhito phālentī**. **Dārakam labhatīti** ugghosanavasena bheriṃ carāpetvā. **Pavattiṃ ācikkhi**, attano puttabhāvaṃ kathesi. **Kucchiyā dhāritattā amātā kātuṃ na sakkā** jananiḥbhāvato. **Maccham gaṇhantāpīti** maccham kiṇitvā gaṇhantāpi. Tathā gaṇhantā ca tappariyāpannaṃ sabbam gaṇhāti nāmāti āha – **“vakkayakanādīni bahi katvā gaṇhantā nāma natthī”**ti. **Ayampi amātā kātuṃ na sakkā** sāmikabhāvato. **Dārako ubhinnampi kulānaṃ dāyādo hotu** dvinnam puttabhāvato.

Asītimeti jātiyā asītime vasse. Pabbajjāmattena kilesānaṃ asamucchiḥjanato vītikkamituṃ kāmāsāññā uppannapubbāti pucchā pana pucchitabbā. Tenāha – **“evaṃca kho maṃ, āvuso kassapa, pucchitabba”**nti.

210. **Niyametvāti** taṃ taṃvāre sesavāreṇa niyametvā. **Kammapathabhedakoti** kammapathavisesakaro. Tattha kāmavitakko yathā kāyavacīdvāresu copanappatto kammapathappatto nāma hoti; manodvāre parabhaṇḍassa attano pariṇāmanavasena pavattaabhijjhāsahagato; evaṃ kāmāsāññāti, tathā byāpādavihiṃsāvittakkasāññāti **thero**, **“ubhayampetaṃ kammapathabhedakamevā”**ti āha. Kammapathaṃ appattaṃ saññaṃ sandhāya, **“saññā uppannamattāvā”**ti vuccamāne vitakkitampi samānaṃ kammapathaṃ appattameva, ubhayassa pana vasena suttapadaṃ pavattanti therassa adhippāyo.

211. **Āyūhanakammanti** attanā āyūhitabbakammaṃ. **Lomakiliṭṭhānīti** kiliṭṭhalomāni, kiliṭṭhaṃsūnīti attho. Kimevaṃ bhogesu paranimmitabhava vasavattidevānaṃ viya sabbaso āyūhanakammena vinā aññassapi pabbajitassa paccayalābho diṭṭhapubbo sutapubbotti āha **“anacchariyañceta”**nti. Kulūpakatherānametaṃ kammaṃ, thero pana kadāci kulūpako nāhoṣi.

Gadduhanamattanti goduhanamattakālaṃ. Idha pana sakalo goduhano adhippetoti dassento, “**gāviṃ...pe... kālamattampi**”ti āha. **Nibandhīti** nibaddhadātabbaṃ katvā ṭhapesi.

Sakilesapuggalassa aseribhāvakaṛaṇena raṇena sadisatāya **raṇo**, saṃkilesa. **Aññā udapādīti panāha**, tasmā arahattaṃ na paṭiññātanti dasseti. Nanu tathā vacanaṃ paṭijānanaṃ viya hotīti āha “**apicā**”tiādi.

212. Avāpurati dvāraṃ etenāti **avāpuraṇaṃ**. Paṭhamasaṅgahato pacchā desitattā **dutiyasaṅgaha saṅgitaṃ**. Sesam suviññeyyameva.

Bākulasuttavaṇṇanāya līnatthappakāsanā samattā.

5. Dantabhūmisuttavaṇṇanā

213. Phuseyyāti ñāṇaphusaṇā nāma adhippetā, tasmā **labheyyāti** adhigaccheyya. **Evaṃ paṭipannoti**, “appamatto ātāpī pahitatto”ti vuttappakārena paṭipanno. **Ajānanakoṭṭhaseyevāti** avadhāraṇena attani kataṃ dosāropanaṃ nivatteti.

214. Appanāupacāranti appanañceva upacārañca pāpetvā kathesīti atthaṃ vadanti, appanāsahito pana upacāro appanāupacāro, taṃ pāpetvā kathesīti attho.

Nikkhamatīti nikkhamo, avaggāhakāmato nikkhamanaṃ nikkhamo eva **nekkhammo**, paṭhamajjhānādi. Sati kilesakāme attano upahāraṃ upacāretvā assādetvā paribhuñjati nāmāti āha – “**duvidhepi kāme paribhuñjamāno**”ti. **Duvidhepīti** hīnapañītādivasena duvidhe.

215. Kūṭākāranti gālhasāṭṭheyyaṃ appatirūpe ṭhāne khandhagatapātanādi. **Dantagamananti** dantehi nibbisevanehi gandhabbagatiṃ. **Pattabbaṃ bhūminti** sammākiriyāya laddhabbasampattiṃ.

216. Byatiharaṇavasena laṅghakaṃ **vilāṅghakaṃ**, aññamaññahatthaggaṇaṃ. Tenāha – “**hatthena hatthaṃ gahetvā**”ti.

217. Gahetuṃ samatthoti gaṇikārahaththinīhi upalāpetvā araññahatthiṃ vacanavasena gahetuṃ samattho. **Atipassitvā** atīṭṭhānavasena passitvā. **Ettagedhāti** etasmiṃ araññe nāgavane pavattagedhā. **Sukhāyatīti** sukhaṃ ayati pavatteti, “sukhaṃ haratī”ti vā pāṭho. **Ḍiṇḍimo** ānako. **Nihitasabbavañkadosoti** apagatasabbasāṭṭheyyadoso. **Apanītakasāvoti** apetasārambhakasāvo.

219. Pañcakāmaguṇanissitasīlānanti akusalānaṃ. **Gehassitasīlānanti** vā vaṭṭasannissitasīlānaṃ.

222. Esa nayo sabbatthāti, “majjhimo, daharo”ti āgatesu upamāvāresu, “thero”tiādinā āgatesu upameyyavāresūti pañcasu saṃkilesapakkhiyesu vāresu esa yathāvuttova nayoti veditabbo. Sesam suviññeyyameva.

Dantabhūmisuttavaṇṇanāya līnatthappakāsanā samattā.

6. Bhūmijasuttavaṇṇanā

223. Āsañcepi karitvāti, “imināhaṃ brahmacariyena devo vā bhaveyyaṃ devaññataro vā, dukkhato vā mucceyya”nti patthanaṃ katvā cepi caranti, **abhabbā phalassa adhigamāya** taṅhāya brahmacariyassa vidūsitattāti adhippāyo. **Anāsañcepi karitvāti** vuttanayena patthanaṃ akatvā. **Abhabbā phalassa adhigamāya** aniyamitabhāvato. Pañidhānavasena hi puññaphalaṃ niyataṃ nāma

hoti, tadabhāvato kataṃ puññaṃ na labhatīti adhippāyo. Tatiyapakkhe ubhayatṭhānehi vuttaṃ, catutthapakkho sammāvātāro iti catukoṭiko pañho jālavasena āhaṭo, tatha āsā nāma patthanā, micchāgāhasmiṃ sati na vipaccati, sammāgāhasmiṃ sati vipaccati, ubhayathāpi ubhayāpekkhānāma, yo micchattadhamme purakkhatvā brahmacariyaṃ carati, tassa yathādhippāyaphalaṃ samijjhatīti na vattabbaṃ ayoniso brahmacariyassa ciṇṇatā; yo pana sammattaṃ purakkhatvā brahmacariyaṃ carati, tassa yathādhippāyaṃ brahmacariyaphalaṃ na samijjhatīti na vattabbaṃ yoniso brahmacariyassa ciṇṇatā. Tena vuttaṃ – “**āsañcepi karitvā ayoniso brahmacariyaṃ caranti**”tiādi. Sesam suviññeyyameva.

Bhūmijasuttavaṇṇanāya līnatthappakāsanā samattā.

7. Anuruddhasuttavaṇṇanā

230. Upasaṅkamtivā evamāhamsūti vuttaṃ upasaṅkamanakāraṇaṃ dassento, “**tassa upāsakassa aphāsukakālo ahoṣī**”ti āha. **Avirādhitanti** avirajjhanakaṃ. Yadi vā te dhammā nānatthā, yadi vā ekatthā, yaṃ tatha avirajjhanakaṃ, taṃ taṃyeva paṭibhātūti yojanā. **Jhānamevāti** appamāṇajjhānameva, “cetovimuttī”ti pana vuttattā **cittekaggatāyeva evaṃ vuccatīti** upāsakassa adhippāyo.

231. Yāvatā majjhanhike kāle chāyā pharati, nivāte paṇṇāni patanti, ettāvātā “**rukhamūla**”nti vuccatīti evaṃ vuttaṃ **ekarukkhamūlappamāṇatṭhānaṃ. Kasiṇanimittena ottharivāti** kasiṇārammaṇaṃ jhānaṃ samāpajjanto **tasmim kasiṇa...pe... viharatīti** vutto. **Ābhogo natthi** jhānakkhaṇe. Kāmaṃ samāpattikkhaṇe ābhogo natthi tato pana pubbe vā siyā so ābhogo, tampi sandhāya mahaggatanti keci. Idāni tasmaṃ cetovimuttīnaṃ satipi kenaci visesena abhede visayādito labbhamānabhedam dassetuṃ, “**etthā**”tiādi vuttaṃ. **Nimittaṃ na vaḍḍhati** vaḍḍhetabbassa nimittasseva abhāvato. Pathavīkasiṇādīnaṃ viya ākāsabhāvanāya **ugghāṭanaṃ na jāyati. Tāni jhānānti** brahmavihārajjhānāni. Cuddasavidhena paridamanābhāvato **abhiññānaṃ pādakāni na honti.** Nimittugghāṭasseva abhāvato arūpajjhānānaṃ anadhiṭṭhānatāya **nirodhassa pādakāni na hontīti.** Kammavattābhāvena kilesavattāvipākavattānaṃ tiṇṇaṃ vaṭṭānaṃ paccayabhāvo **vattāpādakatā.** Upapajjanavaseneva taṃ taṃ bhavaṃ okkamati etehīti **bhavokkamaṇāni.** Dutīyanayassa vuttavipariyāyena attho veditabbo. Ugghāṭanassa labbhanato arūpajjhānopari samatikkamo hotīti ayameva viseso. **Evanti** yathāvuttena nimittāvaḍḍhananimittavaḍḍhanādippakārena. **Nānatthāti** nānāsabhāvā. **Evanti** appamāṇamahaggatasaddavacanīyatāya **nānābyañjanā.** Kāmañcettha appamāṇasamāpattitopi nīharitvā vakkhamānabhavūpapattikāraṇaṃ dassetuṃ sakkā, aṭṭhakathāyaṃ pana kasiṇajhānatova nīharitvā yojanā katāti tathā vuttaṃ. Atha vā mahaggatagahaṇenettha appamāṇāti vuttābrahmavihārānaṃpi saṅgaho veditabbo tassā samaññāya ubhayesampi sādharmaṇabhāvato.

232. Evaṃ vuttoti asatipi tathārūpe ābhoge “parittābhāti pharivā adhimuccitvā viharatī”ti vutto. Appamāṇaṃ katvā kasiṇaṃ vaḍḍhentassa kasiṇavaḍḍhanavasena bahulīkārasambhavato siyā jhānassa balavatatā, tadabhāve ca dubbalatā, āciṇṇavasitāya pana paccanīkadhammānaṃ sammā apariso dhane vattabbameva natthīti pañcahākārehi jhānassa appaṇaṇaṃ dassento, “**suppamatte vā**”tiādimāha. Jhānassa appānubhāvātāya eva tannimittā pabhāpi appatārā aparisuddhāva hotīti āha – “**vaṇṇo...pe... saṃkiliṭṭho cā**”ti. Dutīyanayo vuttavipariyāyena veditabbo. Tatthāpi kasiṇassa parittābhāvena vaṇṇassa parittatā, parittārammaṇāya anurūpatāya vā nimittaṃ pabhāmaṇḍalakampi parittameva siyāti adhippāyo. **Vipulaparikkammanti** vipulabhāvena parikkammaṃ. Sesam tatiyacatutthānāyesu vattabbaṃ paṭhamadutīyanāyesu vuttasadisameva.

Vaṇṇanānattanti yadi pītaṃ yadi lohitaṃ yadi vā odātanti sarīravaṇṇanānattaṃ. **Ābhānānattanti** parittavipulatāvasena pabhāya nānattaṃ. **Accinānattanti** tejjodhātussa dīghādivasena vemattatā. **Abhinivisanti** abhirativasena nivisanti nisīdanti tiṭṭhanti. Tenāha “**vasanti**”ti.

234. Ābhanti dibbantīti **ābhāti** āha “**ābhāsampannā**”ti. **Tadaṅgenāti** vā tassā parittatāya appamānatāya ca ābhākāraṇaṃ, taṃ pana atthato bhavūpapattikāraṇamevāti āha – “**tassā bhavūpapattiyā aṅgenā**”ti. **Kāyālasiyabhāvo** tandīdīnaṃ hetubhūtā kāyassa vitthāyitatā.

235. **Pāramiyoti** mahāsāvakaṃvattanikā sāvakaṃpāramiyo pūrento. **Brahmaloketi** brahmattabhāve, brahmaloke vā uppattiṃ paṭilabhi, **vuttampi cetam** theragāthāsu. **Avokiṇṇanti** aññehi asammissanti attho. **Pubbe sañcaritanti** atītabhavesu jātivaseṇa sañcaraṇaṃ mama, sañcaritanti taṃ mamassāti attho. Sesam suviññeyyameva.

Anuruddhasuttavaṇṇanāya līnatthappakāsanā samattā.

8. Upakkilesasuttavaṇṇanā

236. **Tasmāti** atthakāmattā evamāha, na bhagavato vacanaṃ anādiyanto. Ye pana tadā satthuvacanaṃ na gaṇhiṃsu, te kiñci avatvā tuṅhībhūtā maṅkubhūtā aṭṭhaṃsu, tasmā ubhayesampi satthari agāravapaṭipatti nāhosi.

Yenapi janena na diṭṭhoti yena ubhayajanena aññavihitatāya kuḍḍakavāṭḍiantarikatāya vā na diṭṭho. **Damanatthanti** tehi upāsakehi nimmadabhāvaṃ āpāditānaṃ tesam bhikkhūnaṃ damanattham. **Ṭhapayimsūti** yo imesaṃ bhikkhūnaṃ deti, tassa satam daṇḍoti, sahasanti ca vadanti.

237. Vaggabhāveneva (sārattha. ṭī. mahāvaggo 3.464) nānāsaddo assāti **puthusaddo**. **Samajanoti** bhaṇḍane samajjhāsayo jano. Bālalakkhaṇe ṭhitopi “**ahaṃ bālo**”ti na maññati. Bhiyyo cāti attano bālabbhāvassa ajānanatopi bhiyyo ca bhaṇḍanassa upari phoṭo viya saṅghabhedassa attano kāraṇabhāvampi uppajjamānaṃ **na maññi** naññāsi.

Kalahavasena pavattavācāyeva gocaro etesanti **vācāgocarā** hutvā. **Mukhāyāmantī** vivādavasena mukhaṃ āyamevā bhāṇino. **Na taṃ jānantīti** taṃ kalahaṃ na jānanti. Kalahaṃ karonto ca taṃ na jānanto nāma natthi. Yathā pana na jānanti, taṃ dassetuṃ āha – “**evaṃ sādīnavo aya**”nti. Ayaṃ kalaho nāma attano paresaṅca atthajāpanato anattuppādanato diṭṭheva dhamme samparāye ca **sādīnavo**, sadosoti attho.

Upanayhantīti upanāhavasena anubandhanti. **Porāṇoti** purimehi buddhādīhi āciṅṇasamāciṅṇatāya purātano.

Na jānantīti aniccasaññaṃ na paccupaṭṭhāpentī.

Tathā pavattaverānanti aṭṭhichinnādibhāvaṃ nissāya upanayavasena cirakālaṃ pavattaverānaṃ.

Bālasahāyatāya ime bhikkhū kalahapasutā, paṇḍitasahāyānaṃ pana idaṃ na siyāti **paṇḍitasahāyassa bālasahāyassa ca vaṇṇāvāṇṇadīpanattham** vuttā. Sīhabyagghādike **pākaṭaparissaye** rāgadosādike **paṭicchannaparissaye ca abhibhavivā**.

Mātaṅgo araṅṇe **mātaṅgaraṅṇeti** saralopena sandhi. Mātaṅgasaddeneva hatthibhāvassa vuttattā nāgavacanaṃ tassa mahattavibhāvanatthanti āha – “**nāgoti mahantādhivacanameta**”nti. Mahantapariyāyopi hi nāga-saddo hoti “**evaṃ nāgassa nāgena, īsādantassa hatthino**”tiādīsu (udā. 25; mahāva. 467).

238. **Kirasaddo** anussavasūcanattho nipāto. Tena āyamevā sutiparamparāti dasseti. Bhagavatā hi so ādīnavo pageva pariññāto, na tena satthā nibbiṇṇo hoti; tasmim pana antovasse keci buddhaveneyyā

nāhesuṃ; tena aññattha gamaṇaṃ tesāṃ bhikkhūnaṃ damanupāyoti pālileyyakaṃ uddissa gacchanto ekavihāriṃ āyasmantaṃ bhaguṃ, samaggavāsaṃ vasante ca anuruddhattherādike sampahaṃsetuṃ anuruddhattherassa ca. Imaṃ upakkilesovādaṃ dātuṃ tattha gato, tasmā **kalahakārake kirassāti** etthāpi **kirasaddaggaṇe** eseva nayo. **Vuttanayameva** gosīṅgasālasutte (ma. ni. 1.325 ādayo).

241. “Yathā kathaṃ paṇā”ti vuttapucchānaṃ pacchimabhāvato “**atthi pana voti pacchimapucchāyā**”ti vuttaṃ, na puna “atthi pana vo”ti pavattanassa pucchanaṃ atthibhāvato. **So pana** lokuttaradhammo. **Therānanti** anuruddhattherādīnaṃ natthi. **Parikammobhāsaṃ pucchātī** dibbacakkuṇāṇe katādhikārattā tassa uppādanatthaṃ parikammobhāsaṃ pucchati. **Parikammobhāsanti** parikammasamādhinibbattaṃ obhāsaṃ, upacārajjhānaṣaṅjanitaṃ obhāsanti attho. Catutthajjhānalābhī hi dibbacakkhuparikammattaṃ obhāsakaṣiṇaṃ bhāvetvā upacāre ṭhapito samādhi parikammasamādhī, tattha obhāso parikammobhāsoti vutto. Taṃ sandhāyāha – “**obhāsañceva sañjānāmāti parikammobhāsaṃ sañjānāmā**”ti. Yattake hi ṭhāne dibbacakkhunā rūpagataṃ daṭṭhukāmo, tattakaṃ ṭhānaṃ obhāsakaṣiṇaṃ pharivā ṭhito. Taṃ obhāsaṃ tattha ca rūpagataṃ dibbacakkuṇāṇena passati, therā ca tathā paṭipajjimsu. Tena vuttaṃ – “**obhāsañceva sañjānāma dassanañca rūpāna**”nti. Yasmā pana tesāṃ rūpagataṃ passantānaṃ parikammavāro atikkami, tato obhāso antaradhāyi, tasmīṃ antarahite rūpagatampi na paññāyati. Parikammanti hi yathāvuttakaṣiṇāramaṇaṃ upacārajjhānaṃ, rūpagataṃ passantānaṃ kaṣiṇobhāsavasena rūpagatadassanaṃ, kaṣiṇobhāso ca parikammavasenāti tadubhayampi parikammaṃ appavattiyā nāhosi, tayidaṃ kāraṇaṃ ādikammikabhāvato therā na maññimsu, tasmā vuttaṃ “**nappaṭivijjhāmā**”ti.

Nimittaṃ paṭivijjhitaṃ kāraṇaṃ paccakkhato dassetvā suvisuddhadibbacakkuṇāṇe therāṃ paṭiṭṭhāpetukāmo satthā vadati. **Kim na ājulesantī**ti kim na byāmoheṣṣanti, byāmoheṣṣanti evāti attho. **Vicikicchā udapādī**ti dibbacakkhuno yathāupaṭṭhitesu rūpagatesu apubbatāya, “idaṃ nu kho rūpagataṃ kim, idaṃ nu kho ki”nti maggena asamucchinnattā vicikicchā saṃsayo uppajji. **Samādhi cavī**ti vicikicchāya uppannattā parikammasamādhī vigacchī. Tato eva hi parikammobhāsopi antaradhāyi, dibbacakkhunāpi rūpaṃ na passī. **Na manasi karissāmī**ti manasikāravasena me rūpāni upaṭṭhahimsu, rūpāni passato vicikicchā uppajjati, tasmā idāni kiñci na manasi karissāmīti tuṅhī ahosi taṃ pana tuṅhībhāvappattiṃ sandhāyāha “**amanasikāro udapādī**”ti.

Tathābhūtaṃ amanasikārassa abhāvaṃ āgamma **uppilaṃ udapādi. Vīriyaṃ gālhaṃ paggaḥitanti** thinamidhachambhitattānaṃ vūpasamanatthaṃ accāradhāvīriyaṃ ahosi, tena citte samādhidūsikā gehassitā balavapīti uppannā. Tenāha “**uppilaṃ uppanna**”nti. **Tatoti** sithilavīriyattā. **Patameyyāti** ativiya khinnaṃ bhaveyya. Taṃ mamāti patthanābhibhavanīyamanasīsena jappetīti **abhijappā**, taṅhā. Nānattā nānāsabhāvā saññā **nānattasaññā**. Ativiya upari katvā nijjhānaṃ pekkhanaṃ atinijjhāyitattaṃ.

243. Parikammobhāsamevāti parikammasamuṭṭhitaṃ obhāsameva. **Na ca rūpāni passāmī**ti obhāsamanasikārapasutatāya dibbacakkhunā rūpāni na passāmī. **Visayarūpamevāti** tena pharivā ṭhitaṭṭhāneva dibbacakkhuno visayabhūtaṃ rūpagatameva manasi karomi.

Kaṣiṇarūpānaṃ vasenettha obhāsassa parittatāti āha “**parittaṭṭhāne obhāsa**”nti. **Parittāni rūpānī**ti katipayāni, sā ca nesāṃ parittatā ṭhānavasenevāti āha “**parittakaṭṭhāne rūpānī**”ti. “Appamāṇaṇceva”tiādīna vutto **dutiyaṃvāro**. Obhāsaparittataṃ sandhāya parikammasamādhī “paritto”ti vutto tasseva obhāsassa appamāṇatāya appamāṇasamādhīti vacanato. **Tasmīṃ samayeti** tasmīṃ parittasamādhino uppannasamaye. **Dibbacakkhupi parittakaṃ hoti** parittarūpagatadassanato.

245. Dukatikajjhānasamādhinti catukkanaye dukajjhānasamādhim, pañcakanaye tikajjhānasamādhinti yojanā. **Dukajjhānasamādhinti** catukkanaye tatiyacatutthavasena dukajjhānasamādhim, pañcakanaye catutthapañcamavasena dukajjhānasamādhim.

Tikacatukkajjhānasamādhinti catukkanaye tikajjhānasamādhim, pañcakanaye catukkajjhānasamādhinti yojanā.

Tividhanti sappītikavasena tippakāraṃ samādhim. **Tadantogadhāti** sappītikādisabhāvā. Kāmaṃ bhagavā purimayāme pubbenivāsānussatiñāṇaṃ, pacchimayāme dibbacakkhuñāṇaṃ nibbattentopi imāni ñāṇāni bhāvesiyeva. Vipassanāpādakāni pana ñāṇāni sandhāya, “**pacchimayāme**”ti vuttaṃ, tenāha “**bhagavato hī**”tiādi. **Pañcamajjhānassāti** pañcamajjhānikassa vasena paṭhamajjhāniko **maggo natthi**. **Soti** pañcakanayo bhagavato lokiyo ahoṣi. **Etanti** etaṃ, “savitakkampi savicāraṃ samādhim bhāvemī”tiādivacanaṃ. **Lokiyalokuttaramissakaṃ sandhāya vuttaṃ**, na “lokiyaṃ vā lokuttarameva vā”ti. Sesam suviññeyyamevāti.

Upakkilesasuttavaṇṇanāya līnatthappakāsanā samattā.

9. Bālapaṇḍitasuttavaṇṇanā

246. Etehīti ducintitādīhi. Etena lakkhaṇasaddassa karaṇatthatamāha. **Tānevāti** lakkhaṇāni eva. **Tassāti** bālassa. “Ayaṃ bālo”ti nimīyati sañcānīyati etehīti **bālanimittāni**. **Apadānaṃ** vuccati vikhyātaṃ kammaṃ. **Ducintitādīni** ca bāle vikhyātāni, avadhāraṇabhāve vā, tasmā bālassa apadānānti **bālāpadānāni**. Abhijjhādīhi duṭṭhaṃ dūsitaṃ cintetīti **ducintitacintī**. Lobhādīhi duṭṭhaṃ bhāsitaṃ musāvādādīhi bhāsati **dubbhāsitaḥāsī**. Tesam tesameva vasena kattabbato dukkaṭakammaṃ pāṇātipātādīhi karotīti **dukkaṭakammakārī**. Tenāha “**cintayanto**”tiādi. Tāni upanissāya jātanti tājjaṃ. Tato eva tesam sārappaṃ anurūpanti **tassārappaṃ**. Tenāha “**tajjātika**”ntiādi. **Kacchamānāyāti** kathiyamānāya.

248. Yasmā sattānaṃ yathūpacitāni kammāni katokāsāni tadupaṭṭhāpitāni kammanimittagatinimittāni maraṇassa āsannaḥāle cittassa āpāthaṃ āgacchantāni, tadā olambantāni viya abhibhavantāni viya ajjhottharantāni viya upaṭṭhahanti, tasmā vuttaṃ – “**olambanādiākārena hi tāni upaṭṭhahantī**”ti. Upaṭṭhānākāro eva tadā cittassa gocaraḥhāvaṃ gacchatīti āha – “**tasmim upaṭṭhānākāre āpāthagate**”ti.

249. Na sakkāti na vadatīti etena dvepi paṭisedhā pakatiatthāti ayamatto vutto hoti. **Na sukarāti** pana iminā dukkarabhāvo dīpito, dukkaraṇca tāva upāyena sakkā kātunti dassento āha – “**na sukaraṃ panā**”tiādi. **Tenāti** vinivijjhivā gamanena aññamaññaṃ saṃvijjhanena. **Assāti** corassa. **Ito uttaripīti** majjhanhikasamayaṃ sāyanhasamayaṇca sattisatena.

250. Saṅkhampi na upetīti iminā saṅkhātābbamattaṃ natthīti dīpitaṃ hotīti āha – “**gaṇanāmatampī na gacchatī**”ti. **Upanikkhepanamattampīti** etthāpi eseva nayo. **Kalabhāganti** kalānaṃ saṅgaṇanakoṭṭhāsaṃ. Tenāha “**satimaṃ kala**”ntiādi. **Olokitamattampīti** upanikkhepanavasena olokanamattakampi. **Taṃ kammakāraṇanti** taṃ pañcavidhabandhanakammakāraṇaṃ catunnampi passānaṃ vasena samparivattetvā karontiyeva, pāliyaṃ pana ekapassavasena āgatā. **Gehassāti** mahato gehassa. **Sabbatoti** sabbāvayavato. **Sampajjalite** ekajālībhūte. **Supakkuthitāyāti** suṭṭhu nipakkāya.

Vibhattoti tattha nibbattakasattānaṃ sādharmaṇakammunā vibhatto viya nibbatta. Ayopākārena parito atto gahitoti **ayopākārapariyatto** parikkhitto.

Yamakagoḷakāti dāraḥkānaṃ kīlanayugaḷā. **Evampi dukkhoti** yathāvuttaussadanirayavasenapi sota-ghāna-jivhā-kāya-mano-gocaratāvasenapi iminā ākārena dukkhoti.

251. Dantehi ullehivāti uttaradantehi añchitvā. Rasavasena atitto assādo **rasādo**. Tenāha

“rasagedhena paribhuttaraso”ti.

252. Durūpoti virūpo. **Duddasoti** teneva virūpabhāvena anīṭhadassano. **Lakuṇṭhakoti** rasso. **Paviṭṭhagīvoti** khandhantaraṃ anupaviṭṭhagīvo. **Mahodaroti** vipulakucchi. Yebhuyyena hi lakuṇṭakā sattā rassagīvā puthulakucchikāva hontīti tathā vuttaṃ. Kāṇo nāma cakkhuvikaloti vuttaṃ – “**ekakkhikāṇo vā ubhayakkhikāṇo vā**”ti. **Kuṇṭi** hatthavikalo vuccatīti āha – “**ekahatthakuṇṭi vā ubhayahatthakuṇṭi vā**”ti. Vātādinā upahatakāyapakkho idha pakkhahatoti adhippeto, na pakkhihatoti āha – “**pakkhahatoti piṭṭhasappi**”ti. **Dukkānupabandhadassanattanti** aparāparajātīsu vipākadukkhasa anupabandhavasena pavattidassanattam.

Kalīyati khalīyati appahīyati sāsanaṃ etenāti **kali**, jutaparājayo. So eva gahasadisatāya “**kaliggaho**”ti vutto. **Adhibandhanti** kuṭumbassa adhivutthassa mūlabhūtassa attano bandhitabbataṃ. Tenāha “**attanāpi bandhaṃ nigaccheyyā**”ti. Bālabhūmiyā bālabhāvassa matthakappatti nirayagāmikammakāritāti “**niraye nibbattati**”ceva vuttaṃ. Taggahaṇeneva pana tato mudumudutarādikammavasena sesāpāyesu aparāparanibbattādibālabhūmi vibhāvitā hotīti.

253. Vuttānusārenāti “bālo aya”ntiādinā vuttassa atthavacanassa “paṇḍito aya”nti etehi lakkhīyatītiādinā anusārena. **Manosucaritādināṃ vasesāti** cinto anabhijjhā-abyāpāda-sammādasanaṃ sucintitameva cintetītiādinā manosucaritānaṃ tiṇṇaṃ sucaritānaṃ vasena yojetabbāni.

Cakkaratanavaṇṇanā

256. Uposathaṃ (dī. ni. ṭi. 2.243) vuccati aṭṭhaṅgasamannāgataṃ sabbadivasesu gahaṭṭhehi rakkhitabbasīlaṃ, samādānavasena taṃ etassa atthīti **uposathiko**, tassa. Tenāha “**samādinnauposathaṅgassā**”ti. **Tadāti** tasmim kāle, yasmim pana kāle cakkavattibhāvasaṃvattaniya-dāna-sīlādi-puññasambhārasamudāgamasampanno pūritacakkavattivatto kādīpadesavisesapaccājātiyā ceva kularūpabhogādhipateyyādiguṇavisesasampattiyā ca tadanurūpe atthabhāve ṭhito hoti, tasmim kāle. Tādise hi kāle cakkavattibhāvī purisuttamo yathāvuttaguṇasamannāgato rājā khattiyo hutvā muddhāvasitto visuddhasīlo anuposathaṃ satasahassavissajjanādinā sammāpaṭipattim paṭipajjati, na yadā cakkaratanaṃ uppajjati, tadā eva. Tenāha – “**pāto...pe... dhammatā**”ti. (Tattha **damo** indriyasamvaro, **saṃyamo** sīlasamvaro.)

Vuttappakārapuññakammappaccayanti

cakkavattibhāvāvahadānadamasamyaṃmādīpuññakammahetukaṃ. **Nilamaṇisaṅghātasadisanti** indanīlamaṇisaṅcayasamānaṃ. **Dibbānubhāvayuttattāti** dassanīyatā manuññaghosatā ākāsagāmitā obhāsavissajjanā appaṭighātātā rañño icchitathanipphattikāraṇatāti evamādīhi dibbasadisēhi ānubhāvehi samannāgatattā. **Sabbehi ākārehīti** sabbehi sundarehi ākārehi. **Paripūranti** paripuṇṇaṃ. Sā cassa pāripūri idāneva vitthāriyati.

Panālīti chiddaṃ. **Suddhasiniddhadantapantiyā** nibbivarāyāti adhippāyo. **Nābhipanāli** **parikkhepapaṭṭesūti** nābhiparikkhepapaṭṭe ceva nābhiyā panāliparikkhepapaṭṭe ca. **Suvibhattāvāti** aññamaññaṃ asaṃkiṇṇattā suṭṭhu vibhattā. Paricchedalekhantaresu maṇikā suvibhattā hutvā paññāyantīti vadanti.

Paricchedalekhādīnīti ādi-saddena mālākammādiṃ saṅgaṇhāti. **Surattāti**ādīsu **surattaggahaṇena** mahānāmavaṇṇataṃ paṭikkhipati, **suddhaggahaṇena** saṃkiliṭṭhataṃ, **siniddhaggahaṇena** lūkhataṃ. Kāmaṃ tassa cakkaratanaṃ nemimaṇḍalaṃ asandhikaṃva nibbattaṃ, sabbatthakameva pana kevalaṃ pavāḷavaṇṇova na sobhatīti pakaticakkassa sandhiyuttesu ṭhānesu rattajambunadaparikkhataṃ ahosi, taṃ sandhāya vuttaṃ “**sandhīsu panassā**”tiādi.

Nemimaṇḍalapiṭṭhiyanti nemimaṇḍalassa piṭṭhipadesē. **Dasannaṃ dasannaṃ arānamantareti**

dasannaṃ dasannaṃ arānaṃ antarasamīpe padese. **Chiddamaṇḍalacittoti** maṇḍalasaṅḥānachiddavicitto. **Sukusalasamannāhatassāti** suṭṭhu kusalena sippinā pahatassa, vāditassāti attho. **Vaggūti** manoramo **rajanīyoti** suṅantānaṃ rāguppādako. **Kamanīyoti** kanto. **Samosaritakusumadāmāti** olambitasugandhakusumadāmā. **Nemiparikkhepassāti** nemipariyantaparikkhepassa. Nābhīpanāḷiyā dvinnaṃ passānaṃ vasena “**dvinnampi nābhīpanāḷīna**”nti vuttaṃ. Ekā eva hi sā panāḷi. **Yehīti** yehi dvīhi sīhamukhehi. Puna **yehīti** muttākālāpehi.

Odhāpayamānanti sotuṃ avahitāni kurumānaṃ. Cando purato, cakkarataṇaṃ pacchāti evaṃ **pubbāpariyena** pubbāparabhāgena.

Ante purassāti anurādhapure rañño antepurassa **uttarasīhapañjaraāsanne** tadā rañño pāsāde tādisassa uttaradisāya sīhapañjarassa labbhamānattā vuttaṃ. **Sukhena sakkāti** kiñci anāruhitvā sarīrañca anullaṅghitvā yathāṭṭhiteneva hatthena pupphamuṭṭhiyo khipitvā sukhena sakkā hoti pūjetuṃ.

Nānāvīrāgaratanappabhāsamujjalanti nānāvīdhacittavaṇṇaratanobhāsapabhassaraṃ. **Ākāsaṃ abbhuggantvā pavatteti**. Āgantvā ṭhitatṭhānato upari ākāsaṃ abbhuggantvā pavatte.

Sannivesakkhamoti khandhavārasannivesayogyo. **Sulabhāhārūpakaraṇoti** sukheneva laddhabbadhaññagorasadārutiṇṇādibhojanasādhano. **Paracakkanti** parassa rañño senā, āṇā vā.

Āgatanandanoti āgato hutvā nandijanano. Āgataṃ vā āgamaṇaṃ, tena nandatīti **āgatanandano**. Gamaṇena socetīti **gamanasocano**. **Upakappethāti** uparūpari kappetha saṃvidahatha, upanethāti attho. **Upaparikkhitvāti** hetutopi sabhāvatoṇi phalatoṇi diṭṭhadhammikasaṃparāyikaādīnavatoṇi vīmaṃsitvā.

Vibhāventi paññāya atthaṃ vibhūtaṃ karontīti **vibhāvino**, paññavanto. **Anuyantāti** anuvattakā. **Ogacchamānanti** osīdantaṃ. **Yojanamattanti** vitthārato yojanamattaṃ padesaṃ. Gambhīrabhāvena pana yathā bhūmi dissati, evaṃ ogacchati. Tenāha “**mahāsamuddatāla**”ntiādi. **Ante cakkarataṇaṃ** udakena senāya anajjhottharaṇatthaṃ.

257. Puratthimo samuddo pariyanto assāti **puratthimasamuddapariyanto**, puratthimasamuddaṃ pariyantaṃ katvā. **Cāturantāyāti** cātusamuddantāya pubbavidehādicatukoṭṭhāsantāya.

Hatthiratanavaṇṇanā

258. **Haricandanādīhīti ādi**-saddena catujjātiyagandhādīṃ saṅgaṇhāti. **Āgamaṇaṃ cintethāti vadanti** cakkavattivattassa pūritatāya paricitattā. Bhūmiphusaṇakehi vāladhi, varaṅgaṃ hatthoti imehi ca tīhi, catūhi pādehi cāti sattahi avayavehi ṭhitattā **sattapatiṭṭho**. **Itaresaṃ** amaccādīnaṃ cintayantānaṃ **na āgacchati**. **Apanetvāti** attano ānubhāvena apanetvā. Gandhameva hi tassa itare hatthino na saṇanti.

Assaratanavaṇṇanā

Sindhavakulatoti sindhavassājānīyakulato.

Mañiratanavaṇṇanā

Sakaṭanābhisamappamāṇanti pariṇāhato mahāsakaṭassa nābhiyā samappamāṇaṃ. **Ubhosu antesūti** heṭṭhā upari cāti dvīsu antesu. **Kaṇṇikapariyantatoti** dvinnaṃ kaṇṇanapadumaṇaṃ kaṇṇikāya pariyantato. **Muttājālake ṭhapetvāti** suvisuddhe muttāmāye jālake patiṭṭhapetvā.

Itthiratanavaṇṇanā

“**Itthiratanam pātubhavatī**”ti vatvā assa pātubhavanākāraṃ dassetuṃ, “**maddarājakulato vā**”tiādi vuttaṃ. Maddaraṭṭhaṃ kira abhirūpānaṃ itthīnaṃ uppattiṭṭhānaṃ. **Sanṭhānapāripūriyāti** hatthapādādisarīravayavānaṃ susaṅghitatāya. Avayavapāripūriyā hi samudāyapāripūrisiddhi. **Rūpanti** sarīraṃ. **Dassanīyāti** surūpabhāvena passitabbayuttā. **Somanassavasena cittaṃ pasādeti** yoniso cintentānaṃ kammaphalasaddhāya vasena. **Pasādāvahattāti** kāraṇavacanena yathā pāsādikatāya vaṇṇapokkharatāsiddhi vuttā, evaṃ dassanīyatāya pāsādikatāsiddhi, abhirūpatāya ca dassanīyatāsiddhi vattabbāti nayaṃ dasseti. Paṭilomato vā vaṇṇapokkharatāya pāsādikatāsiddhi, pāsādikatāya dassanīyatāsiddhi, dassanīyatāya abhirūpatāsiddhi yojetabbā. Evaṃ sarīrasampattivāsena abhirūpatādike dassetvā idāni sarīre dosābhāvavāsena te dassetuṃ, “**abhirūpā vā**”tiādi vuttaṃ. Tattha yathā pamāṇayuttā, evaṃ ārohapariṇāhayogato ca pāsādikā nātidīghatādayo. Evaṃ manussānaṃ dībbarūpatāsampattipīti “**appattā dībbavaṇṇa**”nti vuttaṃ. **Kāyavipattiyāti** sarīradosassa. **Abhāvoti** accantameva dūrībhāvo.

Satavihatassāti satakkhattuṃ vihatassa. **Satavihatassāti** ca idaṃ kappāsapicuvāsena vuttaṃ, tūlapicuno pana vihananameva natthi. Kuṅkumatagaraturukkhayavanapupphāni **catujjāti**. Tamālatagaraturukkhayavanapupphānīti apare.

Aggidaddhā viyāti āsanagatena agginā daḍḍhā viya. **Paṭhamamevāti** aññakiccatto paṭhamameva, dassanasamakālemevāti attho. Taṃ taṃ attanā rañño kātabbakiccaṃ kiṃ karomīti pucchitabbatāya kiṃ karaṇanti paṭissāvetīti **kiṅkārapaṭissāvinī**.

Mātugāmo nāma yebhuyyena saṅghajātiko, itthiratanassa pana taṃ natthīti dassetuṃ, “**svāssā**”tiādi vuttaṃ. **Guṇāti** rūpaṇā ceva ācāraṇā ca. **Purimakammānubhāvenāti** tassā purimakammānubhāvena. Itthiratanassa tabbhāvasaṃvattaniyapurimakammassa ānubhāvena, cakkavattinopi parivārasaṃvattaniyaṃ puññakammaṃ tādissassa phalavisesassa upanissayo hotiyeva. Tenāha “**cakkavattino puññaṃ upanissāyā**”ti. Etena sesaratanesupi tesam viśesānaṃ tadupanissayatā vibhāvitā evāti daṭṭhabbaṃ. Pubbe ekadesavasena labbhamānapāripūrī rañño **cakkavattibhāvūpagamanato paṭṭhāya sabbākārapāripūrā jātā**.

Gahapatiratanavaṇṇanā

Pakatiyāvāti sabhāveneva, cakkaratanaṃpātubhāvato pubbepi.

Pariṇāyakaratanavaṇṇanā

Nissāyāti upanissāya.

260. Kaṭaggaho vuccati jayaggaho sakānaṃ paṇānaṃ kaṭabhāvena atthasiddhivasena saṅgaṇhananti katvā. Tenāha “**jayaggāhenā**”ti. **Ekappahārenevāti** ekappayogeneva sataśassāni adhigaccheyyāti yojanā. Sesam vuttanayattā suviññeyyameva.

Bālapaṇḍitasuttavaṇṇanāya līnatthappakāsānā samattā.

10. Devadūtasuttavaṇṇanā

261. Dve agārātiādīti ādi-saddena “**sadvārā...pe... anuvicarantepī**”ti etamatthaṃ saṅgaṇhāti. Ettakameva hi assapurāsutte (ma. ni. 1.432; ma. ni. aṭṭha. 1.432) vitthāritaṃ veditabbaṃ. “**Dibbena cakkhunā**”tiādi pana visuddhimagge (visuddhi. 2.397) tathā vitthāritampi suttasaṃvaṇṇanā hotīti katvā,

“assapurasutte vitthāritamevā”ti vuttaṃ.

262. Nirayato paṭṭhāya desanaṃ devalokena osāpetīti saṃkilesadhammehi saṃvejetvā vodānadhammehi niṭṭhāpento. Dutiyamaṃ pana vuttavipariyāyena veditabbaṃ, tadidaṃ veneyyajjhāsayaṃsiṭṭhanti daṭṭhabbaṃ. Idāni saṅkhipitvā vuttamatthaṃ vivarituṃ, “sace”tiādi vuttaṃ. Soti bhagavā.

Ekacce therāti (kathā. anuṭī. 866-868; a. ni. ṭī. 2.3.36) andhakādike, viññānavādino ca sandhāya vadati. Nerayike niraye pārenti tato niggantumappadānavasena rakkhantīti **nirayapālā**. Nerayikānaṃ narakadukkhena pariyaonaddhāya alaṃ samatthāti vā **nirayapālā**. Tanti “natthi nirayapālā”tivacanaṃ. **Paṭisedhitamevāti** “atthi niraye nirayapālā, atthi ca kāraṇikā”tiādinā nayena **abhidhamme** (kathā. 866) paṭisedhitameva. Yadi nirayapālā nāma na siyuṃ, kammakāraṇāpi na bhaveyya. Sati hi kāraṇike kammakāraṇāya bhavitabbanti adhippāyo. Tenāha “**yathā hī**”tiādi. Etthāha – “kiṃ panete nirayapālā nerayikā, udāhu anerayikā”ti. Kiñcettha – yadi tāva nerayikā, ime nirayasamvattaniyena kammunā nibbattāti sayampi nirayadukkhamaṃ anubhaveyyuṃ, tathā sati aññesaṃ nerayikānaṃ yātanāya asamatthā siyuṃ, “ime nerayikā, ime nirayapālā”ti vavatthānañca na siyā, ye ca ye yārenti, tehi samānarūpabalappamañehi itaresaṃ bhayasantāsā na siyuṃ. Atha anerayikā, nesaṃ tattha kathaṃ sambhavoti vuccate – anerayikā nirayapālā anirayagatisamvattaniyakammaṃ nibbattito. Nirayūpapattisaṃvattaniyakammato hi aññeneva kammunā te nibbattanti rakkhasajātikattā. Tathā hi vadanti sabbatthivādino –

“Kodhanā kurūrakammantā, pāpābhirucino sadā;
Dukkhesu ca nandanti, jāyanti yamarakkhasā”ti. (kathā. anuṭī. 866-868; a. ni. ṭī. 2.3.36);

Tattha yadeke vadanti “yātanādukkhamaṃ paṭisaṃvedeyyuṃ, atha vā aññamaññaṃ yāteyyu”ntiādi, tayidaṃ asāraṃ nirayapālānaṃ nerayikabhāvasseva abhāvato. Yadi pi anerayikā nirayapālā, ayomayāya pana ādittāya sampajjalitāya saṃjotibhūtāya nirayabhūmiyā parikkamaṃnā kathaṃ dāhadukkhamaṃ nānubhavanti? Kammānubhāvato. Yathā hi iddhimanto cetovasippattā mahāmogallānādayo nerayike anukampantā iddhibalena nirayabhūmiṃ upagatā dāhadukkhena na bādhiyanti, evaṃsappadamidaṃ daṭṭhabbaṃ.

Iddhivisaṃyassa acinteyyabhāvatoti ce? Idampi taṃsamānaṃ kammavipākassa acinteyyabhāvato. Tathārūpena hi kammunā te nibbattā. Yathā nirayadukkhena abādhitā eva hutvā nerayike yārenti, na cettakena bāhiravisayābhāvo yujjati iṭṭhāniṭṭhatāya paccekaṃ dvārapurisesu vibhattasabhāvattā. Tathā hi ekaccassa dvārassa purisassa ca iṭṭhaṃ ekaccassa anīṭṭhaṃ, ekaccassa ca anīṭṭhaṃ ekaccassa iṭṭhaṃ hoti. Evañca katvā yadeke vadanti – “natthi kammavasena tejasā parūpatāpana”ntiādi, tadapāhataṃ hoti. Yaṃ pana vadanti – “anerayikānaṃ nesaṃ kathaṃ tattha sambhavo”ti niraye nerayikānaṃ yātanāsabbhāvato. Nerayikasattayātanāyogyāñhi attabhāvaṃ nibbattentaṃ kammaṃ tādisanikantivīnāmitaṃ nirayapṭṭhāneyeva nibbatteti. Te ca nerayikehi adhikatarabalārohapariñāhā ativiya bhayānakadassanā kurūrarapayogā ca honti. Eteneva tattha nerayikānaṃ vibādhakakākasunakhādīnampi nibbatti saṃvaṇṇitāti daṭṭhabbaṃ.

Kathaṃ aññagatikēhi aññagatikabādhananti ca na vattabbaṃ aññatthāpi tathā dassanato. Yaṃ paneke vadanti – “asattasabhāvā eva nirayapālā nirayasunakhādayo cā”ti tampi tesamaṃ matimattaṃ aññattha tathā adassanato. Na hi kāci atthi tādisī dhammapavatti, yā asattasabhāvā, sampatisattehi appayojitā ca sattakiccaṃ sādheṇī diṭṭhapubbā. Petānaṃ pānīyanivāraṇānaṃ daṇḍādīhatthapurisānampi sabbhāve, asattabhāve ca visesakāraṇaṃ natthi. Supinopaghātopi atthi, kiccasaṃmatthātaṃ pana appamaṇaṃ dassanādimmattenapi tadatthasiddhito. Tathā hi supine āhārūpabhogādīnā na atthasiddhi, iddhinimmānarūpaṃ panettha laddhāparihāraṃ iddhivisaṃyassa acinteyyabhāvato. Idhāpi kammavipākassa acinteyyabhāvatoti ce? Taṃ na, asiddhattā. Nerayikānaṃ kammavipākato nirayapālāti asiddhametaṃ, vuttanayena pana pālito ca tesamaṃ sattabhāvo eva siddhoti. Sakkā hi vattaṃ,

“sattasāṅkhātā nirayapālasaṅghitā dhammapavatti sābhisandhikaparūpaghātī atthi kiccāsabbhāvato oḷāhārādirakkhasasantati viyā”ti. Abhisandhipubbakatā cettha na sakkā paṭikkhipitum tathā tathā abhisandhiyā yātanato, tato eva na saṅghātapabbatādīhi anekantikātā. Ye pana vadanti – “bhūtavisesā eva ete vaṇṇasaṅghānādivisesavanto bheravākārā ‘narakapālā’ti samaṅgaṃ labhanti”ti. Tadasiddham ujukameva pāḷiyam, – “atthi nirayesu nirayapālā”ti (kathā. 866) vādassa paṭiṭṭhāpitattā.

Apica yathā ariyavinaye narakapālānaṃ bhūtamattatā asiddhā, tathā paññattimattavādinopi tesam bhūtamattatā asiddhāva sabbaso rūpadhammānaṃ atthi bhāvasseva appaṭijānanato. Na hi tassa bhūtāni nāma paramatthato santi. Yadi paramattham gahevā voharati, atha kasmā cakkhurūpādīni paṭikkhipatīti? Tiṭṭhatesā anavaṭṭhitatakkānaṃ appahīnasammohavipallāsānaṃ vādavīmaṃsā, evaṃ, “attheva niraye nirayapālā”ti niṭṭhamettha gantabbaṃ. Sati ca nesam sabbhāve, asatipi bāhire visaye narake viya desādiniyamo hotīti vādo na sijjhati, sati eva pana bāhire visaye desādiniyamoti daṭṭhabbaṃ.

Devadūtasarāpanavasena satte yathūpacite puññakamme yameti niyametīti yamo, tassa yamassa vemānikapetānaṃ rājabhāvato rañño. Tenāha – “**yamarājā nāma vemānikapetarājā**”ti. **Kammavipākanti** akusalakammavipākaṃ. **Vemānikapetāti** kaṇhasukkavasena missakakammaṃ katvā vinipātikadevatā viya sukkena kammunā paṭisandhiṃ gaṇhanti. Tathā hi te maggaphalabhāginopi honti, pavattiyam pana kammānurūpaṃ kadāci puññaphalaṃ, kadāci apuññaphalaṃ paccanubhavanti. Yesam pana ariyamaggo uppajjati, tesam maggādhiyamato paṭṭhāya puññaphalameva uppajjati daṭṭhabbaṃ. Apuññaphalaṃ pubbe viya kaṭukaṃ na hoti. Manussattabhāve ṭhitānaṃ mudukameva hotīti apare. **Dhammiko rājāti** ettha tassa dhammikabhāvo dhammadevaṃputtassa viya uppattiniyamitadhammavaseneva vedītabbo. **Dvāresūti** avīcimahānarakassa catūsu dvāresu.

Jātidhammoti kammakilesavasena jātipakatiko. Tenāha “**jātisabhāvo**”ti. Sabhāvo ca nāma tejodhātuyā uḷhatā viya na kadāci viyacchatīti āha “**aparimutto jātiyā**”tiādi.

263. Idāni jātiyā devadūtabhāvaṃ niddhāretvā dassetum, “**daharakumāro**”tiādi vuttaṃ. **Atthato evam vadati nāmāti** vācāya avadantopi atthāpattito evam vadanto viya hoti viññūnanti attho. **Evam tumhākampi jāti āgamissati**ti evam saṃkiliṭṭhājegucchaasamatthadaharāvattā jāti tumhākaṃ āgamissati. Kāmañcāyaṃ āgatā eva, sā pana atītānāgatāya uparipi āgamanāya payogo icchītabbo, anāgatāya na icchītabboti āha “**jāti āgamissati**”ti. Tenevāha – “**iti tassā...pe... karoṭhā**”ti. **Tenāti** tena kāraṇena viññūnaṃ vedavattubhāvenāti attho.

Ūrubalanti ūrubalī. Tena dūrepi gamanāgamanaṅghānādisamatthataṃ dasseti, **bāhubalanti** pana iminā hatthehi kātabbakiccāsamatthataṃ, javaggahaṇena vegassa pavattisamatthataṃ. **Antarahitā** naṭṭhā. Sesam paṭhamadevadūte vuttanayameva.

Vividham dukkham ādahatīti byādhi, visesena vā ādhīyati etenāti byādhi, tena **byādhinā**. **Abhihatoti** bādhito, upaddutoti attho.

265. Kāraṇā nāma “hatthacchedādibhedā adhikapiḷā karīyati etāyā”ti katvā yātanā, sā eva kāraṇikehi kātabbaṭṭhena kammanti **kammakāraṇā** yātanākammanti attho.

266. Bahum pāpaṃ katanti bahuso pāpaṃ kataṃ. Tena pāpassa bahulīkaraṇamāha. **Bahūti** vā mahantaṃ. Mahatthopi hi bahusaddo dissati, “bahu vata kataṃ assā”tiādīsu, garukanti vuttaṃ hoti. **Soti** garukaṃ bahulaṃ vā pāpaṃ katvā ṭhito **niraye nibbattatiyeva**, na yamapurisehi yamassa santikaṃ nīyati. **Parittanti** pamāṇaparittatāya kālaparittatāya ca parittaṃ, purimasmim pakkhe agaruntī attho, dutiyasmim abahulanti. Yathāvuttamattham upamāya vibhāvetum, “**yathā hī**”tiādi vuttaṃ. **Kattabbamevāti** daṇḍameva. **Anuvijjivā** vīmaṃsitvā. **Vinichayaṭṭhānanti** aṭṭakaraṇaṭṭhānaṃ. **Parittapāpakammāti** dubbalapāpakammā. Te hi pāpakammassa dubbalabhāvato katūpacitassa ca okāsārahakusalakammassa balavabhāvato attano dhammatāyapi saranti.

Ākāsacetiyaṃ girisikhare vivaṅgaṇe katacetiyaṃ. **Aggijālasaddanti** “paṭapaṭā”ti pavattamānaṃ aggijālāya saddaṃ sutvā, “mayā tadā ākāsacetiye pūjitarattapaṭā viyā”ti **attano pūjitaṭapaṭaṃ anussari. Pañcahipi na saratīti** balavatā pāpakammaṇa byāmahito pañca saññāṇāni na gaṇhāti. **Tuṅhī hoti** kammāraho ayanti tattha paṭikāraṃ aṇassanto.

267. Avīcimahānirayo ubbedhenapi yojanasatamevāti vadanti. **Navanavayojanikā hoti** puthulato. Mahānirayassa mahantattā tathāpi bhittisatāṃ yojanasahassaṃ hotīti ussadassa sabbassa parikkhepato “**dasayojanasahassaṃ hotī**”ti vuttaṃ.

268. **Jhāyatīti** paṭipākatikaṃ hoti. **Tādisamevāti** purimasadisattā “ubbhataṃ sadisameva hotī”ti evaṃ vuttaṃ. **Bahusampattoti** vā bahuṭṭhānaṃ atikkamitvā puratthimadvāraṃ sampatto hoti.

Channaṃ jālānanti catūhi disāhi heṭṭhā upari ca ubbhātānaṃ channaṃ jālānaṃ. Sattānaṃ nirantarātā nirayaṣaṃvattaniyakammakatānaṃca bahubhāvato jālānaṃ tāva sattānaṃca nirantarattā avīci hotu; dukkhassa pana kathaṃ nirantarātāti taṃ dassento, “**kāyadvāre...pe... ekaṃ dukkhasahagata**”ntiādimāha. Tattha āvajjanaṃ sampaṭicchanāṃ santīraṇaṃ voṭṭhabbanāṃ dve tadāraṃmaṇacittānīti **cha upekkhāsahagatāni. Evaṃ santeṭīti** yadipi tattha upekkhāsahagatacittānīpi pavattanti upekkhāvedanāpi laddhāvasarā; dukkhavedanā pana balavataṃ nisitanisitena tikhiṇena satthena nirantaraṃ sarīraṃ chindantī viya dukkhaṃ upanentī viya tā vedanā abhibhavanti ajjhottharanti uppajjantī nirantarā viya hoti. Tenāha “**anudahanabalavatāyā**”tiādi. **Upekkhāvedanāti** vā tattha ativiya anīṭṭhaphalatāya anīṭṭhāraṃmaṇā upekkhāvedanā dukkhāti vuccati, yathā iṭṭhaphalabahutāya iṭṭhāraṃmaṇā jhānādīpariyāpanne ca sugatibhave ca upekkhāvedanā sukhāti vuccati, evaṃ dukkhassa nirantarātāya **avīcīti** veditabbaṃ.

269. **Eko pādo mahāniraye hoti, eko gūthaniraye nipatati**, kammavegukkhitto antarā padamāvahati sesāraṃbhatāya. **Hatthigivappamāṇā** pariṇāhena. **Ekadoṇikanāvāppamāṇā** āyāmena.

Pokkharapattānīti khuradhārāsadisāni tikhiṇaggāni ayosūlamayāneva padumapattāni. **Heṭṭhā khuradhārāti** heṭṭhābhūmiyaṃ nikkhittā, vettalatāyo ca tikhiṇadhārakaṇṭakā ayomayā eva. Tenāha – “**so tattha dukkhā**”tiādi. **Kusatiṇānīti** kusatiṇajātītāya tathā vuttāni. **Kharavālikāti** kharā tikhiṇakoṭikā siṅghāṭakasaṇṭhānā vālikā.

270. **Dante samphusetīti** heṭṭhimadante yathā kiñci mukhe pakkhipituṃ na sakkā, evaṃ suphusite karoti. **Tambalohapānato paṭṭhāyāti** vuttakāraṇato paṭilomatopi evaṃ kammakāraṇānaṃ kāraṇamāha. **Dutiyaṇāti** kuṭṭhārīhi tacchanena. **Tatiyaṇāti** vāsīhi tacchanena. **Avijahitameva** saṃvegahetutāya lokassa mahato atthassa saṃvattanato.

271. **Hīnakāyaṃ** hīnaṃ vā attabhāvaṃ upagatā. **Upādāneti** catubbidhepi upādāne. Taṃ atthato taṇhādīṭṭhiggāhoti āha “**taṇhādīṭṭhigahaṇe**”ti. Sambhavati jarāmaṇaṃ etenāti **sambhavo**, upādānanti āha – “**jātiyā maraṇassa ca kāraṇabhūte**”ti. **Anupādāti** anupādāya. Tenāha “**anupādiyitvā**”ti.

Sabbadukkhātikantā nāmāti sakalampi vaṭṭadukkhāṃ atikkantā eva honti carimacittanīrodhena vaṭṭadukkhalesassaṃpi asambhavato.

Devadūtasuttavaṇṇanāya līnatthappakāsanā samattā.

Niṭṭhitā ca suññatavaggavaṇṇanā.

4. Vibhaṅgavaggo

1. Bhaddekarattasuttavaṇṇanā

272. Ekā ratti ekaratto, bhaddo ekaratto etassāti **bhaddekarattam**, vipassanaṃ paribrūhento puggalo. Tenāha – “**vipassanānuyogasamannāgatattā**”ti. Taṃ uddissa pavattiyā pana bhaddekarattasahacaraṇato bhaddekaratto. Tenāha bhagavā – “bhaddekarattassa vo, bhikkhave, uddesaṅca vibhaṅgaṅca desessāmi”ti. Desetabbamatthaṃ uddisati etenāti **uddeso**, saṅkhepadesanā eva. Yasmā pana niddesapadānaṃ jananiṭṭhāne ṭhitattā mātā viyāti **mātikā**ti vuccati, tasmāha “**uddesanti mātika**”nti. Uddiṭṭhamatthaṃ vibhajati etenāti vibhaṅgo vitthāradesanā, tenāha – “**vitthārabhājaniya**”nti “yathāuddiṭṭhamatthaṃ vitthārato bhājeti vibhajati etenā”ti katvā.

Uppādādikhaṇattayaṃ patvā atikkamaṃ atikkantaṃ **atītam**. Taṃ pana atthato vigataṃ khandhapañcakanti āha “**atīte khandhapañcake**”ti. **Taṇhādīṭṭhīhi nānugaccheyyāti** taṇhādīṭṭhābhinandanāhi nānubhaveyya, nābhinandeyyāti attho. Yathā “nicca”ntiādinā viparītaggāhavasena atītesu rūpādīsu micchābhiniṅgisaṃ parāmāso diṭṭhābhinandanā; evaṃ “nicca”ntiādinā viparītaggāhavasena anāgatesu rūpādīsu micchābhiniṅgisaṃ parāmāso diṭṭhi kammaṃādānaṃ diṭṭhipatthanāti taṃ paṭikkhipanto āha – “**taṇhādīṭṭhīhi na pattheyyā**”ti. **Yadatītanti** ettha **itī**-saddo ādiattho. Tena “apatta”nti padaṃ saṅgaṇhāti. Tampi hi kāraṇavacanaṃ. Tenāha “**yasmā ca**”ti. Tatthāyamadhippāyo, “atītam taṇhādivasena nābhinanditabbaṃ sabbaso avijjamaṇattā sasaviṣāṇaṃ viya, tathā anāgatampi na patthetabba”nti. Tattha siyā – atītam nābhinanditabbaṃ abhinandanāya nippayojanattā, anāgatapatthanā pana saphalāpi siyāti na sabbaso paṭikkhipitabbāti? Na, tassāpi savighātabhāvena paṭikkhipitabbato. Tenāha “**yasmā**”tiādi. Tattha **pahīnanti** nissatṭhasabhāvaṃ. **Niruddhanti** bhaggaṃ. **Atthaṅgatanti** vināsaṃ. **Appattanti** sabhāvaṃ uppādādikam asampattaṃ. **Ajātanti** na jātam. **Anibbattanti** tasseva vevacanaṃ.

Yattha yatthāti yasmim yasmim khaṇe, yasmim yasmim vā dhammapuñje uppannaṃ, taṃ sabbampi asesevā. **Araññādīsu vāti vā**-saddo aniyamattho. Tena araṇṇe vā rukkhamūle vā pabbatakandarādīsu vāti ṭhānaniyamābhāvā anupassanāya sātaccakāritaṃ dasseti. Yamakādivasena paribrūhiyamānā vipassanā viya paṭipakkhehi akopaniyāva hotīti āha – “**asamhīraṃ asamkuppanti idaṃ vipassanāpaṭivipassanādassanattam vutta**”nti. Gāthāyamamayamattho vipassanāvasena yujjatīti āha – “**vipassanā hī**”tiādi. Kiṃ etāya pariṅgāyākatthāyāti nippariṅgāyatova asamhīraṃ asamkuppam dassetuṃ, “**atha vā**”tiādi vuttaṃ. Kathaṃ pana niccassa nibbānassa anubrūhanā hotīti āha “**punappuna**”ntiādi. Etena tadārammaṇadhammā brūhanāya, tesam ārammaṇampi atthato anubrūhitaṃ nāma hoti bahulaṃ manasikārenāti dasseti.

Ādito tāpanaṃ **ātāpanaṃ**, tena ārambhadhātumāha. Parito tāpanaṃ **paritāpanaṃ**, tena nikkamadhātuparakkamadhātuyo cāti. **Tassa senāti** tassa maccuno sahaṅgaṇaṭṭhena senā viyāti senā. **Saṅgaroti**ādiṅgāya mittākāraggaṇaṇena sāmāyogamaṃ. **Lañjaggaṇaṇena** lañjadānaṃ, tena dānappayogaṃ. **Balarāsīti** hatthiassādibalakāyo. Tena daṇḍabhedāni vadati. Bhedopi hi balavato eva ijjhati, svāyaṃ catubbidhopi upāyayogena sampavattiyāti. Tattha tattha ca saṅgaṃ āsattim arati detīti **saṅgaro** pubbhāge vā saṅgaṇavasena tassa paṭijānavasena pavattanato.

Uṭṭhāhakaṃ uṭṭhānavīriyasampannaṃ. Saparahitasīvanalakkhaṇena asādhubhāvaparammukhabhāvagamana vā **santo**.

273. **Manuññarūpavaseneva evaṃrūpo aho**sīnti atītam anvāgameti tattha nandiyāsamanvānayanato. **Vedanādīsupi** eseva nayo. **Kusalasukhasomanassavedanāvasenāti** kusalaavedanāvasena sukhavedanāvasena somanassavedanāvasenāti paccekaṃ vedanāsaddo yojetabbo. Taṇhābhinandanāya sati diṭṭhābhinandanā siddhā evāti – “**taṇhaṃ samanvāneti**”iceva vuttaṃ. **Hīnarūpādī...pe... na maññati** amanuññopi samāno samanūññabhāvasseva vasena maññanāya pavattanato. **Nānupavattayati** vikkhambhanavasena nandiyā dūrīkatattā.

274. Uḷārasundarabhāvamukheneva anāgatesupi rūpādīsu taṇhādīṭṭhikappanā pavattatīti āha – “**evamrūpo...pe... veditabbā**”ti.

275. **Vattabbaṃ siyāti** yathā nandiyā asamanvāyanajotanaṃ byatirekamukhena patiṭṭhapetaṃ, “atītaṃ na nvāgameyyā”ti uddesassa, “kathaṅca, bhikkhave, atītaṃ anvāgameṭī”tiādīnā (ma. ni. 3.273) vibhaṅgo vutto, evaṃ “paccuppannaṅca yo dhamma”ntiādīkassa uddesassa byatirekamukhena vibhaṅge vuccamāne vipassanāpaṭikkhepavasena, “kathaṅca...pe... vattabbaṃ siyā”ti vuttaṃ. Tayidaṃ paramagambhīraṃ sathhudesanāyamaṃ anupadhāretvā coditaṃ, yasmā “paccuppannaṅca yo dhamma”ntiādīkassa uddesassa byatirekamukheneva vipassanāpaṭikkhepavasena, “kathaṅca, bhikkhave, paccuppannesū”ti vibhaṅgadesanā sampavattati. Tenāha “**yasmā panā**”tiādī. Tattha **tassā evāti** vipassanāya eva. **Abhāvaṃ dassetaṃ saṃhīratīti mātikaṃ uddharitvāti** kathetukamyatāya mātikāvasena paduddhāraṃ katvā, “idha, bhikkhave, asutavā sutavā”ti ca ādinā **vitthāro vutto**. **Vipassanāya abhāvato**ti vipassanāya abhāvitatāya avikkhambhitatāya taṇhādīṭṭhīhi sapattehi viya tattha tattha ṭhapanāya ākaḍḍhīyati, tattha tattha visaye tato eva apāyasamuddaṃ saṃsārasamuddaṃ ānīyati. Sukkapakkho vuttavipariyāyena veditabbo. Sesamaṃ suviññeyyameva.

Bhaddekarattasuttavaṇṇanāya līnatthappakāsanā samattā.

2. Ānandabhaddekarattasuttavaṇṇanā

276. Bahiddhā puthuttārammaṇato nivattetvā ekasmiṃyeva ārammaṇe cittassa sammadeva layanaṃ appanaṃ paṭisallānaṃ, yo koci samāpattivihāro, idha pana ariyavihāro adhippetoti āha – “**paṭisallānā vuṭṭhito**”tiādī. **Jānantova** bhagavā **kathāsamuṭṭhāpanatthamaṃ pucchi**. Vuttañhetamaṃ – “jānantāpi tathāgatā pucchanti, jānantāpi na pucchanti”tiādī (pārā. 16).

278. **Sādhukāramadāsīti** sādhusaddamaṃ sāvesi. Tamaṃ pana pasamsā hotīti pasamsattho sādhusaddo. Tenāha “**desanaṃ pasamsanto**”ti. Vijjamānehi vaṇṇehi guṇavante udaggaṭākaraṇamaṃ sampahaṃsanaṃ, kevalamaṃ guṇasaṃkittanavasena thomaṇā pasamsāti ayametesamaṃ viseso.

Ānandabhaddekarattasuttavaṇṇanāya līnatthappakāsanā samattā.

3. Mahākaccānabhaddekarattasuttavaṇṇanā

279. Uṇhabhāvena tapanato tapanamaṃ udakamaṃ etassāti **tapodā**, rahado. Tenāha “**tattodakassa rahadassā**”ti. Saṅkhepena vuttamatthamaṃ vitthārato dassetaṃ, “**vebhārapabbatassā**”tiādī vuttaṃ. **Tato** udakarahadato, tamaṃ rahadamaṃ upanissāyāti attho. Nāgabhanāgatoṇi hi so rahado tato upari manussaloke jalāsāyena sambaddho hoti. Tena vuttaṃ – “**tapodā nāma nadī sandatī**”ti. **Edisāti** kuthitā uṇhā, anvatthanāmasāyena tapodāti ca vuccatīti attho. **Petalokoti** petānāmasāyena vasanaṭṭhānāmasāyena paccakanirayamaṃ sandhāyāha. **Imassa pana āramassāti** tapodārāmassa. **Tatoti** tapodāsāṅkhātanadito. **Mahāudakarahadoti** mahāudakabharitamaṃ pallalamaṃ.

280. **Samiddhoti** uḷāro, paripuṇṇoyevāti attho. Ādimhi brahmacariyamassāti ādibrahmacariyo, so eva **ādibrahmacariyako**. Tenāha “**pubbabhāgappaṭipattibhūto**”ti. “Atītaṃ anāgataṃ paccuppanna”nti addhabhedamukhena saṅkhatadhammabodhavanamaṃ.

282. Kāmaṃ khandhādivasena vibhajanaṃ sādharāṇamaṃ, paṭhamadutiyacatutthasuttesu pana khandhavasena vibhajanaṃ katvā idha tathā akatvā evaṃ desanāya ṭhapanamaṃ tato aññathā āyatanavasena vibhajanaṭṭhamaṃ. Evaṃ vibhinnā hi saṅkhepavitthārato anavasesā sammāsanupagā dhammā vibhajitvā dassitā honti; ayaṃ kirettha bhagavato ajjhāsāyo therena nayato gahitoti dassetaṃ, “**imasmim kirā**”tiādī vuttaṃ. Tattha **dvādasāyatanavaseneva mātikaṃ ṭhapesīti** lokiyāni dvādasāyatanāni eva sandhāya mātikaṃ ṭhapesi, yathā tīsu suttesu khandhavasena vibhattamaṃ, evaṃ yadi

bhagavatā idhāpi vibhajanaṃ icchitaṃ siyā, tathā vibhajeyya, yasmā pana tathā avibhajitvāva gandhakuṭiṃ pavitṭho, tasmā dvādasāyatanavasenevettha vibhajanaṃ bhagavatā ca adhippetanti nayaggāhe ṭhatvā therō vibhaji. Tenāha – “**nayaṃ paṭilabhitvā evamāhā**”ti. **Bhāriyaṃ katanti** dukkaraṃ kataṃ. **Apade padaṃ dassitaṃ** ākāse padaṃ kataṃ sādharmaṇassa atthassa viṣiṭṭhavisayatāya dassitattā. **Nikantiviññānanti** nikantitaṇhāya sampayuttaṃ viññānaṃ, “chandarāgappaṭibaddhaṃ hotī”ti vacanato. **Manoti bhavaṅgacittaṃ** manodvārikajavanānaṃ dvārabhūtaṃ.

283. Patthanāvasena ṭhapesīti patthanāvasena cittaṃ pavattesi.

Mahākaccānabhaddekarattasuttavaṇṇanāya līnatthappakāsānā

Samattā.

4. Lomasakakaṅgiyabhaddekarattasuttavaṇṇanā

286. Ghananicitalomo lomaso, ayaṃ pana appatāya **lomasakoti** āha – “**īsakalomasākāratāyā**”ti, lomasako aṅgiko **lomasakakaṅgiyo**, paṭhama ka-kāro appattho, dutiyaṃ pana padavaḍḍhanameva. **Rattakambalasilāyanti** rattakambalavaṇṇasilāyaṃ. **Oruyhāti** ākāso otaritvā. Pāṭihāriyaṃ disvā dinnalābhasakkārassa asādiyanato **manussapathe na vasanti**.

Dasahi cakkavālasahassehīti nissakkavacanato āgantvāti adhippāyo. **Sannipatitāhi devatāhīti** karaṇavacanāṃ. Paññāpayogamandatāya **paṭivijjhituṃ asakkontānaṃ devānaṃ** ñāṇassa tikkhavisadabhāvāpādanena samuttejetuṃ **saṃvegajananatthaṃ...pe... abhāsi**. **Tatrāti** tasmim devasannipāte, tissaṃ vā desanāyaṃ. **Devattassāti** devabhāvassa, dibbasampattiyāti attho. Bhaddekarattassa suttassa etāti **bhaddekarattiyā**.

Savanamukhena byañjanaso atthaso ca upadhāraṇaṃ uggaṇhananti āha – “**tuṅhībhūto nisīditvā suṇanto uggaṇhāti nāmā**”ti. Vācuggatakarāṇaṃ pariyāpuṇananti āha – “**vācāya sajjhāyaṃ karonto pariyāpuṇāti nāmā**”ti. Ganthassa parihaṇaṃ dhāraṇaṃ, taṃ pana paresu paṭiṭṭhāpanaṃ pākātaṃ hotīti āha – “**aññesaṃ vācento dhāreti nāmā**”ti. Sesāṃ heṭṭhā vuttanayameva.

Lomasakakaṅgiyabhaddekarattasuttavaṇṇanāya līnatthappakāsānā

Samattā.

5. Cūlakammavibhaṅgasuttavaṇṇanā

289. Aṅgasubhatāyāti aṅgānaṃ hatthapādādisarīrāvayavānaṃ sundarabhāvena. Yaṃ apaccaṃ kucchitaṃ muddhaṃ vā, tattha loke māṇavavohāro, yebhuyyena sattā daharakāle suddhadhātukā hontīti vuttaṃ, “**taruṇakāle voharimsū**”ti. **Adhipatittāti** issarabhāvato.

Samāhāranti sannicayaṃ. **Paṇḍito gharamāvaseti** yasmā appatarepi byayamāne bhogā khīyanti, appatarepi sañcayamāne vaḍḍhanti, tasmā viññujātiko kiñci byayaṃ akatvā ayameva uppādentō gharāvāsaṃ anutiṭṭheyāti lobhādesitamattaṃ vadati.

Dhanalobhena...pe... nibbato. Lobhavasikassa hi gati nirayo vā tiracchānayoni vā. Vuttañhettaṃ – “nimittassādagathitaṃ vā, bhikkhave, viññānaṃ tiṭṭhamānaṃ tiṭṭhati anubyañjanassādagathitaṃ vā. Tasmim samaye kālaṅkareyya, dvinnaṃ gatīnaṃ aññataraṃ gatiṃ vadāmi – nirayaṃ vā tiracchānayoniṃ vā”ti (saṃ. ni. 4.235). **Niraye nibbattissati** katokāsassa kammassa paṭibāhituṃ asakkuṇeyyabhāvato.

Pattakkhandhaadhommukhabhāvaṃ sandhāya “**onāmetvā**”ti vuttaṃ. Brāhmaṇacārittassa bhāvitataṃ sandhāyāha “**brahmaloke nibbatto**”ti. **Taṃ pavattiṃ pucchīti** sutametaṃ mayā, “mayhaṃ pitā sunakho hutvā nibbatto”ti, etaṃ bhotā gotamena vuttanti. Kimidaṃ vuttanti imaṃ pavattiṃ pucchi.

Tatheva vatvāti yathā sunakhassa vuttaṃ, tatheva vatvā. **Avisaṃvādanatthanti**, “todeyyabrāhmaṇo sunakho jāto”ti attano vacanassa avisaṃvādanattham, visaṃvādanābhāvadassanatthanti adhippāyo. **Ñātomhi imināti** iminā mama puttena mayhaṃ purimajātiyaṃ pitāti evaṃ ñāto amhīti jānitvā. Buddhānubhāvena kira sunakho tathā dasseti, na jātissaratāya. Bhagavantaṃ disvā bhukkaraṇaṃ pana purimajātisiddhavāsanāya. **Bhavapaṭicchannanti** bhavantarabhāvena paṭicchannaṃ. **Nāma-saddo sambhāvane. Paṭisandhiantaranti** aññajātipaṭisandhiggahaṇena heṭṭhimajātaṃ gatiṃ. **Aṅgavijjāpāṭhako kiresa**, tena appāyukadīghāyukatādivasena cuddasa pañhe abhisāṅkhari; evaṃ kirassa ahosi, “imesaṃ sattānaṃ appāyukatādayo visesā aṅgapaccaṅgavasena sallakkhiyanti. Na kho panetaṃ yuttaṃ ‘aṅgapaccaṅgāni yāva tesam tesam kāraṇa’nti; tasmā bhavitabbamettha aññeneva kāraṇena. Samaṇo gotamo taṃ kāraṇaṃ vibhajitvā kathessati, evāyaṃ sabbaññūti nicchayo me apanṇako bhavissati”ti. Apare pana bhaṇanti, “tiracchānagataṃ manussaṃ vā āvisitvā icchitatthakasāvanaṃ nāma mahāmantavijjāvasena hoti; tasmā na ettāvata samaṇassa gotamassa sabbaññūtā sunicchitā hoti. Yaṃ nūnāhaṃ kammaphalamassa uddissa pañhaṃ puccheyaṃ, tattha ca me cittaṃ ārādhento pañhaṃ byākarissati. Evāyaṃ sabbaññūti vinicchayo me bhavissatīti te pañhe pucchati”ti.

Bhaṇḍakanti sāpateyyaṃ, santakanti attho. Kammunā dātappaṃ ādiyaṃtīti **kammadāyādā**, attanā katūpacitakammaphalabhāgīti attho. Taṃ pana kammadāyajjaṃ kāraṇopacārena vadanto, “**kammaṃ etesaṃ dāyajjaṃ bhaṇḍakanti attho**”ti āha – yathā “kusalānaṃ, bhikkhave, dhammānaṃ samādānāhetu evamidaṃ puññaṃ pavaḍḍhati”ti (dī. ni. 3.80). Yavati phalaṃ sabhāvato bhinnampi abhinnaṃ viya missitaṃ hoti, etenāti **yonīti** āha – “**kammaṃ etesaṃ yoni kāraṇa**”nti. Mamattavasena bajjhati saṃbajjhatīti **bandhu**, ñāti sālohito ca. Kammaṃ pana ekantasambandhamevāti āha – “**kammaṃ etesaṃ bandhū**”ti. **Paṭiṭṭhāti** avassayo. Kammāsaddo hi sattānaṃ avassayo natthi, añño koci issaro brahmā vā na karoti tādisaṃ kattaṃ sajjitūṃ asamatthabhāvato. Yaṃ panettha vattappaṃ, taṃ **visuddhimaggasaṃvaṇṇanāyaṃ** vuttanayena veditappaṃ. **Kammamevāti** kasmā avadhāritaṃ, nanu kilesāpi sattānaṃ hīnapanītabhāvakāraṇaṃ, na kevalanti? Saccametaṃ, kilesapayogena vipākavaṭṭaṃ nibbattaṃ kammavattitamevāti katvā vuttaṃ. “**Kathitassa atthaṃ na sañjānāsī**”ti saṅkhepato vatvā nanu bhagavā mahākāruṇiko paresaṃ ñāpanatthameva dhammaṃ desetīti āha – “**mānanissito kiresā**”tiādi.

290. Samattenāti pariyattena, yathā taṃ phalaṃ dātuṃ samatthaṃ hoti, evaṃ katena, upacitenāti attho. Tādisaṃ pana attano kicca anūnaṃ nāma hotīti āha “**paripuṇṇenā**”ti. **Samādinnenāti** ettha samādānaṃ nāma taṇhādīṭṭhīhi gahaṇaṃ parāmasananti āha – “**gahitena parāmaṭṭhenā**”ti. Paṭipajjati etāya sugatiduggatīti **paṭipadā**, kammaṃ. Tathā hi taṃ “kammappaṭho”ti vuccati.

Esāti paṭipadā. Dubbalaṃ upaghātakameva siyāti upapīlakassa visayaṃ dassetaṃ, “**balavakammenā**”tiādi vuttaṃ. **Balavakammenāti** puññaṃkamma. **Vadati nāmāti** vadanto viya hoti. **Nibbattāpeyyanti** kasmā vuttaṃ, nanu upapīlakasabhāvaṃ kammaṃ janakasabhāvaṃ na hotīti? Sabbametaṃ parikkappanavacanaṃ, yathā manussā paccatthikaṃ paṭipakkhaṃ kiñci kātuṃ asamatthāpi keci ālambanavasena samatthā viya attānaṃ dassenti, evaṃsampaḍamidanti keci. Apare pana bhaṇanti – yassidaṃ kammavipākaṃ piḷeti, sace tasmīṃ anokāse eva sayaṃ vipaccitūṃ okāsaṃ labheyya, apāyesu eva taṃsamaṅgipuggalaṃ nibbattāpeyya, yasmā taṃ kammaṃ balavaṃ hutvā avasesapaccayasamavāyena vipaccitūṃ āradhamaṃ, tasmā itaraṃ tassa vipākaṃ vibādhettaṃ upapīlakaṃ nāma jātaṃ. Etadatthameva cettha “balavakammena nibbatta”nti balavaggahaṇaṃ kataṃ. Kiccavasena hi nesaṃ kammānaṃ etā samaññā, yadidaṃ upapīlakaṃ upacchedakaṃ janakaṃ upatthambhakanti, na kusalaṃ viya upatthambhāni honti nibbattatthāya. **Piḷetvāti** vihetṭetvā paṭighāṭanādivasena

ucchutelayantādayo viya ucchutilādi ke vibādhetvā. **Nirojanti** nittejaṃ. **Niyūsanti** niraṣaṃ. **Kasaṭanti** nissāraṃ. **Parissayanti** upaddavaṃ.

Idāni parissayassa upanayanākāraṃ dassentena tathā, “**dāraḥassā**”tiādiṃ vatvā bhogānaṃ vināsanākāraṃ dassetuṃ, puna “**dāraḥassā**”tiādi vuttaṃ. **Kumbhadohanāti** kumbhapūrakhīrā. **Gomaṇḍaleti** goyūthe.

Aṭṭhusabhagamaṇaṃ katvāti aṭṭhausabhappamānaṃ padesaṃ paccatthikaṃ uddissa dhanuggaho anuyāyiṃ katvā. **Tanti** saraṃ. **Aññoti** paccatthiko. **Tattheva pāteyya** accāsannaṃ katvā sarassa khittattā. **Vālamacchodakanti** makarādivālamacchavantaṃ udakaṃ.

Paṭisandhinibbattaṃ kammaṃ janakakammaṃ nāma paripuṇṇavipākādāyibhāvato, na pavattivipākamattanibbattaṃ. **Bhogasampadādīti ādi**-saddena ārogyasampadādi-parivārasampadādīni gaṇhāti. Na dīghāyukatādīni hi appāyukatāsaṃvattanikena kammunā nibbattāni; aññaṃ dīghāyukatākaraṇena upatthambhetuṃ sakkoti; na atidubbaṇṇaṃ appesakkaṃ nīcakulīnaṃ duppaññaṃ vā vaṇṇavantaṭādivasena. Tathā hi vakkhati, “imasmiṃ pana pañhavissajjane”tiādi, taṃ pana nidassanavasena vuttanti daṭṭhabbaṃ.

Purimānīti upapīlakopacchedakāni. Upapīlakupaghātā nāma kusalavipākapaṭibhāhātī adhippāyena “**dve akusalānevā**”ti vuttaṃ. **Upatthambhakaṃ kusalamevāti** ettha yathā janakaṃ ubhayaṣabhāvaṃ, evaṃ itaresampi ubhayaṣabhāvātāya vuccamānāya na koci virodho. Devadattādīnañhi nāgādīnaṃ ito anuppavacchitānaṃ petādīnañca narakādīsu akusalakammavipākassa upatthambhanupapīlanupaghātānāni na na sambhavanti. Evañca katvā yā heṭṭhā bahūsu ānantariyesu ekena gahitapaṭisandhikassa itaresaṃ tassa anubalappadāyitā vuttā, sāpi samatthitā hoti. Yasmiñhi kamme kate janakanibbattaṃ kusalaphalaṃ vā akusalaphalaṃ vā byādhihātusamatādinimittaṃ vibādhiyati, tamupatthambhakaṃ. Yasmiṃ pana kate jātisamatthassa paṭisandhiyaṃ pavattiyāñca vipākakaṭattārūpanaṃ uppatti hoti, taṃ janakaṃ. Yasmiṃ pana kate aññaṃ janitassa iṭṭhassa vā aniṭṭhassa vā phalassa vibādhihātusamatādinimittāya upabrūhanapaccayuppattiyā ca janakasāmatthiyānurūpaṃ parivutticiratarapabandhā hoti, etaṃ upatthambhakaṃ. Tathā yasmiṃ kate janakanibbattaṃ kusalaphalaṃ akusalaphalaṃ vā byādhihātusamatādinimittaṃ vibādhiyati, taṃ upapīlakaṃ. Yasmiṃ pana kate janakasāmatthiyavasena ciratarapabandhārahampi samānaṃ phalaṃ vicchedakapaccayuppattiyā vicchijjati, taṃ upaghātakanti ayamettha sāro.

Tatthāti tesu kammesu. **Upacchedakakammenāti** āyuno upaghātakakammena. Svāyamupaghātakabhāvo dvidhā icchitabboti taṃ dassetuṃ “**pāṇātipātīnā**”tiādi vuttaṃ. **Na sakkoti** pāṇātipātakammunā santānassa tathābhisaṅkhatattā. Yasmiñhi santāne nibbattaṃ, tassa tena abhisaṅkhatatā avassaṃ icchitabbā tattheva tassa vipākassa vinibandhanaṭo. Etena kusalassa kammassa āyūhanakkaṇeyeva pāṇātipāto tādisaṃ sāmattihiyupaghātaṃ karotīti dasseti, tato kammaṃ appaphalaṃ hoti. “Dīghāyukā”tiādīnā upaghātasāmatthiyena khette uppannasassaṃ viya upapattiniyāmakaṃ dhammāti dasseti. Upapatti niyatavisese vipaccituṃ okāse karonte eva kusalakamme ākaḍḍhiyamānapaṭisandhikaṃ pāṇātipātakammaṃ appāyukatthāya niyametīti āha – “**paṭisandhimeva vā niyāmetvā appāyukaṃ karotī**”ti. Pāṇātipātacetanāya accantakaṭukavipākattā sanniṭṭhānacetanāya niraye nibbattati tassā atthassa khīṇābhāvato; itare pana na tathā bhāriyāti āha – “**pubbā...pe... hotī**”ti. Idha pana yaṃ heṭṭhā vuttasadiṣaṃ, taṃ vuttanayena veditabbaṃ.

Manussāmanussaparissayāti mānusakā amānusakā ca upaddavā. **Puratoti** pubbadvārato. **Pacchatoti** pacchimavatthuto. **Pavaṭṭamānāti** pariṇānaṃ, devatānaṃ vā desena pavaṭṭamānā. **Parehīti** purātanehi parehi. **Sammukhībhāvanti** sāmibhāvavasena paccakkhattaṃ. **Āharitvā denti** iṇāyikā. **Kammantāti** vaṇijjādīkammāni. **Apāṇātipātakammanti** pāṇātipātassa paṭipakkhabhūtaṃ kammaṃ; pāṇātipātā virativasena pavattitakammanti attho. **Dīghāyukasamvattanikaṃ hoti** vipākassa kammasarikkhabhāvato. **Iminā nayanāti** iminā appāyukadīghāyukasamvattanikesu kammesu

yathāvuttena taṃ saṃvattanikavibhāvananayena.

Viheṭhanakammādīnīpīti pi-saddena kodhaissāmanakamaccherathaddhaaviddasubhāvavasena pavattitakammāni saṅgaṇhāti. **Tathevāti** yathā paṇātipātakammaṃ atthato evaṃ vadati nāmāti vuttaṃ, tatheva **vadamānāni viya**. “Yaṃ yadevātipatthenti, sabbametenā labbhatī”ti (khu. pā. 8.10) vacanato yathā sabbakusalāṃ sabbāsaṃ sampattīnaṃ upanissayo, evaṃ sabbāṃ akusalaṃ sabbāsaṃ vipattīnaṃ upanissayoti, “**upapīlanena nibbhogataṃ āpādetvā**”tiādi vuttaṃ. Tathā hi paṇātipātakammavasenapi ayaṃ nayo dassito. **Aviheṭhanādīnīti** ettha **ādi-**saddena akkodhana-anissāmana-dāna-anatimāna-viddasubhāvena pavattakammāni saṅgaṇhāti.

293. Issā mano etassāti **issāmanakoti** āha “**issāsampayuttacitto**”ti. **Upakkosantoti** akkosavattūhi akkosanto. **Issaṃ bandhatīti** issaṃ anubandhati issāsahitameva cittaṃ anupavatteti. **Appesakkhoti** appānubhāvo appaṇṇāto. Tenāha “**na paṇṇāyati**”ti. Sā panassa appānubhāvataṃ parivārābhāvena pākaṭā hotīti āha “**appaparivāro**”ti.

294. Macchariyavasena na dātā hotīti sabbaso deyyadhammassa abhāvena na dātā na hoti. Amaccharī hi puggalo sati deyyadhamme yathārahaṃ detiyeva.

295. Abhivādetabbāṃ khetavasena matthakappattaṃ dassetuṃ, “**buddhaṃ vā**”tiādi vuttaṃ. Aññepi mātipuṇṇaṃ khetāraṃ abhivādanādiarahā santi, tesu thaddhādivasena karaṇaṃ nīcakulasāṃvattanikameva. Na hi pavatte sakkā kātunti sambandho. Tena pavattivipākādāyino kammaṃ visayo esoti dasseti. Tenāha “**paṭisandhimeva panā**”tiādi.

296. Aparipucchanenāti aparipucchāmattena niraye na nibbattati; aparipucchāhetu pana kattabbākaraṇādīhi siyā nirayanibbattīti pāliyaṃ, “na paripucchitā hotī”tiādi vuttanti dassento, “**aparipucchako panā**”tiādimāha. **Yathānusandhiṃ pāpesīti** desanaṃ yathānusandhiniṭṭhānaṃ pāpesi. Sesāṃ vuttanayattā suviññeyyameva.

Cūḷakammavibhaṅgasuttavaṇṇanāya līnatthappakāsanā samattā.

6. Mahākammavibhaṅgasuttavaṇṇanā

298. Kammaṃ moghabhāvo nāma phalena tucchatā phalābhāvoti āha – “**moghanti tucchaṃ aphala**”nti. **Tathaṃ bhūtaṃ** saccasaddassa atthamāha. Paribbājako pana “sacca”nti iminā tameva saphalanti vadati. Saphalañhi kammaṃ satthu abhimatamanokammanti adhippāyo. **Idaṅca** “moghaṃ kāyakamma”ntiādivacanāṃ. **Taṃ gahetvāti** paramparāya gahetvā. **Esāti** potaliputto paribbājako. **Abhisāññānirodhakathaṃ sandhāya vadati**. Sāpi hi tīthiyānaṃ antare pākaṭā jātati. **Theroti** samiddhitthero. Yathā bhagavatā vuttaṃ, tato ca aññathāva dosāropanabhayena gahetvā tato bhagavantaṃ thero rakkhatīti adhippāyena paribbājako, “parirakkhitabbaṃ maññissatī”ti avocāti āha – “**parirakkhitabbanti garahato mocanena rakkhitabba**”nti. Sañcetanā assa atthīti **sañcetanikaṃ**. **Kammanti** sañcetanikassapi kammaṃ attano samaye icchitattā paribbājakena vuttaṃ.

Saṅkhatasaṅkhāratāya rūpameva “**tilamattampi saṅkhāra**”nti vuttaṃ. Tenāha – “**maṃsacakkhunāva passati**”ti. **Samāgamadassanaṃ sandhāyāti** katthacipi tassa dassanaṃ sandhāya, na pariññādasanaṃ. Tenāha bhagavā – “kuto panevarūpaṃ kathāsallāpa”nti.

299. Vaṭṭadukkhanti saṃsāradukkhāṃ. **Kilesadukkhanti** kilesasambhavarāgāpariḷāhadukkhāṃ. **Saṅkhāradukkhanti** yadaniccaṃ, taṃ dukkhanti evaṃ vuttadukkhāṃ. **Sace bhāsitaṃ bhaveyyāti** imaṃ īdisaṃ dukkhāṃ sandhāya āyasmataṃ samiddhinā bhāsitaṃ siyā nu bhagavā, avibhajitvā byākaraṇaṃ yuttamevāti adhippāyo.

300. Ummaṅganti ummujjanam, kathāmuḷhena antarā aññānavisayapañhā ummaṅgam. Tenāha – “**pañhāummaṅga**”nti **neva dibbacakkhunā**ti kasmā vuttam. Na hi tam ayoniso ummujjanam dibbacakkhuvisayanti? Kāmañcetaṃ na dibbacakkhuvisayam, dibbacakkhuparibhaṇḍaññāvisayam pana siyāti tathā vuttam. **Adhippāyenevā**ti udāyittherassa adhippāyeneva gayhamānena tam ayoniyo ummujjanam aññāsi. **Sannisīditum** pubbe nisinnākārena sannisīditum **na sakkoti**. Samiddhittherena anabhisankhatasseva atthassa kathitattā, “**yam abhūtam, tadeva kathessati**”ti vuttam. Tenāha “ayoniso ummujjissati”ti. **Tisso vedanā pucchitā**, “kiṃ so vediyati”ti avibhāgena vediyamānassa jātitattā. Sukhāya vedanāya hitanti **sukhavedaniyam**. Tenāha – “**sukhavedanāya paccayabhūta**”nti. **Sesesūti**, “dukkhavedaniya”ntiādīsu.

Heṭṭhā tikajjhānacetanāti ettha, “kusalato”ti adhikārato rūpāvacarakusalato heṭṭhā tikajjhānacetanāti attho. **Etthāti** etesu kāmāvacararūpāvacarasukhavedaniyakammesu. **Adukkhamasukhampī**ti **pi-saddena iṭṭhārammaṇe** sukhampīti imamatham sampiṇḍeti.

Yadi kāyadvāre pavattato aññattha adukkhamasukham janeti, atha kasmā, “dukkhasseva jananto”ti vuttanti āha – “**sā pana vedanā**”tiādi.

Catutthajjhānacetanāti ettha arūpāvacarakusalacetanātipi vattabbaṃ. Yathā hi “kāyena vācāya manasā”ti ettha yathālābhaggahaṇavasena manasā sukhavedaniyam adukkhamasukhavedaniyanti ayamatto arūpāvacarakusalepi labbhatīti sukhampi janeti ukkaṭṭhassa ñāṇasampayuttakusalassa soḷasavipākacittanibbattanato, ayañca nayo heṭṭhā, “adukkhamasukhampī”ti etthāpi vattabbo. Pubbe pariyāyato dukkhavedanā vuttā, suttantasamvaṇṇanā hesāti idāni nippariyāyato puna dassetuṃ, “**apicā**”tiādi vuttam. Tena ettha dukkhavedaniyam pavattivaseneva vaṭṭatīti. **Etassāti** dukkhavedaniyassa pavattivaseneva yujjamānattā etassa vasena sabbaṃ sukhavedaniyam adukkhamasukhavedaniyañca pavattivaseneva vattum vaṭṭati.

Ālayoti abhiruci. **Mahākammavibhaṅgaññānti** mahati kammavibhajane ñāṇam, mahantaṃ vā kammavibhajanaññāṇam. Bhājanam nāma niddeso, ayam pana uddesoti katvā āha – “**katame cattāro... pe... mātikāṭṭhapanā**”nti.

301. Pāṭiyekko anusandhi yathāuddiṭṭhassa mahākammavibhaṅgaññāṇassa abhājanabhāvato, pucchānusandhiājḥāsāyānusandhīsu ca anantogadhattā. Tenāha “**idaṃ hi**”tiādi. **Idaṃ ārammaṇam katvā**ti idha, “pāṇātipātiṃ adinnādāyi”ntiādinā puggalādhīṭṭhānena vuttam kammavibhaṅgam ārabba. **Imaṃ paccayam labhivā**ti tasseva vevacanam. **Idaṃ dassanam gaṇhantī**ti idaṃ, “atthi kira, bho, pāpakāni kammāni, natthi kira, bho, pāpakāni kammāni”ti ca ādīni hatthidassakaandhāviya diṭṭhamatte eva ṭhatvā acittakadassanañca gaṇhanti. Vīriyam kilesānam ātāpanavasena **ātappam**, tadeva padahavasena **padhānam**, punappunam yuñjanavasena **anuyogo**, tathā bhāvanāya nappamajjati etenāti **appamādo**, sammā yoniso manasi karoti etenāti **sammāmanasikāro**ti vuccatīti adhippāyena, “**pañcapi vīriyasseva nāmāni**”ti āha. **Appamādo** vā satiyā avippavāso. Yasmiṃ manasikāre sati tassa dibbacakkhuññāṇam ijḥati, ayamettha sammāmanasikāroti ettha attho daṭṭhabbo. **Cetosamādhinti** dibbacakkhuññāṇasahagataṃ cittasamādhim. Tenāha “**dibbacakkhusamādhi**”nti. **Aññathāti** akusalakammakaraṇato aññathā, tam pana kusalakammakaraṇam hotīti āha – “**ye dassanam kusalanam kammaṭṭhānam pūritattā**”ti **diṭṭhithāmenāti** diṭṭhivasena diṭṭhibalena. **Diṭṭhiparāmāsenāti** diṭṭhivasena dhammasabhāvam atikkamitvā parāmāsenā. **Adhiṭṭhahitvāti**, “idameva saccam, moghamañña”nti adhiṭṭhāya abhinivisitvā. **Ādiyitvāti** daḷhaggāham gahetvā. **Voharatīti** attano gahitaggahaṇam paresam dīpento voharati.

302. Tatrānandāti ettha **iti-saddo** ādiattho. **Idampīti** idaṃ vacanam. “Tatrānandā”ti evamādivacanampīti attho. **Na mahākammavibhaṅgaññāṇassa bhājanam** tassa aniddesabhāvato. **Assāti** mahākammavibhaṅgaññāṇassa **mātikāṭṭhapanameva** dibbacakkhukānam samaṇabrāhmaṇānam vasena anuññātabbassa ca dassanavasena uddesabhāvato. Tenāha “**ettha panā**”tiādi. Tattha **ettha**

panāti “tatrānandā”tiādipāthe. **Etesaṃ dibbacakkhukānanti** etesaṃ heṭṭhā catūsupi vāresu āgatānaṃ dibbacakkhukānaṃ. **Ettakāti** ekacciyaṃ saccagira. **Anuññātāti** anujānitā. **Ananuññātāti** paṭikkhepitā. Idha ananuññātamukhena dīpitaṃ ananuññātabhāvamattaṃ. **Tatrānandāti**ādike **tatrāti** niddhāraṇe bhummanti dassento, “**tesu catūsu samaṇabrāhmaṇesu**”ti āha. **Idaṃ vacanaṃ** “atthi kira, bho...pe... vipāko”ti idaṃ evaṃ vuttaṃ. **Assāti** tathāvādino samaṇabrāhmaṇassa. **Aññenākārenāti** “yo kira, bho”tiādinā vuttakāraṇato aññena kāraṇena. **Dvīsu ṭhānesūti** “atthi kira, bho...pe... vipāko”ti ca, “apāyaṃ...pe... nirayaṃ upapanna”nti ca imesu dvīsu pāṭhapadesesu. **Anuññātā** tadatthassa atthibhāvato. **Tīsu ṭhānesūti** “yo kira, bho...pe... nirayaṃ upapajjati”, “yampi so...pe... te sañjānanti”, “yampi so yadeva...pe... moghamañña”nti imesu tīsu pāṭhapadesesu. **Ananuññātā** tadatthassānekantikattā micchābhinivesato ca. Tenāha bhagavā – “aññathā hi, ānanda, tathāgatassa mahākammavibhaṅgañāṇa”nti. Yathā te appahīnavipallāsā padesaññāṇasamaṇabrāhmaṇā kammavibhaṅgaṃ sañjānanti, tato aññathāva sabbaso pahīnavipallāsassa tathā āgamanādiatthena tathāgatassa sammāsambuddhassa mahākammavibhaṅgañāṇaṃ hotīti attho.

303. Iminā dibbacakkhukena yaṃ kammaṃ karonto diṭṭho, tato pubbeti yojanā. **Tatoti** tato kariyamānakammato pubbe. **Khandoti** kumāro. **Sivoti** issaro. **Pitāmahoti** brahmā. **Issarādīhīti** issarabrahmapajjāpatiādīhi. **Visatṭhoti** nimmito. **Micchādassanenāti** micchādassanavasena. **Yanti** yaṃ kammaṃ. **Tatthāti** tesu pāṇātipātādivasena pavattakammesu. **Diṭṭheva dhammeti** tasmīmyeva attabhāve vipākaṃ paṭisaṃvedetīti yojanā. **Upapajjivāti** dutiyabhāve nibbattitvā. **Aparasmim pariyaeyeti** aññasmim yattha katthaci bhāve.

Ekam kammarāsinti pāṇātipātādibhedena ekam kammamudāyaṃ. **Ekam vipākarāsinti** tasseva aṅgena ekam vipākasamudāyaṃ. **Imināti** yathāvuttena dibbacakkhukena samaṇena brāhmaṇena vā adīṭṭhā. **Tayoti** “pubbe vāssa taṃ kataṃ hotī”tiādinā vuttā tayo. **Dve vipākarāsīti** diṭṭhadhammavedaniyo aparāpariyāyavedaniyoti dve vipākarāsī. Upapajjavedaniyaṃ pana tena diṭṭhaṃ, tasmā “dve”ti vuttaṃ. Diṭṭho eko, adīṭṭhā tayoti **diṭṭhe ca adīṭṭhe ca cattāro kammarāsī**, tathā diṭṭho eko, adīṭṭhā dveti **tayo vipākarāsī. Imāni satta ṭhānānti** yathāvuttāni satta ñāṇassa pavattanaṭṭhānāni. “Imassa nāma kammassa idaṃ phalaṃ nibbatta”nti kammassa, phalassa vā adīṭṭhattā, “**dutiyavāre dibbacakkhukena kiñci na diṭṭha**”nti vuttaṃ. Paṭhamam vuttanayena tayo kammarāsī veditabbā, idha dibbacakkhukena diṭṭhassa abhāvato, “**paccattaṭṭhānāni**”ti vuttaṃ.

Bhavati vaḍḍhati etenāti bhāvaṃ, vaḍḍhinimittaṃ. Na bhāvaṃ **abhabbanti** āha “**bhūtavirahita**”nti. Attano phale bhāsaṃ dibbaṃ **ābhāsananti** āha – “**ābhāsati abhibhavati paṭibāhati**”ti. **Balavakammanti** mahāsāvajjaṃ kammaṃ garusamāsevitādibhedam. **Āsanneti** maraṇe, abhinṇaṃ upaṭṭhānena vā tassa maraṇacittassa **āsanne. Balavakammanti** garusamāsevitātādivasena balavaṃ kusalakammaṃ. **Dubbalakammassāti** attano dubbalassa. **Āsanne kusalaṃ katanti** idhāpi āsannatā pubbe vuttanayeneva veditabbā.

Upaṭṭhānākārenāti maraṇassa āsannakāle kammassa upaṭṭhānākārena. **Tassāti** tassa puggalassa. Nibbattikāraṇabhūtaṃ hutvā upaṭṭhāti akusalanti yojanā. Titthiyā kammantaravipākantaresu akusalatāya yaṃ kiñci kammaṃ yassa kassaci vipākassa kāraṇaṃ katvā gaṇhanti hatthidassakaandhādayo viya diṭṭhamattābhinivesinoti, “**aññatitthiyā...pe... upaṭṭhāti**”ti vuttaṃ. **Itarasminti** bhāvañceva bhāvañceva, bhāvaṃ abhabbābhāsanti imasmim dvaye. **Eseva nayo** paṭhamadutiyapuggalavasena purimānaṃ dvinnam kammānaṃ yojanāyayo vutto upaṭṭhānākārasena. Ayameva tatiyacatutthapuggalavasena pacchimānaṃ dvinnam kammānaṃ yojanāyayo. Tatiyassa hi kammassa kusalattā tassa ca sagge nibbattattā tatha kāraṇabhūtaṃ kusalaṃ hutvā upaṭṭhāti; tathā catutthassapi kammassa kusalattā, tassa pana niraye nibbattattā tatha nibbattikāraṇabhūtaṃ aññatitthiyānaṃ akusalaṃ hutvā upaṭṭhātīti. Yaṃ panettha atthato avibhattam, taṃ suviññeyyameva.

Mahākammavibhaṅgasuttavaṇṇanāya līnatthappakāsanā samattā.

7. Saḷāyatanavibhaṅgasuttavaṅṅaṇā

304. Veditabbānīti ettha yathā viditāni cha ajjhattikāni āyatanāni vaṭṭadukkhasamatikkamāya honti, tathā vedanaṃ adhippetanti āha – “**sahavipassanena maggena jānitabbānī**”ti. Tattha vipassanāya ārammaṇato maggena asammohato jānanaṃ daṭṭhabbaṃ. Sesapadesupi eseva nayo. Mano savisesaṃ upavicarati ārammaṇe pavattati etehīti **manopavicārā**, vitakkavicārā. Ārammaṇe hi abhiniropanānumajjanehi vitakkavicārehi saha cittaṃ pavattati, na tabbiraḥitaṃ. Tenāha “**vitakkavicārā**”tiādi. Sattā pajjanti etehi yathārahaṃ vaṭṭaṃ vivaṭṭaṅcāti **sattapadā**, gehanissitā vaṭṭapadā. Yoggānaṃ damanaācariyā **yoggācariyā**. Tenāha “**dametabbadamakāna**”nti. **Sesanti** vuttāvasesaṃ ekasattatividhaviññānaṃ saphassarūpakasseva adhippetattā.

305. Idhāti imissaṃ chaviññānakāyadesanāyaṃ. Manodhātuttayavinimuttameva manoviññānadhātūti veditabbaṃ.

Cakkhumhi samphassoti cakkhuṃ nissāya uppanno samphasso. Tenāha – “**cakkhuvīññānasampayuttasamphassassetam adhiyacana**”nti.

Yathā kevalena viññāṇena rūpadassanaṃ na hoti, evaṃ kevalena cakkhupasādenapīti vuttaṃ “**cakkhuvīññāṇenā**”ti. Tena pāḷiyaṃ **cakkhunāti** nissayamukhena nissitakiccaṃ vuttanti dasseti. **Ārammaṇavasena**ti ārammaṇapaccayabhāvena. “Upavicarati”cveva kasmā vuttaṃ, nanu tattha vitakkabyāpāropi atthīti? Saccam atthi. So panettha taggatikoti āha – “**vitakko taṃsampayutto cā**”ti. Sampayuttadhammānampi upavicaraṇaṃ vitakkavicārānaṃyevettha kiccanti “**vitakkavicārāsankhātā manopavicārā**”ti vuttaṃ. Somanassayutto upavicāro **somanassūpavicāro** yathā “ājaññaratho”ti āha “**somanassena saddhi**”ntiādi.

306. Upavicārānaṃ upassayaṭṭhena gehaṃ viyāti gehaṃ, rūpādayoti āha – “**gehassitānīti kāmaguṇanissitānī**”ti. Niccasaññādinikkhamaṇato nekkhammaṃ vipassanāti, “**nekkhammassitānīti vipassanānissitānī**”ti vuttaṃ. **Iṭṭhānanti** kasivaññijjādivasena pariyaṭṭhānanti āha “**pariyesitāna**”nti. Piyabhāvo pana kantasaddeneva kathitoti kāmitabbānaṃ mano rāmetūti **manoramānaṃ**. Lokena āmasīyatīti **lokāmisam**, taṇhā. Tāya gahetabbatāya iṭṭhabhāvāpādanena paṭisaṅkhatatāya ca **paṭisaṃyuttānaṃ**. **Atīte kataṃ uppajjati** ārammaṇikaanubhavanassa asambhavatoti adhippāyo. Edisaṃ anussaraṇaṃ diṭṭhaggahaṇānussarena ca hotīti dassetuṃ, “**yathāha**”ntiādi vuttaṃ.

Aniccākāranti hutvā abhāvākāraṃ. **Vipariṇāma**virāgaⁿⁱrodhanti jarāya maraṇena cāti dvedhā vipariṇāmetabbañceva, tato eva palokitaṃ bhaṅgañca. Aṭṭhakathāyaṃ pana yasmā uppannaṃ rūpaṃ tenevākārena na tiṭṭhati, atha kho uppādāvatthāsankhātāṃ pakatiṃ vijahati, vijahitañca jarāvattāya tato vigacchati, vigacchantañca bhaṅgupattiyā nirujjhatīti imaṃ visesaṃ dassetuṃ, “**pakativijahanenā**”tiādi vuttaṃ. Kāmañcettha “yathābhūtaṃ sammappaññāya passato”ti vuttaṃ, anubodhaññaṃ pana adhippetam vīthipaṭipannāya vipassanāya vasenāti “**vipassanāpaññāyā**”ti vuttaṃ upavicāraniddesabhāvato. Tathā hi vakkhati – “chasudvāresu iṭṭhārammaṇe āpāthagate”tiādi. **Saṅkhārānaṃ bhedaṃ passatoti** sabbesaṃ saṅkhārānaṃ khaṇe khaṇe bhijjanasabhāvaṃ vīthipaṭipannena vipassanāññaṇena passato. Tenāha “**saṅkhāragatamhi tikkhe**”tiādi. Tattha **saṅkhāgatamhīti** saṅkhāragate visayabhūte. **Tikkheti** bhāvanābalena indriyānañca samatāya tibbe. **Sūreti** paṭipakkhehi anabhibhūtatāya, tesañca abhibhavanasamatthāya visade paṭubhūte pavattante.

Kilesānaṃ vikkhambhanavasena vūpasantatāya **santacittassa**, saṃsāre bhayassa ikkhanato **bhikkhuno**, uttarimanussadhammasannissitattā **amānusī ratīti** vivekarati nekkhammarati. **Yato yatoti** yathā yathā nayavipassanādīsu yena yena sammasanākārenāti attho. **Khandhānaṃ udayabbayanti** pañcupādānakkhandhānaṃ uppādañca bhaṅgañca. **Amatantaṃ vijānatanti** vijānantānaṃ viññūnaṃ āradhāvipassanānaṃ taṃ pītipāmojjaṃ amatādhiagamahetutāya amatanti veditabbaṃ.

Chasu dvāresu iṭṭhārammaṇe āpāthagateti rūpādivasena chabbidhe iṭṭhārammaṇe yathārahaṃ chasu dvāresu āpāthagate. Visaye cetam̐ bhummavacanam̐.

307. Paccuppananti santatipaccuppanam̐. **Anuttaravimokkho nāma arahattam̐** idha adhippetam̐ ukkaṭṭhaniddesena. Katham̐ pana tattha piham̐ upaṭṭhapeti, na hi adhigatam̐ arahattam̐ ārammaṇam̐ hoti, na ca tam̐ ārabba pihā pavattatīti? Ko vā evamāha – “arahattam̐ ārammaṇam̐ katvā piham̐ upaṭṭhapeti”ti. Anussutiladdham̐ pana parikappasiddham̐ arahattam̐ uddissa patthanam̐ ṭhapeti, tattha cittam̐ paṇidahati. Tenāha bhagavā – “kudāssu nāmāham̐ tadāyatanaṃ upasampajja viharissāmi”ti. **Āyatananti** arahattameva chaḷaṅgasamannāgamādikāraṇabhāvato, manāyatanadhammāyatanabhāvato ca tathā vuttam̐, tam̐ panetaṃ domanassam̐ patthanam̐ paṭṭhapentassa uppajjati patthanāya sahāvattanato. Na hi lobhadosānam̐ saha vutti atthi. **Patthanāmūlakattāti** iminā upaṭṭhāpayato padassa hetuatthajotakatamāha. **Evanti** “kudāssunāmā”tiādinā vuttākārena. **Ussukkāpetunti** yathā maggena ghaṭeti, evam̐ ussukkāpetum̐.

308. Aññānupekkhāti aññāṇasahitā upekkhā asamapekkhanapavattā. Tena tena maggodhinā tassa tassa apāyagamanīyakilesodhissa anavasesato jitattā khīṇāsavo nippariyāyato odhijino nāma; tadabhāvato puthujjano nippariyāyato anodhijino nāma; sekho pana siyā pariyāyato odhijinoti. Tampi nivattento, “**akhīṇāsavassāti attho**”ti āha. **Āyatim̐ vipākam̐ jinitvāti** appavattikaraṇavasena sabbaso āyatim̐ vipākam̐ jinitvā ṭhitattā khīṇāsavova nippariyāyato vipākajino nāma; tadabhāvato puthujjano nippariyāyato avipākajino nāma; sekho pana siyā pariyāyato vipākajinoti. Tampi nivattento “**akhīṇāsavassevāti attho**”ti āha. Apassantassa rūpanti pālito padaṃ ānetvā sambandhitabbam̐. Pāliyam̐ pubbe “puthujjanassā”ti vatvā puna “assutavato puthujjanassā”ti vacanam̐ andhaputhujjanassāyam̐ upekkhā, na kalyāṇaputhujjanassāti dassanattham̐. Gehassitā upekkhā hi yaṃ kiñci ārammaṇavatthum̐ apekkhasseva, na nirapekkhassāti iṭṭhe, iṭṭhamajjhatte vā ārammaṇe siyāti vuttam̐ “**iṭṭhārammaṇe āpāthagate**”ti. Aññāṇena pana tattha ajjupekkhanākārappatti hoti. Tenāha “**gulaṇḍake**”tiādi.

Iṭṭhe arajjantassa anīṭṭhe adussantassāti idam̐ yebhuyyena sattānam̐ iṭṭhe rajjanam̐, anīṭṭhe dussananti katvā vuttam̐. Ayoniyomanasikāro hi tam̐tam̐ārammaṇavasena na katthacipi javananiyamam̐ karotīti vuttaviparītepi ārammaṇe rajjanadussanam̐ sambhavati, tathāpissa rajjanadussanam̐ atthato paṭikkhittamevāti daṭṭhabbam̐. **Asamapekkhaneti** asamaṃ ayuttadassane ayoniso sammohapubbakam̐ ārammaṇassa gahaṇe.

309. Pavattanavasenāti uppādanavasena ceva bahulīkaraṇavasena ca. **Nissāya ceva āgamma cāti** āgamaṇaṭṭhānabhūte nissayapaccayabhūte ca katvā. **Atikkantāni nāma honti** vikkhambhanena ussārentā samussārentā.

Somanassabhāvasāmaññaṃ gahetvā, “**sarikkhakeneva sarikkhakam̐ jahāpetvā**”ti vuttam̐. Idhāpi pahāyakam̐ nāma pahātabbato balavameva, saṃkilesadhammānam̐ balavabhāvato sātisayam̐ pana balavabhāvam̐ sandhāya “**idāni balavatā**”tiādi vuttam̐. Balavabhāvato vodānadhammānam̐ adhigamassa adhippetattā hettha nekkhammassitadomanassānampi pahānam̐ jotitam̐.

Upekkhāya pahāyakabhāvena adhippetattā “**upekkhākathā veditabbā**”ti vuttam̐. Jhānassa alābhino ca lābhino ca pakiṇṇakasaṅkhārasammasanam̐ sandhāya, “**suddhasaṅkhāre ca pādake katvā**”ti. **Upekkhāsahagatāti** bhāvanāya paṇaṇabhāvam̐ āgamma kadāci ajjupekkhanavasenapi hi sammasanam̐ hotīti. Pādakajjhānavasena, sammasitadhammavasena vā āgamanavipassanāya bahulam̐ somanassasahagatabhāvato “**vuṭṭhānagāminī pana vipassanā somanassasahagatāvā**”ti niyametvā vuttam̐. **Upekkhāsahagatā hotīti** etthāpi eseva nayo. **Catutthajjhānādīnī ādi-**saddena arūpajjhānāni saṅgaṇhāti. **Purimasadisāvāti** purimasadisā eva, upekkhāsahagatā vā hoti somanassasahagatā vāti attho. **Idam̐ sandhāyāti** yaṃ catutthajjhānādīpādakato eva upekkhāsahagatam̐ vuṭṭhānagāminīvipassanam̐ nissāya somanassasahagatāya vipassanāya pahānam̐, idam̐ sandhāya. **Pahānanti** cettha

samatikkamalakkhaṇaṃ veditabbam.

Etam visesaṃ vipassanāya āvajjanaṭṭhānabhūtaṃ. Vuṭṭhānagāminiyā āsanne samāpannajjhānavipassanā pādakajjhānavipassanā, sammasitadhammoti **vipassanāya ārammaṇabhūtā khandhā. Puggalajjhāsaya**ti pādakajjhānassa sammasitajjhānassa ca bhede sati paṭipajjanakassa puggalassa, “aho vata mayhaṃ pañcaṅgikaṃ jhānaṃ bhavēyya caturaṅgika”’ntiādinā pubbe pavattaajjhāsayo. **Tesampi vādeti** ettha paṭhamatheravāde. **Ayameva...pe... niyame**ti tato tato dutiyādi pādakajjhānato uppannassa saṅkhārupekkhāñāṇassa pādakajjhānātikkantānaṃ aṅgānaṃ asamāpajjitukāmatā virāgabhāvanābhāvato itarassa ca atabbhāvato. Eteneva hi paṭhamatheravāde apādakapaṭhamajjhānapādakamaggā paṭhamajjhānikāva honti, itare ca dutiyajjhānikādimaggā pādakajjhānavipassanāniyamehi taṃtaṃjhānikāva. Evaṃ sesavādesupi vipassanāniyamo yathāsambhavaṃ yojetabbo. Tenāha – “**tesampi vāde ayameva pubbabhāge vuṭṭhānagāminivipassanāva niyame**ti”’ti. **Vuttāva**, tasmā na idha vattabbāti adhippāyo.

310. Nānattādi kāmāvacarādikusalādivibhāgato nānāvidhā. Tenāha “**anekappakārā**”’ti. **Nānattasitāti** rūpasaddādinānārammaṇanissayā. **Ekattā** ekasabhāvā jātibhūmiādivibhāgabhāvato. **Ekārammaṇanissitāti** ekappakāreneva ārammaṇe pavattā. **Heṭṭhā aññānupekkhā vuttā** “bālassa muḷhassā”’tiādinā (ma. ni. 3.308). **Upaṇi chaḷaṅgupekkhā vakkhati** “upekkhako viharati”’tiādinā (ma. ni. 3.311). **Dve upekkhā gahitā** dvinnampi ekattā, ekajjhaṃ gahetabbato, nānattasitāya upekkhāya pakāsītābhāvato ca.

Aññānupekkhā aññā saddādīsu tattha tattheva vijjamaṇattā. **Rūpesūti** ca iminā na kevalaṃ rūpāyatanavisesā eva gahitā, atha kho kasiṇarūpānipīti āha – “**rūpe upekkhābhāvañca aññā**”’tiādi. Ekattasitābhāvopi idha ekattavisayasampayogavaseneva icchito, na ārammaṇavasena cāti dassetuṃ, “**yasmā panā**”’tiādi vuttaṃ. Tenevāha “**tatthā**”’tiādi. **Sampayuttavasenāti** sampayogavasena. Ākāsañācāyatanāṃ nissayatīti **ākāsānañcāyatananissitā**, ākāsañācāyatanakhandhanissitā. **Sesāsupīti** viññāñcāyatananissitādīsipi.

Arūpāvacaravipassanupekkhāyāti arūpāvacaradhammārammaṇāya vipassanupekkhāya. **Rūpāvacaravipassanupekkhanti** etthāpi eseva nayo. Tāya kāmārūpārūpabhedāya taṇhāya nibbattāti tammayā, tebhūmakadhammā, tesam bhāvo **tammayatā**, taṇhā yassa guṇassa vasena atthe saddaniveso, tadabhidhānakoti āha – “**tammayatā nāma taṇhā**”’ti. **Atammayatā** tammayatāya paṭipakkhoti katvā. **Vipassanupekkhanti**, “yadatthi yaṃ bhūtaṃ, taṃ pajahati upekkhaṃ paṭilabhati”’ti (dī. ni. 3.71; a. ni. 7.55) evamāgataṃ saṅkhāravacinane majjhatabhūtaṃ upekkhaṃ.

311. Yadariyoti ettha **da-kāro** padasandhikaro, upayogaputhuvacane ca **ya-saddoti** dassento, “**ye satipaṭṭhāne ariyo**”’ti āha. Kāmaṃ “ariyo”’ti padaṃ sabbesampi paṭividdhasaccānaṃ sādharmaṇaṃ, vakkhamānassa pana visesassa buddhāveṇikattā, “**ariyo sammāsambuddho**”’ti vuttaṃ. Na hi paccekabuddhādīnaṃ ayamānubhāvo atthi. **Tīsu ṭhānesūti** na sussūsantīti vā, ekacce na sussūsanti ekacce sussūsantīti vā, sussūsantīti vā, paṭipannāpaṭipannānaṃ sāvakānaṃ paṭipattisaṅkhātesu tīsu satipaṭṭhānesu. **Satiṃ paṭṭhapentoti** paṭighānunaṃyehi anavassutattā tadubhayanivattattā sabbadā satiṃ upaṭṭhapento. Buddhānameva sā niccaṃ upaṭṭhitasatitā, na itaresaṃ āveṇikadhammabhāvato. Ādarena sotomicchā idha sussūsātīti tadabhāvaṃ dassento, “**saddahitvā sotuṃ na icchantī**”’ti āha. **Na aññāti** “na aññāyā”’ti vattabbe yakāralopena niddesoti āha “**na jānanatthāyā**”’ti. Satthu ovādassa anādiyanameva **vokkamananti** āha – “**atikkamitvā...pe... maññanti**”’ti.

Gehassitadomanassavasenāti idam idha paṭikkhipitabbamattadassanapadaṃ daṭṭhabbāṃ. Nekkhammassitadomanassasapi satthu pasaṅgavasena “na ceva attamaṇo hoti”’ti attamaṇapaṭikkhepena anattamaṇatā vuttā viya hotīti taṃ paṭisedhento – “**appatīto hotīti na evamattho daṭṭhabbo**”’ti. Tassa setughāto hi tathāgatānaṃ. Yadi evaṃ kasmā attamaṇatāpaṭikkhepoti āha – “**appaṭipannakesu pana anattamaṇatākāraṇassa abhāvenetaṃ vutta**”’nti. **Paṭighaavassavenāti**

chahi dvārehi paṭighavissandanena, paṭighappavattiyāti attho. **Uppilāvitoti** na evamattho daṭṭhabbo uppilāvitattassa bodhimūle eva pahīnattā. **Paṭipannakesūti** idaṃ adhikāravasena vuttam, appaṭipannakesupi tathāgatassa anattamanatākāraṇaṃ nattheva. **Etaṃ vuttanti** etaṃ “attamano ceva hoti” tiādivacanaṃ vuttam sāvakaṇaṃ sammāpaṭipattiyā satthu anavajjāya cittārādhanāya sambhavato.

312. Damitoti nibbisevanabhāvāpādanena sikkhāpito. Iriyāpathaparivattanavasena aparivattitvā ekadisāya eva sattadisāvidhāvanassa idhādhippetattā sārītaṇaṃ hatthidammādīnaṃ ekadisādhāvanampi anivattanavaseneva yuttanti āha – “**anivattitvā dhāvanto ekameva disaṃ dhāvati**” ti. **Kāyena anivattitvāvāti** kāyena aparivattitvā eva. **Vimokkhavasena aṭṭha disā vidhāvati**, na puratthimādidisāvasena. **Ekappahārenevāti** ekañhāreneva, ekasmiṃyeva vā divase ekabhāgena. “Pahāro” ti hi divasassa tatiyo bhāgo vuccati. Vidhāvanañcettha jhānasamāpajjanavasena akalaṅkamappatisātaṃ javanacittapavattanti āha “**samāpajjatiyevā**” ti. Sesam suviññeyyameva.

Saḷāyatanavibhaṅgasuttavaṇṇanāya līnatthappakāsanā samattā.

8. Uddesavibhaṅgasuttavaṇṇanā

313. Desetabbassa atthassa uddisanaṃ **uddeso**, vibhajanaṃ **vibhaṅgoti** āha – “**mātikaṅca vibhajanaṅcā**” ti **tuleyyāti** tiādīni cattāripi padāni paññāvevacanāni. Atha vā **tuleyyāti** tulanabhūtāya paññāya tassa dhammassa paggahādividhinā parituleyya. **Tīreyyāti** tīraṇabhūtāya paññāya tatha ñāṇakiriyāsamāpanavasena tīreyya. **Pariggaṇheyyāti** tathāsamāpanno ānisaṃse assādaādīnave ca vicineyya. **Paricchindeyyāti** paricchindabhūtena ñāṇena atthaṃ paricchinditvā jāneyya. **Ārammaṇesūti** rūpādiputhuttārammaṇesu. **Nikantivasenāti** nikāmanavasena apekkhāvasena. **Tiṭṭhamānanti** pavattamānaṃ. **Gocarajjhatteti** jhānārammaṇabhūte. Tañhi bhāvanācittenañbhūbhūyaya avissajjitvā gayhamānaṃ ajjhattaṃ viya hotīti “gocarajjhatta” nti vuccati. Bhāvanaṃ āradhassa bhikkhuno yadi bhāvanārammaṇe nikanti uppajjeyya, tāya nikantiyā upari bhāvanaṃ vissajjetvā cittaṣaṃkocavasena saṅghitaṃ nāma, tadabhāvena **asaṅghitaṃ** nāma hotīti, “ajjhattaṃ asaṅghita” nti vuttanti dassento, “**gocarajjhatte nikantivasena asaṅghita**” nti āha. Tathā hi vakkhati – “nikantivasena hi atitṭhamānaṃ hānabhāgiyaṃ na hoti, visesabhāgiyameva hoti” ti. **Aggahetvāti** rūpādīsu kiñci taṇhādiggāhavasena aggahetvā. Tathā aggahaṇeneva hi taṇhāparitāsādivasena na paritasseyya. **Avasesassa ca dukkhassāti** sokādidukkhassa. **Avasesassa ca dukkhassāti** vā jātijarāmarāṇasīsena vipākadukkhassa gahitattā kilesadukkhassa ceva saṃsāradukkhassa cāti attho.

316. Rūpameva kilesuppattiyā kāraṇabhāvato **rūpanimittaṃ**. Rāgādivasena taṃ anudhāvātīti **rūpanimittānusārī**.

318. Nikantivasena asaṅghitanti apekkhāvasena saṅghitaṃ nikantiṃ pahāya pavattamānaṃ upari visesāvahatoti. Tenāha “**nikantivasena hī**” tiādi.

320. Aggahetvā aparitassanāti pañcupādānakkhandhe, “etaṃ mamā” tiādīnā taṇhādiggāhavasena upādiyitvā taṇhāparitāsādivasena paritassanā, vuttavipariyāyena aggahetvā aparitassanā veditabbā. **Kathaṃ panesā anupādāparitassanā hotīti** mahātherassa adhippāyaṃ vivarituṃ codanaṃ samuṭṭhāpeti? **Upādātābbassa abhāvato** tassa anupādāparitassanābhāve kāraṇavacanaṃ. **Yadi hītiādi** tassa samatthanaṃ. **Upādāparitassanāva assa** tathā upādātābbassa tatheva upādinnattā. **Evanti** niccādiākārena. **Upādinnāpīti** gahitaparāmaṭṭhāpi. **Anupādinnāva honti** ayoniso gahitattā, viññūsu nissāya jānitābbattā ca. **Diṭṭhivasenāti** micchādiṭṭhiyā gahaṇākāravasena, tassa pana ayathābhūtagāhitāya paramatthato ca abhāvato. **Atthatoti** paramatthato. **Anupādāparitassanāyeva nāma hoti** upādātābbākārassa abhāvena taṃ anupādiyitvā eva paritassanāti katvā.

Parivattatīti na tadeva rūpaṃ aññathā pavattaṃ parivattati, atha kho pakatijahanena sabhāvavīgamena nassati bhijjati. **Vipariṇatanti** aññathattaṃ gataṃ vinaṭṭhaṃ. **Kammaviññānanti**

abhisankhāravīññāṇaṃ. “Rūpaṃ attā”tiādi micchāgāhavasena viññāṇassa rūpabhedena vuttassa **bhedānuparivatti hoti**. Vipariṇāmaṃ anugantvā viparivattanataṃ ārabba pavattaṃ vipariṇāmānuparivattaṃ; tato samuppannā paritassanā **vipariṇāmānuparivattajā paritassanāti** dassento āha – “**vipariṇāmassa...pe... paritassanā**”ti. **Akusaladhammasamuppādā cāti**, “yaṃ ahu vata me, taṃ vata me natthī”tiādinā pavattā akusalacittuppādadhammā. **Khepetvāti** pavattituṃ appadānavasena anuppattinimittatāya khepetvā. **Bhayatāsenāti** bhāyanavasena cittutrāsena. **Taṇhātāsenāti** tassanena. **Savighātoti** cittavighātanavighātena savighāto. Tato eva cetodukkheṇa **sadukkho**. **Maṇikaraṇḍakasaññāyāti** rittakaraṇḍaṃyeva maṇiparipuṇṇakaraṇḍoti uppannasaññāya. **Aggahetvā paritassanāti** gahetabbassa abhāvena gahaṇampi avijjamaṇapakkhiyamevāti aggahetvā paritassanā nāma hoti.

321. Kammaviññāṇameva natthi sati kammaviññāṇe rūpabhedānuparivatti siyāti kammaviññāṇābhāvadassanamukheṇa khīṇāsavassa sabbaso kilesābhāvaṃ dasseti. Sesam suviññeyyameva.

Uddesavibhaṅgasuttavaṇṇanāya līnatthappakāsanā samattā.

9. Araṇavibhaṅgasuttavaṇṇanā

323. Gehassitavasenāti kilesanissitavasena anurodhavasena. **Neva ukkhipeyyāti** na anuggaṇheyya. **Na avakkhipeyyāti** gehassitavasena virodhavasena na niggaṇheyya. Anurodhena vinā sampahaṃsanavasena yathābhūtaguṇakathanam nevuśādanā vajjābhāvato; tathā virodhena vinā vivecanavasena yathābhūtasakathanam na apasādanam. **Sabhāvamevāti** yathābhūtasabhāvameva kassaci puggalassa anādesakaraṇavasena **katheyya**, seyyathāpi āyasmā subhūtitthero. **Vinicchitasukhanti**, “ajjhataṃ anavajja”ntiādinā visesato vinicchitasukhāya hoti. **Parammukhā avaṇṇanti** svāyaṃ rahovādo pesuññūpasamhāravasena pavatto idhāhippetoti āha “**pisuṇavācanti attho**”ti. Khīṇātīti **khīṇo**, yo bhāsati, yañca uddissa bhāsati, dvepi himsati vibādhatīti attho, taṃ khīṇavādam. Svāyaṃ yasmā kilesehi ākiṇṇo samkiliṭṭho eva ca hoti, tasmā vuttaṃ – “**ākiṇṇam samkiliṭṭham vāca**”nti. Tena avasiṭṭham tividhampi vacīduccaritamāha. **Adhiṭṭhahitvāti**, “idameva sacca”nti ajjhosāya. **Ādāyāti** paggayha. **Vohareyyāti** samudācareyya. **Lokasamaññanti** lokasaṅketam.

324. Ārammaṇato sampayogato kāmehi paṭisaṃhitattā **kāmapaṭisandhi**, kāmasukhaṃ. Tenāha “**kāmūpasamhitena sukheṇā**”ti. **Sadukkhoti** vipākadukkheṇa samkilesadukkheṇa sadukkho. **Tathā sapaṭiḷāhoti** vipākapaṭiḷāhena ceva kilesapaṭiḷāhena ca sapaṭiḷāho.

326. Vaṭṭato nissarituṃ adatvā tattheva sīdāpanato micchāpaṭipadābhāvena satte saṃyojetīti saṃyojanaṃ, visesato bhavasamyojanaṃ taṇhāti āha “**taṇhāyetaṃ nāma**”nti. Na taṇhāyeva mānādayopi saṃyojanattaṃ sādheti nāma sabbaso saṃyojanato suṭṭhu bandhanato. Tena vuttaṃ – “avijjānīvaraṇānaṃ, bhikkhave, sattānaṃ taṇhāsamyojanāna”nti (saṃ. ni. 2.125-126).

Imaṃ catukkanti, “ye kāmapaṭisandhisukhino somanassānuyogaṃ anuyuttā, ye attakilamathānuyogaṃ anuyuttā”ti evamāgataṃ imaṃ catukkaṃ nissāya. “Etadagge ṭhapito”ti, vatvā taṃ nissāya ṭhapitabhāvaṃ vitthārato dassetuṃ, “**bhagavato hī**”tiādi vuttaṃ. **Ussādanāpasādanā paññāyanti** tathāgatena vinetabbapuggalavasena dhammadesanāya pavattetabbato. **Ayaṃ puggalo... pe... ācārasampannoti vā natthi** paresam anuddesakavasena dhammadesanāya pavattanato.

329. Parammukhā avaṇṇanti nindiyassa dosassa nindanaṃ. Na hi kadāci nindiyō pasamsiyo hoti, taṃ pana kālaṃ ṇatvāva kathetabbanti āha, “**yuttapattakālaṃ ṇatvā**”ti. **Khīṇavādepī eseva nayo** tassa rahovādena samānayogakkhamattā.

330. Ghāṭiyatīti vadhīyati. Saddopi bhijjati nassati, bhedo hotīti attho. **Gelaññappattoti** khedaṃ

parissamaṃ patto. **Apalibuddhanti** dosehi ananupatitaṃ.

331. Abhinivissa voharatīti evametaṃ, na ito aññathāti taṃ janapadaniruttiṃ abhinivisitvā samudācarati. **Atidhāvananti** samaññaṃ nāmetaṃ lokasañketasiddhā paññattīti paññattimatte aṭṭhatvā paramatthato thāmasā parāmassa voharaṇaṃ.

332. Aparāmasantoti anabhinivisanto samaññāmatatova **voharati**.

333. Mariyādabhājanīyanti yathāvuttasammāpaṭipadāya micchāpaṭipadāya ca aññamaññaṃ sañkarabhāvavibhājanaṃ. Raṇanti sattā etehi kandanti akandantāpi kandanakāraṇabhāvato raṇā; rāgadosamohā, dasapi vā kilesā, sabbepi vā ekantākusalā, tehi nānappakāradukkhānibhattakehi abhibhūtā sattā kandanti; saha raṇehīti **saraṇo**. Raṇasaddo vā rāgādireṇūsu niruḷho. Tenāha “**sarajo sakilesa**”ti. Pāḷiyaṃ pana “sadukkho eso dhammo”tiādīnā āgatattā kāmasukhānuyogādayopi “saraṇo”ti vuttāti dukkhādīnaṃ raṇabhāvo tannibhattakasabhāvānaṃ akusalānaṃ saraṇatā ca veditabbā. **Araṇoti**ādīnaṃ padānaṃ vuttavipariyāyena attho veditabbo.

Vatthum sodhetīti nirodhasamāpajjanena mahapphalabhāvakaraṇena dakkhiṇeyyavatthubhūtaṃ attānaṃ visodheti; nirodhasamāpattiyā vatthuisodhanaṃ nirodhaṃ samāpajjitvā vuṭṭhitānaṃ paccakabuddhānaṃ mahākassapattherādīnaṃ dinnadakkhiṇāvisuddhiyā dīpetabbaṃ. Tenāha “**tathā hī**”tiādī. **Tathevāti** iminā “piṇḍāya caranto”tiādīṃ upasaṃharati. Mettābhāvanāya mudubhūtacittabahumānapubbakaṃ dentīti, “subhūtitthero dakkhiṇaṃ visodhetī”ti vuttaṃ. Tena dāyakatopi dakkhiṇāvisuddhiṃ dasseti. Vatthusodhanaṃ pana paṭibhāgato. **Evaṃ pana kātum sakkāti** sāvakanampi kimevaṃ lahuvuṭṭhānādhiṭṭhānaṃ sāvakesu ciṇṇavasībhāvo sambhavatīti pucchati. Itaro aggasāvakamahāsāvakesu kiṃ vattabbaṃ, pakatisāvakesupi vasippattesu labbhatīti te dassento, “**āma sakkā**”tiādīmāha. Sesam suviññeyyameva.

Araṇavibhaṅgasuttavaṇṇanāya līnatthappakāsanā samattā.

10. Dhātuvibhaṅgasuttavaṇṇanā

342. Aparikkhīṇāyukaṃ pukkusātikulaputtaṃ uddissa gamananti katvā vuttaṃ “**turitagamanacārika**”nti. Mama vāsupagamanena tava cittassa aphāsukaṃ aṇiṭṭhaṃ **sace natthi**. Soti pubbupagato. **Dinnaṃ dinnameva vaṭṭatī**ti ekavāraṃ dinnaṃ dinnameva yuttaṃ, na puna dātābanti adhippāyo. **Kataṃ katamevāti** saṅgahatthaṃ kataṃ anucchavikakammaṃ katameva, na taṃ puna viparivattetābanti adhippāyo.

Pukkusātīmhi ubhayathāpi kulaputtabhāvo paripuṇṇo evāti āha – “**jātikulaputtopi ācārakulaputtopi**”ti. **Tatrāti** tasmim takkasīlato āgamane. **Anke nipannadāraṇaṃ viya janaṃ toseti** tuṭṭhiṃ pāpeti. **Ratanāni uppajjanti** pabbatasamuddādisannissitattā paccantadesassa. **Dassanīyanti** dassaneneva sukhāvahaṃ. **Evarūpanti** dassanīyaṃ savanīyañca.

Anagghakambale mahagghakambale. **Sāraṇaṇḍaketi** candanasārādisāramayakaraṇḍake. **Likhāpetvā** ukkirāpetvā. **Lākhāya vaṭṭāpetvāti** mukhaṃ pidahitvā lākhāparikammaṃ kāretvā.

Anto dussabhaṇḍikaṃ atthīti aññāsi nātigarukabhāvato. **Anagghā ahesunti** vaṇṇasampattiphassasampattipamaṇamahattadunnimmāpiyatāhi mahagghā ahesuṃ, mahāpuñño rājā tassa atthevāti adhippāyo.

Yadi evaṃ, “kinnu kho pesemī”ti kasmā vīmaṃsaṃ āpajjīti āha – “**apica kho panā**”tiādī. Soti bimbisāro rājā. **Vicinitum āradhho** ratanassa anekavidhattā uttaruttariñca paṇītatarādibhāvato.

Suvaṇṇarajatādīti suvaṇṇarajatapavāḷamaṇimuttāveḷuriyādi. **Indriyabaddhanti** cakkhādiindriyapaṭibaddham. **Padesanti** guṇavasena ekadesaṃ na pāpuṇāti.

Sāmaṃ saccānaṃ abhisambuddhatāsāmaññaena, “**buddharatanampi duvidha**”nti vuttaṃ. **Buddharatanasamaṃ ratanaṃ nāma natthi**, yasmā pana imasmiṃ loke parasmiṃ vā pana buddhena sadiso na vijjatīti. Paṭhamabodhiyaṃyeva pavattatīti katvā vuttaṃ “**ghosopī**”tiādi.

Rājā tuṭṭho cintesi, “tattha avijjamānaṃyeva pesetuṃ laddha”nti. **Tasmāti** yasmā paripuṇṇaṃ ekadivasampi tasmīṃ padese buddhānaṃ āvāsapariggaho natthi, tasmā. **Pubbadisāmukhanti** pubbadisābhimukhaṃ sīhapañjaraṃ. Tenassa suvibhūtālokataṃ dasseti.

Evaṃ anaññasādhāraṇassa bhagavato īdiso samudāgamoti dassetuṃ, “**evaṃ dasa pāramiyo pūretvā**”tiādi vuttaṃ. Evaṃ sampannasamudāgamassa tadanurūpā ayaṃ phalasampadāti dassetuṃ, “**tusitabhavanato**”tiādi vuttaṃ.

Ariyadhammo nāma ariyamaggappadhāno, ariyamaggo ca sattatiṃsabodhipakkhiyasaṅgaho, te ca uddesamatteneva gahitāti āha – “**sattatiṃsabodhipakkhiye ekadesena likhitvā**”ti. Cūḷasīlādīni **brahmajāle** (dī. ni. 1.8-9) āgatanayena veditabbāni. **Chadvārasaṃvaram** satisampajaññanti manacchaṭṭhānaṃ dvārānaṃ saṃvaraṇavasena sattaṭṭhānikaṃ satisampajaññaṃ. Dvādasappabhedam cīvarādicatuppaccayasantosam. Araññarukkhamūlādīnañca vibhaṅgaṃ bhāvanānukūlaṃ **senāsanaṃ**. “Abhijjhaṃ loke pahāyā”tiādinā vuttaṃ **nīvaraṇappahānaṃ**. **Parikammanti** kasiṇādiparikammaṃ. Pāḷiyaṃ āgatanayena **aṭṭhatiṃsa kammaṭṭhānāni**. Visuddhipaṭipāṭiyā **yāva āsavakkhayā** imaṃ paṭipattiṃ **ekadesena likhi**. **Soḷasavidhanti** soḷasavidhabhāvanāya payogaṃ.

Kilañjamayeti nānāvidhabhittivibhatte saṅhasukhumaratanaparisisbbite kilañjamayasamugge. **Bahi vatthena veṭhetvāti** paṭhamaṃ sukhumakambalena veṭhetvā paṭipāṭiyā tettimsāya samuggesu pakkhipitvā tato bahi sukhumavatthena veṭhetvā chādetvā. Tiṇagacchapahānasammajjanādīnā **sodhitamattakameva hotu**, kadalipuṇṇaghaṭaṭhapanadhajapaṭākussāpanādialaṅkaraṇena mā niṭṭhāpethāti attho. **Rājānubhāvena paṭiyādetthāti** mama rājānurūpaṃ sajjetha, alaṅkarothāti attho. **Antarabhogikānanti** anuyuttarājamahāmattānaṃ. **Javanadūteti** khippaṃ gacchantakadūtapurise. Tālehi saha avacarantīti **tālāvacaṛā**.

Rañña paṇṇākāraṃ uddissa katapūjāsakkārassa amaccato sutattā **paṇṇākāraṃ uccaṭṭhāne ṭhapetvā sayam nīcāsane nisinno**. **Nāyam aññaṃ ratanassa bhavissatīti** ayaṃ parihāro aññaṃ maṇimuttādibhedassa ratanassa na bhavissati maṇimuttādīhi abhisankhatattā. **Balavasomanassaṃ uppajji** ciratanakālaṃ buddhasāsane bhāvitabhāvanatāya vāsitavāsanaṭāya ghaṭe dīpo viya abbhantare eva samujjalamaṇaparipakkatihatukabhāvato.

Dhāremīti icchāmi, gaṇhāmīti attho. **Dvejjhavaṇanti** dvelhakabhāvo. **Antaram karotīti** dvinnam pādānaṃ antaram taṃ lekhaṃ karoti, ekena pādēna atikkamīti attho. **Tassā gatamaggenāti** tāya deviyā vivaṭṭamānāya nāsītāya gatamaggēna. **Taṃ pana lekhaṃti** pukkusātīnā katalekhaṃ. Paṇṇacchattakanti tālapattamuṭṭhim.

Satthugāravenāti satthari uppannapasādapemabahumānasambhavana. Tadā satthāraṃyeva manasi katvā tanninnabhāvena gacchanto, “pucchissāmī”tipi cittaṃ na uppādesi, “ettha nu kho satthā vasatī”ti parivittakasseva abhāvato; rājagahaṃ pana patvā rañño pesitasāsanavasena tattha ca vihāssa bahubhāvato **satthā kahaṃ vasatīti pucchi**. Satthu ekakasseva nikkhamaṃ pañcacattālīsa yojanāni padasā gamanañca dhammapūjāvasena katanti daṭṭhabbaṃ. Dhammapūjāya ca buddhānaṃ āciṇṇabhāvo heṭṭhā vitthāritoyeva. Buddhasobhaṃ pana paṭicchādetvā aññātakavesena tattha gamanaṃ tassa kulaputtassa vissatthavasena maggadarathapaṭipassambhanatthaṃ. Appaṭipassaddhamaggadaratho hi dhammadesanāya bhājanaṃ na hotīti. Tathāhi vakkhati, “nanu ca bhagavā”tiādi.

Urudhanti visālanti keci. **Atirekatyojanasatanti**ādinā anvayato byatirekato ca maccheravinayane sabrahmacārīnaṃ ovādadānaṃ. **Accantasukhumāloti**ādinā satthu dhammagāravena saddhiṃ kulaputtassapi dhammagāravaṃ saṃsandati sametīti dasseti. Tena bhagavato katassa paccuggamanassa thānagatabhāvaṃ vibhāvento aññesampi bhabbarūpānaṃ kulaputtānaṃ yathārahaṃ saṅgaho kātabboti dasseti.

Brahmalokappamāṇanti uccabhāvena. **Ānubhāvenāti** iddhānubhāvena yathā so sotapathaṃ na upagacchati, evaṃ vūpasametum sakkoti. **Avibbhantanti** vibbhamarahitaṃ nilloluppaṃ. **“Bhāvanapumsakaṃ paneta”**nti vatvā tassa vivaraṇatthaṃ, “pāsādikena iriyāpathenā”ti vuttaṃ. Itthambhūtalakkhaṇe etaṃ karaṇavacanaṃ daṭṭhabbaṃ. Tenāha **“yathā iriyato”**tiādi. **Amanāpo hoti** passantānaṃ. Sīhaseyyāya nipannassapi hi ekacce sarīrāvayavā adhokhittavikkhittā viya dissanti. Kaṭiyaṃ dvinnaṃ ūrusandhīnaṃ dvinnaṃca jāṇusandhīnaṃ vasena **catusandhikapallaṅkaṃ**. **Na paṭiṭṭhātīti** nappavattati, “kaṃsi tva”ntiādinā apucchite kathāpavattī eva na hoti. **Appaṭiṭṭhitāya kathāya na sañjāyatīti** tathā pana pucchāvasena kathāya appavattitāya upari dhammakathā na sañjāyati na uppajjati. **Itīti** tasmā. **Kathāpaṭiṭṭhāpanatthaṃ** kathāpavattanatthaṃ kathāsamuṭṭhāpanatthaṃ vā pucchi.

Sabhāvameva kathetīti attano bhagavato adīṭṭhapubbattā “adīṭṭhapubbakaṃ kathamaṃ jāneyya”nti sabhāvameva kevalaṃ attano ajjhāsayaṃmeva katheti; na pana sadevakassa lokassa supākaṭaṃ sabhāvasiddhaṃ buddharūpakāyasabhāvaṃ. Atha vā **sabhāvameva kathetīti** “idameva”nti jānantopi tadā bhagavato ruciyā tathāpavattamānaṃ rūpakāyasabhāvameva katheti appavikkhambhanti adhippāyo. Tenāha – **“tathā hi na”**ntiādi, vipassanālakkhāṇameva paṭipadanti adhippāyo.

343. “Pubbabhāgapaṭipadaṃ akathetvā”ti vatvā pubbabhāgapaṭipadāya akathane kāraṇaṃ pubbabhāgapaṭipadaṃca sarūpato dassetum, **“yassa hī”**tiādi vuttaṃ. Aparisuddhāyapi pubbabhāgapaṭipadāya vipassanā tathā na kiccaṃkāri, pageva avijjamānāyāti, **“yassa hi...pe... aparisuddhā hoti”**ceva vuttaṃ. Pubbabhāgapaṭipadā ca nāma saṅkhepatto pannarasa caraṇadhammāti āha – **“sīlasaṃvaram...pe... imaṃ pubbabhāgapaṭipadaṃ ācikkhati”**ti. **Yānakiccaṃ sādheti** maggagamanena akilantabhāvasādhanatā. Cirakālaṃ paribhāvitāya paripakkagatāya hetusampadāya upaṭṭhāpitaṃ **sāmaṇerasīlampi paripuṇṇaṃ** akhaṇḍādibhāvappattiyā, yaṃ pubbahetuttā “sīla”nti vuccati.

Dhātuyo paramatthato vijjamānā, paññattimattho **puriso avijjamāno**. Atha kasmā bhagavā arahattassa padaṭṭhānabhūtaṃ vipassanaṃ kathento “chadhāturo”ti avijjamānappadhānaṃ desanaṃ ārabhīti āha – **“bhagavā hī”**tiādi. **Katthaci** “tevijjo chaḷabhiñño”tiādīsu **vijjamānena avijjamānaṃ dasseti**. **Katthaci** – “itthirūpaṃ, bhikkhave, purisassa cittaṃ pariyādāya tiṭṭhatī”tiādīsu (a. ni. 1.1) **avijjamānena vijjamānaṃ dasseti**. **Katthaci** “cakkhuviññānaṃ sotaviññāna”ntiādīsu (vibha. 121) **vijjamānena vijjamānaṃ dasseti**. **Katthaci** – “khattiyakumāro brāhmaṇakaññāya saddhiṃ saṃvāsaṃ kappeti”tiādīsu (dī. ni. 1.275) **avijjamānena avijjamānaṃ dasseti**. Idha pana vijjamānena avijjamānaṃ dasseti. “Chadhāturo”ti hi samāsatto avijjamāno puggalavisayattā, tassa padassa avayavattho pana appadhānattho vijjamāno, so saddakkamena appadhānopi atthakkamena padhānoti āha – **“vijjamānena avijjamānaṃ dassento”**ti. Puggalādhiṭṭhānāyetta desanāya kāraṇaṃ dassetum, **“sace hī”**tiādi vuttaṃ. **Upaṭṭhāpeyyāti** – “dhātuyo”iceva kulaputtassa cittaṃ niveseyya tathā sañjāneyya, evaṃ dhammaṃ deseyyāti attho. **Sandehaṃ kareyyāti** asati purise ko karoti? Ko paṭisaṃvedeti, dhātuyo evāti kiṃ nu kho idaṃ, kathaṃ nu kho idanti saṃsayam uppādeyya? **Sammohaṃ āpajjeyyāti** caturaṅgasamannāgate andhakāre vattamānaṃ viya desiyamāne atthe sammohaṃ āpajjeyya. Tathābhūto ca desanāya abhājanabhūtattā **desanaṃ sampaṭicchitum na sakuṇeyya**. **Evamāhāti** evaṃ “chadhāturo”ti āha.

Yaṃ tvam purisoti sañjānāsīti yaṃ rūpārūpadhammasamūhaṃ pabandhavasena pavattamānaṃ adhiṭṭhānavisesavisitthaṃ – “puriso satto itthī”tiādinā tvam sañjānāsī, **so chadhāturo**. Santesupi

chadhātuvinimuttetu dhātvantaresu sukhāvaggahaṇattham tathā vuttam taggahaṇeneva ca tesam gahetabbato, svāyamatto heṭṭhā dassito eva. **Sesapadesūti** “chaphassāyatano” tiādipadesupi. Cattāri adhiṭṭhānāni catasso patiṭṭhā etassāti **catūrādhiṭṭhāno**, adhiṭṭhāti patiṭṭhahati etenāti **adhiṭṭhānam**, yesu patiṭṭhāya uttamattham arahattam adhigacchati, tesam paññādīnam etaṃ adhivacanam. Tenāha “**svāyam bhikkhū**” tiādi. **Ettoti** vaṭṭato. **Vivaṭṭitvāti** vinivaṭṭitvā apasakkitvā. **Ettoti** vā etehi chadhātuādīhi. Ettha hi nivṭṭhassa āyattassa uttamāya siddhiyā asambhavoti. **Patiṭṭhitanti** ariyamaggādhigamavasena suppatiṭṭhitam. Evañhi sabbaso paṭipakkhasamucchinanena tattha patiṭṭhito hoti. **Maññassavā nappavattantī** chahipi dvārehi pavattamānasotāya maggena visositāya sabbaso vīgatāya sabbaso vicchedappattiyā na sandanti. Tenāha “**nappavattantī**” ti. Yasmā māne sabbaso samucchinne asamucchinno anupasanto kilesa nāma natthi, tasmā āha – “**muni santoti vuccatī**” ti rāgaggiādīnam nibbānena **nibbuto**.

Paññam nappamajjeyyāti, “divasam caṅkamena nisajjāya āvaraṇīyehi dhammehi cittaṃ parisodhetī” tiādīnappavattāya (ma. ni. 1.423; 2.24; 3.75; sam. ni. 4.120; a. ni. 3.15; vibha. 519; mahāni. 161) appamādappaṭipattiyā samādhivipassanāpaññam nappamajjeyya. Etena pubbabhāgiyam samathavipassanābhāvanamāha. **Saccamanurakkheyyāti** saccānurakkhanāpadesena sīlavisodhanamāha; sacce ṭhito samādinnaṣīlam avikopetvā paripūrento samādhisaṃvattaniyatam karoti. Tenāha “**vacīsaccam rakkheyyā**” ti. **Kilesapariccāgam brūheyyāti** tadanāgādivasena kilesānam pariccajanavidhiṃ vaḍḍheyya. **Kilesavūpasamanam sikkheyyāti** yathā te kilesā tadanāgādivasena pariccattā yathāsamudācārapavattiyā santāne pariḷāham na janenti; evam kilesānam vūpasamanavidhiṃ sikkheyya **paññādhiṭṭhānādīnanti** lokuttarānam paññādhiṭṭhānādīnam. **Adhigamatthāyāti** paṭilābhatthāya.

347. Pubbe vuttānanti, “catūrādhiṭṭhāno, yattha ṭhitam maññassavā nappavattantī” ti (ma. ni. 3.343) evam pubbe vuttānam.

348. Vattabham bhaveyyāti niddesavasena vattabham bhaveyya. **Ādihīti** evamādīhi. **Kiccam natthi** kiccābhāvato. **Uppaṭipāṭidhātukanti** ayathānupubbikam. **Yathādharmavasenevāti** desetabbadhammānam yathāsabhāveneva. **Sappāyam dhutaṅganti** attano kilesaniggaṇhanayoggam dhutaṅgam. **Cittarucitanti** attano cittaapakatīyā ācariyehi virocetabbam, cariyānukūlanti attho. **Hatthipadopamasuttādīsūti ādi**-saddena visuddhimaggadhātuvibhaṅgādiṃ saṅgaṇhāti.

354. Ayampetthāti pi-saddo sampiṇḍanatto. Tena “athāparam upekkhāyeva avasissatī” ti uparidesanam sampiṇḍetī. Sopi hi pāṭiyekko anusandhīti. Nanu cāyam yathāuddiṭṭhāya viññāṇadhātuyā niddesopi bhavissatīti yathānusandhinayo vijjatīti? Na, viññāṇadhātuniddesanayena desanāya appavattattā tenāha “**heṭṭhato**” tiādi. **Yam vā panāti**ādīnā pana desanāya sānusandhitam vibhāveti. Na hi buddhā bhagavanto ananusandhikam desanam desenti. **Āgamanīyavipassanāvasenāti** yassā pubbe pavattattā āgamanīyatthāne ṭhitā vipassanā, tassā vasena. **Kammakāravīññānanti** “netam mama nesohamasmī, na meso attā” ti evam vipassanākiccakāram vipassanāsahitam viññānam. **Viññāṇadhātuvasenāti** yathāuddiṭṭhāya viññāṇadhātuyā bhājanavasena. **Satthu kathanatthāyāti** satthārā uddesameva katvā ṭhapitattā niddesavasena kathanatthāya. Akathitabhāvo eva hissa avasiṭṭhatā kathanatthāya paṭivijjhanatthāya ca. Paṭipakkhavigamena tassa cittassa parisuddhatāti āha “**nirupakkilesa**” nti. Upakkilesānam pana pahīnabhāvato **pariyodātam**. Samudayavasena **udayadassanathāñceva** paccayanirodhavasena **atthaṅgamadassanathāñca**. Kāraṇabhāvena sukhāya vedanāya hitanti **sukhavedaniyam**. Tenāha “**sukhavedanāya paccayabhūta**” nti.

360. Rūpakammaṭṭhānampi catudhātuvavattānavasena, **arūpakammaṭṭhānampi** sukhadukkhavedanāmukhena **paḅuṇam jātam**.

Satthu kathanatthāmyeva avasissatīti, “kulaputtassa paṭivijjhanattha” nti vuttamevattham nisedheti, tasmā vuttamevattham samatthetum, “**imasmim hi**” tiādi vuttam. **Kulaputtassa**

rūpāvacarajjhāneti kulaputtana adhigatarūpāvacarajjhāne. Tenāha – “**bhikkhu paguṇaṃ tava idaṃ rūpāvacaracattajjhāna**”nti. Yaṃ kiñci suvaṇṇatāpanayogyaṃ aṅgārabhājanāṃ idha “**ukkā**”ti adhippetanti āha “**aṅgārakapalla**”nti. **Sajjeyyā**ti yathā tattha pakkhittasuvaṇṇaṅca tappati, evaṃ paṭiyādiyeyya. **Nihaṭadosanti** vigatībhūtakāḷakaṃ. **Apanītakasāvanti** apagatasukhumakāḷakaṃ.

Ariyamagge paṭiṭṭhāpetukāmena nāma sabbasmimpi lokiyadhamme virajjanatthāya dhammo kathetabboti adhippāyena, “**kasmā panā**”tiādinā codanā katā. Vineyyadamanakusalena bhagavatā veneyyajjhāsayaśasena tāva cattutthajjhānupekkhāya vaṇṇo kathitoti tassa parihāraṃ vadanto, “**kulaputtassā**”tiādimāha.

361. Tadanudhammanti tassa arūpāvacarassa kusalassa anurūpadhammaṃ, yāya paṭipadāya tassa adhigamo hoti, tassa pubbhāgapaṭipadanti attho. Tenāha “**rūpāvacarajjhāna**”nti. **Taggahaṇā**ti tassa gahaṇena tassā paṭipattiyā paṭipajjamānena. **Ito uttarinti** “viññāṇaṅcāyatana”ntiādisu.

362. Tassevāti arūpāvacarajjhānassa. Etaṃ pana savipākaṃ arūpāvacarajjhānaṃ samecca sambhuyya paccayehi katattā **saṅkhatam**. **Pakappitanti** paccayavasena savihitaṃ. **Āyūhitanti** sampiṇḍitaṃ. **Karontena karīyatī**ti paṭipajjanakena paṭipajjīyati saṅkharīyati. Nibbānaṃ viya na niccaṃ na sassataṃ. Atha kho khaṇe khaṇe bhijjanasabhāvātāya **tāvakālikam**. Tato eva cavanādisabhāvanti sabbametaṃ rūpāvacaradhammesu ādinavavibhāvanam. **Dukkhe paṭiṭṭhitanti** saṅkhāradukkhe paṭiṭṭhitaṃ. **Atāṇanti** cavanasabhāvāditāya tāṇarahitaṃ. **Aleṇanti** tato arakkhattā līyanatthānarahitaṃ. **Asaraṇanti** appaṭisaraṇam. **Asaraṇībhū**nti sabbakālampi appaṭisaraṇam.

Samattapattavise khandhādīsu gahite duttikicchā siyāti, “**kandham vā sīsam vā gahetum adatvā**”ti vuttaṃ. **Evamevā**ti etthāyaṃ upamāsaṃsandana – cheko bhisakko viya sammāsambuddho. Visavikāro viya kilesadukkhānubandho, bhisakkassa viya ṭhānato cāvetvā upari āropanam viya bhagavato desanānubhāvena kulaputtassa kāmaḥhave nikantiṃ pariyādāya arūpajjhāne bhavanam. Bhisakkassa viya otāretvā pathaviyam pātanam viya kulaputtassa orambhāgiyakilesadukkhāpanayanam.

Asampattassāti arūpāvacarajjhānam anadhigatassa. **Appaṭiladdhassevā**ti tassa vevacanam. **Sabbameta**nti “aniccam adhuva”ntiādinā vitthārato vuttaṃ sabbametaṃ ādinavam. **Ekapadeneva** “**saṅkhatameta**”nti **kathesi** saṅkhatapadeneva tassa atthassa anavasesato pariyādinattā.

Nāyūhatīti bhavakāraṇacetanāvasena byāpāram na samūheti na sampiṇḍeti. Tenāha – “**na rāsim karotī**”ti. Abhisāṅkharanam nāma cetanābyāpāroti āha – “**na abhisāṅcetaṇatī**”ti. Taṃ pana phaluppādanasamatthātāya phalena kappananti āha “**na kappeti**”ti. Sace abhisāṅkharacetanā uḷārā, phalamahattasaṅkhātāya vuḍḍhiyā hoti, anuḷārā ca avuḍḍhiyāti āha – “**vuḍḍhiyā vā parihāniyā vā**”ti. **Buddhavisaye ṭhatvā**ti bhagavā attano buddhasubuddhatāya sīhasamānavuttitāya ca desanam ukkaṃsato sāvakehi pattabbaṃ viśesaṃ anavasesento tathā vadati, na sāvakaṃvisayaṃ atikkamitvā attano buddhavisayameva desento. Tenāha – “**arahattanikūṭam gaṇhī**”ti. Yadi kulaputto attano...pe... paṭivijjhi, atha kasmā bhagavā desanāya arahattanikūṭam gaṇhīti āha “**yathā nāmā**”tiādi.

Ito pubbeti ito anāgāmiphalaḍhigamato uttari upari. **Assā**ti kulaputtassa. **Kathentassa** bhagavato dhamme **neva kaṅkhā na vimati** paṭhamamaggeneva kaṅkhāya samucchinnattā. **Ekaccesu ṭhānesū**ti tathā vineyyaṭhānesu. Tathā hi ayampi kulaputto anāgāmiphalam patvā bhagavantam sañjāni. Tena vuttaṃ “**yato anenā**”tiādi.

363. Anajjhositāti anajjhosanīyāti ayamatthoti āha – “**gilitvā pariniṭṭhāpetvā gahetum na yuttā**”ti.

364. Rāgo va anusayo **rāgānusayo**, so ca paccayasamavāye uppajjanārahoti vattabbatam labhatīti vuttam – “**sukhavedanam ārabha rāgānusayo uppajjeyyā**”ti. Na pana tassa uppādanam atthi khaññattayasamāyogāsambhavato. Esa nayo sesesupi. **Itaranti** adukkhamasukhavedanam. **Visaṃyuttoti** kenaci saññojanena asaṃyuttatāya eva niyatavippayutto. Kāyassa koṭi paramo anto etassāti **kāyakoṭikam. Dutiyapadeti** “jīvitapariyantika”nti imasmiṃ pade. **Visevanassāti** upādānassa. **Sītībhavissantīti** padassa “nirujjhissantī”ti attho vutto, katham pana vedayitānam dvādasasu āyatanesu nirujjhanam sītībhāvappattīti codanam sandhāyāha – “**kilesā hī**”tiādi. **Samudayapañhenāti** mahāsati paṭṭhāne (dī. nī. 2.400; ma. nī. 1.133) samudayasaccanīrodhapañhena. Nanu sabbaso kilesapariḷāhavigame sītībhāvo nāma vedanānīrodhamattena adhippeto; tena idha vedayitāni vuttāni, na kilesāti vedayitānam accantanīrodhasaṅkhāto sītībhāvopi kilesasamucchedenevāti āha “**vedayitānipī**”tiādi.

365. **Idam opammasaṃsandananti** ettha saññojanā dīpasikhā viya, adhiṭṭhānakapallikā viya vedanāya nissayabhūtā cattāro khandhā, telam viya kilesā, vaṭṭi viya kammavaṭṭam, upaharaṇakapuriso viya vaṭṭagāmī puthujjano, tassa sīsacchedakapuriso viya arahattamaggo santānassa samucchedakaraṇato, anāhārāya dīpasikhāya nibbāyanam viya kammakilesānam anantarapaccayato anāhārāya vedanāya anupādīsēsavasena nibbāyanam.

Ādimhi samādhivipassanāpaññāhīti pubbabhāgapaṭipadābhūtā tayā paṇṇasamādhito arahattassa padaṭṭhānabhūtavipassanāpaññāto ca. **Uttaritarāti** visiṭṭhatarā. **Evam samannāgatoti** ettha **evam**-saddo idaṃsaddatthavacanoti āha – “**iminā uttmena arahattaphalapaññādhiṭṭhānenā**”ti. Sabbam vaṭṭadukkham khepetīti **sabbadukkakkhayo**, aggamaggo, taṃpariyāpannatāya tattha ñāṇanti āha – “**sabbadukkakkhaye ñāṇam nāma arahattamagge ñāṇa**”nti. **Arahattaphale ñāṇam adhippetam** vuttanayena sabbadukkakkhaye sante tannimittam vā uppannañāṇanti katvā. **Tassāti**, “evam samannāgato bhikkhu iminā paramena paññādhiṭṭhānena samannāgato hotī”ti vuttabhikkhuno.

366. **Hīti yasmā. Vimuttīti** arahattaphalavimutti, tasmā sabbadukkakkhaye ñāṇanti arahattaphalañāṇam adhippetam. **Saccanti paramatthasaccam nibbānam**, na maggasaccam. Kāmam arahattaphalavimutti paṭipakkhehi akopaniyatāya akuppā, “sacce ṭhitā”ti pana vacanato, “**akuppārammaṇakaraṇena akuppāti vuttā**”ti āha. **Vitathanti** naṭṭham, jarāya maraṇena ca vipariṇāmetabbatāya yādisam uppādāvattāya jātam, tato aññādisanti attho. Tathā hi taṃ jarāmarāṇehi parimusitabbarūpatāya “musā”ti vuttam. Tenāha – “**mosadhammanti nassanasabhāva**”nti. **Tam avitathanti** tam vuttanayena avitatham nāma, **taṃ sabhāvo** sabbakālam teneva labbhanato. **Samathavipassanāvasena vacīsaccatoti** samathavipassanāvasena yaṃ visuddhimattam vacīsaccam, tato. **Dukkhasaccasamudayasaccehi** tacchavipallāsabhūtasabhāvehi. Iti nesam yathāsakam sabhāvena avitathabhāve amosadhammatāya tehipi avitathabhāvā paramatthasaccam nibbānameva **uttaritam**. **Tasmāti** nibbānasēva uttaritarabhāvato.

367. Upadhīyati ettha dukkhanti **upadhī**, khandhā kāmaguṇā ca. Upadahanti dukkhanti **upadhī**, kilesābhisaṅkhārā. **Paripūrā gahitā parāmaṭṭhāti** pariyaṭṭabhāvena taṇhāya gahitā diṭṭhiyā parāmaṭṭhā. **Samathavipassanāvasena kilesapariccāgatoti** vikkhambhanavasena tadaṅgappahānavasena ca kilesānam pariccājanato. **Uttaritaro** visiṭṭhatarassa pahānappakārassa abhāvato.

368. **Āghātakaraṇavasenāti** cetasi kāghātassa uppajjanavasena. **Byāpajjanavasenāti** cittassa vipattībhāvavasena. **Sampadussanavasenāti** sabbaso dussanavasena. **Tīhi** padehi yadi arahattamaggena kilesānam pariccāgo cāgādhiṭṭhānam, arahattamaggeneva nesam vūpasamo upasamādhīṭṭhānam hotīti dasseti. Ettha visesena pariccāgo sampajhanam anuppattidhammatāpādanam cāgo, tathā pana pariccāgena yo so nesam tadā vūpasantatāya abhāvo, ayaṃ upasamotī ayametesam viseso.

369. **Maññitanti** maññanā, “etaṃ mamā”tiādinā kappanāti attho. Avijjāvibandhanatanḥgāhādīnam sādharāṇabhāvato **ayamahanti** ettha **ahanti** diṭṭhimaññanādassanam,

sā pana diṭṭhi mānamaññanāya attaniyagāhavasena hotīti sveva “aya”nti iminā gahitoti āha – “**ayamahanti ekam taṇhāmaññitameva vaṭṭati**”ti. **Ābaddhaṭṭhenā**ti paṭipīlanatṭhena. Maññanāvasena hi sattānaṃ tathā hoti. **Antodosatṭhenā**ti abbhantaraduṭṭhabhāvena. Maññanādūsitattā hi sattānaṃ attabhāvo dukkhatāmūlayatto, kilesāsucipaggharaṇato uppādanirodhabhaṅgehi uddhamuddhaṃ pakkapabhinno hotīti phalūpacārena “maññitaṃ gaṇḍo”ti vutto. **Anupaviṭṭhaṭṭhenā**ti anupavisitvā hadayamāhacca adhiṭṭhānena. Maññitañhi pīlājananato antotudanato duruddharaṇato sallaṃ. **Khīṇāsavamuni** sabbaso kilesānaṃ santattā, tato eva pariḷāhānaṃ parinibbutattā vūpasantattā **santo** upasanto **nibbutoti vuccati**. **Yattha ṭhitanti** yasmīṃ asekkhabhūmiyaṃ ṭhitaṃ. Yadi bhagavā attano desanāñānānurūpaṃ desanaṃ pavattāpeyya, mahāpathaviṃ pattharantassa viya, ākāsaṃ pasārentassa viya, anantāparimeyyalokadhātuyo paṭicca tesam ṭhitākāraṃ anuppūraṃ vicinantassa viya desanā pariyoṣānaṃ na gaccheyya. Yasmā panassa vineyyajjhāsayanurūpameva desanā pavatti, na tato paraṃ aṇumattampi vadḍhati. Tasmā vuttaṃ – “**sabbāpi dhammadesanā saṃkhittāva, vitthāradesanā nāma natthi**”ti. Nanu sattapakaraṇadesanā vitthārakathāti? Na sāpi vitthārakathāti āha – “**samantapaṭṭhānakathāpi saṃkhittāyevā**”ti. Sannipatitadevaparisaṃyā ajjhāsayanurūpameva hi tassāpi pavatti, na satthudesanāñānānurūpanti. **Yathānusandhiṃ pāpesi** yathāuddiṭṭhe anupubbena anavasesato vibhajanavasena desanāya niṭṭhāpitattā. **Vipañcitaññū...pe... kathesi** nātisankhepavitthāravasena desitattā.

370. Aṭṭhannaṃ parikkhārānanti nayidamanavasesapariyādānaṃ, lakkhaṇavacanaṃ panetaṃ, aññatarassāti vacanaseso. Tathā hi, “mayhaṃ iddhimayaparikkhārālābhāya paccayo hotū”ti patthanaṃ paṭṭhapetvā pattacīvaraṃ, pattam, cīvarameva vā dinne carimabhava iddhimayaparikkhāro nibbattatīti vadanti. **Adinnattā**ti kecivādo, tenāha “**kulaputto**”tiādi. **Okāsābhāvato**ti upasampadālakkhaṇassa asambhavato. Tenāha – “**kulaputtassa āyuparikkhāna**”nti. **Udakatittha...pe... āraddho** paramappicchabhāvato.

Vibbhantāti bhantacittā. **Siṅgena vijjhivā ghātesī** purimajātībaddhāghātātāyāti vadanti.

Mānusaṃ yoganti manussatthabhāvaṃ. Attabhāvo hi yujjati kammakilesehīti “yogo”ti vuccati. **Upaccagunti** upagacchimsu. **Upakotiā**di tesam nāmāni.

Gandhakaṭṭhehīti candanāgarusaḷaladevadāruādīhi gandhadārūhi. Sesam suviññeyyameva.

Dhātuvibhaṅgasuttavaṇṇanāya līnatthappakāsānā samattā.

11. Saccavibhaṅgasuttavaṇṇanā

371. Ācikkhanāti – “idaṃ dukkhaṃ ariyasaccaṃ, ayaṃ dukkhanirodhagāminī paṭipadā ariyasacca”nti ādīto kathanam. **Desanā**ti tasseva atthassa atisaṃjānaṃ pabodhanaṃ. **Paññāpanā**ti pakārehi ñāpanā, sā pana yasmā itthamidanti veneyyānaṃ paccakkhato dassanā, tesam vā santāne patiṭṭhāpanā hoti, tasmā āha – “**dukkhasaccādīnaṃ ṭhapanā**”ti. **Paṭṭhapanā**ti patiṭṭhāpanā. Yasmā paṭṭhapiyamānasabhāvā desanā bhājanaṃ upagacchantī viya hoti, tasmā vuttaṃ – “paññāpanā”ti, jānāpanāti attho. **Vivaṭakaraṇā**ti desiyamānassa atthassa vivaṭabhāvakaraṇam. **Vibhāgakiriyā**ti yathāvuttassa atthavibhāgassa vitthārakaraṇam. **Pākaṭabhāvakaraṇanti** agambhīrabhāvāpādanam. **Aparo nayo** – catusaccasaññitassa atthassa paccemaṃ sarūpato dassanavasena idanti ādīto sikkhāpanam kathanam **ācikkhanā**, evam parasantāne pabodhanavasena pavattāpanā **desanā**, evam vineyyānaṃ cittaparitosajananena tesam buddhiparipācanaṃ “**paññāpanā**”ti vuccati. Evam paññāpentī ca sā desiyamānaṃ attham veneyyasantāne pakārato ṭhapeti patiṭṭhāpetīti “**paṭṭhapanā**”ti vuccati. Pakārato ṭhapentī pana saṃkhittassa vitthārato paṭivuttassa punābhīdhānato “**vivaraṇā**”ti, tassevatthassa vibhāgakaraṇato “**vibhajanā**”ti, vuttassa vitthārenābhīdhānato vibhattassa hetudāharaṇadassanato, “**uttānikamma**”nti vuccati. Tenāha – “**pākaṭabhāvakaraṇa**”nti, hetūpamāvasenatthassa pākaṭabhāvakaraṇatoti attho.

Anuggāhakāti anuggaṇhanakāmā. Svāyamanuggaho saṅgahavattuvasena pākaṭo hotīti āha “**āmisasaṅgahenā**”tiādi. Janetā janettīti āha “**janikā mātā**”ti. Vuddhiṃ parisam āpādetīti **āpādetā**. Tenāha “**pošetā**”ti. Idāni dvinnam mahātherānam yathākkamaṃ sabrahmacārīnam bhagavatā vuttehi janikaposikamātuttāhāniyehi saṅgāhakataṃ vitthārato dassetuṃ, “**janikamātā hī**”tiādi vuttaṃ. Paratoghosena vināpi uparimaggādhigamo hotīti “**paccattapurisakārenā**”ti vuttaṃ. Paṭhamamaggo eva hi sāvakanam ekantato ghosāpekkhoti. **Pattēsupīti pi**-saddena pageva appattēsupīti dasseti. Bhavassa appamattakātā nāma ittarakālatāyāti āha “**accharāsaṅghātamattampī**”ti. **Janetāti** janako, thero pana ariyāya janayitā. **Āpādetāti** vadḍhetā paribrūhetā. Purimasmiṃ saccadvaye sammāsanaggahaṇam lokiyattā tassa, itarasmīṃ tassa aggaṇam lokuttarattā.

Kāmehi nikkhanto saṅkappo **nekkhammasaṅkappo**. Svāyamaṃ tato nikkhamanatto tesam paṭipakkabhāvato tehi viśamsaggato virajjanato samucchindanato sabbaso vivittabhāvato ca hotīti dassetuṃ, “**kāmapaccanīkaṭṭhenā**”tiādi vuttaṃ. Tattha **kāmapadaghātanti** yathā kāmo padaṃ patiṭṭham na labhati, evaṃ hananam, kāmasamucchadanti attho. Kāmehi sabbaso vivittattā kāmavivitto, ariyamaggo, tassa anto, ariyaphalam, tasmīṃ **kāmavivittante**. **Eseva nayoti** iminā “byāpādapaccanīkaṭṭhenā”tiādiyojanam atidisati. Sabbe cete nekkhammasaṅkappādayo nānācittesu labbhantīti yojanā. Yadi ekacitte labbhanti, katham tividhamicchāsaṅkappānam samugghātoti āha “**tatra hī**”tiādi. **Na nānā labbhātīti** iminā tividhakiccakāritam sammāsaṅkappassa dasseti. Kiccavasena hi tassa nāmassa lābho. Sammāvācādīnampi maggakkhaṇe ekacitte labbhamānānampi catukiccakāritāya catubbidhanāmāditā veditabbā. Sesam suviññeyyameva.

Saccavibhaṅgasuttavaṇṇanāya līnatthappakāsanā samattā.

12. Dakkhiṇāvibhaṅgasuttavaṇṇanā

376. Mahāpajāpatigotamīti ettha **gotamīti** tassa gotamagottato āgataṃ nāmaṃ, mahāpajāpati pana guṇato. Tam vivarituṃ, “**nāmakaraṇadivase panassā**”tiādi vuttaṃ. Mahatiṃ ulāram pajam janānuposanehi parirakkhatīti **mahāpajāpati**. Paribhogavasena na haññatīti **ahataṃ**. **Sippikānanti** tantavāyānam. **Vāyanatṭhānanti** vīnatṭhānam. **Tāni maṃ na toseti** kāyikassa puññassa abhāvato. Tenāha – “**sahatthā katameva maṃ toseti**”ti. **Pisitivā** nibbattanam katvā. **Poṭhetvāti** sukhumabhāvāpādanattham dhanukena netvā. **Kālānukālāṇca dhātigaṇaparivutā gantvā vemakoṭṭim aggaḥesi** ekadivasanti adhippāyo. Evañhi “ekadivasam pana...pe... akāsi”ti purimavacanena tam na virujjheyya.

Cha cetanāti chabbidhā cetanā. Na hi tā chayeva cetanāti. **Saṅghe gotami dehi...pe... saṅgho cāti** idameva suttapadam. **Saṅghe gotami dehīti** saṅghassa dānāya niyojesi, tasmā saṅghova dakkhiṇeyyataroti ayamevettha attho. **Yadi evantiādinā** tattha byabhicāram dasseti. **Rājamahāmattādayotiādinā** tattha byatirekato nidassanam āha. **Mahantatarā bhavyeyyunti** ānubhāvādinā mahantatarā bhavyeyyūṃ, na ca tam atthīti. **Tasmāti** yasmā guṇavisitṭhahetukam dakkhiṇeyyatam anapekkhitvā attano dīyamānassa dāpanam labhati, tasmā. **Mā evam gaṇhāti** sammāsambuddhato saṅghova dakkhiṇeyyo”ti mā gaṇha.

Tattha nicchayasādhakam suttapadam dassento, “**nayimasmiṃ loke...pe... vipulaphalesina**”nti āha. Svāyamattho ratanasutte (khu. pā. 6.3; su. ni. 226), “yam kiñci vitta”nti gāthāya, aggasādasuttādīhi (itivu. 90) ca vibhāvetabboti. Tenāha – “**satthārā uttaritaro dakkhiṇeyyo nāma natthi**”ti.

Gotamiyā antimabhavikatāya dānassa dīgharattam hitāya sukhāya anuppādanato na tam garutaram saṅghassa pādāpane kāraṇanti āha – “**pacchimāya janatāyā**”tiādi. **Vacanatopīti** tassa vatthayugassa satthu eva paṭiggahaṇāya vacanatopi. Tenāha “**na hī**”tiādi.

Satthā saṅghapariyāpannova īdise thāne aggaphalaṭṭhatāya aṭṭha-ariyapuggalabhāvato, sace panassa na sayam saṅghapariyāpannatā, katham saṅghe pūjite satthā pūjito nāma siyāti adhippāyo. **Tiṇi** saraṇagamanāni tayo eva aggapasādāti vakkhatīti adhippāyo. Abhidheyyānurūpāni hi līngavacanāni. **Na ruhati** ayāthāvapaṭipattibhāvato, na gihivesaggahaṇādinā gihibhāvassa paṭikkhipitattā. **Na vattabbametam “satthā saṅghapariyāpanno”**ti satthubhāvato. Sāvakasamūho hi saṅgho. Saṅghagaṇe hi satthā uttaritaro anaññasādhāraṇaguṇehi samannāgatabhāvato mūlaratanabhāvato ca.

377. Sampatiṇṇatassa mahāsattassa sattapadavītiḥāragamanam dhammatāvasena jātam, param tadaññadaharasadisī paṭipattīti āha – **“hatthapādakiccam asādhentesū”**ti.

378. Paccūpakāram na sukaram vadāmi anucchavikakiriyāya kātuṃ asakkuṇeyyattā. Abhivādentī etenāti **abhivādanam**. Vandamānehi antevāsikehi ācariyam “sukhī hotū”tiādīnā abhivādentī nāma. Tena vuttam **“abhivādana”**nti. **Tadabhimukho...pe... vanditvā nipajjati**, seyyathāpi āyasmā sārīputto. Kālānukālam upaṭṭhānam bījayanapādasambāhanādi **anucchavikakammassa karaṇam** nāma. **Anucchavikam kiriyam kātuṃ na sakkotiyeva**, yasmā ācariyena katassa dhammānuggahassa antevāsīnā kariyamāno āmisānuggaho saṅkhampi kalampi kalabhāgampi na upetiyevatī. Tena vuttam **“na suppatikāram vadāmi”**ti.

379. Paṭipuggalikam dakkhiṇam ārabha samuṭṭhitam, “tam me bhagavā paṭiggaṇhatū”ti mahāpajāpatigotamiyā vacanam nimittam katvā desanāya uṭṭhitattā. Na kevalaṅca tassā eva vacanam, atha kho **ānandattheropi...pe... samādapesi**, tasmā vibhāgato **cuddasasu...pe... hotīti dassetum, imam desanam ārabhi**. Tattha patipaccekam puggalam dīyatīti **paṭipuggalikam**. Paṭhamasaddo yathā aggattho, evam seṭṭhapariyāyopīti āha **“jetṭhakavasenapī”**ti. **Aggā** uttame khetto pavattattā. **Dutiyaṭṭhiyāpi paramadakkhiṇāyeva** sabbaso sammāvikkhambhitarāgādīkilesattā. Rāgādayo hi adakkhiṇeyyabhāvassa kāraṇam. Tenevāha – “tiṇadosāni khettāni, rāgadosā ayaṃ pajā”tiādī (dha. pa. 356). Yasmā pana savāsanam sabbaso samucchinnakīlesehi tato eva sabbaso appaṭihataññācārehi anantāparimeyyaguṇagaṇādhārehi sammāsambuddhehi sadiso sadevake loke koci dakkhiṇeyyo natthi. Tasmā **“paramadakkhiṇāyevā”**ti sāsankam vadati. Yasmā pañcābhīṇṇo aṭṭhasamāpattilābhī eva hoti lokiyābhīṇṇanam aṭṭhasamāpattiadhiṭṭhānattā, tasmā **“lokiyapañcābhīṇṇa”**icceva vuttam, na “aṭṭhasamāpattilābhīmhi”ti tāya avuttasiddhattā. **Gosīladhātukoti** gosīlasabhāvo, sīlavatā sadīsasīloti attho. Tenāha **“asaṭho”**tiādī. Tena na alajjidhātuko pakatisiddho idha puthujjanasīlavatī adhippetoti dasseti.

Paricchindantoti ettakoti paccekappamāṇato tato eva aññamaññam asaṅkaratova paricchindanto. Katham pana asaṅkhyeyyabhāvena vuccamāno vipāko paricchinnō hoti? Sopi tassa paricchedo eva itarehi asaṅkiṇṇabhāvādīpanato, etadatthameva pubbe asaṅkaraggahaṇam katam. **Guṇavasenāti** lakkhaṇasampannādiguṇavasena. **Upakāravasenāti** bhogarakkhādiupakāravasena. **Yam posanattam dinnam, idam na gahitam** dānalakkhaṇāyogato. Anuggahapūjanicchāvasena hi attano deyyavatthupariccāgo dānam bhayarāgaladdhukāmakulādivasena sāvajjābhāvato. **Tampi na gahitam** ayāvadatthataaparipuṇṇabhāvena yathādhīppetaphaladānāsamatthabhāvato. **Sampattassāti** santikāgatassa. Tena sampattipayojane anapekkhatam dasseti. **Phalam paṭikaṅkhitvāti** “idam me dānamayam puññam āyatim sukhahitabhāvāya hotū”tiādīnā phalam paccāsīsitvā. Tenassa phaladāne namiyatam dasseti, **yāvadatthanti** iminā paripuṇṇaphalataṃ. **Sataguṇāti** ettha **guṇasaddo** na “guṇena nāmam uddhareyya”ntiādīsū (dha. sa. aṭṭha. 1313; udā. aṭṭha. 53; paṭi. ma. aṭṭha. 1.1.76; netti. aṭṭha. 4.38) viya sampattiattho, “taddiguṇa”ntiādīsū viya na vaḍḍhanattho, “pañca kāmaguṇā loke, manochaṭṭhā paveditā”tiādīsū (su. ni. 173) viya na koṭṭhāsattho, “antam antaguṇa”ntiādīsū (dī. ni. 2.377; ma. ni. 1.110; khu. pā. 3) viya na antabhāgattho, atha kho ānisamsatthoti dassento, **“satānisamsā”**ti āha, te ānisamsa sarūpato dassetum, **“āyusata”**ntiādī vuttam. **Sataguṇāti** vā satavaḍḍhikāti evamettha attho daṭṭhabbo. **Nipparitasam karotīti** āyuādīnam ānisamsānam aparittāsam karoti. Atha vā **nipparitasam karotīti** āyuādīnimittam aparittāsam karoti. Atha vā **nipparitasam karotīti** āyuādīni tato uttarimpi āhārādīhetu aparittāsam karoti. Attabhāvavinimuttasaṅcaraṇassa abhāvā,

“**bhavasatepi vutte ayamevattho**”ti vuttam. **Sabbatthāti**, “puthujjanadussīle”tiādīsu sabbavāresu. **Nayo netabboti**, “āyusahassaṃ vaṇṇasahassa”ntiādiko nayo.

Sāsanāvataranaṃ nāma yāvadeva vaṭṭadukkhanittharaṇattham, tañca maggapaṭivedhanaṃ, tasmā nibbedhabhāgiyasaraṇagamaṇaṃ sikkhāpadasamādānaṃ pabbajjā upasampadā sīlaparipūraṇaṃ adhiccitasikkhānuyogo vipassanābhāvanāti sabbāpesā sotāpattiphalasacchikiriyāya paṭipatti eva hotīti āha – “**tisaraṇaṃ gato upāsakopi**”tiādi. Tattha yathā nibbedhabhāgiyo samādhi tāva nāma paramparāya ariyamaggādhigamassa paccayabhāvato upanissayo; tathā nibbedhabhāgiyaṃ sīlaparipūraṇaṃ upasampadā pabbajjā upāsakassa dasasu pañcasu sīlesu paṭiṭṭhānaṃ antamaso saraṇādhigamaṇampi nibbedhabhāgiyaṃ ariyamaggādhigamassa upanissayo hotiyevāti, “sabbāpesā sotāpattiphalasacchikiriyāya paṭipatti”ti vuttā. Tattha anaññasādhāraṇa-vijjācaraṇādi-asāṅkhyeyyaaparimeyya-guṇa-samudaya-pūrite bhagavati saddhamme ariyasāṅhe uḷāratarabahumānagāravataṃ gato. “Sammāsambuddho bhagavā, svākhāto dhammo, suppaṭipanno saṅgho”ti tapparāyaṇatādiākārappatto ñāṇaparisoḍhito pasādo saraṇagamaṇanti tena vatthugatena pasādena paribhāvite santāne kataṃ puññakkhettsampattiyā mahapphalaṃ mahānisamsameva hotīti āha – “**tasmim dinnadānaṃpi asaṅkhyeyyaṃ appameyya**”nti. Tayidaṃ saraṇaṃ vatthuttaye pasādabhāvena ajjhāsayasampattimattam, tādissassa pana pañcasīlam ajjhāsayasampattiupathambhito kāyavacīsaṃyamoti tattha dinnam tato uttari mahapphalanti, dasasīlam pana paripuṇṇuposathasīlam, tattha dinnam mahapphalanti, “**tato uttari mahapphala**”nti vuttam. Sāmaṇerasīlādīnaṃ pana uttari viṣiṭṭhatarādibhāvato tattha tattha dinnassa visesamahapphalatā vuttā.

Maggasamaṅgitā nāma maggacittakkhaṇaparicchinā, tasmiñca khaṇe kathaṃ dātum paṭiggahetuñca sambhavatīti codeti “**kiṃ pana maggasamaṅgissa sakkā dānaṃ dātu**”nti. Itaro tādise sati samayeti dassento, “**āma sakkā**”ti paṭijānitvā, “**āraddhavipassako**”tiādinā tamattham vivarati. **Tasmim khaṇeti** tasmim pakkhipanakkhaṇe. Yadi aṭṭhamakassa sotāpannassa dinnadānaṃ phalato asaṅkhyeyyameva, ko nesam visesoti āha “**tatthā**”tiādi. Tena satipi asaṅkhyeyyabhāvasāmaññe atthi nesam appabahubhāvo saṃvaṭṭaṭṭhāyī asaṅkhyeyyamahākappāsaṅkhyeyyānaṃ viyāti dasseti. Maggasamaṅgīnaṃ tena tena odhinā saṃkilesadhammānaṃ pahīyamānattā vodānadhammānaṃ vaḍḍhamānattā aparīyosita-kiccattā aparipuṇṇaguṇatā, parīyosita-kiccattā phalasamaṅgīnaṃ paripuṇṇaguṇatāti tamtam maggaṭṭhehi phalaṭṭhānaṃ khettātīsayatā veditabbā. Heṭṭhimahēṭṭhimehi pana maggaṭṭhehi uparimānaṃ maggaṭṭhānaṃ phalaṭṭhehi phalaṭṭhānaṃ uttaritaratā pākāṭā eva. Tathā hi uparimānaṃ dinnadānassa mahapphalatā vuttā.

380. Kāmañcetha buddhappamukhe ubhatoṅghe kevale ca bhikkhusaṅghe dānaṃ atthi eva, na pana buddhappamukhe bhikkhusaṅghe, taṃ pana buddhappamukhaubhatoṅgheneva saṅgahitanti aviruddham. **Na pāpuṇanti** mahapphalabhāvena sadisatampi, kuto adhikataṃ.

“Tathāgate parinibbute ubhatoṅghassa” icceva vuttattā – “**kiṃ panā**”tiādinā codeti. Itaro parinibbute tathāgate taṃ uddissa gandhapupphādipariccāgo viya cīvarādipariccāgopi mahapphalo hotiyevāti katvā paṭipajjanavidhiṃ dassetuṃ, “**ubhatoṅghassa**”tiādi vuttam. “Ettakāyeva, bhikkhū uddisathā”ti evaṃ paricchedassa akaraṇena upacārasīmāpariyāpannānaṃ khettapariyāpannānaṃ vasena **aparicchinnakamahābhikkhusaṅghe**.

Gottaṃ vuccati sādharmaṇānaṃ, **mattasaddo** luttaniddiṭṭho, tasmā samaṇāti gottamattam anubhavanti dhārentīti **gotrabhuno**. Tenāha “**nāmamattasamaṇā**”ti. Diṭṭhisīlasāmaññena saṃhato samaṇagaṇo **saṅgho**, tasmā saṅgho dussīlo nāma natthi. **Guṇasaṅkhāyāti** ānisaṃsagaṇanāya, mahapphalatāyāti attho. **Kāsāva...pe... asaṅkhyeyyāti** vuttā saṅgham uddissa dinnattā. Yathā pana saṅgham uddissa dānaṃ hoti, taṃ vidhiṃ dassetuṃ, “**saṅhagatā dakkhiṇā**”tiādi vuttam. Tattha **cittikāraṇti** gāraṃ.

Saṅghato na puggalato. **Aññathattam āpajjatīti** “imassa mayā dinnam saṅghassa dinnam hoti”ti

evaṃ cittam anuppādetvā, “saṅghassa dassāmī”ti deyyadhammaṃ paṭiyādetvā sāmaṇerassa nāma dātābbaṃ jātanti aññathattaṃ āpajjati; tasmā tassa dakkhiṇā saṅghagatā na hotiyeva puggalavasena cittaṃ pariṇāmitattā. **Nibbematiko hutvāti** “kiṃ nu kho mayā imassa dinnam hoti vā na vā”ti vimatiṃ anuppādetvā, “yo panā”tiādinā vuttākārena karoti.

Tatthātiādinā vuttassevatthassa pākāṭakaraṇattham vatthum nidasseti, “**parasamuddavāsino**”tiādinā. **Opuñjāpetvā** paribhaṇḍam kāretvā, haritagomayena upalimpitvāti attho. **Kāsāvakaṇṭhasaṅghassāti** kāsāvakaṇṭhasamūhassa. **Ko sodhetī** mahapphalabhāvakarāṇena ko visodheti. Mahapphalabhāvāpattiyā hi dakkhiṇā visujjhati nāma. Tattha yesam hatthe dinnam, tesam vasena paṭiggāhakato dakkhiṇāya visuddhattā, – “tadāpāham, ānanda, saṅghagataṃ dakkhiṇam asaṅkhyeyyam appameyyam vadāmi”ti (ma. ni. 3.380) ca vuttam, tasmā kammavaseneva dakkhiṇāvisuddhiṃ pucchati. Itaro ariyasāṅghe dinnadakkhiṇāya nibbisiṭṭham katvā vuttattā matthakappattasseva ariyasāṅghassa vasena dakkhiṇāvisuddhiṃ dassento, “**sāriputta...pe...sodhetī**”ti vatvā puna, “ye keci arahanto sodhetī”ti dassento, “**apicā**”tiādimāha. **Therā ciraparinibbutāti** idam ajjatanānampi ariyānam sāvakaṭam dassentena maggasodhanavasena vuttanti daṭṭhabbam, na uddissa puññakaraṇe sati akaraṇapattiyā. Evañhi “asītimahātherā sodhetī”ti idam suvuttam hoti, na aññathā.

“Saṅghagatāya dakkhiṇāya”ti kāmañcetaṃ sādharmaṇavacanam, tathāpi tattha tattha puggalaviseso ñātābbo dassento, “**atthi buddhappamukho saṅgho**”tiādimāha. **Na upanetabbo** bhagavato kāle bhikkhūnam abhiññāpaṭisambhidāguṇavasena ativiya uḷārabhāvato, etarahi tadabhāvato. **Etarahi saṅgho...pe... na upanetabboti** ettha nayānusārena attho vattabbo. **Tena teneva samayenāti** tassa tassa kālassa sampattivipattimukhena paṭipattiyā uḷāratam anulāratañca ulliṅgeti. Yattha hi bhikkhū guṇehi sabbaso paripuñṇā honti, tasmim samaye saṅghagatā dakkhiṇā itarasmim samaye dakkhiṇato mahapphalatarāti daṭṭhabbā. **Sāṅghe cittikāram kātum sakkontassāti** suppaṭipannatādim saṅghe āvajjitvā saṅghagatena pasādena saṅghassa sammukhā viya tasmim puggale ca gāravavasena dentassa puthujjanasamaṇe dinnam mahapphalataram saṅghato uddisitvā gahitattā, “saṅghassa demī”tiyeva dinnattā ca.

Eseva nayoti iminā, “sotāpanne dinnam mahapphalatara”nti evamādim atidisati. **Ādi-saddena** uddisitvā gahito sakadāgāmī, paṭipuggaliko anāgāmīti evamādi saṅgahitam. **Mahapphalatameva**. Tenāha bhagavā – “na tvevāham, ānanda, kenaci pariyaena saṅghagatāya dakkhiṇāya paṭipuggalikaṃ dānam mahapphalataram vadāmi”ti (ma. ni. 3.380). Yadi khīṇāsava dinnadānato saṅghato uddisitvā gahitadussīlepi dinnadānam mahapphalam, evam sante – “sīlavato, mahārāja, dinnam mahapphalam, no tathā dussīle”ti idam kathanti āha – “**tam imam nayam gahāyā**”tiādi. Saṅghato uddisitvā gahaṇavidhiṃ pahāya dussīlasseva gahaṇavasena vuttam. **Imasmim catukke daṭṭhabbanti** imassa padassa vasena daṭṭhabbam. Tattha hi “paṭiggāhakā honti dussīlā pāpadhammā”ti āgataṃ.

381. Visujjhatīti na kilissati, mahājutikārī mahāvippahārā hotīti attho. **Sucidhammoti** rāgādiasucividhamanena sucisabhāvo. **Na pāpadhammoti** na nihīnasabhāvo pāpakiriyāya. Akusaladhammo hi ekantanihīno. Jūjako sīlavā kalyāṇadhammo na hoti. Tassa mahābodhisattassa attano puttadānam dānapāramiyā matthakam gaṇhantaṃ mahāpathavīkampanasamattham jātam, svāyam dānaguṇo vessantaramahāraññā kathetabboti.

Uddharatīti bahulam katapāpakammavasena laddhavinipātato uddharati. Tasmā natthi mayham kiñci cittaṃ aññathattanti adhippāyo.

Petadakkhiṇanti pete uddissa dātābbaḍakkhiṇam. **Pāpitakāleyevāti**, “idam dānam asukassa petassa hotū”ti uddisanavasena patte pāpitakāleyeva. **Assāti** petassa. **Pāpuṇī**ti phalasamāpattiyā vasena pāpuṇi. Ayañhi pete uddissa dāne dhammatā.

Tadā kosalarañño pariccāgavasena ativiya uḷārājḥāsayaṭṭaṃ, buddhappamukhassa ca bhikkhusaṅghassa ukkaṃsagataḡaṇaviṣṭhataṃ sandhāyāha, “**asadisadānaṃ kathetabba**”nti.

Asārampi khetanti sārāhīnaṃ dukkhettaṃ. **Samayeti** kasanārahe kāle. **Pamsum apānetvāti** nissāraṃ paṃsum nīharitvā. **Sārabījānīti** sabhāvato abhisāṅkhārato ca sārābhūtāni bījāni. **Paṭiṭṭhapetvāti** vapitvā. **Evanti** yathā kassako attano payogasampattiyā asārepi khette phalaṃ adhigacchati. Evaṃ sīlavā attano payogasampattiyā dussīlassapi datvā phalaṃ mahantaṃ adhigacchati. **Iminā upāyenāti** iminā paṭhamapade vuttanayena. **Sabbapadesūti** sabbakoṭṭhāsesu **visujjanaṃ** vuttaṃ, tatiyapade pana visujjanaṃ paṭikkhittameva.

382. Arahato dinnadānameva aggaṃ dānacetanāya kenaci upakkilesena anupakkiliṭṭhattā, paṭiggāhakassa aggadakkhiṇeyyattā. Tenāha – “**bhavālayassa bhavapattanāya abhāvato**”ti, “ubhinnampī”ti vacanaseso. **Khīṇāsavo dānaphalaṃ na saddahatīti** idaṃ tassa appahīnakilesajanassa viya kammakammaphalānaṃ saddahanākārena pavatti natthīti katvā vuttaṃ, yato arahā “asaddho akataññū ca...pe...poriso”ti (dha. pa. 97) thomīyati. Asaddahanaṃ anumānapakkhikaṃ, anumānañca saṃsayapubbakaṃ, nissandiddho ca kammakammaphalesu paccakkhabhāvaṃ gato. Tameva hi nicchitabhāvasiddhaṃ nissandiddhataṃ sandhāya – “**dānaphalaṃ saddahantā**”tiādi vuttaṃ. Yadi evaṃ tena katakammaṃ kammalakkhaṇappattaṃ hotīti āha “**khīṇāsavenā**”tiādi. Tenevāha – “**nicchandarāgattā**”ti, etañca lakkhaṇavacanāṃ, kenaci kilesena anupakkiliṭṭhattāti adhippāyo. **Assāti** khīṇāsavassa dānaṃ.

Kim pana sammāsambuddhenātiādinā dāyakato dakkhiṇāvisuddhi coditā, **sāriputtattherenāti**ādinā pana paṭiggāhakatoti vadanti; tadayuttaṃ, sāvakassa mahapphalabhāve saṃsayābhāvato, heṭṭhā nicchitattā ca, tasmā ubhayenapi dāyakato dakkhiṇāvisuddhi eva coditā. Sā hi idha sādharmaṇavasena nicchitattā saṃsayavattu. Tenāha – “**sammāsambuddhena...pe... vadanti**”ti. **Sammāsambuddhaṃ hīti**ādi yathāvuttaatthassa kāraṇavacanāṃ. **Añño dānassa vipākaṃ jānitum samattho nāma natthi** sabbaso sattānaṃ kammavipākavibhāgajānanañāṇassa ananuññatattā. Tenāha bhagavā – “yasmā ca kho, bhikkhave, sattā na jānanti, dānasamvibhāgassa vipākaṃ yathāhaṃ jānāmi, tasmā adatvā bhūñjanti”tiādi (itivu. 26). Etena ettha ñāṇavisodhanaṃ nāma kathitaṃ, na dakkhiṇāya visuddhi nāma dāyakato paṭiggāhakato ca vasena hotīti; sammāsambuddhena sāriputtattherassa dinnadānaṃ sabbaso upakkilesavisuddhiyā ñāṇassa ca ativiya uḷārattā mahānubhāvaṃ nāma siyā mahātejavantañca; na mahapphalaṃ tesam santāne paripuṇṇaphalassa asambhavato. Yadi dinnadānaṃ paripuṇṇaphalaṃ na hoti ubhayavipākādānābhāvato, pavattivipākādāyī pana hotīti dassento, “**dānaṃ hī**”tiādimāha.

Catūhīti sahayoge karaṇavacanāṃ, catūhi sampadāhi sahatatā sahitaṃ katvāti attho. Imā catasso sampadā sabbasādharmaṇavasena vuttā, na yathādhiḡatapuggalavasena. Tenāha – “**deyyadhammassa dhammenā**”tiādi. **Tasmiṃyeva attabhāveti** yasmim attabhāve taṃ dānamayaṃ puññaṃ uppannaṃ, tasmiṃyeva attabhāve vipākaṃ deti, cetanāya mahantattā diṭṭhadhammavedanīyaṃ hutvā vipaccatīti attho. **Pubbacetanādivasenāti** sannīṭṭhāpakajavanavīthito pubbāparavīthi cetanāvasena, aññathā sannīṭṭhāpakavīthiyaṃyeva pubbacetanādivasenāti vattabbaṃ siyā. Sā hi cetanā diṭṭhadhammavedanīyabhūtā tasmiṃyeva attabhāve vipākaṃ deti, na itarā. **Mahattatāti** pubbābhisaṅkhāravasena ñāṇasampayogādivasena cetanāya uḷaratā. **Khīṇāsavabhāvenāti** yassa deti, tassa khīṇāsavabhāvena. **Vatthusampannatāti** ettha yathā paṭiḡhasaññā nānattasaññānaṃ vigamena dibbavihārānaṃ vasena, byāpādasaññādīnaṃ vigamena brahmavihārānaṃ vasena, sabbaso rūpasaññānānattasaññānaṃ vigamena āneḡjavihārānaṃ vasena sabbaso niccasaññādīnaṃ paṭippassaddhiyā sabbasaṅkhāravimukhatāya ariyavihārānaṃ vasena vatthusampannatā icchitā. Taṃtaṃsamāpattisamāpajjanena santānassa nirodhasādhanaṭā taṃ divasaṃ nirodhassa sādhanatā nāma. **Vatthusampannatāti** sabbaso nirodhasamāpattisamāpajjanena vatthusampannatā icchitā; na sabbaso anavasesasaññānirodhatāyāti āha – “**taṃ divasaṃ nirodhato vuṭṭhitabhāvena vatthusampannatā**”ti. Saññānirodhassa cettha accāsannataṃ sandhāya, “**taṃ divasa**”nti vuttaṃ. Yaṃ panettha atthato

avibhattaṃ, taṃ suviññeyyameva.

Dakkhināvibhaṅgasuttavaṇṇanāya līnatthappakāsanā samattā.

Niṭṭhitā ca vibhaṅgavaggavaṇṇanā.

5. Saḷāyatanaṅgaṃ

1. Anāthapiṇḍikovādasuttavaṇṇanā

383. Adhimattagilānoti adhikāya mattāya maraṇassa āsannatāya ativiya gilānoti attho. Tenāha “**maraṇaseyyaṃ upagato**”ti. **Akhaṇḍaṃ akāsi** gahapatino sathhari paramapemattā. **Yattakaṃ cassāti**, “sakim vā dvikkhattuṃ vā”ti vuttaṃ yattakaṃ assa gahapatissa.

384. Osakkantīti parihāyanti. **Ottharantīti** abhibhavanti. Usmā nāma kammajatejodhātu, sā saha jīvitindriyanirodhā pariyādiyati, yāva tā āyuusmā vattanti, tāva maraṇantikā vedanā vattanteva viññāṇassa aniruddhattā. Tenāha “**yāva usmā**”tiādi.

385. Tīhi gāhehīti taṇhāmānadiṭṭhiggāhehi. **Paṭibāhituṃ** vikkhambhetuṃ. **Cakkhuṃ tīhi gāhehi na gaṇhissāmīti** mānaggāhapaṭikkhepamukhena cakkhusmiṃ aniccānupassanāti dasseti. Aniccānupassanāya hi sati appatīṭṭho mānaggāho, dukkhānupassanāya sati appatīṭṭho taṇhāggāho, anattānupassanāya sati appatīṭṭho diṭṭhiggāhoti, gāho ca nāma oḷāriko, tasmim vigatepi nikanti tiṭṭheyyāti taṃ vijahāpetukāmena, – “na ca me cakkhunissitaṃ viññāṇaṃ bhavissatī”ti vuttanti āha – “**viññāṇaṃcāpi me cakkhunissitaṃ na bhavissatī**”ti. **Sabbaṃ kāmabhavarūpanti** kāmabhūmipariyāpannaṃ sabbaṃ rūpakkhandaṃ māha – “kāmarūpabhavarūpa”nti vā pāṭho. So yutto imassa vārassa eva anavasesapañcavokārabhavapariyāpannato. Tathā hi upari catuvokārabhavo anavasesato vutto.

386. Idhalokanti ettha saṅkhāralokavisayoti adhippāyena, “**vasanaṭṭhānaṃ vā**”tiādi vuttaṃ, tañca kho paṭhamadutiyaṅgārehi idhaloko gahitoti katvā. Paṭhamadutiyaṅgārehi pana idhaloko paralokoti vibhāgena vinā pañcavokārabhavo gahito; tathā tatiyaṅgāre pañcavokārabhavo catuvokārabhavo ca gahitoti puna diṭṭhadhammasamparāyavasena taṃ vibhajivā dassetuṃ, “**na idhaloka**”ntiādi vuttaṃ. Idhalokanti ca sattasaṅkhāravaseneva gahitaṃ. Sabbampi saṅkhāravasena pariggahetvā dassetuṃ, “**yampi me diṭṭha**”ntiādi vuttanti keci. **Aparitassanattamaṃ** taṇhāparitassanāya anuppādanattamaṃ. Yassa diṭṭhadhammoti vuccati, tassa pana abhāvato, “**manussalokaṃ ṭhapetvā sesā paralokā nāmā**”ti vuttaṃ. Yesaṃ pana “idhaloka”nti iminā sattalokassapi gahaṇaṃ icchitaṃ. Tesam matena, “manussalokaṃ ṭhapetvā”ti yojanā.

387. Alliyasīti attabhāve bhogesu ca apekkhaṃ karosīti attho. **Evarūpīti** yādisī tadā dhammasenāpatinā kathitā, evarūpī. **Dhammakathā na sutapubbāti** yathākathitākārameva sandhāya paṭikkhepo, na sukhumagambhīrasuññatāpaṭisaṃyuttatāsāmaññaṃ. Tenāha “**evaṃ panā**”tiādi.

Mayā gatamaggameva anugacchasīti dānamayapuññabhāvasāmaññaṃ gahetvā vadati, na bodhisattadānabhūtaṃ dānapāramitaṃ. **Na paṭibhātīti** ruccanavasena citte na upatīṭṭhati. Tenāha “**na ruccatī**”ti. Tathā hesa vaṭṭābhīratoti. Ujumaggāvahā vipassanā bhagavatā panassa kathitapubbā.

388. Esitagunattā esiyamānagunattā ca isi, asekkhā sekkhā kalyāṇaputhujjanā ca, isīnaṃ saṅgho, tena nisevanti **isisaṅghanisevitaṃ**. Kāmaṃ tassa vihārassa gandhakuṭipāsādakūṭāgārādivasena nisīdanānipajjanāya rukkhalatādivasena bhūmisayādivasena ca anaññasādhāraṇā mahatī ramaṇiyatā attheva, sā pana gehassitabhāvena ariyānaṃ cittaṃ tathā na toseti; yathā ariyānaṃ nisevitabhāvenāti āha

– “**paṭhamagāthāya jetavanassa vaṇṇaṃ kathetvā**”ti. Tenāha bhagavā – “yattha arahanto viharanti, taṃ bhūmirāmaṇeyyaka”nti (dha. pa. 98; theragā. 991; saṃ. ni. 1.261). Apacayagāminī cetanā sattānaṃ suddhimāvahaṭṭi āha – “**kammanti maggacetanā**”ti. Catunnaṃ ariyasaccānaṃ viditakaraṇaṭṭhena kilesānaṃ vikkhambhanaṭṭhena ca **vijjā**, maggasammādiṭṭhīti āha – “**vijjāti maggapaññā**”ti. **Samādhipakkhiko dhammo** nāma sammāvāyāmasatisamādhayo. Tathā hi vijjābhāgiyo samādhipi samādhipakkhiko. Sīlaṃ tassa atthīti **silanti** āha – “**sīle patiṭṭhitassa jīvitam uttama**”nti. **Diṭṭhisāṅkappoti** sammāsāṅkappo. Tattha sammāsāṅkappassa upakārahābhāvena vijjābhāgo. Tathā hi so paññākkhandhasaṅgahitoti vuccati, yathā sammāsāṅkappo paññākkhandhena saṅgahito, evaṃ vāyāmasatiyo samādhikkhandhasaṅgahitāti. Tenāha – “**dhammoti vāyāmasatisamādhayo**”ti. “Dhammo”ti hi idha sammāsamādhi adhippeto, – “evaṃ dhammā te bhagavanto ahesu”ntiādīsu (dī. ni. 2.13; ma. ni. 3.198; saṃ. ni. 5.378) viya. **Vācākammantājīvāti** sammāvācākammantājīvaṃ maggapariyāpanā eva, te sabbe pi gahitāti. Tenāha – “**etena aṭṭhaṅgikena maggenā**”ti.

Upāyenāti yena vidhinā ariyamaggo bhāvetabbo, tena **samādhipakkhiyaṃ** vipassanādhammañceva maggadhammañca. “Ariyaṃ vo, bhikkhave, sammāsamādhiṃ desessāmi saupaniṣaṃ saparikkhāra”nti (ma. ni. 3.136) hi vacanato sammāsamādhiādayo maggadhammāpi samādhipakkhiyā. **Vicineyyāti** vīmaṇseyya, bhāveyyāti attho. **Tatthāti** hetumhi bhumnavacanā. Ariyamaggahetukā hi sattānaṃ visuddhi. Tenāha – “**tasmiṃ ariyamagge visujjhatī**”ti. **Pañcakkhandhadhammaṃ vicineyya**, pañcupādānakkhandhe vipasseyya. Tesu hi vipassiyamānesu vipassanā ukkaṃsagatā. Yadaggena dukkhasaccaṃ pariññāpaṭivedhena paṭivijjhīyati, tadaggena samudayasaccaṃ pahānapaṭivedhena nirodhasaccaṃ sacchikiriyāpaṭivedhena, maggasaccaṃ bhāvanāpaṭivedhena paṭivijjhīyati, evaṃ accantavisuddhiyā sujjhati. Tenāha – “**evaṃ tesu catūsu saccesu visujjhatī**”ti. Idhāpi nimittatthe bhumnavacanā. Saccesu vā paṭivijjhīyamānesūti vacanaseso.

Avadhāraṇavacananti vavatthāpanavacanā, avadhāraṇanti attho. **Sāriputtovāti** ca avadhāraṇaṃ tassa sāvaka bhāvatō sāvakesu sāriputtova seyyoti imamatthaṃ dīpeti. **Kilesaupasamenāti** iminā mahātherassa tādiso kilesūpasamoti dasseti, yassa sāvakassa visaye paññāya pāramippatti ahoṣi. Yadi evaṃ – “yopi pāraṅgato bhikkhu, etāvaparamo siyā”ti idaṃ kathanti? Tesam tesaṃ buddhānaṃ sāsane paññāya pāramippattasāvaka vasenetam vuttanti daṭṭhabbam. Atha vā – “natthi vimuttiyā nānatta”nti (dī. ni. 1. 3.141; vibha. mūlaṭṭi. suttantabhājanīyavaṇṇanā) vacanato sāvakehi vimuttipaññāmatam sandhāyetaṃ vuttam. Tenāha – “**pāraṅgototi nibbānaṃ gato**”tiādi. Sesam suviññeyyameva.

Anāthapiṇḍikovādasuttavaṇṇanāya līnatthappakāsanā samattā.

2. Channovādasuttavaṇṇanā

389. Channoti idaṃ tassa nāmanti āha “**evam nāmaṃ thero**”ti. Yassa pana satthārā parinibbānakāle brahmadāṇḍo āṇatto, ayaṃ so na hotīti dassento āha – “**na abhinikkhamanaṃ nikkhantatthero**”ti, lokanāthassa abhinikkhamanakāle kapilapurato nikkhantoti attho. **Gilānapucchakāti** gilānassa pucchanaṃ, gilānabhāvassa avatthaṃ sotukāmāti attho. Sasanato hiṃsanato **satthanti** āha “**jīvitahārasattha**”nti.

390. Upavajjam etassa natthīti **anupavajjam**, karajakāyaṃ katvā āyatim upattirahitanti attho. Tenāha “**anuppattika**”nti.

391. Khayavayaṃ nātvati saṅkhāragataṃ khaṇabhaṅgaṃ netvā nāṇena yāthāvato nātva. **Netam mamāti** dukkhato samanupassanā saṅkhāresu diṭṭhesu mamaṅkārahāvato. **Nesohamasmīti** aniccato samanupassanā aniccato tesu diṭṭhesu ahaṅkārahāvato. **Na meso attāti** anattato samanupassanā anattato tesu diṭṭhesu attagāhābhāvatoti āha – “**netam mama...pe... attāti samanupassāmī**”ti.

393. Tasmā puthujjanoti yasmā ariyo sabbaso pariññātavatthuko dukkhavedanaṃ adhvāsetuṃ asakkonto nāma natthi, tasmā puthujjano, kevalaṃ pana adhimānena – “nābhikaṅkhāmi jīvitam, paricijjho me satthā, nirodham disvā”ti vadatīti adhippāyo. **Idampīti** idampi, “nissitassa calita”ntiādi. Taṇhānissitabhāvena hi āyasmā channo māraṇantikaṃ vedanaṃ adhvāsetuṃ asakkonto ito cito parivattanto calati vipphandati, tasmā “nissitassa calita”ntiādi manasikātabbaṃ, tena idaṃ sabbaṃ taṃ vipphanditaṃ na bhavissatīti adhippāyo. **Kappasaddo** kālapariyāyopi hoti, na kālavisesavācako evāti āha – “**niccakappanti niccakāla**”nti. Yathā appahīnataṇhādīṭṭhiko puggalo taṃnissito allino, evaṃ tāhipi nissito amuttabhāvatoti āha – “**taṇhādīṭṭhīhi nissitassā**”ti. **Calitanti** yathā yathā asamāradhāya sammāpaṭipattiyā ādinavavasena calantaṃ pana yasmā ariyassa vinaye virūpaṃ calitaṃ nāma hoti, tasmā āha – “**vipphanditaṃ hotī**”ti. Tādise pana papañcavikkhambhanavasena cittassa calite asati bhāvanāya vīthipaṭipannatāya kilesapaṭippassaddhi eva hotīti āha “calite asati passaddhī”ti. Tena vuttaṃ – “**kilesapassaddhi nāma hotī**”ti.

Bhavantaraṃ disvā namanatthēna **nati**. Tenāha – “**natiyā asatīti bhavattāya ālayanikantipariyutthānesu asatī**”ti. **Paṭisandhivasena āgati nāmāti** paṭisandhiggahaṇavasena bhavantarato idheva āgamaṃ nāma, **cutivasena** cavanavasena ito bhavantarassa **gamaṃ nāma na hoti** āgatigatiyā asati katūpacitassapi kamma uppattiparikappavasena pavattiyā abhāvato. **Cavanavasenāti** nibbattabhavato cavanavasena **cuti**, āyatiṃ upapajjanavasena upapāto na hoti. Yato gati āgati cavaṃ upapāto na hoti, tato eva nevidha, na huraṃ, na ubhayamantarena, kāyassa gatiyā āgatiyā ca abhāvato sabbaso cutūpapāto natthi; tena na idhaloke ṭhitoti vattabbo. Na paraloke ṭhitoti vattabbo, na ubhayamantarena ṭhitoti vattabbo. Tenāha “**nayidha loke**”tiādi. Tattha idhalokaparalokavinimuttassa saṃsaraṇapadesassa abhāvato, “na ubhayamantarenā”ti vuttoti ubhayapariyāpanno na hotīti paṭikkhipanto, “**na ubhayattha hotī**”ti āha. **Ayameva antoti** yo idhaloke paraloke ca abhāvo avijjamānatā anuppajjanaṃ, ayameva sakalassa dukkhamūlassa anto pariyosānaṃ.

394. Kaṇṭhanāḷiṃ chindīti nāḷiṃ chindituṃ ārabhi. **Tasmiṃ** chindituṃ āradhakkhaṇe chedo ca vattati; **marañabhayaṅca okkami** avītarāgabhāvato, tato eva **gatinimittaṃ upaṭṭhāti**. “Sopi nāma sabrahmacārīnaṃ anupavajjantaṃ byākāritvā sarāgamaraṇaṃ marissatī”ti saṃviggamānaso **saṅkhāre** aniccādivasena **pariggaṇhanto**. **Arahattaṃ patvāti** pubbe bahuso vipassanāya udayabbayaññaṃ pāvittā tāvadeva arahattaṃ patvā arahattaphalappaccavekkhaṇānantaraṃ kaṇṭhanāḷicchedapaccayā jīvitanirodhena **samasīsi hutvā parinibbāyi**. Na hi antimabhavikassa arahattaṃ appatvā jīvitantarāyo hoti. **Therassāti** āyasmato channattherassa. **Byākaraṇenāti** hetumhi karaṇavacanaṃ “byākaraṇena hetunā”ti. Tannimittāñhi therō vīriyaṃ paggaṇhanto vipassanaṃ usukkāpeti. **Imināti**, “atthi, bhante”tiādivacanena. **Theroti** āyasmā sārīputtatthero. **Pucchati**, bhante, tathā kulasaṃsaggapasuto kathaṃ parinibbāyissatīti pucchati. “Pubbe kulesu saṃsatṭhavihārī”ti sabrahmacārīnaṃ paññātassapi **imasmī** “hontī hete sārīputtā”tiādinā bhagavato vutta-**ṭṭhāne asaṃsatṭhabhāvo pākaṭo aho**si. Pakkampi nipakkaṃ viya sammāpaṭipajjamānāpi keci asaṅñātā upaṭṭhahanti. Sesam suviññeyyameva.

Channovādasuttavaṇṇanāya līnatthappakāsanā samattā.

3. Puṇṇovādasuttavaṇṇanā

395. Anantarasutte “paṭisallānāti phalasaṃpattito”ti vuttaṃ, tattha dhammasenāpatino ariyavihārassa adhippetattā, idha pana akatakkicassa paṭisallānaṃ nāma kāyavivekoti āha – “**paṭisallānāti ekībhāvā**”ti. “Cakkhuviññeyyā rūpā”ti panettha viññeyyarūpaṃ vijānantassa dvārabhūtaṃ cakkhūti ubhayaṃ ajjhattikaṃ bāhiraṅca āyatanaṃ abhinanditādisāmaññaṇa **tañceti** ettha **taṃ**-saddena ekajjhaṃ paccāmatṭhanti āha – “**tañceti taṃ cakkhuñceva rūpañcā**”ti. Yaṃ panettha viññeyyasaddena jotitaṃ viññānaṃ taṃ sampayuttadhammāti tadubhayaṃ, “manoviññeyyā dhammā”ti padena kathitamevāti idha na gahitaṃ. Esa nayo sesesupī. **Samodhānenāti** sahāvattāhānena, cittena nandiyā taṇhāya saha pavattiyā cittasahuppattiyāti attho. Tenāha – “uppajjati nandī”ti. **Pañcakkhandhadukkhassa samodhānanti** pañcakkhandhasaṅkhātassa dukkhasaccassa paccavokāre

sahappavatti hoti. Yasmā dukkhaṃ uppajjamānaṃ channaṃ dvārānaṃyeva vasena uppajjati, tathā samudayoti, tasmā āha – “**iti chasu dvāresū**”tiādi. Kilesavaṭṭassa kammavaṭṭassa vipākavaṭṭassa ca kathitattā āha – “**vaṭṭaṃ matthakaṃ pāpetvā dasseti**”ti. **Dutiyanayeti** “santi ca kho”tiādinā vutte dutiye desanānaye. **Pāṭiyekko anusandhīti** na yathānusandhi nāpi ajjhāsayanūsandhīti adhippāyo, pucchānusandhissa pana idha sambhavo eva natthīti. **Sattasu ṭhānesūti** akkosane paribhāsane pāṇippahāre leḍḍuppahāre daṇḍappahāre satthappahāre jīvitāvoropaneti imesu sattasu. “Bhaddakā vatime”tiādinā khantipaṭisaṃyuttaṃ **sihanādaṃ nadāpetuṃ**.

396. Caṇḍāti kodhanā, tena dūsitacittatāya dutṭhāti vuttā. **Kibbisāti** pāpā. **Pharusāti** īsakampi pasādasinehābhāvena luddā. Pharusavacanaṭṭāya vā **pharusā**, tathābhūtā pana luddā nāma honti, tasmā vuttaṃ “**kakkhaḷā**”ti. **Idaṅca teti**, “hatthacchedaṃ nāsikaccheda”nti evamādiṃ idaṅca anīṭṭhaṃ karissāmāti bhayadassanena tajjessanti.

Ghaṭikamuggarenāti daṇḍānaṃ kira aggapasse ghaṭākāraṃ dassenti, tena so “ghaṭikamuggaro”ti vuccati. **Ekatodhārādinā** satthena karavālakhaggādinā. “**Indriyaṣaṃvarādīnaṃ etaṃ nāma**”nti vatvā yattha yattha indriyaṣaṃvarādayo “damo”ti vuttā, taṃ pāṭhapadesaṃ dassento “**saccenā**”tiādimāha. Manacchaṭṭhāni indriyāni dameti ṣaṃvaretīti **indriyaṣaṃvaro**, damo. Rāgādipāpadhamme dameti upasametīti **damo**, paññā. Pāṇātipātādīkammakilese dameti upasameti vikkhambhetīti **damo** uposatho. Byāpādavihesādīke dameti vinetīti **damoti** āha – “**imasmim̐ pana sutte khanti ‘damo’ti veditabbā**”ti. **Upasamoti tasseva** damassa **vevacanaṃ**, tasmā damo ca so byāpādādīnaṃ vinayanaṭṭhena tesāṃyeva upasamanaṭṭhena upasamo cāti **damūpasamo**, adhvāsanakhanti.

397. Tattha khantiyaṃ katādhikāro taṃ janapadaṃ gantvā mahājanassa avassayo hoti, tasmā tadassa apadānaṃ samudāgamato paṭṭhāya vibhāvetuṃ, “**ko panesa puṇṇo**”tiādi āradḍhaṃ. **Etthāti** etasmim̐ sunāparantaṃjanapade. **Asappāyavihāranti** bhāvanābhīyogassa na sappāyaṃ vihāraṃ.

Dve bhātaroti avibhattasāpateyyā avibhattavohārasaṃyogā. Tenāha “**tesū**”tiādi. **Janapadacārikaṃ caranto** bhaṇḍaṃ gahetvā janapadesu vikkayaṃ karonto.

“Buddhapūjaṃ dhammapūjaṃ saṅghapūjaṃ karissāmā”ti **tanninnā**. **Aṭṭhimiṅjaṃ āhacca aṭṭhāsīti**, “buddho”ti vacanaṃ assutapubbaṃ sotapathaṃ upagataṃ anappakaṃ pītisomanassaṃ samuṭṭhāpentaṃ pītisamuṭṭhānapaṇītarūpehi chavicammādīni chindītvā aṭṭhimiṅjaṃ āhacca aṭṭhāsī. **Vissajjitanti** vikkiṇanavasena viniyojitaṃ. **Kammaṭṭhānaṃ na upaṭṭhātīti** bhāvanāvīthim̐ na otarati. **Mayhaṃ asappāyoti** mayhaṃ kammaṭṭhānabhāvanāya sappāyo upakāro na hoti.

Koci caṅkamituṃ samattho nāma natthi mahatā samuddavīcisaddena upaddutattā bhāvanāmanasikārassa anabhisambhūnaṇato. Tenāha “**samuddavīciyo**”tiādi. **Soti** makuḷavīhāro.

Uttamajavena gacchamānā yathādhippettaṃ maggaṃ atikkamitvā **aññataraṃ dīpakaṃ pāpuṇi**.

Uppādikaṃ utṭhāpetvāti mahāvātamaṇḍalasaṃuṭṭhāpanena tasmim̐ padese mahāsamuddaṃ saṃkhobhento mahantaṃ uppādaṃ utṭhāpetvā.

Thero, “amhe āvajjeyyāthā”ti kaniṭṭhassa vacanaṃ saritvā antarantarā āvajjeti, tasmā tadāpi āvajjeti, taṃ sandhāya vuttaṃ – “**tasmim̐yeva khaṇe āvajjitvā**”ti. **Sammukheti** sīsaṭṭhāne. **Paṭivedesunti** pavedesuṃ, upāsakā mayanti paṭijjāniṃsu. **Imināti** iminā mayhaṃ pariccattakoṭṭhāsena. **Maṇḍalamāḷanti** muṇḍamaṇḍalamāḷasadiṣaṃ paṭissayaṃ. **Paricārakāti** avasesagāmino.

Saccabandhassa okāsaṃ karonto “**ekūnapañcasatāna**”nti āha. **Taṃ divasaṃ...pe... aggahesi**,

tena so thero paṭhamam salākaṃ gaṇhantānaṃ etadagge ṭhapito.

Vāṇijagāmaṃ gantvāti vāṇijagāmasamīpaṃ gantvā. **Buddhakolāhalanti** buddhānaṃ upagamma sattānaṃ uppajjanakutūhalaṃ.

Mahāgandhakuṭiyāmyevāti jetavanamahāvihāre mahāgandhakuṭiyāmyeva. **Paricaritabbanti** upaṭṭhātabbaṃ.

Gandhakaṭṭhānīti candanaagarusalaḷādīni sugandhakaṭṭhāni. Sesam suviññeyyamevāti.

Puṇṇovādasuttavaṇṇanāya līnatthappakāsanā samattā.

4. Nandakovādasuttavaṇṇanā

398. Saṅghassa bhāraṃ akāsi upāyena nandakattherassa ovādena vinetabbānaṃ bhikkhunīnaṃ vinayatthaṃ. Tenāha “**imaṃ panā**”tiādi. Pariyāyati pavattatīti **pariyāyo**, paṭipāṭīti āha – “**pariyāyenāti vārenā**”ti. **Assāti** nandakattherassa. **Vadāpesi** aññehi attano anokāsabhāvaṃ. **Pariyāyena ovadantīti** ovaditum samatthā bhikkhuniyo vārena ovadanti. Idaṃ pariyāyena ovadanaṃ. **Cittaṃ ekaggaṃ hoti pasīdati** pubbacariyasiddhena gāravabahumānena gehassitapemavasena.

Gotamīti mahāpajāpatigotamī. **Setṭhissāti** bārāṇasissetṭhino.

Teti paccakabuddhe. **Kim nu khoti pucchi** ciratarakālaṃ puññakiriyāya paribhāvitasantānatāya, paccakabuddhesu ca gāravabahumānatāya. **Duggatehipi sakkā kātunti** duggatehipi yathāvibhavaṃ katā kuṭi tumhākaṃ vasitum sakkāti pucchi.

Hatthakammaṃ dethāti hatthakammaṃ katvā dethāti attho. **Ānisaṃsaṃ ācikkhitvāti** “tādisānaṃ mahesīnaṃ kataṃ veyyāvaccam amhākampi dīgharattaṃ hitāya hoti. Āvāsadānañca nāma mahapphalaṃ mahānisaṃsaṃ nibbattaṭṭhāne mahāsampattiāvahaṃ bhavissatī”tiādinā ānisaṃsaṃ ācikkhitvā. **Gāḷhena ovādena tajjetvāti**, “imesu nāma karontesu tvaṃ kasmā na karosi, mama jeṭṭhakadāsassa bhariyabhāvaṃ na jānāsi. Sabbehipi kariyamānassa hatthakammaṃ akaraṇe tuyhaṃ idañcidañca dukkhaṃ āgamissatī”ti bhayena tajjetvā. **Sataṃ sataṃ hutvāti** sataṃ sataṃ dāsaputtā ekajjhaṃ hutvā ekañca ekañca kuṭim katvā adāsi. **Caṅkamanādiparivāranti** caṅkamanarattiṭṭhānadivāṭṭhānabhojanādiparivārattṭhānasahitaṃ. **Jaggitvā** upaṭṭhāpetvā. **Vissajjāpesīti** pariccajāpesi. **Parivattāpetvāti** cetāpetvā. **Ticīvarānīti** sahasagghanikāni ticīvarāni katvā adāsi. **Kālena kālanti** kāle kāle, kismiñci kāleti attho. **Rajje ṭhitassāti** sabbabhūtūpakārarajje ṭhitassa.

Nandakattheropīti tadā jeṭṭhakadāso etarahi nandakatthero pabbajitvā arahattaṃ patto. **Jeṭṭhakadāsīdhītā ...pe... aggamahesiṭṭhāne ṭhitāti** mahāpajāpatigotamim sandhāya vadati. **Ayamāyasmā nandakoti** ayameva samudāgamato āyasmā nandakatthero. **Etāva tā bhikkhuniyoti** etāvataṃ samudāgamato pañcasatā bhikkhuniyo.

399. Hetunāti ñāyena aviparītaṭṭhānāyā. Pubbabhāgā hi purimā purimā paṭipadā pacchimāya kāraṇaṃ. **Yāthāvasarasato diṭṭhanti** yathābhūtasabhāvato paccakkhaṃ viya.

401. Taṃ sabhāvaṃ taṃsabhāvanti tassā vedanāya paccayabhāvena anurūpaṃ.

403. Paṭhamataraṃyeva aniccāti tassāpi chāyāya aniccabhāvo paṭhamataraṃyeva siddho. Na hi kadāci aniccaṃ nissāya pavattaṃ kiñci niccaṃ nāma atthīti.

404. Anupahanitvāti avināsetvā. Kathaṃ pana maṃsakāyaṃ cammakāyañca avināsetvā itaresaṃ kantanaṃ hotīti byatirekamukhena dassetuṃ, “**tatthā**”tiādi vuttaṃ. **Cammaṃ aliyāpentoti** camme laggāpento cammapaṭibaddhaṃ karonto. **Cammaṃ baddhaṃ katvāti** vivarakāle na phālento cammabaddhe katvā. **Evaṃ akatvāti** evaṃ maṃsacammakāyānaṃ vināsanāṃ akatvā, vilimaṃsādivikantanena aññamaññaṃ vivecetvā. Tatha **vilimaṃsanti** cammanissitamāsaṃ, paṭicchannakilomakanti ca vadanti. **Nhārūti** sukhumanhāru. **Bandhananti** cammamāsaṃ sambandhaṃ. Tenāha – “**sabbacamme laggavilipanamaṃsamevā**”ti. **Antarakilesamevāti** antare citte jātattā sattasantānantogadhatāya abbhantarabhūtakilesameva.

405. Tajjaṃ vāyāmaṃti nidassanamattaṃ daṭṭhabbaṃ. Tathā hi purisena kuṭhārinā chejjaṃ chindite chejjaṭṭhānassa sallakkhaṇaṃ icchitabbaṃ, tassa paṭighātabhāvo icchitabbo, kāyapariḷhābhāvo icchitabbo, tassa avaṭṭhānaṃ icchitabbaṃ, kiccantare ajjupekkhaṇaṃ icchitabbaṃ, evaṃ paññāya kilese chindantassa yogīno vīriyabalena saddhiṃ sati-pīti-passaddhi-samādhi-upekkhāsambojjhaṅgaṃ icchitabbanti āha – “**evaṃ na vinā chahi...pe... sakkoti**”ti.

407. Tena kāraṇenāti yena tāsāṃ bhikkhunīnaṃ sā dhammadesanā sappāyā, āsevanamandatāya pana ajjhāsayena paripuṇṇasaṅkappā na jātāyeva; puna tathā desanāya sati āsevanabalavatāya paripuṇṇasaṅkappā bhaviṃssanti; tena kāraṇena tvampi tā bhikkhuniyo teneva ovādena ovadeyyāsīti.

415. Sabbapacchimikāti sabbāsaṃ kaniṭṭhā sotāpannā, anariyā tatha kāci natthīti attho. Tenāha – “**sesā pana...pe... khīṇāsavā cā**”ti. **Yadi evanti** akhīṇāsavāpi tādisā bhikkhunī atthi. Evaṃ sati sukkhavipassakabhāvenapi sati khīṇāsavabhāve ariyassa vināye aparipuṇṇasaṅkappāvāti adhippāyena codeti, “**kathaṃ paripuṇṇasaṅkappā**”ti? Itaro ajjhāsayapāripūriyāti kāraṇaṃ vatvā, “**yassa hī**”tiādinā tamattaṃ vivarati. **Ajjhāsayapāripūriyāti** tatha adhippāyapāripūriyā, na sabbaso guṇapāripūriyāti adhippāyo. Tenāha “**kadā nu kho**”tiādi. Etena pādakajjhānasammasitajjhānānaṃ visadisatāya puggalassa vipassanākāle pavattaajjhāsayavasena ariyamagge bojjhaṅgamaggaṅgajhānaṅgaṇaṃ visesatāti ayamatto dīpitoti veditabbo. Sesaṃ suviññeyyameva.

Nandakovādasuttavaṇṇanāya līnatthappakāsanā samattā.

5. Rāhulovādasuttavaṇṇanā

416. Vimuttiṃ paripācentīti kilesānaṃ paṭippassaddhivimuttibhūtaṃ arahattaṃ sabbaso pācenti sādheti nibbāpentīti **vimuttiṃ paripācanīyā. Dhammāti** kāraṇadhammā. Tenāha – “**visuddhikāraṇavasena**”ti, arahattasaṅkhātāya visuddhiyā sampādanavasenaṃ attho. Saddhindriyādayo visujjhamānā maggapaṭipāṭiyāva sabbaso assaddhiyādīhi cittaṃ vimocentā aggaphalavimuttiṃ sampādentī. Tesāṃ pana visuddhi bālaparivajjanena paṇḍitapayirupāsana pasādāvahadhammapaccavekkhaṇāya ca hotī. Tato idha pannarasa dhammā adhippetāti dassento, “**vuttañheta**”ntiādimāha.

Tatha **assaddhe puggaleti** saddhārahite puggale. Te hi nissāya na kadāci saddhā sambhavati, tesāṃ pana diṭṭhānugatiāpajjanena aññadattu asaddhiyameva vaḍḍhati, tasmā te paṭibhayaṃ maggo viya dūrato vajjetabbā. **Assaddhiyanti** ca saddhāya paṭipakkhabhūtā asaddheyyavattusmiṃ adhimuccanākārena pavattā saṃkilesadhammā veditabbā. **Saddhe puggaleti** saddhāsampanne puggale. Te hi nissāya saddheyyavattusmiṃ anuppannā uppajjati, uppannā bhīyyobhāvaṃ vepullaṃ āpajjati. **Saddheyyavattūti** ca buddhādīni ratanāni kammakammaphalāni ca. **Sevatoti** labbhamānaṃ saddhāsampadaṃ uppādetuṃ vaḍḍhetuñca nisevato. Sesapadāni tasseva vevacanāni. Atha vā **sevato** upasaṅkamato. **Bhajato** tesāṃ paṭipattiyāṃ bhattiṃ kubbato. **Payirupāsato** tesāṃ ovādānusāsanaṃ karaṇavasena upaṭṭhahato. **Pasādanīyasuttantā** nāma buddhādiguṇapaṭisaṃyuttā pasādāvahā sampasādanīyasuttādayo. Te hi paccavekkhato buddhādīsu anuppannā pasannā uppajjati, uppannā bhīyyobhāvaṃ vepullaṃ āpajjati. **Imehi tihākārehīti** imehi yathāvuttehi tīhi kāraṇehi.

Paṭipakkhadūrībhāvato paccekam sūpahārato ca āsevanam bhāvanam labhanti. **Saddhindriyam visujjhati** maggaphalāvahabhāvena acchati visuddhim pāpuṇāti. Iminā nayena sesapadesupi attho veditabbo.

Ayam pana viseso – **kusītetī** alase sammāpaṭipattiyam nikkhattadhure. **Āraddhavīriyeti** paggahitavīriye sammāpaṭipanne. **Sammappadhānetī** anuppannānam akusalānam anuppādanādivasena pavatte cattāro upāyappadhāne. **Paccavekkhato** paṭipattim avekkhato. Te hi paccavekkhato līnam abhibhavivā sammadeva ārambhadhātuādi anuppannānam vidhinā satisampadāya uppādāya bhīyobhāvāya samvattati. **Asamāhite** bhantamigabhantagoṇasappaṭibhāge vibbhantacitte. **Samāhite** upacārasamādhinā appanāsamādhinā ca sammadeva samāhitacitte. **Jhānavimokkheti** savitakkasavicārādijhānāni paṭhamādivimokkhe ca. Tesañhi paccavekkhaṇā uparūpari accantameva samādhānāya samvattati. **Duppaññeti** nippaññe, ariyadhammassa uggahaparipucchāsavanasammasanābhāvena sabbaso paññārahite ca. **Paññavanteti** vipassanāpaññāya ceva maggapaññāya ca samannāgate. **Gambhīraññācariyanti** gambhīram khandhāyatanadhātusaccapaṭiccasamuppādātibhedam ñāṇassa caritabbatṭhānam, yattha vā gambhīraññāssa cariyam pavattati. Tattha hi paccavekkhaṇā sammoham vidhamati, anuppannāya paññāya uppādāya bhīyobhāvāya samvattati. **Suttantakkhandheti** suttasamūhe.

Pubbe saddhindriyādīnam visuddhikāraṇāni, “vimutti-paripācanīyā dhammā”ti vuttānīti idha saddhādi ke aññe ca dhamme dassento, “**aparepi**”tiādīmāha. Tattha saddhādīnam vimutti-paripācanīyatā dassitā eva, aniccasaññādīnam pana vimutti-paripācanīyatāya vattabbameva natthi vipassanābhāvato. Tenāha – “**ime pañca nibbedhabhāgiyā saññā**”ti. **Kalyāṇamittatādayoti** kalyāṇamittatā sīlasamvaro abhisallekhakathā vīriyārambho nibbedhikā paññā ime kalyāṇamittatādayo pañca dhammā. Ayametha saṅkhepo, vitthāro pana “**meghiyasuttasamvaṇṇanāyam**” (udā. aṭṭha. 31) vuttanayena veditabbo. **Lokam volokentassāti** buddhāveneyyasattalokam buddhacakkhunā visesato olokentassa.

419. Āyasmato rāhulassa indriyānam paripakkattā saddhim paṭṭhapitapatthanā devatā udikkhamānā tiṭṭhanti, – “kadā nu kho uttari āsavānam khaye vinessatī”ti. Yadā pana satthā evam parivittakkesi, tāvadeva samānājjhāsayaṭāya sabbakālam taṅkhaṇam āgamentiyo tā devatāyo taṃ samavāyam disvā ekasmiṃ andhavanasmimīyeva sannipatitā. Upālissa gahapatino dīghanakhaparibbājakassa catusaccadhammesu dassanakiccena pavatto sotāpattimaggoti tesu suttasu (paṭi. ma. aṭṭha. 2.2.30) **paṭhamamaggo “dhammacakkhu”nti vutto**, tassa dassanattassa sātisayattā, brahmāyuno pana phalaññānāni heṭṭhimāni tīṇi sātisayānīti **brahmāyusutte**(ma. ni. 2.383 ādayo) **tīṇi phalāni “dhammacakkhu”nti vuttāni**. Idam panettha āyasmato rāhulassa maggaññānam phalaññānaṃ dassanatto sātisayo, tāhi ca devatāhi yaṃ ñāṇam adhigatam, taṃ sātisayamevāti vuttam – “**imasmim sutte cattāro maggā, cattāri ca phalāni dhammacakkhanti veditabbāni**”ti. Kiṃ pana sāvakanam saccābhisamayaññe atthi koci visesoti? Āma atthi. So ca kho pubbabhāge vuṭṭhānagāminivipassanāya pavattiyākāravisesena labheyya kāci visesamattā. Svāyamattho **abhidhamme** “no ca kho yathā diṭṭhippattassā”ti saddhāvimuttato diṭṭhippattassa kilesappahānam pati visesakittanena dīpetabbo. Kiṃ pana āyasmā rāhulo viya tā devatā sabbā ekacittā pageva cattāri phalāni adhigaṇhimsūti? Noti dassento “**tattha hī**”tiādīmāha. Kittakā pana tā devatāti āha “**tāsañca panā**”tiādi.

Rāhulovādasuttavaṇṇanāya līnatthappakāsanā samattā.

6. Chachakkasuttavaṇṇanā

420. Ādimhi kalyāṇanti ādikoṭṭhāse kalyāṇam etassāti vā ādikalyāṇo, taṃ **ādikalyāṇam**, ādikalyāṇabhāvo ca dosavigamena icchitabbo. Yañhi sabbaso vigatadosam, taṃ paripuṇṇaṅaṅameva hotīti “**niddosa**”nti vuttam. **Katvāti** ca padam, “**kalyāṇam katvā bhaddakam katvā**”ti purimapadadvayenapi yojetabbam. Desanākāro hi idha kalyāṇasaddena gahito. Tenevāha – “desetabbadhammassa kalyāṇatā dassitā hotī”ti, dutiye pana atthavikappe desetabbadhammassa

kalyānatā mukhyeneva kathitā itarassa atthāpattito. **Majjhekalyāṇaṃ pariyosānakalyāṇanti** etthāpi eseva nayo. Ayañca desanāya thomanā buddhānaṃ āciññasamāciñṇāvāti dassetuṃ, “**iti bhagavā ariyavaṃsa**”ntiādi vuttaṃ. Dhammaggaḥaṇampi desanāya thomanā evāti “**navahi padehī**”ti vuttaṃ.

Vedanā yāthāvato jānaṇaṃ, tañca maggakiccaṃ, tassa upāyo vipassanātiāha – “**sahavipassanena maggena jānitabbāni**”ti. Pariññābhisamayādikiccena nibbattiyā asammoḥato ca paṭivijjhitabbo. **Tebhūmakacittameva kathitaṃ** sammasanaṭṭhānassa adhippetattā. Esa nayo dhammāyatanādīsipi. Dhammāyatanassa vā āyatanabhāvato **bahiddhā**gahaṇaṃ, na sabbaso anajjhatabhāvato. **Vipākavedanāpaccayā javanakkhaṇe uppannataṇhāti** chattiṃsavipākavedanaṃ nissāya evaṃ assādentī anubhaveyyanti akusalajavanakkhaṇato uppannataṇhā.

422. Pāṭiyekko anusandhīti yathānusandhiādīnaṃ asambhavatoti adhippāyena vuttaṃ. **Heṭṭhāti** viññāṇaphassavedanāṇaṃ paccayāyattavuttitādassanena cakkhāyatanādīnaṃ rūpāyatanādīnañca paccayāyattavuttitā dīpitā apaccayuppannaṃ paccayābhāvato, yañca paccayāyattavuttikaṃ, taṃ aniccaṃ uppādasambhavato, yadaniccaṃ taṃ dukkhaṃ, yaṃ dukkhaṃ tadanattāti khandhapañcake ca channaṃ chakkānaṃ vasena ghanavinibbhogakaraṇena atthato anattalakkhaṇaṃ vibhāvitaṃ. Na sarūpatoti sarūpatopi taṃ vibhāvetukāmo teneva chachakkānaṃ vasena ghanavinibbhogayena byatirekato ca anvayato ca dasseto bhagavā – “cakkhu attāti yo vadeyyā”tiādīmāhāti yathānusandhikāva desanā vibhāvita. Tenāha “**heṭṭhā kathitānaṃ hī**”tiādi. Heṭṭhā pana channaṃ chakkānaṃ vasena vinibbhogadassanamatthaṃ, na anattalakkhaṇaṃ vibhāvitaṃ, idha pana sarūpato anattalakkhaṇaṃ vibhāvitaṃ adhippāyena anusandhantarabhāvajotana. Yadi pi anattabhāvo nāma catūsipi saccesu labbhateva, sabbepi hi dhammā anattā, ime panettha dvepi nayā sammasanavasena pavattāti vuttaṃ – “**dvinnaṃ saccānaṃ anattabhāvadassanatta**”nti. **Na upapajjati** upapattisaṅkhātayuttiyā na sametīti ayamettha atthoti āha “**na yujjati**”ti. Attavādinā – “nicco dhuvo sassato”ti abhimato, cakkhuñca uppādavantaṭṭāya aniccaṃ, yaṃ paccayāyattavuttitā, tasmā “cakkhu attāti yo vadeyya, taṃ na upapajjati”tiādi. Sakkāyavattu cakkhu anattā aniccabhāvato seyyathāpi ghaṭo, cakkhuṃ aniccaṃ paccayāyattavuttibhāvato seyyathāpi ghaṭo, cakkhu paccayāyattavutti uppādādisambhavato seyyathāpi ghaṭo. **Vigacchatīti** bhaṅgupattiyā sabhāvāvigamena vigacchati. Tenāha “**nirujjhati**”ti.

424. Yasmā kilesavaṭṭamūlakaṃ kammavaṭṭaṃ, kammavaṭṭamūlakañca vipākavaṭṭaṃ. Kilesuppatti ca taṇhādiggāhapubbikā, tasmā “**tiṇṇaṃ vā gāhānaṃ vasena vaṭṭaṃ dassetu**”nti āha. Yasmā pana taṇhāpakkhikā dhammā samudayasaccaṃ, cakkhādayo dukkhasaccaṃ, tasmā vuttaṃ – “**dvinnaṃ saccānaṃ vasena vaṭṭaṃ dassetu**”nti. **Taṇhāmānadiṭṭhiggāhāva veditabbā** sakkāyagāminipaṭipadāya adhippetattā. “Etaṃ mamā”tiādinā gahaṇamevettha anupassanāti āha – “**gāhattayavasena passati**”ti.

Tiṇṇaṃ gāhānaṃ paṭipakkhavasenati taṇhādiggāhapāṭipakkhabhūtānaṃ dukkhāniccānattānupassanānaṃ vasena, tāhi vā tiṇṇaṃ gāhānaṃ paṭipakkhavasena viniveṭhanavasena anuppādanavasena attho. Paṭipakkhavasena vivaṭṭaṃ dassetunti yojanā. **Sakkāyanirodhagāminī paṭipadāti** ettha nirodhadhammo sarūpeneva dassitoti āha – “**nirodho...pe... dassetu**”nti. **Paṭisedhavacanānīti** paṭikkhepavacanāni.

425. Taṇhādīnaṃ anupādiyanavacanāni **taṇhādiṭṭhivaseneva vuttāni** taṇhādiṭṭhīnaṃyeva abhinandanādivasena pavattisabbhāvato. Appahīnattho anusayatthoti āha – “**anusetīti appahīno hotī**”ti ariyamaggena hi appahīno thāmagato rāgādikilesa anusayo kāraṇalābhe sati uppajjanārahabhāvato. Yaṃ panettha vattabbaṃ, taṃ heṭṭhā vuttameva. **Vaṭṭadukkhakilesadukkhassāti** vaṭṭadukkhassa ceva kilesadukkhassa ca. Saupādisesanibbānañhi kilesadukkhassa antakaraṇaṃ, anupādisesanibbānaṃ vaṭṭadukkhassa.

426. Tesanti anusayānaṃ. **Paṭikkhepavasena**ti pajhanavasena, appavattikaraṇavasena attho.

Avijjam pajahitvāti anavasesato avijjam appavattidhammatam āpādetvā. Kāmaṃ heṭṭhimamaggañānampi avijjāpahāyini vijjā eva, taṃ pana ñāṇaṃ avijjāya anavasesappahāyakam na hoti, aggamaggañāṇe pana uppanne avijjāya lesopi nāvasissatīti tadeva avijjāya pahāyakanti āha – “**arahattamaggavijjam uppādetvā**”ti.

427. Sayameva tathāgate attano buddhānubhāvena desente satṭhi bhikkhū arahattam pattāti **anacchariyametam**, atha kiṃ acchariyanti āha “**ima**”ntiādi. **Kathentepīti** ettha **itisaddo** pakārattho, imināva pakārenāti attho. **Pattā evāti** satṭhi bhikkhū arahattam pattā evāti yojanā. **Etampi anacchariyam**, satthu sammukhā sāvakā samudāgamā mahābhīṇṇā pabhinnapaṭisambhidā tathā tathā sappāṭihāriyam dhammam desentīti. Tenāha – “**mahābhīṇṇappattā hi te sāvakā**”ti.

Mahāmaṇḍapeti lohapāsādassa purato eva mahābhikkhusannipāto jātoti tesam pahonakavasena kate mahati sāṇimaṇḍapeti vadanti. **Tesupi thānesūti** tesu yathāvuttamahāmaṇḍapādīsū thānesu. Mahāthero atthīti padaṃ ānetvā sambandhitabbaṃ. Devattherassa guṇe sutvā pasannamānaso mahāthero, tathāpi vatthasampattiyā pasīditvā “**tvam pana nhāpehi**”ti āha.

Heṭṭhāpāsādeti ca kalyāṇiyamahāvihāre uposathāgāre heṭṭhāpāsāde ekadā uparipāsāde ekadā, kathesīti. Cūlanāgassa tathā mahatī parisā devatānubhāvena abhiññāpādanam ahosīti keci. Thero pana mahiddhiko ahosi, tasmā tāva mahatiṃ parisam abhiññāpesīti apare.

Tato tatoti tassam tassam disāyam. **Ekovāti** ekacco eva, na bahuso, katipayāva puthujjanā ahesunti attho. Sesam heṭṭhā vuttanayattā suviññeyyameva.

Chachakkasuttavaṇṇanāya līnatthappakāsanā samattā.

7. Mahāsaḷāyatanikasuttavaṇṇanā

428. Mahantāni saḷāyatanāni adhikicca pavattatā **mahāsaḷāyatanikam**, mahantatā ca tesam mahantaṃ lokasannivāsam abhibyāpetvā thitattā ayoniso gayhamānānam mahato anattāya saṃvattanato, yoniso gayhamānānam mahato atthāya hitāya sukhāya saṃvattanato ca daṭṭhabbā. **Jotakanti** bodhakam.

429. Sikhāppattāya vipassanāya jānanampi yathābhūtajānanameva maggena jānassa āsannakāraṇabhāvatoti āha – “**sahavipassanena maggena ajānanto**”ti. **Vuddhiṃ gacchantīti** paccayasamodhānena bhavayonigatiṭṭhisattāvāsapāliyā aparāparam parivuddhiṃ gacchanti. Evambhūta paguṇabhāvamāpādītā samathavipassanādhammā viya suṭṭhutarāṃ vasībhāvam pāpitā jhānābhīṇṇā viya ca vasībhūtā hutvā uparūpari brūhentīti āha – “**vasībhāvam gacchantīti**”ti. Tathā hi te kadāci bhavapatthanāya anuppādītāyapi appahīnabhāvenevassā tiṭṭhanti. Akusalā dhammāva yebhuyyena dassanāyatanena vināsadassanato pavattanti parivaḍḍhanti ca. **Pañcadvārikadarathāti** pañcadvārikajavanasaḷāyatanā akusaladarathā. Evaṃ **manodvārikadarathā** veditabbā. **Santāpāti** darathehi balavanto sampayuttadhammānam nissayassa ca santāpanakarā. Pariḷāhāti tatopi balavatarā tesameva paridahanakarā.

430. Pañcadvārikasukham, na kāyappasādasannissitasukhameva. **Manodvārikasukhanti** manodvārikacittasannissitasukham, na yaṃ kiñci cetāsikasukham tassa kāyikasukhaggahaṇeneva gahitattā. **Pañcadvārikajavanena samāpajjanam vā vuṭṭhānam vā natthīti** idaṃ manodvārikajavanena tassa sambhavam dassetuṃ, maggassa vasena vuttam, na pana tappasaṅgasaṅkānivattanattham. Viññattimattampi janetuṃ asamattham samāpajjanassa katham paccayo hoti, buddhānam pana bhagavantānam hotīti ce? Tathāpi tassa āsannaṭṭhāne pañcadvārikacittappavattiyā asambhavo eva tādisassa pubbābhogassa tasmim kāle asambhavato. Eteneva yā kesañci ariyadhamme akovidānam ghaṭasabhāvādīsū buddhitulyakāritāpatticodanā; sā paṭikkhittāti daṭṭhabbā

taṃtampurimābhogavasena tena tena pañcadvārikābhiniyatamanoviññāṇassa parato pavattamānamanoviññāṇena tasmim̐ tasmim̐ atthe vaṇṇasaṅghānādivisesassa vinicchinitabbato. **Uppanamattakameva hotīti** pañcadvārikajavanam̐ tādisam̐ kiñci atthanicchayakiccaṃ kātuṃ na sakkoti, kevalam̐ uppannamattameva hoti. **Ayanti** “ādīnavānupassino”tiādīnā vuttā.

431. Kusalacitta...pe... bhūtassāti vuṭṭhānagāminivipassanāsahagatakusalacittassa sampayuttacetosukhasamaṅgībhūtassa. **Pubbasuddhikāti** magguppattito, vipassanārambhatopi vā pubbeva suddhā. Tenāha – “**ādito paṭṭhāya parisuddhāva hontī**”ti. **Sabbatthakakārāpakaṅgānti** sīlavisodhanassa cittasamādhānassa vipassanābhīyogassa maggena pahātabbakilesapahānassāti sabbassapi maggasambhārakiccassa kārāpakaṅgāni. **Aṭṭhaṅgiko vāti** paṭhamajjhāniko vā aṭṭhaṅgiko, dutiyajjhāniko vā **sattaṅgiko hoti**.

Imameva suttapadesam̐ gahetvāti, “yā tathābhūtassa diṭṭhī”tiādīnā sammādiṭṭhiādīnam̐ pañcannam̐yeva tasmim̐ thāne gahitattā lokuttaramaggo pañcaṅgikoti vadati. **Soti** tathā vadanto vitaṇḍavādī. **Anantaravacanenevāti**, “yā tathābhūtassa diṭṭhī”tiādivacanassa, “evamassāya”ntiādīnā anantaravacanena. **Paṭisedhitabboti** paṭikkhipitabbo. “Ariyo aṭṭhaṅgiko maggo”ti hi idam̐ vacanam̐ ariyamaggassa pañcaṅgikabhāvam̐ ujukameva paṭikkhipati. Yadi evam̐ “yā tathābhūtassa diṭṭhī”tiādīnā tattha pañcannam̐ eva aṅgānam̐ gahaṇam̐ kimatthiyanti āha “**uttari cā**”tiādi. **Sammāvācam̐ bhāveti** ariyamaggasamaṅgī. Tenāha “**micchāvācam̐ pajahati**”ti. Yasmiñhi khaṇe sammāvācā bhāvanāpāripūriṃ gacchati, tasmim̐yeva micchāvācā pajahiyatīti. **Saheva viratiyā pūrenti** samucchadaviratiyā vinā dukkhapariññādīnam̐ asambhavato. **Ādito paṭṭhāya parisuddhāneva vaṭṭanti** parisuddhe sīle paṭiṭṭhitasseva bhāvanāya ijjhanato. Yathāvuttamattham̐ ganthantarenapi samatthetum̐, “**subhaddasuttepi cā**”tiādi vuttam̐. **Anekesu suttasatesu aṭṭhaṅgikova maggo āgato**, na pañcaṅgikoti adhippāyo.

Sammāsati maggakkhaṇe kāyānupassanādicatukiccasādhikā hotīti taṃ catubbidham̐ katvā dassento, “**maggasampayuttāva cattāro satipaṭṭhānā**”ti āha. Na catumaggasampayuttatāvasena. Esa nayo **sammappadhānādisupi**. Aññamaññānativattamānā yuganaddhā yuttā viya ariyamaggayuganaddhā aññamaññam̐ paṭibaddhāti yuganaddhā. Tenāha – “**ekakkhaṇikayuganandhā**”ti ariyamaggakkhaṇe eva hi samathavipassanā ekakkhaṇikā hutvā samadhuram̐ vattanti. Tenevāha “**ete hi**”tiādi. **Aññasmim̐ khaṇe samāpatti, aññasmim̐ vipassanāti** idam̐ tesam̐ tattha tattha kiccato adhikabhāvam̐ sandhāya vuttam̐, na aññathā. Na hi paññārahitā samāpatti, samādhirahitā ca vipassanā atthi. **Ariyamagge pana ekakkhaṇikā** samadhuratāya ekarasabhāvenāti attho. **Phalavimuttīti** arahattaphalavimutti. Sesam̐ heṭṭhā vuttanayattā suviññeyyameva.

Mahāsaḷāyatanikasuttavaṇṇanāya līnatthappakāsanā samattā.

8. Nagaravindeyyasuttavaṇṇanā

435. Samavisamaṃ carantīti kāyasamādiṃ samaññeva, kāyavisamādiṃ visamaññeva caranti karonti paṭipajjanti. Taṃ pana samavisamaṃ aññamaññam̐ viruddhattā visadisattā na ekasmim̐ kāle sambhavatīti āha – “**kālena samaṃ kālena visama**”nti. **Samacariyampi hi etanti** pubbe samacariyāya jotitattā vuttam̐.

437. Ākaronti adhippetamattham̐ ñāpenti pabodhentīti **ākārā**, ñāpakakāraṇanti āha – “**ke ākārāti kāni kāraṇāni**”ti. **Anubuddhiyoti** anumānaññāni. Tañhi yathādiṭṭhamattham̐ diṭṭhabhāvena anveti anugacchatīti “anvayā”ti vuccati. **Haritaṇḍacampakavanādivasenāti** haritakambalādisadisatiṇḍādivasena vitthāritakanakapaṭādisadivikasitacampakavanādivasena. Ādisaddena cettha kīcakaveṇusaddamadhurasaphalāphalavasena saddarasānam̐ atthibhāvo veditabboti. Campakavaseneva pana phassagandhānampi atthibhāvo vuttoti. Tenāha – “**rūpādayo pañca kāmagaṇā atthi**”ti. “**Itthirūpādīni sandhāyetam̐ kathita**”nti vatvā indriyabaddhā vā hontu rūpādayo

anindriyabaddhā vā, sabbepi cete kilesuppatinimittatāya kāmagaṇā evāti codanaṃ sandhāya visabhāgitthigatā rūpādayo savisesaṃ kilesuppatinimittanti dassento, “**tāni hī**”tiādīmāha.

Tattha **tānī** rūpādīni. **Hi**-saddo hetuattho. Tena yathāvuttamatthaṃ samattheti, “yasmā purisassa cittaṃ pariyādāya tiṭṭhanti, tasmā itthirūpādīni sandhāya etaṃ kathita”nti. **Purisassa cittaṃ** purisassa catubhūmakam kusalacittaṃ **pariyādāya** gahetvā antomuṭṭhigataṃ viya katvā. “Hatthikāyaṃ pariyādiyitvā”tiādīsu (saṃ. nī. 1.126) hi gahaṇaṃ pariyādānaṃ nāma, “aniccasaññā bhāvitā bahulīkatā sabbaṃ kāmārāgaṃ pariyādiyatī”tiādīsu (saṃ. nī. 3.102) khepanaṃ pariyādānaṃ, idha ubhayampi vaṭṭati. Idāni yathāvuttamatthaṃ sutteneva sādhetuṃ, “**yathāhā**”tiādi vuttaṃ. Tattha “**nāhaṃ, bhikkhave**”tiādīsu **na**-kāro paṭisedhattho. **Ahanti** bhagavā attānaṃ niddisati. **Bhikkhaveli** bhikkhū ālapati. **Aññanti** idāni vattabbaṃ itthirūpato aññaṃ. **Ekarūpampī**ti ekampi rūpaṃ. **Samanupassāmī**ti aññaṃ samaṇupassanā adhippetā, heṭṭhā **na**-kāraṃ ānetvā sambandhitabbaṃ. Ayañhettha attho – “ahaṃ, bhikkhave, sabbaññutaññaṇena sabbaso olokeno aññaṃ ekarūpampi na samanupassāmī”ti. **Yaṃ evaṃ purisassa cittaṃ pariyādāya tiṭṭhatī**ti yaṃ rūpaṃ rūpaṅkarukassa purisassa sabbampi kusalacittaṃ pavattituṃ appadānavasena pariyādiyitvā gahetvā khepetvā ca tiṭṭhati. **Yathayidaṃ itthirūpanti** itthiyā rūpakāyaṃ. **Rūpasaddo** khandhādiṇekathavācako, idha pana itthiyā catusamuṭṭhāne rūpāyatane vaṇṇadhātuyāṃ daṭṭhabbo. “Itthirūpaṃ, bhikkhave, purisassa cittaṃ pariyādāya tiṭṭhati”ti idaṃ purimasseva daḥhikaraṇatthaṃ vuttaṃ. Purimaṃ “yathayidaṃ, bhikkhave, itthirūpa”nti idaṃ opammavasena vuttaṃ, idaṃ pariyādānabhāve nidassananti daṭṭhabbaṃ. Sesam suviññeyyameva.

Nagaravindeyyasuttavaṇṇanāya līnatthappakāsanā samattā.

9. Piṇḍapātapārisuddhisuttavaṇṇanā

438. Dhammasenāpatino paṭisallīyanassa adhippetattā, upari ca pāliyaṃ, “suññatāvihārena kho ahaṃ, bhante, etarahi bahulaṃ viharāmī”ti (ma. nī. 3.438) vuttattā “**paṭisallānāti phalasamāpattito**”ti āha.

Vippasannānīti visesato pasannāni. **Okāsavasenā**ti indriyānaṃ patiṭṭhitokāsavasena. Nanu tāni indriyāni sabhāvato vippasannāni hontīti? Saccam honti. Na hidaṃ tādisaṃ pasannataṃ sandhāya vuttaṃ, idaṃ pana santapañītasamāpattisamuṭṭhitānaṃ paccupaṭṭhitānaṃ cittajarūpānaṃ vasena sesatisantatirūpānaṃ seṭṭhataraṃ pañītabhāvāpattiṃ sandhāya vuttaṃ. **Phalasamāpattitoti** suññatānupassanāvasena samāpannaphalasamāpattito. Mahantānaṃ buddhādīnaṃ purisānaṃ viharo **mahāpurisavihāro**. Tenāha – “**buddha...pe... viharo**”ti. **Vihārato paṭṭhāyāti** parikkhitte ca viharo parikkhepato paṭṭhāya, aparikkhitte ca parikkheparahaṭṭhānato paṭṭhāya. Keci pana “vihārabhantarato paṭṭhāyā”ti vadanti. **Yāva gāmassa indakhilāti** gāmassa abhantarindakhīlo. **Gehapaṭipāṭiyācaritvāti** piṇḍāya caritvā. **Yāva nagaradvārena nikkhamanāti** nagaradvārena yāva nikkhamanapadesā. **Yāva viharāti** yāva viharabbhantarā. **Paṭikkantamaggoti** nivattanamaggo. Ārammaṇe paṭihaññānākārena pavattamānampi paṭighasampayuttaṃ citte paṭihanantaṃ viya pavattatīti āha – “**citte paṭihaññānakilesajāta**”nti. **Divasañca rattiñca anusikkhantena**ti etaṃyeva rāgādippahāyiniṃ sammāpaṭipattiṃ divā ca rattiñca anu anu sikkhantena uparūpari vaḍḍhentena.

440. Pahīnā nu kho me pañca kāmagaṇāti ettha kāmagaṇappahānaṃ nāma tappaṭibaddhachandarāgappahānaṃ. Tathā hi vuttaṃ – “tiṭṭhanti citrāni tatheva loke, athettha dhīrā vinayanti chanda”nti. **Ekabhikkhussa paccavekkhaṇā nānāti** ekasseva bhikkhuno, “pahīnā nu kho me pañca kāmagaṇā”tiādīnā pāliyaṃ āgatā nānāpaccavekkhaṇā honti. **Nānābhikkhūnanti** visuṃ visuṃ anekesaṃ bhikkhūnaṃ. **Paccavekkhaṇā nānāti** vuttanānāpaccavekkhaṇā. Idāni tameva sañkhepatō vuttamatthaṃ vitthārato dassetuṃ, “**katha**”ntiādi vuttaṃ. Tattha “**paccavekkhatī**”ti vuttaṃ, kathaṃ pana paccavekkhatīti āha “**pahīnā nu kho**”tiādi. **Vīriyaṃ paggayhāti** catubbidhasammappadhānavīriyaṃ ārabhitvā vipassanaṃ vaḍḍhitvā. Maggānantaraṃ anāgāmiphalaṃ

patvāti vacanaseso. **Phalānantaram magganti** tasmim anāgāmimagge t̥hito phalāsamāpattito vuṭṭhāya aggamaggatthāya vipassanam ārabhitvā tasmimyeva āsane na cireneva vipassanam ussukkāpetvā arahattamaggam gaṇhanto nirodhadhammānuppattiyā vipassanāparivāsābhāvato phalānantaram maggappatto nāma hotīti katvā.

Tato vuṭṭhāyāti maggānantaraphalato vuṭṭhāya. Maggānantarato hi vuṭṭhito maggato vuṭṭhito viya hotīti tathā vuttam. “**Phalānantaram magga**”nti ettha phalam anantaram etassāti phalānantaram. “Phalānantaram magga”nti padadvayenapi anāgāmimaggaphalāni ceva vadatīti evamettha attho daṭṭhabbo. **Nīvaraṇādīsupi eseve nayo**ti ettha, “pahīnā nu kho me pañca nīvaraṇā”tiādīnā yojanā veditabbā. **Etesanti** ettha etesam nīvaraṇapañcupādānakkhandhasatipaṭṭhānādīnam. **Pahānādīnīti** pahānapariññābhāvanāsacchikiriyā. **Nānāpaccavekkhaṇā hotīti** tā paccavekkhaṇā nānāti adhippāyo. **Etāsu pana paccavekkhaṇāsūti** etāsu kāmagaṇapaccavekkhaṇādīsū dvādasasu paccavekkhaṇāsū. **Ekam paccavekkhaṇam paccavekkhati** dvādasasu navesu ekeneva kiccasiddhito. **Añño** bhikkhu. **Ekanti aññaṃ paccavekkhati.** Aññattho hi ayam **ekasaddo** “ittheke”tiādīsū (ma. ni. 3.21, 27) viyāti. Nānābhikkhūnam pana ekā paccavekkhaṇā, nānābhikkhūnam nānāpaccavekkhaṇāti evam catukkapaccavekkhaṇampi ettha sambhavati. Imassa pana dvayassa vasena abhisamayo natthīti tadubhayam aṭṭhakathāyam na uddhaṭam. Sesam suviññeyyameva.

Piṇḍapātapārisuddhisuttavaṇṇanāya līnatthappakāsanā samattā.

10. Indriyabhāvanāsuttavaṇṇanā

453. Evaṃnāmaketi “gajāṅgalā”ti evam itthilingavasena laddhanāmake majjhimapadesassa mariyādaṭṭhānabhūte nigame. **Suvelu nāma** nicalarukkhoto vadanti. Tato aññaṃ evāti pana adhippāyena “**ekā rukkhajātī**”ti vuttam. Cakkhusotānam yathāsakavisayato nīvaraṇam dāmanam indriyabhāvanā, tañca kho sabbaso adassanena asāvanenāti āha – “**cakkhunā rūpaṃ na passati, sotena saddam na suṇāti**”ti. Sati hi dassane savane ca tāni adantāni abhāvītānevāti adhippāyo. Cakkhusotāni ca asampattaggāhitāya durakkhitānīti brāhmaṇo tesamyeva visayaggahaṇam paṭikkhipi. **Asadisāyāti** aññatitthiyasamāyehi asādhāraṇāya. **Ālayanti** kathetukāmatākāranti attho.

454. Vipassanupekkhāti āradhāvīpassakassa vipassanāññānena lakkhaṇattaye diṭṭhe saṅkhārānam aniccabhāvādivicinane majjhatabhūtā vipassanāsaṅkhātā upekkhā. Sā pana yasmā bhāvanāvisesappattiyā heṭṭhimehi vipassanāvārehi santā ceva paṇītā ca, pageva cakkhuvīññāṇādīsahagatāhi upekkhāhi, tasmā āha – “**esā santā esā paṇītā**”ti. **Atappikāti** santapaṇītābhāvanārasavasena tittim na janeti. Tenevāha –

“Suññāgāram pavīṭṭhassa, santacittassa bhikkhuno;
Amānusi ratī hoti, sammā dhammam vipassato”ti. (dha. pa. 373);

Itīti evam vakkhamānākārenāti attho. **Ayam bhikkhūti** ayam āradhāvīpassako bhikkhūti yojanā. **Cakkhudvāre rūpārammaṇamhīti** cakkhudvāre āpāthagate rūpārammaṇe. **Manāpanti** manāpabhāvena pavattanakam. **Majjhatte manāpāmanāpanti** iṭṭhamajjhatte manāpabhāvena amanāpabhāvena ca pavattanakam manāpāmanāpam nāmāti. Tenāha (“neva manāpam na amanāpa”nti). Iminā manāpabhāvo gahito, “neva manāpa”nti iminā manāpabhāvo majjhatto ca ubhayam ekadesato labbhatīti, “**manāpāmanāpa**”nti vuttam. Evam ārammaṇe labbhamānavisesavasena tadārammaṇassa cittassa pākātikam pavattīākāram dassetvā idāni tappaṭisedhena ariyassa vinaye anuttaram indriyabhāvanam dassetum, “**tassa rajjitum vā**”tiādī vuttam. Tatrāyam yojanā – tassa cittam iṭṭhe ārammaṇe rajjitum vā aniṭṭhe ārammaṇe dussitum vā majjhatte ārammaṇe muyhitum vā. **Adatvāti** nisedhetvā. **Pariggahetvāti** pariṇānanavasena ñānena gahetvā ñātātīraṇapahānapariññāhi pariṇānitvā. **Vipassanam majjhatte t̥hapetīti** anukkamena vipassanupekkham nibbattetvā tam saṅkhārupekkham pāpetvā t̥hapeti. **Cakkhumāti** na pasādacakkhuno

atthitāmattojotanam; atha kho tassa atisayena atthitājotanam, “sīlavā” tiādīsu viyāti āha –
“cakkhumāti sampannacakkhu visuddhanetto”ti.

456. Īsakam poṇeti majjhe uccaṃ hutvā īsakam poṇe, na antantena vanke. Tenāha – “rathīsā viya utṭhahitvā thite”ti.

461. Paṭikūleti amanuññe ārammaṇe. Appaṭikūlasaṅṅīti na paṭikūlasaṅṅī. Taṃ pana appaṭikūlasaṅṅitaṃ dassetuṃ, **“mettāpharaṇena vā”**tiādi vuttaṃ. Tattha paṭikūle anīṭṭhe vatthusmiṃ sattasaṅṅite mettāpharaṇena vā dhātuso upasaṃhārena vā saṅkhārasaṅṅite pana dhātuso upasaṃhārena vāti yojetabbam. **Appaṭikūlasaṅṅī viharatīti** hitesitāya dhammasabhāvacintanāya ca nappaṭikūlasaṅṅī hutvā iriyāpathavihārena viharati. **Appaṭikūle** iṭṭhe vatthusmiṃ sattasaṅṅite kesādiasucikoṭṭhāsamattamevāti **asubhapharaṇena vāti** asubhato manasikāravasena. Idam rūpārūpamattaṃ aniccaṃ saṅkhatanti **aniccato upasaṃhārena vā**. Tato eva, “dukkhaṃ vipariṇāmadhamma”nti manasi karonto **paṭikūlasaṅṅī viharati. Sesapadesūti**, “paṭikūle ca appaṭikūle cā”tiādīnā āgatesu sesesu dvīsu padesu. Tattha hi iṭṭhāniṭṭhavatthūni ekajjhaṃ gahetvā vuttaṃ yathā sattānaṃ paṭhamam paṭikūlato upaṭṭhitameva pacchā gahaṇākāravasena avatthantarena vā appaṭikūlato upaṭṭhāti. Yaṅca appaṭikūlato upaṭṭhitameva pacchā paṭikūlato upaṭṭhāti, tadubhayepi khīṇāsavo sace ākaṅkhati, vuttanayena appaṭikūlasaṅṅī vihareyya paṭikūlasaṅṅī vāti.

Tadubhayaṃ abhinivajjetvāti sabhāvato bhāvanānubhāvato ca upaṭṭhitam ārammaṇam paṭikūlasabhāvam appaṭikūlasabhāvam vāti taṃ ubhayaṃ pahāya aggahetvā. Sabbasmim vatthusmim pana, **“majjhatto hutvā viharitukāmo kim karotī”**ti, vatvā tattha paṭipajjanavidhiṃ dassento, **“iṭṭhāniṭṭhesu...pe... domanassito hotī”**ti āha. Idāni yathāvuttamatthaṃ paṭisambhidāmaggapāliya vibhāvetuṃ, **“vuttaṃ heta”**ntiādimāha. Tassattho heṭṭhā vuttanayo eva. **Satoti** sativepullappattiyā satimā. **Sampajānoti** paññāvepullappattiyā sampajānakārī. **Cakkhunā rūpaṃ disvāti** kāraṇavasena cakkhūti laddhavohārena rūpadassanasamatthena cakkhuvīññāṇena, cakkhunā vā karaṇabhūtena rūpaṃ passivā. **Neva sumano hoti** gehassitasomanassapaṭikkhepena nekkhammapakkhikāya kiriyāsomanassavedanāya.

Imesu cāti “aññathā ca panānanda, ariyassa vinaye anuttarā indriyabhāvanā hotī”tiādīnā (ma. ni. 3.453), – “kathañcānanda, sekho hoti paṭipado”tiādīnā (ma. ni. 3.460); – “kathañcānanda, ariyo hoti bhāvitindriyo”tiādīnā (ma. ni. 3.461) ca āgatesu tividhesu navesu. **Manāpaṃ amanāpaṃ manāpāmanāpanti** ettha **manāpaggahaṇena** somanassayuttakusalākusalānaṃ, **amanāpaggahaṇena** domanassayuttaakusalānaṃ, **manāpāmanāpaggahaṇena** tabbidhurupekkhāyuttānaṃ saṅgahitattā paṭhamanaye **“saṃkilesam vaṭṭati, nikkilesam vaṭṭati”**ti vuttaṃ. Paṭhamanaye hi puthujjanassa adhippetattā saṃkilesakilesavippayuttampi yujjati. Dutīyanaye pana **“so...pe... aḍḍiyati”**tiādivacanato **“paṭhamam saṃkilesam vaṭṭati”**ti vuttaṃ. Sekkhassa adhippetattā cassa appahīnakilesavasena, **“saṃkilesampi vaṭṭati”**ti vuttaṃ. Tatiyanaye arahato adhippetattā, **“tatiyam nikkilesameva vaṭṭati”**ti vuttaṃ. Sekkhavāre pana “cakkhumā puriso”tiādīkā upamā ekameva atthaṃ nāpetuṃ āha. Tasmā cakkhudvārassa uppanne rāgādike vikkhambhetvā vipassanupekkhāya paṭiṭṭhānaṃ ariyā indriyabhāvanāti. Paṭhamanayo vipassakavasena āgato, dutīyo sekkhassa vasena, paṭhamadutiyo ca sekkhaputhujjanānaṃ mūlakammaṭṭhānavasena, tatiyo khīṇāsavassa ariyavīhāravasena āgato. Paṭhamanaye ca puthujjanassa vasena, dutīyanaye sekkhassa vasena kusalam vuttaṃ, tatiyanaye asekkhassa vasena kiriyābyākatam vuttanti ayam viseso veditabbo.

Papañcasūdaniyā majjhimanikāyaṭṭhakathāya

Indriyabhāvanāsuttavaṇṇanāya līnatthappakāsanā samattā.

Niṭṭhitā ca saḷāyatanavaggavaṇṇanā.

Uparipaṇṇāsaṭṭhikā samattā.